

宿雨清幾句

荆陽晨帝城

聖年人樂業

境上踏歌行



# 全唐詩

## 二十二

中华古典精华文库

# 全唐 诗

(第二十二部)

## 第八百零一卷

### 卷 801\_1 【采桑】

郎大家宋氏

春来南雁归，日去西蚕远。妾思纷何极，客游殊未返。

### 卷 801\_2 【宛转歌二首（一作崔液诗）】

郎大家宋氏

风已清，月朗琴复鸣。掩抑非千态，殷勤是一声。  
歌宛转，宛转和且长。愿为双鸿鹄，比翼共翱翔。

日已暮，长檐鸟声度。此时望君君不来，此时思君君不顾。  
歌宛转，宛转那能异栖宿。愿为形与影，出入恒相逐。

卷 801\_3 【长相思】

郎大家宋氏

长相思，久离别。关山阻，风烟绝。台上镜文销，  
袖中书字灭。不见君形影，何曾有欢悦。

卷 801\_4 【朝云引】

郎大家宋氏

巴西巫峡指巴东，朝云触石上朝空。巫山巫峡高何已，  
行雨行云一时起。一时起，三春暮。若言来，且就阳台路。

卷 801\_5 【宿巫山寄远人】

梁琼

巫山云，巫山雨，朝云暮雨无定所。南峰忽暗北峰晴，  
空里仙人语笑声。曾侍荆王枕席处，直至如今如有灵。  
春风澹澹白云闲，惊湍流水响千山。一夜此中对明月，  
忆得此中与君别。感物情怀如旧时，君今渺渺在天涯。  
晓看襟上泪流处，点点血痕犹在衣。

卷 801\_6 【昭君怨】

梁琼

自古无和亲，贻灾到妾身。朔风嘶去马，汉月出行轮。  
衣薄狼山雪，妆成虏塞春。回看父母国，生死毕胡尘。

卷 801\_7 【铜雀台】

梁琼

歌扇向陵开，齐行奠玉杯。舞时飞燕列，梦里片云来。  
月色空余恨，松声莫更哀。谁怜未死妾，掩袂下铜台。

卷 801\_8 【远意】

梁琼

脉脉长摠气，微微不离心。叩头从此去，烦恼阿谁禁。

卷 801\_9 【句】

梁琼

玉枕空流别后泪，罗衣已尽去时香。

卷 801\_10 【有所思】

刘云

朝亦有所思，暮亦有所思。登楼望君处，蔼蔼萧关道。  
掩泪向浮云，谁知妾怀抱。玉井苍苔春院深，  
桐花落尽无人扫。

卷 801\_11 【婕妤怨】

刘云

君恩不可见，妾岂如秋扇。秋扇尚有时，妾身永微贱。  
莫言朝花不复落，娇容几夺昭阳殿。

卷 801\_12 【望月（一作张瑛诗）】

刘云

天汉凉秋夜，澄澄一镜明。山空猿屡啸，林静鹤频惊。

卷 801\_13 【古意】

崔萱

灼灼叶中花，夏萎春又芳。明明天上月，蟾缺圆复光。  
未如君子情，朝违夕已忘。玉帐枕犹暖，纨扇思何长。  
愿因西南风，吹上玳瑁床。娇眠锦衾里，展转双鸳鸯。

卷 801\_14 【叙别】

崔萱

碧池漾漾春水绿，中有佳禽暮栖宿。  
愿持此意永相贻，只虑君情中反覆。

卷 801\_15 【豪家子】

崔萱

年少家藏累代金，红楼尽日醉沈沈。  
马非躩蹠宁酬价，人不婵娟肯动心。

卷 801\_16 【句】

崔萱

岂知一只凤钗价，沽得数村蜗舍人。

卷 801\_17 【赠所思】

崔仲容

所居幸接邻，相见不相亲。一似云间月，何殊镜里人。  
丹诚空有梦，肠断不禁春。愿作梁间燕，无由变此身。

卷 801\_18 【戏赠】

崔仲容

暂到昆仑未得归，阮郎何事教人非。  
如今身佩上清箬，莫遣落花沾羽衣。

卷 801\_19 【赠歌姬】

崔仲容

水剪双眸雾剪衣，当筵一曲媚春辉。潇湘夜瑟怨犹在，  
巫峡晓云愁不稀。皓齿乍分寒玉细，黛眉轻蹙远山微。  
渭城朝雨休重唱，满眼阳关客未归。

卷 801\_20 【句】

崔仲容

妾心合君心，一似影随形。

梁燕无情困，双栖语此时。

不觉红颜去，空嗟白发生。

桐花落尽春又尽，紫塞征人犹未归。

卷 801\_21 【独夜词】

崔公远

晴天霜落寒风急，锦帐罗帏羞更入。  
秦筝不复续断弦，回身掩泪挑灯立。

卷 801\_22 【句】

崔公远

看花独不语，裴回双泪潜。  
君今远戍在何处，遣妾秋来长望天。

卷 801\_23 【春词二首】

张琰

垂柳鸣黄鹂，关关若求友。春情不可耐，愁杀闺中妇。  
日暮登高楼，谁怜小垂手。

· 全唐诗 ·

---

昨日桃花飞，今朝梨花吐。春色能几时，那堪此愁绪。  
荡子游不归，春来泪如雨。

卷 801\_24 【铜雀台（一作张瑛诗）】

张瑛

君王冥漠不可见，铜雀歌舞空裴回。西陵嘒嘒悲宿鸟，  
高殿沈沈闭青苔。青苔无人迹，红粉空自哀。

卷 801\_25 【句】

张瑛

年年人自老，日日水东流。

庭芳自摇落，永念结中肠。

卷 801\_26 【哭夫二首（时以夫征戎轻入被擒音信断绝作诗哭之）】

裴羽仙

风卷平沙日欲曛，狼烟遥认犬羊群。  
李陵一战无归日，望断胡天哭塞云。

良人平昔逐蕃浑，力战轻行出塞门。  
从此不归成万古，空留贱妾怨黄昏。

卷 801\_27 【长门怨】

刘媛

雨滴梧桐秋夜长，愁心和雨到昭阳。  
泪痕不学君恩断，拭却千行更万行。

学画蛾眉独出群，当时人道便承恩。  
经年不见君王面，花落黄昏空掩门。

卷 801\_28 【送远】

刘媛

闻道瞿塘滟滪堆，青山流水近阳台。  
知君此去无还日，妾亦随波不复回。

卷 801\_29 【句】

刘媛

春风报梅柳，一夜发南枝。

傍人那得知心事，一面残妆空泪痕。

卷 801\_30 【怀良人（一云朱滔时河北士人作）】

葛鸦儿

蓬鬓荆钗世所稀，布裙犹是嫁时衣。  
胡麻好种无人种，正是归时不见归。

卷 801\_31 【会仙诗】

葛鸦儿

彩凤摇摇下翠微，烟光漠漠遍芳枝。  
玉窗仙会何人见，唯有春风仔细知。

烟霞迢迢接蓬莱，宫殿参差晓日开。  
群玉山前人别处，紫鸾飞起望仙台。

卷 801\_32 【暗别离】

刘瑶

槐花结子桐叶焦，单飞越鸟啼青霄。翠轩辗云轻遥遥，

燕脂泪迸红线条。瑶草歇芳心耿耿，玉佩无声画屏冷。  
朱弦暗断不见人，风动花枝月中影。青鸾脉脉西飞去，  
海阔天高不知处。

卷 801\_33 【古意曲】

刘瑶

梧桐阶下月团团，洞房如水秋夜阑。吴刀剪破机头锦，  
茱萸花坠相思枕。绿窗寂寞背灯时，暗数寒更不成寝。

卷 801\_34 【阖闾城怀古】

刘瑶

五湖春水接遥天，国破君亡不记年。  
唯有妖娥曾舞处，古台寂寞起愁烟。

卷 801\_35 【峡中即事】

廉氏

清秋三峡此中去，鸣鸟孤猿不可闻。一道水声多乱石，  
四时天色少晴云。日暮泛舟溪淑口，那堪夜永思氛氲。

卷 801\_36 【怀远】

廉氏

隙尘何微微，朝夕通其辉。人生各有托，君去独不归。  
青林有蝉响，赤日无鸟飞。裴回东南望，双泪空沾衣。

卷 801\_37 【寄征人】

廉氏

凄凄北风吹鸳被，娟娟西月生蛾眉。  
谁知独夜相思处，泪滴寒塘蕙草时。

卷 801\_38 【寄远】

田娥

忆昨会诗酒，终日相逢迎。今来成故事，岁月令人惊。  
泪流红粉薄，风度罗衣轻。难为子猷志，虚负文君名。

卷 801\_39 【携手曲】

田娥

携手共惜芳菲节，莺啼锦花满城阙。行乐逶迤念容色，  
色衰只恐君恩歇。凤笙龙管白日阴，盈亏自感青天月。

卷 801\_40 【长信宫】

田娥

团圆手中扇，昔为君所持。今日君弃捐，复值秋风时。  
悲将入箠笥，自叹知何为。

卷 801\_41 【句】

田娥

春至偏无兴，秋来只是眠。

卷 801\_42 【中秋夜泊武昌】

刘淑柔

两城相对峙，一水向东流。今夜素娥月，何年黄鹤楼。  
悠悠兰棹晚，渺渺荻花秋。无奈柔肠断，关山总是愁。

卷 801\_43 【赋荆门】

薛琼

黄鸟翻红树，青牛卧绿苔。渚宫歌舞地，轻雾锁楼台。

卷 801\_44 【戏赠】

赵虚舟

砌下梧桐叶正齐，花繁雨后压枝低。  
报道不须鸦鸟乱，他家自有凤凰栖。

卷 801\_45 【铜雀台（一作张琰诗）】

张琰

君王冥漠不可见，铜雀歌舞空裴回。西陵啧啧悲宿鸟，  
高殿沈沈闭青苔。青苔无人迹，红粉空相哀。

卷 801\_46 【望月（一作刘云诗）】

张琰

天汉凉秋夜，澄澄一镜明。山空猿屡啸，林静鹤频惊。

卷 801\_47 【答外（佐转戍边不归寄书与妻作诗答之）】

长孙佐转妻

征人去年戍边水，夜得边书字盈纸。挥刀就烛裁红绮，  
结作同心答千里。君寄边书书莫绝，妾答同心心自结。  
同心再解不心离，离字频看字愁灭。结成一衣和泪封，  
封书只在怀袖中。莫如书故字难久，愿学同心长可同。

卷 801\_48 【早梅（一作观梅女仙诗）】

刘元载妻

南枝向暖北枝寒，一种春风有两般。  
凭仗高楼莫吹笛，大家留取倚阑干。

卷 801\_49 【明月堂】

刘氏妇

蝉鬓惊秋华发新，可怜红隙尽埃尘。  
西山一梦何年觉，明月堂前不见人。

玉钩风急响丁东，回首西山似梦中。  
明月堂前人不到，庭梧一夜老秋风。

卷 801\_50 【和潘雍】

葛氏女

九天天远瑞烟浓，驾鹤骖鸾意已同。  
从此三山山上月，琼花开处照春风。

卷 801\_51 【寄诗】

李主簿姬

去时盟约与心违，秋日离家春不归。  
应是维扬风景好，恣情欢笑到芳菲。

卷 801\_52 【题兴元明珠亭】

京兆女子

寂寥满地落花红，独有离人万恨中。  
回首池塘更无语，手弹珠泪与春风。

卷 801\_53 【题玉泉溪】

湘驿女子

红叶醉秋色，碧溪弹夜弦。佳期不可再，风雨杳如年。

卷 801\_54 【题三乡诗】

若耶溪女子

昔逐良人西入关，良人身歿妾空还。  
谢娘卫女不相待，为雨为云归此山。

卷 801\_55 【题沙鹿门】

谁氏女

昔逐良人去上京，良人身歿妾东征。  
同来不得同归去，永负朝云暮雨情。

卷 801\_56 【联句（光、威、哀，姊妹三人，失其姓）】

朱楼影直日当午，玉树阴低月已三。--光  
膩粉暗销银镂合，错刀闲剪泥金衫。--威  
绣床怕引乌龙吠，锦字愁教青鸟衔。--哀  
百味炼来怜益母，千花开处斗宜男。--光  
鸳鸯有伴谁能羨，鸚鵡无言我自惭。--威  
浪喜游蜂飞扑扑，佯惊孤燕语喃喃。--哀  
偏怜爱数螭螻掌，每忆光抽玳瑁簪。--光  
烟洞几年悲尚在，星桥一夕帐空含。--威

· 全唐诗 ·

---

窗前时节羞虚掷，世上风流笑苦谖。 -- 袁  
独结香绡偷饷送，暗垂檀袖学通参。 -- 光  
须知化石心难定，却是为云分易甘。 -- 威  
看见风光零落尽，弦声犹逐望江南。 -- 袁

卷 801\_57 【联句】

越溪杨女

珠帘半床月，青竹满林风。 -- 杨女  
何事今宵景，无人解语同。 -- 谢生

卷 801\_58 【春日】

越溪杨女

春尽花随尽，其如自是花。 -- 杨女  
从来说花意，不过此容华。 -- 谢生  
明月易亏轮，好花难恋春。 -- 杨女  
常将花月恨，并作可怜人。 -- 谢生

· 全唐诗 ·

---

卷 801\_59 【句】

曹文姬

凿开天外长生地，炼出人间不死丹。

## 第八百零二卷

### 卷 802\_1 【燕子楼三首】

关盼盼

楼上残灯伴晓霜，独眠人起合欢床。  
相思一夜情多少，地角天涯不是长。

北邙松柏锁愁烟，燕子楼中思悄然。  
自埋剑履歌尘散，红袖香销一十年。

适看鸿雁岳阳回，又睹玄禽逼社来。  
瑶瑟玉箫无意绪，任从蛛网任从灰。

### 卷 802\_2 【和白公诗】

关盼盼

自守空楼敛恨眉，形同春后牡丹枝。  
舍人不会人深意，讶道泉台不去随。

卷 802\_3 【句】

关盼盼

儿童不识冲天物，漫把青泥污雪毫。

卷 802\_4 【啰唖曲六首】

刘采春

不喜秦淮水，生憎江上船。载儿夫婿去，经岁又经年。

借问东园柳，枯来得几年。自无枝叶分，莫恐太阳偏。

莫作商人妇，金钗当卜钱。朝朝江口望，错认几人船。

那年离别日，只道住桐庐。桐庐人不见，今得广州书。

昨日胜今日，今年老去年。黄河清有日，白发黑无缘。

昨日北风寒，牵船浦里安。潮来打缆断，摇橹始知难。

卷 802\_5 【寄欧阳詹】

太原妓

自从别后减容光，半是思郎半恨郎。  
欲识旧来云髻样，为奴开取缕金箱。

卷 802\_6 【续韦蟾句】

武昌妓

悲莫悲兮生别离，登山临水送将归。  
武昌无限新栽柳，不见杨花扑面飞。

卷 802\_7 【献李观察】

舞柘枝女

湘江舞罢忽成悲，便脱蛮靴出绛帷。  
谁是蔡邕琴酒客，魏公怀旧嫁文姬。

卷 802\_8 【赠卢夫人】

常浩

佳人惜颜色，恐逐芳菲歇。日暮出画堂，下阶拜新月。  
拜月如有词，傍人那得知。归来投玉枕，始觉泪痕垂。

卷 802\_9 【寄远】

常浩

年年二月时，十年期别期。春风不知信，轩盖独迟迟。  
今日无端卷珠箔，始见庭花复零落。人心一往不复归，  
岁月来时未尝错。可怜荧荧玉镜台，尘飞幂幂几时开。  
却念容华非昔好，画眉犹自待君来。

卷 802\_10 【送武补阙】

襄阳妓

弄珠滩上欲销魂，独把离怀寄酒尊。  
无限烟花不留意，忍教芳草怨王孙。

卷 802\_11 【题孙棨诗后】

王福娘

苦把文章邀劝人，吟看好个语言新。  
虽然不及相如赋，也直黄金一二斤。

卷 802\_12 【问棨诗】

王福娘

日日悲伤未有图，懒将心事话凡夫。  
非同覆水应收得，只问仙郎有意无？

卷 802\_13 【谢棨（一作掷红巾诗）】

王福娘

久赋恩情欲托身，已将心事再三陈。  
泥莲既没移栽分，今日分离莫恨人。

卷 802\_14 【答小子弟诗】

杨莱儿

黄口小儿口莫凭，逡巡看取第三名。  
孝廉持水添瓶子，莫向街头乱碗鸣。

卷 802\_15 【和赵光远题壁】

杨莱儿

长者车尘每到门，长卿非慕卓王孙。定知羽翼难随风，  
却喜波涛未化鲲。娇别翠钿黏去袂，醉歌金雀碎残尊。  
多情多病年应促，早办名香为返魂。

卷 802\_16 【贻郑昌图】

楚儿

应是前生有宿冤，不期今世恶因缘。蛾眉欲碎巨灵掌，  
鸡肋难胜子路拳。只拟吓人传铁券，未应教我踏青莲。  
曲江昨日君相遇，当下遭他数十鞭。

卷 802\_17 【和李标】

王苏苏

怪得犬惊鸡乱飞，羸童瘦马老麻衣。  
阿谁乱引闲人到，留住青蚨热赶归。

卷 802\_18 【临终召客（一作病中见落花）】

颜令宾

气余三五喘，花剩两三枝。话别一尊酒，相邀无后期。

卷 802\_19 【寄故人（一作杜羔妻诗）】

张窈窕

淡淡春风花落时，不堪愁望更相思。  
无金可买长门赋，有恨空吟团扇诗。

卷 802\_20 【上成都在事（一作成都即事）】

张窈窕

昨日卖衣裳，今日卖衣裳。衣裳浑卖尽，羞见嫁时箱。  
有卖愁仍缓，无时心转伤。故园有虏隔，何处事蚕桑。

卷 802\_21 【春思二首】

张窈窕

门前梅柳烂春辉，闭妾深闺绣舞衣。  
双燕不知肠欲断，衔泥故故傍人飞。

井上梧桐是妾移，夜来花发最高枝。  
若教不向深闺种，春过门前争得知。

卷 802\_22 【西江行】

张窈窕

日下西塞山，南来洞庭客。晴空白鸟度，万里秋光碧。

卷 802\_23 【赠所思】

张窈窕

与君咫尺长离别，遣妾容华为谁说。  
夕望层城眼欲穿，晓临明镜肠堪绝。

卷 802\_24 【句】

张窈窕

满院花飞人不到，含情欲语燕双双。

卷 802\_25 【赠裴思谦（一作裴思谦诗）】

平康妓

银釭斜背解明珰，小语偷声贺玉郎。  
从此不知兰麝贵，夜来新惹桂枝香。

卷 802\_26 【迷香洞】

史凤

洞口飞琼佩羽霓，香风飘拂使人迷。  
自从邂逅芙蓉帐，不数桃花流水溪。

卷 802\_27 【神鸡枕】

史凤

枕绘鸳鸯久与栖，新裁雾縠斗神鸡。  
与郎酣梦浑忘晓，鸡亦留连不肯啼。

卷 802\_28 【锁莲灯】

史凤

灯锁莲花花照曩，翠钿同醉楚台巍。  
残灰剔罢携纤手，也胜金莲送辙回。

卷 802\_29 【蛟红被】

史凤

肱被当年仅御寒，青楼惯染血猩纨。  
牙床舒卷鸂鶒共，正值窗棂月一团。

卷 802\_30 【传香枕】

史凤

韩寿香从何处传，枕边芳馥恋婵娟。  
休疑粉黛加铍刃，玉女旃檀侍佛前。

卷 802\_31 【八分羊】

史凤

党家风味足肥羊，绮阁留人漫较量。  
万羊亦是男儿事，莫学狂夫取次尝。

卷 802\_32 【闭门羹】

史凤

一豆聊供游冶郎，去时忙唤锁仓琅。  
入门独慕相如侣，欲拨瑶琴弹凤凰。

卷 802\_33 【突厥三台】

盛小丛

雁门山上雁初飞，马邑阑中马正肥。  
日旰山西逢驿使，殷勤南北送征衣。

卷 802\_34 【云鬓】

赵鸾鸾

扰扰香云湿未干，鸦领蝉翼腻光寒。  
侧边斜插黄金凤，妆罢夫君带笑看。

卷 802\_35 【柳眉】

赵鸾鸾

弯弯柳叶愁边戏，湛湛菱花照处频。  
妩媚不烦螺子黛，春山画出自精神。

卷 802\_36 【檀口】

赵鸾鸾

衔杯微动樱桃颗，咳唾轻飘茉莉香。  
曾见白家樊素口，瓠犀颗颗缀榴芳。

卷 802\_37 【纤指】

赵鸾鸾

纤纤软玉削春葱，长在香罗翠袖中。  
昨日琵琶弦索上，分明满甲染猩红。

卷 802\_38 【酥乳】

赵鸾鸾

粉香汗湿瑶琴轸，春逗酥融绵雨膏。  
浴罢檀郎扞弄处，灵华凉沁紫葡萄。

卷 802\_39 【献陈陶处士】

莲花妓

莲花为号玉为腮，珍重尚书遣妾来。  
处士不生巫峡梦，虚劳神女下阳台。

卷 802\_40 【叙怀】

徐月英

为失三从泣泪频，此身何用处人伦。  
虽然日逐笙歌乐，长羨荆钗与布裙。

卷 802\_41 【送人】

徐月英

惆怅人间万事违，两人同去一人归。  
生憎平望亭前水，忍照鸳鸯相背飞。

卷 802\_42 【句】

徐月英

枕前泪与阶前雨，隔个窗儿滴到明。

卷 802\_43 【句】

韩襄客

连理枝前同设誓，丁香树下共论心。

## 第八百零三卷

### 卷 803\_1 【酬人雨后玩竹】

薛涛

南天春雨时，那鉴雪霜姿。众类亦云茂，虚心能自持。  
多留晋贤醉，早伴舜妃悲。晚岁君能赏，苍苍劲节奇。

### 卷 803\_2 【春望词四首】

薛涛

花开不同赏，花落不同悲。欲问相思处，花开花落时。  
揽草结同心，将以遗知音。春愁正断绝，春鸟复哀吟。  
风花日将老，佳期犹渺渺。不结同心人，空结同心草。  
那堪花满枝，翻作两相思。玉箸垂朝镜，春风知不知。

卷 803\_3 【宣上人见示与诸公唱和】

薛涛

许厕高斋唱，涓泉定不如。可怜谿记室，流水满禅居。

卷 803\_4 【风】

薛涛

猎蕙微风远，飘弦唳一声。林梢鸣淅沥，松径夜凄清。

卷 803\_5 【月】

薛涛

魄依钩样小，扇逐汉机团。细影将圆质，人间几处看。

卷 803\_6 【蝉】

薛涛

露涤清音远，风吹数叶齐。声声似相接，各在一枝栖。

卷 803\_7 【池上双鸟】

薛涛

双栖绿池上，朝暮共飞还。更忆将雏日，同心莲叶间。

卷 803\_8 【鸳鸯草】

薛涛

绿英满香砌，两两鸳鸯小。但娱春日长，不管秋风早。

卷 803\_9 【罚赴边有怀上韦令公二首（一作陈情上韦令公）】

薛涛

闻道边城苦，今来到始知。羞将门下曲，唱与陇头儿。

黠虏犹违命，烽烟直北愁。却教严谴妾，不敢向松州。

卷 803\_10 【咏八十一颗】

薛涛

色比丹霞朝日，形如合浦笱簞。  
开时九九如数，见处双双颡颥。

卷 803\_11 【谒巫山庙】

薛涛

乱猿啼处访高唐，路入烟霞草木香。山色未能忘宋玉，  
水声犹是哭襄王。朝朝夜夜阳台下，为雨为云楚国亡。  
惆怅庙前多少柳，春来空斗画眉长。

卷 803\_12 【牡丹】

薛涛

去春零落暮春时，泪湿红笺怨别离。常恐便同巫峡散，  
因何重有武陵期。传情每向馨香得，不语还应彼此知。  
只欲栏边安枕席，夜深闲共说相思。

卷 803\_13 【贼平后上高相公】

薛涛

惊看天地白荒荒，瞥见青山旧夕阳。  
始信大威能照映，由来日月借生光。

卷 803\_14 【送友人】

薛涛

水国蒹葭夜有霜，月寒山色共苍苍。  
谁言千里自今夕，离梦杳如关塞长。

卷 803\_15 【听僧吹芦管】

薛涛

晓蝉鸣咽暮莺愁，言语殷勤十指头。  
罢阅梵书聊一弄，散随金磬泥清秋。

卷 803\_16 【酬郭简州寄柑子】

薛涛

霜规不让黄金色，圆质仍含御史香。  
何处同声情最异，临川太守谢家郎。

卷 803\_17 【上川主武元衡相国二首】

薛涛

落日重城夕雾收，玳筵雕俎荐诸侯。  
因令朗月当庭燎，不使珠帘下玉钩。

东阁移尊绮席陈，貂簪龙节更宜春。  
军城画角三声歇，云幕初垂红烛新。

卷 803\_18 【忆荔枝】

薛涛

传闻象郡隔南荒，绛实丰肌不可忘。  
近有青衣连楚水，素浆还得类琼浆。

卷 803\_19 【斛石山晓望寄吕侍御】

薛涛

曦轮初转照仙扃，旋擘烟岚上窅冥。  
不得玄晖同指点，天涯苍翠漫青青。

卷 803\_20 【寄词】

薛涛

菌阁芝楼杳霭中，霞开深见玉皇宫。  
紫阳天上神仙客，称在人间立世功。

卷 803\_21 【斛石山书事】

薛涛

王家山水画图中，意思都卢粉墨容。  
今日忽登虚境望，步摇冠翠一千峰。

卷 803\_22 【送姚员外】

薛涛

万条江柳早秋枝，裊地翻风色未衰。  
欲折尔来将赠别，莫教烟月两乡悲。

卷 803\_23 【酬祝十三秀才】

薛涛

浩思蓝山玉彩寒，冰囊敲碎楚金盘。  
诗家利器驰声久，何用春闈榜下看。

卷 803\_24 【别李郎中】

薛涛

花落梧桐凤别凰，想登秦岭更凄凉。  
安仁纵有诗将赋，一半音词杂悼亡。

卷 803\_25 【送扶炼师】

薛涛

锦浦归舟巫峡云，绿波迢递雨纷纷。  
山阴妙术人传久，也说将鹅与右军。

卷 803\_26 【摩诃池赠萧中丞】

薛涛

昔以多能佐碧油，今朝同泛旧仙舟。  
凄凉逝水颓波远，惟有碑泉咽不流。

卷 803\_27 【乡思（用前韵）】

薛涛

峨嵋山水下如油，怜我心同不系舟。  
何日片帆离锦浦，棹声齐唱发中流。

卷 803\_28 【和李书记席上见赠】

薛涛

翩翩射策东堂秀，岂复相逢豁寸心。  
借问风光为谁丽，万条丝柳翠烟深。

卷 803\_29 【棠梨花和李太尉】

薛涛

吴均蕙圃移嘉木，正及东溪春雨时。  
日晚莺啼何所为，浅深红腻压繁枝。

卷 803\_30 【酬文使君】

薛涛

延英晓拜汉恩新，五马腾骧九陌尘。  
今日谢庭飞白雪，巴歌不复旧阳春。

卷 803\_31 【酬吴随君】

薛涛

支公别墅接花扃，买得前山总未经。  
入户剡溪云水满，高斋咫尺蹑青冥。

卷 803\_32 【酬李校书】

薛涛

才游象外身虽远，学茂区中事易闻。  
自顾漳滨多病后，空瞻逸翮舞青云。

卷 803\_33 【赋凌云寺二首】

薛涛

闻说凌云寺里苔，风高日近绝纤埃。  
横云点染芙蓉壁，似待诗人宝月来。

闻说凌云寺里花，飞空绕磴逐江斜。  
有时锁得嫦娥镜，镂出瑶台五色霞。

卷 803\_34 【九日遇雨二首】

薛涛

万里惊飙朔气深，江城萧索昼阴阴。  
谁怜不得登山去，可惜寒芳色似金。

茱萸秋节佳期阻，金菊寒花满院香。  
神女欲来知有意，先令云雨暗池塘。

卷 803\_35 【酬雍秀才贻巴峡图】

薛涛

千叠云峰万顷湖，白波分去绕荆吴。  
感君识我枕流意，重示瞿塘峡口图。

卷 803\_36 【上王尚书】

薛涛

碧玉双幢白玉郎，初辞天帝下扶桑。  
手持云篆题新榜，十万人家春日长。

卷 803\_37 【和刘宾客玉蕊】

薛涛

琼枝的皤露珊珊，欲折如披玉彩寒。  
闲拂朱房何所似，缘山偏映月轮残。

卷 803\_38 【江边】

薛涛

西风忽报雁双双，人世心形两自降。  
不为鱼肠有真诀，谁能梦梦立清江。

卷 803\_39 【送卢员外】

薛涛

玉垒山前风雪夜，锦官城外别离魂。  
信陵公子如相问，长向夷门感旧恩。

卷 803\_40 【题竹郎庙】

薛涛

竹郎庙前多古木，夕阳沈沈山更绿。

何处江村有笛声，声声尽是迎郎曲。

卷 803\_41 【赠苏十三中丞】

薛涛

洛阳陌上埋轮气，欲逐秋空击隼飞。  
今日芝泥检征诏，别须台外振霜威。

卷 803\_42 【和郭员外题万里桥】

薛涛

万里桥头独越吟，知凭文字写愁心。  
细侯风韵兼前事，不止为舟也作霖。

卷 803\_43 【送郑眉州】

薛涛

雨暗眉山江水流，离人掩袂立高楼。  
双旌千骑骈东陌，独有罗敷望上头。

卷 803\_44 【江亭饯别（一作宴饯，一作江亭宴）】

薛涛

绿沼红泥物象幽，范汪兼倅李并州。  
离亭急管四更后，不见公车心独愁。

卷 803\_45 【海棠溪】

薛涛

春教风景驻仙霞，水面鱼身总带花。  
人世不思灵卉异，竞将红缣染轻沙。

卷 803\_46 【采莲舟】

薛涛

风前一叶压荷蕖，解报新秋又得鱼。  
兔走乌驰人语静，满溪红袂棹歌初。

卷 803\_47 【菱苻沼】

薛涛

水苻斜牵绿藻浮，柳丝和叶卧清流。  
何时得向溪头赏，旋摘菱花旋泛舟。

卷 803\_48 【金灯花】

薛涛

阑边不见囊囊叶，砌下惟翻艳艳丛。  
细视欲将何物比，晓霞初叠赤城宫。

卷 803\_49 【春郊游眺寄孙处士二首】

薛涛

低头久立向蔷薇，爱似零陵香惹衣。  
何事碧溪孙处士，百劳东去燕西飞。

今朝纵目玩芳菲，夹缬笼裙绣地衣。  
满袖满头兼手把，教人识是看花归。

卷 803\_50 【酬杨供奉法师见招】

薛涛

远水长流洁复清，雪窗高卧与云平。  
不嫌袁室无烟火，惟笑商山有姓名。

卷 803\_51 【试新服裁制初成三首】

薛涛

紫阳宫里赐红绡，仙雾朦胧隔海遥。  
霜兔毳寒冰茧净，嫦娥笑指织星桥。

九气分为九色霞，五灵仙驭五云车。  
春风因过东君舍，偷样人间染百花。

长裾本是上清仪，曾逐群仙把玉芝。  
每到宫中歌舞会，折腰齐唱步虚词。

卷 803\_52 【寄张元夫】

薛涛

前溪独立后溪行，鹭识朱衣自不惊。

借问人间愁寂意，伯牙弦绝已无声。

卷 803\_53 【酬辛员外折花见遗】

薛涛

青鸟东飞正落梅，衔花满口下瑶台。  
一枝为授殷勤意，把向风前旋旋开。

卷 803\_54 【赠远二首】

薛涛

芙蓉新落蜀山秋，锦字开缄到是愁。  
闺阁不知戎马事，月高还上望夫楼。

扰弱新蒲叶又齐，春深花落塞前溪。  
知君未转秦关骑，月照千门掩袖啼。

卷 803\_55 【秋泉】

薛涛

冷色初澄一带烟，幽声遥泻十丝弦。

长来枕上牵情思，不使愁人半夜眠。

卷 803\_56 【柳絮】

薛涛

二月杨花轻复微，春风摇荡惹人衣。  
他家本是无情物，一任南飞又北飞。

卷 803\_57 【续嘉陵驿诗献武相国】

薛涛

蜀门西更上青天，强为公歌蜀国弦。  
卓氏长卿称士女，锦江玉垒献山川。

卷 803\_58 【段相国游武担寺，病不能从题寄】

薛涛

消瘦翻堪见令公，落花无那恨东风。  
侬心犹道青春在，羞看飞蓬石镜中。

卷 803\_59 【赠段校书】

薛涛

公子翩翩说校书，玉弓金勒紫绡裾。  
玄成莫便骄名誉，文采风流定不如。

卷 803\_60 【十离诗·犬离主】

薛涛

驯扰朱门四五年，毛香足净主人怜。  
无端咬著亲情客，不得红丝毯上眠。

卷 803\_61 【十离诗·笔离手】

薛涛

越管宣毫始称情，红笺纸上撒花琼。  
都缘用久锋头尽，不得羲之手里擎。

卷 803\_62 【十离诗·马离厩】

薛涛

雪耳红毛浅碧蹄，追风曾到日东西。  
为惊玉貌郎君坠，不得华轩更一嘶。

卷 803\_63 【十离诗·鹦鹉离笼】

薛涛

陇西独自一孤身，飞去飞来上锦茵。  
都缘出语无方便，不得笼中再唤人。

卷 803\_64 【十离诗·燕离巢】

薛涛

出入朱门未忍抛，主人常爱语交交。  
衔泥秽污珊瑚枕，不得梁间更垒巢。

卷 803\_65 【十离诗·珠离掌】

薛涛

皎洁圆明内外通，清光似照水晶宫。  
只缘一点玷相秽，不得终宵在掌中。

卷 803\_66 【十离诗·鱼离池】

薛涛

跳跃深池四五秋，常摇朱尾弄纶钩。  
无端摆断芙蓉朵，不得清波更一游。

卷 803\_67 【十离诗·鹰离鞞】

薛涛

爪利如锋眼似铃，平原捉兔称高情。  
无端窜向青云外，不得君王臂上擎。

卷 803\_68 【十离诗·竹离亭】

薛涛

翁郁新栽四五行，常将劲节负秋霜。  
为缘春笋钻墙破，不得垂阴覆玉堂。

卷 803\_69 【十离诗·镜离台】

薛涛

铸泻黄金镜始开，初生三五月裴回。  
为遭无限尘蒙蔽，不得华堂上玉台。

卷 803\_70 【酬杜舍人】

薛涛

双鱼底事到侬家，扑手新诗片片霞。  
唱到白蘋洲畔曲，芙蓉空老蜀江花。

卷 803\_71 【筹边楼】

薛涛

平临云鸟八窗秋，壮压西川四十州。  
诸将莫贪羌族马，最高层处见边头。

卷 803\_72 【赠韦校书】

薛涛

芸香误比荆山玉，那似登科甲乙年。  
澹地鲜风将绮思，飘花散蕊媚青天。

卷 803\_73 【江月楼】

薛涛

秋风仿佛吴江冷，鸥路参差夕阳影。垂虹纳纳卧谯门，  
雉堞眈眈俯渔艇。阳安小儿拍手笑，使君幻出江南景。

卷 803\_74 【西岩】

薛涛

凭阑却忆骑鲸客，把酒临风手自招。  
细雨声中停去马，夕阳影里乱鸣蝸。

卷 803\_75 【罚赴边上武相公二首】

薛涛

萤在荒芜月在天，萤飞岂到月轮边。  
重光万里应相照，目断云霄信不传。

按辔岭头寒复寒，微风细雨彻心肝。  
但得放儿归舍去，山水屏风永不看。

卷 803\_76 【寄旧诗与元微之】

薛涛

诗篇调态人皆有，细腻风光我独知。月下咏花怜暗澹，  
雨朝题柳为欹垂。长教碧玉藏深处，总向红笺写自随。  
老大不能收拾得，与君开似教男儿。

· 全唐诗 ·

---

卷 803\_77 【句】

薛涛

枝迎南北鸟，叶送往来风。

## 第八百零四卷

### 卷 804\_1 【赋得江边柳（一作临江树）】

鱼玄机

翠色连荒岸，烟姿入远楼。影铺秋水面，花落钓人头。  
根老藏鱼窟，枝低系客舟。萧萧风雨夜，惊梦复添愁。

### 卷 804\_2 【赠邻女（一作寄李亿员外）】

鱼玄机

羞日遮罗袖，愁春懒起妆。易求无价宝，难得有心郎。  
枕上潜垂泪，花间暗断肠。自能窥宋玉，何必恨王昌。

### 卷 804\_3 【寄国香】

鱼玄机

旦夕醉吟身，相思又此春。雨中寄书使，窗下断肠人。

· 全唐诗 ·

---

山卷珠帘看，愁随芳草新。别来清宴上，几度落梁尘。

卷 804\_4 【寄题炼师】

鱼玄机

霞彩剪为衣，添香出绣帏。芙蓉花叶，山水帔稀。  
驻履闻莺语，开笼放鹤飞。高堂春睡觉，暮雨正霏霏。

卷 804\_5 【寄刘尚书】

鱼玄机

八坐镇雄军，歌谣满路新。汾川三月雨，晋水百花春。  
圉圉长空锁，干戈久覆尘。儒僧观子夜，羁客醉红茵。  
笔砚行随手，诗书坐绕身。小材多顾盼，得作食鱼人。

卷 804\_6 【浣纱庙】

鱼玄机

吴越相谋计策多，浣纱神女已相和。一双笑靥才回面，  
十万精兵尽倒戈。范蠡功成身隐遁，伍胥谏死国消磨。  
只今诸暨长江畔，空有青山号苎萝。

卷 804\_7 【卖残牡丹】

鱼玄机

临风兴叹落花频，芳意潜消又一春。应为价高人不问，  
却缘香甚蝶难亲。红英只称生宫里，翠叶那堪染路尘。  
及至移根上林苑，王孙方恨买无因。

卷 804\_8 【酬李学士寄簟】

鱼玄机

珍簟新铺翡翠楼，泓澄玉水记方流。  
唯应云扇情相似，同向银床恨早秋。

卷 804\_9 【情书（一作书情寄李子安）】

鱼玄机

饮冰食檠志无功，晋水壶关在梦中。秦镜欲分愁堕鹊，  
舜琴将弄怨飞鸿。井边桐叶鸣秋雨，窗下银灯暗晓风。  
书信茫茫何处问，持竿尽日碧江空。

卷 804\_10 【闺怨】

鱼玄机

靡芜盈手泣斜晖，闻道邻家夫婿归。别日南鸿才北去，  
今朝北雁又南飞。春来秋去相思在，秋去春来信息稀。  
扃闭朱门人不到，砧声何事透罗帏。

卷 804\_11 【春情寄子安】

鱼玄机

山路欹斜石磴危，不愁行苦苦相思。冰销远涧怜清韵，  
雪远寒峰想玉姿。莫听凡歌春病酒，休招闲客夜贪棋。  
如松匪石盟长在，比翼连襟会肯迟。虽恨独行冬尽日，  
终期相见月圆时。别君何物堪持赠，泪落晴光一首诗。

卷 804\_12 【打球作】

鱼玄机

坚圆净滑一星流，月杖争敲未拟休。无滞碍时从拨弄，  
有遮栏处任钩留。不辞宛转长随手，却恐相将不到头。  
毕竟入门应始了，愿君争取最前筹。

卷 804\_13 【暮春有感寄友人】

鱼玄机

莺语惊残梦，轻妆改泪容。竹阴初月薄，江静晚烟浓。  
湿髻衔泥燕，香须采蕊蜂。独怜无限思，吟罢亚枝松。

卷 804\_14 【冬夜寄温飞卿】

鱼玄机

苦思搜诗灯下吟，不眠长夜怕寒衾。满庭木叶愁风起，  
透幌纱窗惜月沈。疏散未闲终遂愿，盛衰空见本来心。  
幽栖莫定梧桐处，暮雀啾啾空绕林。

卷 804\_15 【酬李郢夏日钓鱼回见示】

鱼玄机

住处虽同巷，经年不一过。清词劝旧女，香桂折新柯。  
道性欺冰雪，禅心笑绮罗。迹登霄汉上，无路接烟波。

卷 804\_16 【次韵西邻新居兼乞酒】

鱼玄机

一首诗来百度吟，新情字字又声金。西看已有登垣意，  
远望能无化石心。河汉期赊空极目，潇湘梦断罢调琴。  
况逢寒节添乡思，叔夜佳醪莫独斟。

卷 804\_17 【和友人次韵】

鱼玄机

何事能销旅馆愁，红笺开处见银钩。蓬山雨洒千峰小，  
嶰谷风吹万叶秋。字字朝看轻碧玉，篇篇夜诵在衾裯。  
欲将香匣收藏却，且惜时吟在手头。

卷 804\_18 【和新及第悼亡诗二首】

鱼玄机

仙籍人间不久留，片时已过十经秋。鸳鸯帐下香犹暖，  
鹦鹉笼中语未休。朝露缀花如脸恨，晚风敲柳似眉愁。  
彩云一去无消息，潘岳多情欲白头。

一枝月桂和烟秀，万树江桃带雨红。  
且醉尊前休怅望，古来悲乐与今同。

卷 804\_19 【游崇真观南楼，睹新及第题名处】

鱼玄机

云峰满目放春晴，历历银钩指下生。  
自恨罗衣掩诗句，举头空羡榜中名。

卷 804\_20 【愁思】

鱼玄机

落叶纷纷暮雨和，朱丝独抚自清歌。放情休恨无心友，  
养性空抛苦海波。长者车音门外有，道家书卷枕前多。  
布衣终作云霄客，绿水青山时一过。

卷 804\_21 【秋怨】

鱼玄机

自叹多情是足愁，况当风月满庭秋。  
洞房偏与更声近，夜夜灯前欲白头。

卷 804\_22 【江行】

鱼玄机

大江横抱武昌斜，鹦鹉洲前户万家。  
画舸春眠朝未足，梦为蝴蝶也寻花。

烟花已入鸬鹚港，画舸犹沿鹦鹉洲。  
醉卧醒吟都不觉，今朝惊在汉江头。

卷 804\_23 【闻李端公垂钓回寄赠】

鱼玄机

无限荷香染暑衣，阮郎何处弄船归。  
自惭不及鸳鸯侣，犹得双双近钓矶。

卷 804\_24 【题任处士创资福寺】

鱼玄机

幽人创奇境，游客驻行程。粉壁空留字，莲宫未有名。  
凿池泉自出，开径草重生。百尺金轮阁，当川豁眼明。

卷 804\_25 【题隐雾亭】

鱼玄机

春花秋月入诗篇，白日清宵是散仙。  
空卷珠帘不曾下，长移一榻对山眠。

卷 804\_26 【重阳阻雨】

鱼玄机

满庭黄菊篱边拆，两朵芙蓉镜里开。  
落帽台前风雨阻，不知何处醉金杯。

卷 804\_27 【早秋】

鱼玄机

嫩菊含新彩，远山闲夕烟。凉风惊绿树，清韵入朱弦。  
思妇机中锦，征人塞外天。雁飞鱼在水，书信若为传。

卷 804\_28 【感怀寄人】

鱼玄机

恨寄朱弦上，含情意不任。早知云雨会，未起蕙兰心。  
灼灼桃兼李，无妨国士寻。苍苍松与桂，仍羨世人钦。  
月色苔阶净，歌声竹院深。门前红叶地，不扫待知音。

卷 804\_29 【期友人阻雨不至】

鱼玄机

雁鱼空有信，鸡黍恨无期。闭户方笼月，褰帘已散丝。  
近泉鸣砌畔，远浪涨江湄。乡思悲秋客，愁吟五字诗。

卷 804\_30 【访赵炼师不遇】

鱼玄机

何处同仙侣，青衣独在家。暖炉留煮药，邻院为煎茶。  
画壁灯光暗，幡竿日影斜。殷勤重回首，墙外数枝花。

卷 804\_31 【遣怀】

鱼玄机

闲散身无事，风光独自游。断云江上月，解缆海中舟。  
琴弄萧梁寺，诗吟庾亮楼。丛篁堪作伴，片石好为俦。  
燕雀徒为贵，金银志不求。满杯春酒绿，对月夜窗幽。  
绕砌澄清沼，抽簪映细流。卧床书册遍，半醉起梳头。

卷 804\_32 【寄飞卿】

鱼玄机

阶砌乱蛩鸣，庭柯烟露清。月中邻乐响，楼上远山明。  
珍簟凉风著，瑶琴寄恨生。嵇君懒书札，底物慰秋情。

卷 804\_33 【过鄂州】

鱼玄机

柳拂兰桡花满枝，石城城下暮帆迟。折牌峰上三闾墓，  
远火山头五马旗。白雪调高题旧寺，阳春歌在换新词。  
莫愁魂逐清江去，空使行人万首诗。

卷 804\_34 【夏日山居】

鱼玄机

移得仙居此地来，花丛自遍不曾栽。庭前亚树张衣桁，  
坐上新泉泛酒杯。轩槛暗传深竹径，绮罗长拥乱书堆。  
闲乘画舫吟明月，信任轻风吹却回。

卷 804\_35 【暮春即事】

鱼玄机

深巷穷门少侣俦，阮郎唯有梦中留。香飘罗绮谁家席，  
风送歌声何处楼。街近鼓鞺喧晓睡，庭闲鹊语乱春愁。  
安能追逐人间事，万里身同不系舟。

卷 804\_36 【代人悼亡】

鱼玄机

曾睹夭桃想玉姿，带风杨柳认蛾眉。珠归龙窟知谁见，  
镜在鸾台话向谁。从此梦悲烟雨夜，不堪吟苦寂寥时。  
西山日落东山月，恨想无因有了期。

卷 804\_37 【和人】

鱼玄机

茫茫九陌无知己，暮去朝来典绣衣。宝匣镜昏蝉鬓乱，  
博山炉暖麝烟微。多情公子春留句，少思文君昼掩扉。  
莫惜羊车频列载，柳丝梅绽正芳菲。

卷 804\_38 【隔汉江寄子安】

鱼玄机

江南江北愁望，相思相忆空吟。鸳鸯暖卧沙浦，  
鸂鶒闲飞橘林。烟里歌声隐隐，渡头月色沈沈。  
含情咫尺千里，况听家家远砧。

卷 804\_39 【寓言】

鱼玄机

红桃处处春色，碧柳家家月明。楼上新妆待夜，  
闺中独坐含情。芙蓉月下鱼戏，蝶螭天边雀声。  
人世悲欢一梦，如何得作双成。

卷 804\_40 【江陵愁望寄子安】

鱼玄机

枫叶千枝复万枝，江桥掩映暮帆迟。  
忆君心似西江水，日夜东流无歇时。

卷 804\_41 【寄子安】

鱼玄机

醉别千卮不浣愁，离肠百结解无由。蕙兰销歇归春圃，  
杨柳东西绊客舟。聚散已悲云不定，恩情须学水长流。  
有花时节知难遇，未肯厌厌醉玉楼。

卷 804\_42 【送别】

鱼玄机

秦楼几夜惬心期，不料仙郎有别离。  
睡觉莫言云去处，残灯一盏野蛾飞。

卷 804\_43 【迎李近仁员外】

鱼玄机

今日喜时闻喜鹊，昨宵灯下拜灯花。  
焚香出户迎潘岳，不羨牵牛织女家。

卷 804\_44 【送别】

鱼玄机

水柔逐器知难定，云出无心肯再归。  
惆怅春风楚江暮，鸳鸯一只失群飞。

卷 804\_45 【左名场自泽州至京，使人传语】

鱼玄机

闲居作赋几年愁，王屋山前是旧游。诗咏东西千嶂乱，  
马随南北一泉流。曾陪雨夜同欢席，别后花时独上楼。  
忽喜扣门传语至，为怜邻巷小房幽。相如琴罢朱弦断，  
双燕巢分白露秋。莫倦蓬门时一访，每春忙在曲江头。

卷 804\_46 【和人次韵】

鱼玄机

喧喧朱紫杂人寰，独自清吟日色间。何事玉郎搜藻思，  
忽将琼韵扣柴关。白花发咏惭称谢，僻巷深居谬学颜。  
不用多情欲相见，松萝高处是前山。

卷 804\_47 【光、威、衰姊妹三人少孤而始妍乃有是作...因次其韵】

鱼玄机

昔闻南国容华少，今日东邻姊妹三。妆阁相看鹦鹉赋，  
碧窗应绣凤凰衫。红芳满院参差折，绿醕盈杯次第衔。  
恐向瑶池曾作女，谪来尘世未为男。文姬有貌终堪比，  
西子无言我更惭。一曲艳歌琴杳杳，四弦轻拨语喃喃。  
当台竞斗青丝发，对月争夸白玉簪。小有洞中松露滴，  
大罗天上柳烟含。但能为雨心长在，不怕吹箫事未谙。  
阿母几嗔花下语，潘郎曾向梦中参。暂持清句魂犹断，  
若睹红颜死亦甘。怅望佳人何处去，行云归北又归南。

卷 804\_48 【折杨柳】

鱼玄机

朝朝送别泣花钿，折尽春风杨柳烟。  
愿得西山无树木，免教人作泪悬悬。

卷 804\_49 【句】

鱼玄机

焚香登玉坛，端简礼金阙。  
明月照幽隙，清风开短襟。  
绮陌春望远，瑶徽春兴多。  
殷勤不得语，红泪一双流。  
云情自郁争同梦，仙貌长芳又胜花。

## 第八百零五卷

### 卷 805\_1 【湖上卧病喜陆鸿渐至】

李冶

昔去繁霜月，今来苦雾时。相逢仍卧病，欲语泪先垂。  
强劝陶家酒，还吟谢客诗。偶然成一醉，此外更何之。

### 卷 805\_2 【寄校书七兄（一作送韩校书）】

李冶

无事乌程县，蹉跎岁月余。不知芸阁吏，寂寞竟何如。  
远水浮仙棹，寒星伴使车。因过大雷岸，莫忘八行书。

### 卷 805\_3 【寄朱放（一作昉）】

李冶

望水试登山，山高湖又阔。相思无晓夕，相望经年月。

郁郁山木荣，绵绵野花发。别后无限情，相逢一时说。

卷 805\_4 【送韩揆之江西（一作送阎伯钧往江州）】

李冶

相看指杨柳，别恨转依依。万里江西水，孤舟何处归。  
湓城潮不到，夏口信应稀。唯有衡阳雁，年年来去飞。

卷 805\_5 【道意寄崔侍郎】

李冶

莫漫恋浮名，应须薄宦情。百年齐旦暮，前事尽虚盈。  
愁鬓行看白，童颜学未成。无过天竺国，依止古先生。

卷 805\_6 【从萧叔子听弹琴，赋得三峡流泉歌】

李冶

妾家本住巫山云，巫山流泉常自闻。玉琴弹出转寥夔，  
直是当时梦里听。三峡迢迢几千里，一时流入幽闺里。  
巨石崩崖指下生，飞泉走浪弦中起。初疑愤怒含雷风，  
又似呜咽流不通。回湍曲濑势将尽，时复滴沥平沙中。

忆昔阮公为此曲，能令仲容听不足。一弹既罢复一弹，  
愿作流泉镇相续。

卷 805\_7 【相思怨】

李冶

人道海水深，不抵相思半。海水尚有涯，相思渺无畔。  
携琴上高楼，楼虚月华满。弹著相思曲，弦肠一时断。

卷 805\_8 【感兴】

李冶

朝云暮雨镇相随，去雁来人有返期。玉枕只知长下泪，  
银灯空照不眠时。仰看明月翻含意，俯眄流波欲寄词。  
却忆初闻凤楼曲，教人寂寞复相思。

卷 805\_9 【恩命追入，留别广陵故人】

李冶

无才多病分龙钟，不料虚名达九重。仰愧弹冠上华发，  
多惭拂镜理衰容。驰心北阙随芳草，极目南山望旧峰。

桂树不能留野客，沙鸥出浦谩相逢。

卷 805\_10 【八至】

李冶

至近至远东西，至深至浅清溪。  
至高至明日月，至亲至疏夫妻。

卷 805\_11 【送阎二十六赴剡县】

李冶

流水阊门外，孤舟日复西。离情遍芳草，无处不萋萋。  
妾梦经吴苑，君行到剡溪。归来重相访，莫学阮郎迷。

卷 805\_12 【得阎伯钧书】

李冶

情来对镜懒梳头，暮雨萧萧庭树秋。  
莫怪阑干垂玉箸，只缘惆怅对银钩。

卷 805\_13 【结素鱼贻友人】

李冶

尺素如残雪，结为双鲤鱼。欲知心里事，看取腹中书。

卷 805\_14 【偶居】

李冶

心远浮云知不还，心云并在有无间。  
狂风何事相摇荡，吹向南山复北山。

卷 805\_15 【明月夜留别】

李冶

离人无语月无声，明月有光人有情。  
别后相思人似月，云间水上到层城。

卷 805\_16 【春闺怨】

李冶

百尺井栏上，数株桃已红。念君辽海北，抛妾宋家东。

卷 805\_17 【句】

李冶

经时未架却，心绪乱纵横。

已看云鬓散，更念木枯荣。

鞞鼓喧行选，旌旗拂座隅。

不睹河阳一县花，空见青山三两点。

卷 805\_18 【寄洛中诸姊】

元淳

旧国经年别，关河万里思。题诗凭雁翼，望月想蛾眉。  
白发愁偏觉，归心梦独知。谁堪离乱处，掩泪向南枝。

卷 805\_19 【秦中春望】

元淳

凤楼春望好，宫阙一重重。上苑雨中树，终南霁后峰。  
落花行处遍，佳气晚来浓。喜见休明代，霓裳蹑道踪。

卷 805\_20 【句】

元淳

弟兄俱已尽，松柏问何人。  
闻道茂陵山水好，碧溪流水有桃源。  
赤城峭壁无人到，丹灶芝田有鹤来。  
三千宫女露蛾眉，笑煮黄金日月迟。，

卷 805\_21 【舟夜一章】

海印

水色连天色，风声益浪声。旅人归思苦，渔叟梦魂惊。

· 全唐诗 ·

---

举棹云先到，移舟月逐行。旋吟诗句罢，犹见远山横。

## 第八百零六卷

### 卷 806\_1 【诗三百三首】

#### 寒山

凡读我诗者，心中须护净。慳贪继日廉，谄曲登时正。  
驱遣除恶业，归依受真性。今日得佛身，急急如律令。

重岩我卜居，鸟道绝人迹。庭际何所有，白云抱幽石。  
住兹凡几年，屡见春冬易。寄语钟鼎家，虚名定无益。

可笑寒山道，而无车马踪。联谿难记曲，叠嶂不知重。  
泣露千般草，吟风一样松。此时迷径处，形问影何从。

吾家好隐沦，居处绝嚣尘。践草成三径，瞻云作四邻。  
助歌声有鸟，问法语无人。今日娑婆树，几年为一春。

琴书须自随，禄位用何为。投杼从贤妇，巾车有孝儿。  
风吹曝麦地，水溢沃鱼池。常念鸛鷀鸟，安身在一枝。

弟兄同五郡，父子本三州。欲验飞鳧集，须征白兔游。  
灵瓜梦里受，神橘座中收。乡国何迢递，同鱼寄水流。

· 全唐诗 ·

---

一为书剑客，二遇圣明君。东守文不赏，西征武不勋。  
学文兼学武，学武兼学文。今日既老矣，余生不足云。

庄子说送终，天地为棺槨。吾归此有时，唯须一番箔。  
死将喂青蝇，吊不劳白鹤。饿著首阳山，生廉死亦乐。

人问寒山道，寒山路不通。夏天冰未释，日出雾朦胧。  
似我何由届，与君心不同。君心若似我，还得到其中。

天生百尺树，剪作长条木。可惜栋梁材，抛之在幽谷。  
年多心尚劲，日久皮渐秃。识者取将来，犹堪柱马屋。

驱马度荒城，荒城动客情。高低旧雉堞，大小古坟茔。  
自振孤蓬影，长凝拱木声。所嗟皆俗骨，仙史更无名。

鹦鹉宅西国，虞罗捕得归。美人朝夕弄，出入在庭帏。  
赐以金笼贮，肩哉损羽衣。不如鸿与鹤，飘飏入云飞。

玉堂挂珠帘，中有婵娟子。其貌胜神仙，容华若桃李。  
东家春雾合，西舍秋风起。更过三十年，还成苜蓿滓。

城中娥眉女，珠珮珂珊珊。鹦鹉花前弄，琵琶月下弹。  
长歌三月响，短舞万人看。未必长如此，芙蓉不耐寒。

父母续经多，田园不羨他。妇摇机轧轧，儿弄口啾啾。  
拍手摧花舞，支颐听鸟歌。谁当来叹赏，樵客屡经过。

· 全唐诗 ·

---

家住绿岩下，庭芜更不芟。新藤垂缭绕，古石竖巉岩。  
山果猕猴摘，池鱼白鹭衔。仙书一两卷，树下读喃喃。

四时无止息，年去又年来。万物有代谢，九天无朽摧。  
东明又西暗，花落复花开。唯有黄泉客，冥冥去不回。

岁去换愁年，春来物色鲜。山花笑绿水，岩岫舞青烟。  
蜂蝶自云乐，禽鱼更可怜。朋游情未已，彻晓不能眠。

手笔太纵横，身材极瑰玮。生为有限身，死作无名鬼。  
自古如此多，君今争奈何。可来白云里，教尔紫芝歌。

欲得安身处，寒山可长保。微风吹幽松，近听声逾好。  
下有斑白人，喃喃读黄老。十年归不得，忘却来时道。

俊杰马上郎，挥鞭指绿杨。谓言无死日，终不作梯航。  
四运花自好，一朝成萎黄。醍醐与石蜜，至死不能尝。

有一餐霞子，其居讳俗游。论时实萧爽，在夏亦如秋。  
幽涧常沥沥，高松风飕飕。其中半日坐，忘却百年愁。

妾在邯郸住，歌声亦抑扬。赖我安居处，此曲旧来长。  
既醉莫言归，留连日未央。儿家寝宿处，绣被满银床。

快榜三翼舟，善乘千里马。莫能造我家，谓言最幽野。  
岩岫深嶂中，云雷竟日下。自非孔丘公，无能相救者。

· 全唐诗 ·

---

智者君抛我，愚者我抛君。非愚亦非智，从此断相闻。  
入夜歌明月，侵晨舞白云。焉能拱口手，端坐鬓纷纷。

有鸟五色彰，栖桐食竹实。徐动合礼仪，和鸣中音律。  
昨来何以至，为吾暂时出。悦闻弦歌声，作舞欣今日。

茅栋野人居，门前车马疏。林幽偏聚鸟，溪阔本藏鱼。  
山果携儿摘，皋田共妇锄。家中何所有，唯有一床书。

登陟寒山道，寒山路不穷。谿长石磊磊，涧阔草濛濛。  
苔滑非关雨，松鸣不假风。谁能超世累，共坐白云中。

六极常婴困，九维徒自论。有才遗草泽，无艺闭蓬门。  
日上岩犹暗，烟消谷尚昏。其中长者子，个个总无裨。

白云高嵯峨，绿水荡潭波。此处闻渔父，时时鼓棹歌。  
声声不可听，令我愁思多。谁谓雀无角，其如穿屋何？

杳杳寒山道，落落冷涧滨。啾啾常有鸟，寂寂更无人。  
磻磻风吹面，纷纷雪积身。朝朝不见日，岁岁不知春。

少年何所愁，愁见鬓毛白。白更何所愁，愁见日逼迫。  
移向东岱居，配守北邙宅。何忍出此言，此言伤老客。

闻道愁难遣，斯言谓不真。昨朝曾趁却，今日又缠身。  
月尽愁难尽，年新愁更新。谁知席帽下，元是昔愁人。

· 全唐诗 ·

---

两龟乘犊车，蓦出路头戏。一蛊从傍来，苦死欲求寄。  
不载爽人情，始载被沈累。弹指不可论，行恩却遭刺。

三月蚕犹小，女人来采花。隈墙弄蝴蝶，临水掷虾蟆。  
罗袖盛梅子，金钿挑笋芽。斗论多物色，此地胜余家。

东家一老婆，富来三五年。昔日贫于我，今笑我无钱。  
渠笑我在后，我笑渠在前。相笑傥不止，东边复西边。

富儿多鞅掌，触事难祇承。仓米已赫赫，不贷人斗升。  
转怀钩距意，买绢先拣绫。若至临终日，吊客有苍蝇。

余曾昔睹聪明士，博达英灵无比伦。一选嘉名喧宇宙，  
五言诗句越诸人。为官治化超先辈，直为无能继后尘。  
忽然富贵贪财色，瓦解冰消不可陈。

白鹤衔苦桃，千里作一息。欲往蓬莱山，将此充粮食。  
未达毛摧落，离群心惨恻。却归旧来巢，妻子不相识。

惯居幽隐处，乍向国清中。时访丰干道，仍来看拾公。  
独回上寒岩，无人话合同。寻究无源水，源穷水不穷。

生前大愚痴，不为今日悟。今日如许贫，总是前生作。  
今生又不修，来生还如故。两岸各无船，渺渺难济渡。

璨璨卢家女，旧来名莫愁。贪乘摘花马，乐掬采莲舟。  
膝坐绿熊席，身披青凤裘。哀伤百年内，不免归山丘。

· 全唐诗 ·

---

低眼邹公妻，邯郸杜生母。二人同老少，一种好面首。  
昨日会客场，恶衣排在后。只为著破裙，吃他残蓂蕞。

独卧重岩下，蒸云昼不消。室中虽踳蹶，心里绝喧嚣。  
梦去游金阙，魂归度石桥。抛除闹我者，历历树间瓢。

夫物有所用，用之各有宜。用之若失所，一缺复一亏。  
圆凿而方枘，悲哉空尔为。骅骝将捕鼠，不及跛猫儿。

谁家长不死，死事旧来均。始忆八尺汉，俄成一聚尘。  
黄泉无晓日，青草有时春。行到伤心处，松风愁杀人。

骝马珊瑚鞭，驱驰洛阳道。自矜美少年，不信有衰老。  
白发会应生，红颜岂长保。但看北邙山，个是蓬莱岛。

竟日常如醉，流年不暂停。埋著蓬蒿下，晓月何冥冥。  
骨肉消散尽，魂魄几凋零。遮莫咬铁口，无因读老经。

一向寒山坐，淹留三十年。昨来访亲友，太半入黄泉。  
渐减如残烛，长流似逝川。今朝对孤影，不觉泪双悬。

相唤采芙蓉，可怜清江里。游戏不觉暮，屡见狂风起。  
浪捧鸳鸯儿，波摇鸂鶒子。此时居舟楫，浩荡情无已。

吾心似秋月，碧潭清皎洁。无物堪比伦，教我如何说。

垂柳暗如烟，飞花飘似霰。夫居离妇州，妇住思夫县。

· 全唐诗 ·

---

各在天一涯，何时得相见。寄语明月楼，莫贮双飞燕。

有酒相招饮，有肉相呼吃。黄泉前后人，少壮须努力。  
玉带暂时华，金钗非久饰。张翁与郑婆，一去无消息。

可怜好丈夫，身体极棱棱。春秋未三十，才艺百般能。  
金羁逐侠客，玉馔集良朋。唯有一般恶，不传无尽灯。

桃花欲经夏，风月催不待。访觅汉时人，能无一个在。  
朝朝花迁落，岁岁人移改。今日扬尘处，昔时为大海。

我见东家女，年可有十八。西舍竞来问，愿姻夫妻活。  
烹羊煮众命，聚头作淫杀。含笑乐呵呵，啼哭受殃抉。

田舍多桑园，牛犊满厩辙。肯信有因果，顽皮早晚裂。  
眼看消磨尽，当头各自活。纸袴瓦作裤，到头冻饿杀。

我见百十狗，个个毛狰狞。卧者渠自卧，行者渠自行。  
投之一块骨，相与唯喋争。良由为骨少，狗多分不平。

极目兮长望，白云四茫茫。鸱鸦饱腹腰，鸾凤饥彷徨。  
骏马放石碛，蹇驴能至堂。天高不可问，鷓鴣在沧浪。

洛阳多女儿，春日逞华丽。共折路边花，各持插高髻。  
髻高花匝匝，人见皆睥睨。别求醪醑怜，将归见夫婿。

春女銜容仪，相将南陌陲。看花愁日晚，隐树怕风吹。

· 全唐诗 ·

---

年少从傍来，白马黄金羁。何须久相弄，几家夫婿知。

群女戏夕阳，风来满路香。缀裙金蛱蝶，插髻玉鸳鸯。  
角婢红罗缜，阉奴紫锦裳。为观失道者，鬓白心惶惶。

若人逢鬼魅，第一莫惊惶。捺硬莫采渠，呼名自当去。  
烧香请佛力，礼拜求僧助。蚊子叮铁牛，无渠下嘴处。

浩浩黄河水，东流长不息。悠悠不见清，人人寿有极。  
苟欲乘白云，曷由生羽翼。唯当鬢发时，行住须努力。

乘兹朽木船，采彼经婆子。行至大海中，波涛复不止。  
唯贳一宿粮，去岸三千里。烦恼从何生，愁哉缘苦起。

默默永无言，后生何所述。隐居在林藪，智日何由出。  
枯槁非坚卫，风霜成夭疾。土牛耕石田，未有得稻日。

山中何太冷，自古非今年。沓嶂恒凝雪，幽林每吐烟。  
草生芒种后，叶落立秋前。此有沈迷客，窺窺不见天。

山客心悄悄，常嗟岁序迁。辛勤采芝朮，搜斥讵成仙。  
庭廓云初卷，林明月正圆。不归何所为，桂树相留连。

有人兮山楹，云卷兮霞纓。秉芳兮欲寄，路漫漫兮难征。  
心惆怅兮狐疑，年老已无成。众喔咿斯，蹇独立兮忠贞。

猪吃死人肉，人吃死猪肠。猪不嫌人臭，人反道猪香。

猪死抛水内，人死掘土藏。彼此莫相啖，莲花生沸汤。

快哉混沌身，不饭复不尿。遭得谁钻凿，因兹立九窍。  
朝朝为衣食，岁岁愁租调。千个争一钱，聚头亡命叫。

啼哭缘何事，泪如珠子颗。应当有别离，复是遭丧祸。  
所为在贫穷，未能了因果。冢间瞻死尸，六道不干我。

妇女慵经织，男夫懒耨田。轻浮耽挟弹，跼蹐拈抹弦。  
冻骨衣应急，充肠食在先。今谁念于汝，苦痛哭苍天。

不行真正道，随邪号行婆。口惭神佛少，心怀嫉妒多。  
背后唾鱼肉，人前念佛陀。如此修身处，难应避奈何。

世有一等愚，茫茫恰似驴。还解人言语，贪淫状若猪。  
险巇难可测，实语却成虚。谁能共伊语，令教莫此居。

有汉姓傲慢，名贪字不廉。一身无所解，百事被他嫌。  
死恶黄连苦，生怜白蜜甜。吃鱼犹未止，食肉更无厌。

纵你居犀角，饶君带虎睛。桃枝将辟秽，蒜壳取为瓔。  
暖腹茱萸酒，空心枸杞羹。终归不免死，浪自觅长生。

卜择幽居地，天台更莫言。猿啼溪雾冷，岳色草门连。  
折叶覆松室，开池引涧泉。已甘休万事，采蕨度残年。

益者益其精，可名为有益。易者易其形，是名之有易。

能益复能易，当得上仙籍。无益复无易，终不免死厄。

徒劳说三史，浪自看五经。泊老检黄籍，依前住白丁。  
筮遭连蹇卦，生主虚危星。不及河边树，年年一度青。

碧涧泉水清，寒山月华白。默知神自明，观空境逾寂。

我今有一襦，非罗复非绮。借问作何色，不红亦不紫。  
夏天将作衫，冬天将作被。冬夏递互用，长年只这是。

白拂栴檀柄，馨香竟日闻。柔和如卷雾，摇拽似行云。  
礼奉宜当暑，高提复去尘。时时方丈内，将用指迷人。

贪爱有人求快活，不知祸在百年身。但看阳焰浮沔水，  
便觉无常败坏人。丈夫志气直如铁，无曲心中道自真。  
行密节高霜下竹，方知不枉用心神。

多少般数人，百计求名利。心贪觅荣华，经营图富贵。  
心未片时歇，奔突如烟气。家眷实团圆，一呼百诺至。  
不过七十年，冰消瓦解置。死了万事休，谁人承后嗣。  
水浸泥弹丸，方知无意智。

贪人好聚财，恰如泉爱子。子大而食母，财多还害己。  
散之即福生，聚之即祸起。无财亦无祸，鼓翼青云里。

去家一万里，提剑击匈奴。得利渠即死，失利汝即殂。  
渠命既不惜，汝命亦何辜。教汝百胜术，不贪为上谋。

瞋是心中火，能烧功德林。欲行菩萨道，忍辱护真心。

汝为埋头痴兀兀，爱向无明罗刹窟。再三劝你早修行，  
是你顽痴心慌惚。不肯信受寒山语，转转倍加业汨汨。  
直待斩首作两段，方知自身奴贼物。

恶趣甚茫茫，冥冥无日光。人间八百岁，未抵半宵长。  
此等诸痴子，论情甚可伤。劝君求出离，认取法中王。

世有多解人，愚痴徒苦辛。不求当来善，唯知造恶因。  
五逆十恶辈，三毒以为亲。一死入地狱，长如镇库银。

天高高不穷，地厚厚无极。动物在其中，凭兹造化力。  
争头觅饱暖，作计相啖食。因果都未详，盲儿问乳色。

天下几种人，论时色数有。贾婆如许夫，黄老元无妇。  
卫氏儿可怜，钟家女极丑。渠若向西行，我便东边走。

贤士不贪婪，痴人好炉冶。麦地占他家，竹园皆我者。  
努膊觅钱财，切齿驱奴马。须看郭门外，垒垒松柏下。

啧啧买鱼肉，担归喂妻子。何须杀他命，将来活汝己。  
此非天堂缘，纯是地狱滓。徐六语破堆，始知没道理。

有人把椿树，唤作白栴檀。学道多沙数，几个得泥丸。  
弃金却担草，谩他亦自谩。似聚砂一处，成团也大难。

· 全唐诗 ·

---

蒸砂拟作饭，临渴始掘井。用力磨碌砖，那堪将作镜。  
佛说元平等，总有真如性。但自审思量，不用闲争竞。

推寻世间事，子细总皆知。凡事莫容易，尽爱讨便宜。  
护即弊成好，毁即是成非。故知杂滥口，背面总由伊。  
冷暖我自量，不信奴唇皮。

蹭蹬诸贫士，饥寒成至极。闲居好作诗，札札用心力。  
贱他言孰采，劝君休叹息。题安糊饼上，乞狗也不吃。

欲识生死譬，且将冰水比。水结即成冰，冰消返成水。  
已死必应生，出生还复死。冰水不相伤，生死还双美。

寻思少年日，游猎向平陵。国使职非愿，神仙未足称。  
联翩骑白马，喝兔放苍鹰。不觉大流落，皤皤谁见矜。

偃息深林下，从生是农夫。立身既质直，出语无谄谀。  
保我不鉴璧，信君方得珠。焉能同泛滟，极目波上鳧。

不须攻人恶，何用伐己善。行之则可行，卷之则可卷。  
禄厚忧积大，言深虑交浅。闻兹若念兹，小子当自见。

富儿会高堂，华灯何炜煌。此时无烛者，心愿处其傍。  
不意遭排遣，还归暗处藏。益人明炬损，顿讶惜余光。

世有聪明士，勤苦探幽文。三端自孤立，六艺越诸君。  
神气卓然异，精彩超众群。不识个中意，逐境乱纷纷。

· 全唐诗 ·

---

层层山水秀，烟霞锁翠微。岚拂纱巾湿，露沾蓑草衣。  
足躡游方履，手执古藤枝。更观尘世外，梦境复何为。

满卷才子诗，溢壶圣人酒。行爱观牛犊，坐不离左右。  
霜露入茅檐，月华明瓮牖。此时吸两瓿，吟诗五百首。

施家有两儿，以艺干齐楚。文武各自备，托身为得所。  
孟公问其术，我子亲教汝。秦卫两不成，失时成龃龉。

止宿鸳鸯鸟，一雄兼一雌。衔花相共食，刷羽每相随。  
戏入云霄里，宿归沙岸湄。自怜生处乐，不夺凤凰池。

或有衒行人，才艺过周孔。见罢头兀兀，看时身侷侷。  
绳牵未肯行，锥刺犹不动。恰似羊公鹤，可怜生氎氎。

少小带经锄，本将兄共居。缘遭他辈责，剩被自妻疏。  
抛绝红尘境，常游好阅书。谁能借斗水，活取辙中鱼。

变化计无穷，生死竟不止。三途鸟雀身，五岳龙鱼已。  
世浊作羝羝，时清为騄耳。前回是富儿，今度成贫士。

书判全非弱，嫌身不得官。铨曹被拗折，洗垢觅疮瘢。  
必也关天命，今冬更试看。盲儿射雀目，偶中亦非难。

贫驴欠一尺，富狗剩三寸。若分贫不平，中半富与困。  
始取驴饱足，却令狗饥顿。为汝熟思量，令我也愁闷。

柳郎八十二，蓝嫂一十八。夫妻共百年，相怜情狡猾。  
弄璋字乌髡，掷瓦名媼。屡见枯杨萸，常遭青女杀。

大有饥寒客，生将兽鱼殊。长存磨石下，时哭路边隅。  
累日空思饭，经冬不识襦。唯赍一束草，并带五升麸。

赫赫谁甌肆，其酒甚浓厚。可怜高幡帜，极目平升斗。  
何意讶不售，其家多猛狗。童子欲来沽，狗咬便是走。

吁嗟浊滥处，罗刹共贤人。谓是等流类，焉知道不亲。  
狐假狮子势，诈妄却称珍。铅矿入炉冶，方知金不知。

田家避暑月，斗酒共谁欢？杂杂排山果，疏疏围酒樽。  
芦萸将代席，蕉叶且充盘。醉后支颐坐，须弥小弹丸。

个是何措大，时来省南院。年可三十余，曾经四五选。  
囊里无青蚨，筐中有黄绢。行到食店前，不敢暂回面。

为人常吃用，爱意须慳惜。老去不自由，渐被他推斥。  
送向荒山头，一生愿虚掷。亡羊罢补牢，失意终无极。

浪造凌霄阁，虚登百尺楼。养生仍天命，诱读讵封侯。  
不用从黄口，何须厌白头。未能端似箭，且莫曲如钩。

云山叠叠连天碧，路僻林深无客游。远望孤蟾明皎皎，  
近闻群鸟语啾啾。老夫独坐栖青嶂，少室闲居任白头。  
可叹往年与今日，无心还似水东流。

· 全唐诗 ·

---

富贵疏亲聚，只为多钱米。贫贱骨肉离，非关少兄弟。  
急须归去来，招贤阁未启。浪行朱雀街，踏破皮鞋底。

我见一痴汉，仍居三两妇。养得八九儿，总是随宜手。  
丁防是新差，资财非旧有。黄蘗作驴鞦，始知苦在后。

新谷尚未熟，旧谷今已无。就贷一斗许，门外立踟蹰。  
夫出教问妇，妇出遣问夫。慳惜不救乏，财多为累愚。

大有好笑事，略陈三五个。张公富奢华，孟子贫轘轲。  
只取侏儒饱，不怜方朔饿。巴歌唱者多，白雪无人和。

老翁娶少妇，发白妇不耐。老婆嫁少夫，面黄夫不爱。  
老翁娶老婆，一一无弃背。少妇嫁少夫，两两相怜态。

雍容美少年，博览诸经史。尽号曰先生，皆称为学士。  
未能得官职，不解秉耒耜。冬披破布衫，盖是书误己。

鸟语情不堪，其时卧草庵。樱桃红烁烁，杨柳正毵毵。  
旭日衔青嶂，晴云洗绿潭。谁知出尘俗，馭上寒山南。

昨日何悠悠，场中可怜许。上为桃李径，下作兰荪渚。  
复有绮罗人，舍中翠毛羽。相逢欲相唤，脉脉不能语。

丈夫莫守困，无钱须经纪。养得一牯牛，生得五犊子。  
犊子又生儿，积数无穷已。寄语陶朱公，富与君相似。

· 全唐诗 ·

---

之子何惶惶，卜居须自审。南方瘴疠多，北地风霜甚。  
荒陬不可居，毒川难可饮。魂兮归去来，食我家园菘。

昨夜梦还家，见妇机中织。驻梭如有思，擎梭似无力。  
呼之回面视，况复不相识。应是别多年，鬓毛非旧色。

人生不满百，常怀千载忧。自身病始可，又为子孙愁。  
下视禾根土，上看桑树头。秤锤落东海，到底始知休。

世有一等流，悠悠似木头。出语无知解，云我百不忧。  
问道道不会，问佛佛不求。子细推寻著，茫然一场愁。

董郎年少时，出入帝京里。衫作嫩鹅黄，容仪画相似。  
常骑踏雪马，拂拂红尘起。观者满路傍，个是谁家子？

个是谁家子，为人大被憎。痴心常愤愤，肉眼醉瞢瞢。  
见佛不礼佛，逢僧不施僧。唯知打大齋，除此百无能。

人以身为本，本以心为柄。本在心莫邪，心邪丧本命。  
未能免此殃，何言懒照镜。不念金刚经，却令菩萨病。

城北仲家翁，渠家多酒肉。仲翁妇死时，吊客满堂屋。  
仲翁自身亡，能无一人哭。吃他杯斝者，何太冷心腹。

下愚读我诗，不解却嗤诮。中庸读我诗，思量云甚要。  
上贤读我诗，把著满面笑。杨修见幼妇，一览便知妙。

自有慳惜人，我非慳惜辈。衣单为舞穿，酒尽缘歌碎。  
当取一腹饱，莫令两脚儻。蓬蒿钻髑髅，此日君应悔。

我行经古坟，泪尽嗟存没。冢破压黄肠，棺穿露白骨。  
欹斜有瓮瓶，振拨无簪笏。风至揽其中，灰尘乱埽埽。

夕阳赫西山，草木光晔晔。复有朦胧处，松萝相连接。  
此中多伏虎，见我奋迅鬣。手中无寸刃，争不惧懾懾。

出身既扰扰，世事非一状。未能舍流俗，所以相追访。  
昨吊徐五死，今送刘三葬。终日不得闲，为此心凄怆。

有乐且须乐，时哉不可失。虽云一百年，岂满三万日。  
寄世是须臾，论钱莫啾唧。孝经末后章，委曲陈情毕。

独坐常忽忽，情怀何悠悠。山腰云纍纍，谷口风飕飕。  
猿来树裊裊，鸟入林啾啾。时催鬓飒飒，岁尽老惆惆。

一人好头肚，六艺尽皆通。南见驱归北，西风趁向东。  
长漂如泛萍，不息似飞蓬。问是何等色，姓贫名曰穷。

他贤君即受，不贤君莫与。君贤他见容，不贤他亦拒。  
嘉善矜不能，仁徒方得所。劝逐子张言，抛却卜商语。

俗薄真成薄，人心个不同。殷翁笑柳老，柳老笑殷翁。  
何故两相笑，俱行諛诂中。装车竞嶙嶙，翻载各泔泔。

· 全唐诗 ·

---

是我有钱日，恒为汝贷将。汝今既饱暖，见我不分张。  
须忆汝欲得，似我今承望。有无更代事，劝汝熟思量。

人生一百年，佛说十二部。慈悲如野鹿，瞋忿似家狗。  
家狗趁不去，野鹿常好走。欲伏猕猴心，须听狮子吼。

教汝数般事，思量知我贤。极贫忍卖屋，才富须买田。  
空腹不得走，枕头须莫眠。此言期众见，挂在日东边。

寒山多幽奇，登者皆恒惧。月照水澄澄，风吹草猎猎。  
凋梅雪作花，机木云充叶。触雨转鲜灵，非晴不可涉。

有树先林生，计年逾一倍。根遭陵谷变，叶被风霜改。  
咸笑外凋零，不怜内文采。皮肤脱落尽，唯有贞实在。

寒山有裸虫，身白而头黑。手把两卷书，一道将一德。  
住不安釜灶，行不赍衣械。常持智慧剑，拟破烦恼贼。

有人畏白首，不肯舍朱绂。采药空求仙，根苗乱挑掘。  
数年无效验，痴意瞋怫郁。猎师披袈裟，元非汝使物。

昔时可可贫，今朝最贫冻。作事不谐和，触途成恹惚。  
行泥屣脚屈，坐社频腹痛。失却斑猫儿，老鼠围饭瓮。

我见世间人，堂堂好仪相。不报父母恩，方寸底模样。  
欠负他人钱，蹄穿始惆怅。个个惜妻儿，爷娘不供养。  
兄弟似冤家，心中长怅快，忆昔少年时，求神愿成长。

今为不孝子，世间多此样。买肉自家噉，抹髻道我畅。  
自逞说喽罗，聪明无益当。牛头努目瞋，出去始时晌。  
择佛烧好香，拣僧归供养。罗汉门前乞，趁却闲和尚。  
不悟无为人，从来无相状。封疏请名僧，餽钱两三样。  
云光好法师，安角在头上。汝无平等心，圣贤俱不降。  
凡圣皆混然，劝君休取相。我法妙难思，天龙尽回向。  
我今稽首礼，无上法中王。慈悲大喜舍，名称满十方。  
众生作依怙，智慧身金刚。顶礼无所著，我师大法王。

可贵天然物，独一无二侣。觅他不可见，出入无门户。  
促之在方寸，延之一切处。你若不信爱，相逢不相遇。

余家有一窟，窟中无一物。净洁空堂堂，光华明日日。  
蔬食养微躯，布裘遮幻质。任你千圣现，我有天真佛。

男儿大丈夫，作事莫莽卤。劲挺铁石心，直取菩提路。  
邪路不用行，行之枉辛苦。不要求佛果，识取心王主。

粤自居寒山，曾经几万载。任运遁林泉，栖迟观自在。  
寒岩人不到，白云常碍碓。细草作卧褥，青天为被盖。  
快活枕石头，天地任变改。

可重是寒山，白云常自闲。猿啼畅道内，虎啸出人间。  
独步石可履，孤吟藤好攀。松风清飒飒，鸟语声□□□。

闲自访高僧，烟山万万层。师亲指归路，月挂一轮灯。

闲游华顶上，日朗昼光辉。四顾晴空里，白云同鹤飞。

世有多事人，广学诸知见。不识本真性，与道转悬远。  
若能明实相，岂用陈虚愿。一念了自心，开佛之知见。

寒山有一宅，宅中无阑隔。六门左右通，堂中见天碧。  
房房虚索索，东壁打西壁。其中一物无，免被人来惜。  
寒到烧软火，饥来煮菜吃。不学田舍翁，广置牛庄宅。  
尽作地狱业，一入何曾极。好好善思量，思量知轨则。

侬家暂下山，入到城隍里。逢见一群女，端正容貌美。  
头戴蜀样花，燕脂涂粉膩。金钏镂银朵，罗衣绯红紫。  
朱颜类神仙，香带氛氲气。时人皆顾盼，痴爱染心意。  
谓言世无双，魂影随他去。狗咬枯骨头，虚自舐唇齿。  
不解返思量，与畜何曾异。今成白发婆，老陋若精魅。  
无始由狗心，不超解脱地。

一自遁寒山，养命餐山果。平生何所忧，此世随缘过。  
日月如逝川，光阴石中火。任你天地移，我畅岩中坐。

我见世间人，茫茫走路尘。不知此中事，将何为去津。  
荣华能几日，眷属片时亲。纵有千斤金，不如林下贫。

自闻梁朝日，四依诸贤士。宝志万回师，四仙傅大士。  
显扬一代教，作时如来使。造建僧伽蓝，信心归佛理。  
虽乃得如斯，有为多患累。与道殊悬远，折西补东尔。  
不达无为功，损多益少利。有声而无形，至今何处去。

· 全唐诗 ·

---

吁嗟贫复病，为人绝友亲。瓮里长无饭，甑中屡生尘。  
蓬庵不免雨，漏榻劣容身。莫怪今憔悴，多愁定损人。

养女畏太多，已生须训诱。捺头遣小心，鞭背令缄口。  
未解乘机杼，那堪事箕帚。张婆语驴驹，汝大不如母。

秉志不可卷，须知我匪席。浪造山林中，独卧盘陀石。  
辩士来劝余，速令受金璧。凿墙植蓬蒿，若此非有益。

以我栖迟处，幽深难可论。无风萝自动，不雾竹长昏。  
涧水缘谁咽，山云忽自屯。午时庵内坐，始觉日头暎。

忆昔遇逢处，人间逐胜游。乐山登万仞，爱水泛千舟。  
送客琵琶谷，携琴鹦鹉洲。焉知松树下，抱膝冷飕飕。

报汝修道者，进求虚劳神。人有精灵物，无字复无文。  
呼时历历应，隐处不居存。叮咛善保护，勿令有点痕。

去年春鸟鸣，此时思弟兄。今年秋菊烂，此时思发生。  
绿水千肠咽，黄云四面平。哀哉百年内，肠断忆咸京。

多少天台人，不识寒山子。莫知真意度，唤作闲言语。

一住寒山万事休，更无杂念挂心头。  
闲于石壁题诗句，任运还同不系舟。

可惜百年屋，左倒右复倾。墙壁分散尽，木植乱差横。

砖瓦片片落，朽烂不堪停。狂风吹蓐榻，再竖卒难成。

精神殊爽爽，形貌极堂堂。能射穿七札，读书览五行。  
经眠虎头枕，昔坐象牙床。若无一堵物，不啻冷如霜。

笑我田舍儿，头颊底褻涩。巾子未曾高，腰带长时急。  
非是不及时，无钱趁不及。一日有钱财，浮图顶上立。

买肉血聒聒，买鱼跳鱖鱖。君身招罪累，妻子成快活。  
才死渠便嫁，他人谁敢遏。一朝如破床，两个当头脱。

客难寒山子，君诗无道理。吾观乎古人，贫贱不为耻。  
应之笑此言，谈何疏阔矣。愿君似今日，钱是急事尔。

从生不往来，至死无仁义。言既有枝叶，心怀便险诋。  
若其开小道，缘此生大伪。诈说造云梯，削之成棘刺。

一瓶铸金成，一瓶埏泥出。二瓶任君看，那个瓶牢实？  
欲知瓶有二，须知业非一。将此验生因，修行在今日。

摧残荒草庐，其中烟火蔚。借问群小儿，生来凡几日。  
门外有三车，迎之不肯出。饱食腹膨膨，个是痴顽物。

有身与无身，是我复非我。如此审思量，迁延倚岩坐。  
足间青草生，顶上红尘堕。已见俗中人，灵床施酒果。

昨见河边树，摧残不可论。二三余干在，千万斧刀痕。

霜凋萎疏叶，波冲枯朽根。生处当如此，何用怨乾坤。

余见僧繇性希奇，巧妙间生梁朝时。道子飘然为殊特，  
二公善绘手毫挥。逞画图真意气异，龙行鬼走神巍巍。  
饶邈虚空写尘迹，无因画得志公师。

久住寒山凡几秋，独吟歌曲绝无忧。蓬扉不掩常幽寂，  
泉涌甘浆长自流。石室地炉砂鼎沸，松黄柏茗乳香瓯。  
饥餐一粒伽陀药，心地调和倚石头。

丹丘迥耸与云齐，空里五峰遥望低。雁塔高排出青嶂，  
禅林古殿入虹蜺。风摇松叶赤城秀，雾吐中岩仙路迷。  
碧落千山万仞现，藤萝相接次连溪。

千生万死凡几生，生死来去转迷情。  
不识心中无价宝，犹似盲驴信脚行。

老病残年百有余，面黄头白好山居。布裘拥质随缘过，  
岂羨人间巧样模。心神用尽为名利，百种贪婪进己躯。  
浮生幻化如灯烬，冢内埋身是有无。

世间何事最堪嗟，尽是三途造罪楂。不学白云岩下客，  
一条寒衲是生涯。秋到任他林落叶，春来从你树开花。  
三界横眠闲无事，明月清风是我家。

昔年曾到大海游，为采摩尼誓恳求。直到龙宫深密处，  
金关锁断主神愁。龙王守护安耳里，剑客星挥无处搜。

贾客却归门内去，明珠元在我心头。

众星罗列夜明深，岩点孤灯月未沈。  
圆满光华不磨莹，挂在青天是我心。

千年石上古人踪，万丈岩前一点空。  
明月照时常皎洁，不劳寻讨问西东。

寒山顶上月轮孤，照见晴空一物无。  
可贵天然无价宝，埋在五阴溺身躯。

我向前溪照碧流，或向岩边坐盘石。  
心似孤云无所依，悠悠世事何须觅。

我家本住在寒山，石岩栖息离烦缘。泯时万象无痕迹，  
舒处周流遍大千。光影腾辉照心地，无有一法当现前。  
方知摩尼一颗珠，解用无方处处圆。

世人何事可吁嗟，苦乐交煎勿底涯。生死往来多少劫，  
东西南北是谁家。张王李赵权时姓，六道三途事似麻。  
只为主人不了绝，遂招迁谢逐迷邪。

余家本住在天台，云路烟深绝客来。千仞岩峦深可遁，  
万重谿涧石楼台。桦巾木屐沿流步，布裘藜杖绕山回。  
自觉浮生幻化事，逍遥快乐实善哉。

怜底众生病，餐尝略不厌。蒸豚搵蒜酱，炙鸭点椒盐。

去骨鲜鱼脍，兼皮熟肉脍。不知他命苦，只取自家甜。

读书岂免死，读书岂免贫。何以好识字，识字胜他人。  
丈夫不识字，无处可安身。黄连搵蒜酱，忘计是苦辛。

我见瞒人汉，如篮盛水走。一气将归家，篮里何曾有。  
我见被人瞒，一似园中韭。日日被刀伤，天生还自有。

不见朝垂露，日烁自消除。人身亦如此，阎浮是寄居。  
切莫因循过，且令三毒祛。菩提即烦恼，尽令无有余。

水清澈澄莹，彻底自然见。心中无一事，水清众兽现。  
心若不妄起，永劫无改变。若能如是知，是知无背面。

自从到此天台境，经今早度几冬春。  
山水不移人自老，见却多少后生人。

说食终不饱，说衣不免寒。饱吃须是饭，著衣方防寒。  
不解审思量，只道求佛难。回心即是佛，莫向外头看。

可畏轮回苦，往复似翻尘。蚁巡环未息，六道乱纷纷。  
改头换面孔，不离旧时人。速了黑暗狱，无令心性昏。

可畏三界轮，念念未曾息。才始似出头，又却遭沈溺。  
假使非非想，盖缘多福力。争似识真源，一得即永得。

昨日游峰顶，下窥千尺崖。临危一株树，风摆两枝开。

· 全唐诗 ·

---

雨漂即零落，日晒作尘埃。嗟见此茂秀，今为一聚灰。

自古多少圣，叮咛教自信。人根性不等，高下有利钝。  
真佛不肯认，置功枉受困。不知清净心，便是法王印。

我闻天台山，山中有琪树。永言欲攀之，莫晓石桥路。  
缘此生悲叹，幸居将已慕。今日观镜中，飒飒鬓垂素。

养子不经师，不及都亭鼠。何曾见好人，岂闻长者语。  
为染在薰莸，应须择朋侣。五月贩鲜鱼，莫教人笑汝。

徒闭蓬门坐，频经石火迁。唯闻人作鬼，不见鹤成仙。  
念此那堪说，随缘须自怜。回瞻郊郭外，古墓犁为田。

时人见寒山，各谓是风颠。貌不起人目，身唯布裘缠。  
我语他不会，他语我不言。为报往来者，可来保寒山。

自在白云间，从来非买山。下危须策杖，上险捉藤攀。  
涧底松常翠，谿边石自斑。友朋虽阻绝，春至鸟喧喧。

我在村中住，众推无比方。昨日到城下，却被狗形相。  
或嫌袴太窄，或说衫少长。牵却鹞子眼，雀儿舞堂堂。

死生元有命，富贵本由天。此是古人语，吾今非谬传。  
聪明好短命，痴騃却长年。钝物丰财宝，醒醒汉无钱。

国以人为本，犹如树因地。地厚树扶疏，地薄树憔悴。

不得露其根，枝枯子先坠。决陂以取鱼，是取一期利。

众生不可说，何意许颠邪。面上两恶鸟，心中三毒蛇。  
是渠作障碍，使你事烦拏。举手高弹指，南无佛陀耶。  
自乐平生道，烟萝石洞间。野情多放旷，长伴白云间。  
有路不通世，无心孰可攀。石床孤夜坐，圆月上寒山。

大海水无边，鱼龙万万千。递互相食啖，冗冗痴肉团。  
为心不了绝，妄想起如烟。性月澄澄朗，廓尔照无边。

自见天台顶，孤高出众群。风摇松竹韵，月现海潮频。  
下望青山际，谈玄有白云。野情便山水，本志慕道伦。

三五痴后生，作事不真实。未读十卷书，强把雌黄笔。  
将他儒行篇，唤作贼盗律。脱体似蟬虫，咬破他书帙。

心高如山岳，人我不伏人。解讲围陀典，能谈三教文。  
心中无惭愧，破戒违律文。自言上人法，称为第一人。  
愚者皆赞叹，智者抚掌笑。阳焰虚空花，岂得免生老。  
不如百不解，静坐绝忧恼。

如许多宝贝，海中乘坏舸。前头失却桅，后头又无柁。  
宛转任风吹，高低随浪簸。如何得到岸，努力莫端坐。

我见凡愚人，多畜资财谷。饮酒食生命，谓言我富足。  
莫知地狱深，唯求上天福。罪业如毗富，岂得免灾毒。  
财主忽然死，争共当头哭。供僧读文疏，空是鬼神禄。

· 全唐诗 ·

---

福田一个无，虚设一群秃。不如早觉悟，莫作黑暗狱。  
狂风不动树，心真无罪福。寄语冗冗人，叮咛再三读。

劝你三界子，莫作勿道理。理短被他欺，理长不奈你。  
世间浊滥人，恰似黍粘子。不见无事人，独脱无能比。  
早须返本源，三界任缘起。清净入如流，莫饮无明水。

三界人蠢蠢，六道人茫茫。贪财爱淫欲，心恶若豺狼。  
地狱如箭射，极苦若为当。兀兀过朝夕，都不别贤良。  
好恶总不识，犹如猪及羊。共语如木石，嫉妒似颠狂。  
不自见己过，如猪在圈卧。不知自偿债，却笑牛牵磨。

人生在尘蒙，恰似盆中虫。终日行绕绕，不离其盆中。  
神仙不可得，烦恼计无穷。岁月如流水，须臾作老翁。

寒山出此语，复似颠狂汉。有事对面说，所以足人怨。  
心真出语直，直心无背面。临死度奈河，谁是喽罗汉。  
冥冥泉台路，被业相拘绊。

我见多知汉，终日用心神。岐路逞喽罗，欺谩一切人。  
唯作地狱滓，不修正直因。忽然无常至，定知乱纷纷。

寄语诸仁者，复以何为怀。达道见自性，自性即如来。  
天真元具足，修证转差回。弃本却逐末，只守一场呆。

世有一般人，不恶又不善。不识主人公，随客处处转。  
因循过时光，浑是痴肉脔。虽有一灵台，如同客作汉。

· 全唐诗 ·

---

常闻释迦佛，先受然灯记。然灯与释迦，只论前后智。  
前后体非殊，异中无有异。一佛一切佛，心是如来地。

常闻国大臣，朱紫簪纓禄。富贵百千般，贪荣不知辱。  
奴马满宅舍，金银盈帑屋。痴福暂时扶，埋头作地狱。  
忽死万事休，男女当头哭。不知有祸殃，前路何疾速。  
家破冷飕飕，食无一粒粟。冻饿苦凄凄，良由不觉触。

上人心猛利，一闻便知妙。中流心清净，审思云甚要。  
下土钝暗痴，顽皮最难裂。直待血淋头，始知自摧灭。  
看取开眼贼，闹市集人决。死尸弃如尘，此时向谁说。  
男儿大丈夫，一刀两段截。人面禽兽心，造作何时歇。

我有六兄弟，就中一个恶。打伊又不得，骂伊又不著。  
处处无奈何，耽财好淫杀。见好埋头爱，贪心过罗刹。  
阿爷恶见伊，阿娘嫌不悦。昨被我捉得，恶骂恣情掣。  
趁向无人处，一一向伊说。汝今须改行，覆车须改辙。  
若也不信受，共汝恶合杀。汝受我调伏，我共汝觅活。  
从此尽和同，如今过菩萨。学业攻炉冶，炼尽三山铁。  
至今静恬恬，众人皆赞说。

昔日极贫苦，夜夜数他宝。今日审思量，自家须营造。  
掘得一宝藏，纯是水精珠。大有碧眼胡，密拟买将去。  
余即报渠言，此珠无价数。

一生慵懒作，憎重只便轻。他家学事业，余持一卷经。  
无心装褱轴，来去省人擎。应病则说药，方便度众生。

但自心无事，何处不惺惺。

我见出家人，不入出家学。欲知真出家，心净无绳索。  
澄澄孤玄妙，如如无倚托。三界任纵横，四生不可泊。  
无为无事人，逍遥实快乐。

昨到云霞观，忽见仙尊士。星冠月帔横，尽云居山水。  
余问神仙术，云道若为比。谓言灵无上，妙药心神秘。  
守死待鹤来，皆道乘鱼去。余乃返穷之，推寻勿道理。  
但看箭射空，须臾还坠地。饶你得仙人，恰似守尸鬼。  
心月自精明，万象何能比。欲知仙丹术，身内元神是。  
莫学黄巾公，握愚自守拟。

余家有一宅，其宅无正主。地生一寸草，水垂一滴露。  
火烧六个贼，风吹黑云雨。子细寻本人，布裹真珠尔。

传语诸公子，听说石齐奴。僮仆八百人，水碓三十区。  
舍下养鱼鸟，楼上吹笙竽。伸头临白刃，痴心为绿珠。

何以长惆怅，人生似朝菌。那堪数十年，亲旧凋落尽。  
以此思自哀，哀情不可忍。奈何当奈何，托体归山隐。

褴褛关前业，莫诃今日身。若言由冢墓，个是极痴人。  
到头君作鬼，岂令男女贫。皎然易解事，作么无精神。

我见黄河水，凡经几度清。水流如急箭，人世若浮萍。  
痴属根本业，无明烦恼坑。轮回几许劫，只为造迷盲。

· 全唐诗 ·

---

二仪既开辟，人乃居其中。迷汝即吐雾，醒汝即吹风。  
惜汝即富贵，夺汝即贫穷。碌碌群汉子，万事由天公。

余劝诸稚子，急离火宅中。三车在门外，载你免飘蓬。  
露地四衢坐，当天万事空。十方无上下，来去任西东。  
若得个中意，纵横处处通。

可叹浮生人，悠悠何日了。朝朝无闲时，年年不觉老。  
总为求衣食，令心生烦恼。扰扰百千年，去来三恶道。

时人寻云路，云路杳无踪。山高多险峻，涧阔少玲珑。  
碧嶂前兼后，白云西复东。欲知云路处，云路在虚空。

寒山栖隐处，绝得杂人过。时逢林内鸟，相共唱山歌。  
瑞草联谿谷，老松枕嵯峨。可观无事客，憩歇在岩阿。

五岳俱成粉，须弥一寸山。大海一滴水，吸入在心田。  
生长菩提子，遍盖天中天。语汝慕道者，慎莫绕十缠。

无衣自访觅，莫共狐谋裘。无食自采取，莫共羊谋羞。  
借皮兼借肉，怀叹复怀愁。皆缘义失所，衣食常不周。

自羨山间乐，逍遥无倚托。逐日养残躯，闲思无所作。  
时披古佛书，往往登石阁。下窥千尺崖，上有云盘泊。  
寒月冷飕飕，身似孤飞鹤。

我见转轮王，千子常围绕。十善化四天，庄严多七宝。

· 全唐诗 ·

---

七宝镇随身，庄严甚妙好。一朝福报尽，犹若栖芦鸟。  
还作牛领虫，六趣受业道。况复诸凡夫，无常岂长保。  
生死如旋火，轮回似麻稻。不解早觉悟，为人枉虚老。

平野水宽阔，丹丘连四明。仙都最高秀，群峰耸翠屏。  
远远望何极，砢砢势相迎。独标海隅外，处处播嘉名。

可贵一名山，七宝何能比。松月飕飕冷，云霞片片起。  
匝匝几重山，回还多少里。谿涧静澄澄，快活无穷已。

我见世间人，生而还复死。昨朝犹二八，壮气胸襟士。  
如今七十过，力困形憔悴。恰似春日花，朝开夜落尔。

迴耸霄汉外，云里路峩峩。瀑布千丈流，如铺练一条。  
下有栖心窟，横安定命桥。雄雄镇世界，天台名独超。

盘陀石上坐，谿涧冷凄凄。静玩偏嘉丽，虚岩蒙雾迷。  
怡然憩歇处，日斜树影低。我自观心地，莲花出淤泥。

隐士遁人间，多向山中眠。青萝疏麓麓，碧涧响联联。  
腾腾且安乐，悠悠自清闲。免有染世事，心静如白莲。

寄语食肉汉，食时无逗遛。今生过去种，未来今日修。  
只取今日美，不畏来生忧。老鼠入饭瓮，虽饱难出头。

自从出家后，渐得养生趣。伸缩四肢全，勤听六根具。  
褐衣随春冬，粝食供朝暮。今日恳恳修，愿与佛相遇。

五言五百篇，七字七十九。三字二十一，都来六百首。  
一例书岩石，自夸云好手。若能会我诗，真是如来母。

世事绕悠悠，贪生早晚休。研尽大地石，何时得歇头。  
四时周变易，八节急如流。为报火宅主，露地骑白牛。

可笑五阴窟，四蛇共同居。黑暗无明烛，三毒递相驱。  
伴党六个贼，劫掠法财珠。斩却魔军辈，安泰湛如苏。

常闻汉武帝，爰及秦始皇。俱好神仙术，延年竟不长。  
金台既摧折，沙丘遂灭亡。茂陵与骊岳，今日草茫茫。

忆得二十年，徐步国清归。国清寺中人，尽道寒山痴。  
痴人何用疑，疑不解寻思。我尚自不识，是伊争得知。  
低头不用问，问得复何为。有人来骂我，分明了了知。  
虽然不应对，却是得便宜。

语你出家辈，何名为出家。奢华求养活，继缀族姓家。  
美舌甜唇觜，谄曲心钩加。终日礼道场，持经置功课。  
炉烧神佛香，打钟高声和。六时学客春，昼夜不得卧。  
只为爱钱财，心中不脱洒。见他高道人，却嫌诽谤骂。  
驴屎比麝香，苦哉佛陀耶。又见出家儿，有力及无力。  
上上高节者，鬼神钦道德。君王分辇坐，诸侯拜迎逆。  
堪为世福田，世人须保惜。下下低愚者，诈现多求觅。  
浊滥即可知，愚痴爱财色。著却福田衣，种田讨衣食。  
作债税牛犁，为事不忠直。朝朝行弊恶，往往痛臀脊。  
不解善思量，地狱苦无极。一朝著病缠，三年卧床席。

亦有真佛性，翻作无明贼。南无佛陀耶，远远求弥勒。

寒岩深更好，无人行此道。白云高岫闲，青嶂孤猿啸。  
我更何所亲，畅志自宜老。形容寒暑迁，心珠甚可保。

岩前独静坐，圆月当天耀。万象影现中，一轮本无照。  
廓然神自清，含虚洞玄妙。因指见其月，月是心枢要。

本志慕道伦，道伦常获亲。时逢杜源客，每接话禅宾。  
谈玄月明夜，探理日临晨。万机俱泯迹，方识本来人。

元非隐逸士，自号山林人。仕鲁蒙帟帛，且爱裹疏巾。  
道有巢许操，耻为尧舜臣。猕猴罩帽子，学人避风尘。

自古诸哲人，不见有长存。生而还复死，尽变作灰尘。  
积骨如毗富，别泪成海津。唯有空名在，岂免生死轮。

今日岩前坐，坐久烟云收。一道清溪冷，千寻碧嶂头。  
白云朝影静，明月夜光浮。身上无尘垢，心中那更忧。

千云万水间，中有一闲士。白日游青山，夜归岩下睡。  
倏尔过春秋，寂然无尘累。快哉何所依，静若秋江水。

劝你休去来，莫恼他阎老。失脚入三途，粉骨遭千捣。  
长为地狱人，永隔今生道。勉你信余言，识取衣中宝。

世间一等流，诚堪与人笑。出家弊己身，诳俗将为道。

虽著离尘衣，衣中多养蚤。不如归去来，识取心王好。

高高峰顶上，四顾极无边。独坐无人知，孤月照寒泉。  
泉中且无月，月自在青天。吟此一曲歌，歌终不是禅。

有个王秀才，笑我诗多失。云不识蜂腰，仍不会鹤膝。  
平侧不解压，凡言取次出。我笑你作诗，如盲徒咏日。

我住在村乡，无爷亦无娘。无名无姓第，人唤作张王。  
并无人教我，贫贱也寻常。自怜心的实，坚固等金刚。

寒山出此语，此语无人信。蜜甜足人尝，黄蘗苦难近。  
顺情生喜悦，逆意多瞋恨。但看木傀儡，弄了一场困。

我见人转经，依他言语会。口转心不转，心口相违背。  
心真无委曲，不作诸缠盖。但且自省躬，莫觅他替代。  
可中作得主，是知无内外。

寒山唯白云，寂寂绝埃尘。草座山家有，孤灯明月轮。  
石床临碧沼，虎鹿每为邻。自羨幽居乐，长为象外人。

鹿生深林中，饮水而食草。伸脚树下眠，可怜无烦恼。  
系之在华堂，肴膳极肥好。终日不肯尝，形容转枯槁。

花上黄莺子，啁啾声可怜，美人颜似玉，对此弄鸣弦。  
玩之能不足，眷恋在韶年。花飞鸟亦散，洒泪秋风前。

栖迟寒岩下，偏讶最幽奇。携篮采山茹，挈笼摘果归。  
蔬斋敷茅坐，啜啄食紫芝。清沼濯瓢钵，杂和煮稠稀。  
当阳拥裘坐，闲读古人诗。

昔日经行处，今复七十年。故人无来往，埋在古冢间。  
余今头已白，犹守片云山。为报后来子，何不读古言。

欲向东岩去，于今无量年。昨来攀葛上，半路困风烟。  
径窄衣难进，苔粘履不全。住兹丹桂下，且枕白云眠。

我见利智人，观者便知意。不假寻文字，直入如来地。  
心不逐诸缘，意根不妄起。心意不生时，内外无余事。

身著空花衣，足蹑龟毛履。手把兔角弓，拟射无明鬼。

君看叶里花，能得几时好。今日畏人攀，明朝待谁扫。  
可怜娇艳情，年多转成老。将世比于花，红颜岂长保。

画栋非吾宅，松林是我家。一生俄尔过，万事莫言赊。  
济渡不造筏，漂沦为采花。善根今未种，何日见生芽。

出生三十年，当游千万里。行江青草合，入塞红尘起。  
炼药空求仙，读书兼咏史。今日归寒山，枕流兼洗耳。

寒山无漏岩，其岩甚济要。八风吹不动，万古人传妙。  
寂寂好安居，空空离讥诮。孤月夜长明，圆日常来照。  
虎丘兼虎谿，不用相呼召。世间有王傅，莫把同周邵。

我自遁寒岩，快活长歌笑。

沙门不持戒，道士不服药。自古多少贤，尽在青山脚。

有人笑我诗，我诗合典雅。不烦郑氏笺，岂用毛公解。  
不恨会人稀，只为知音寡。若遣趁宫商，余病莫能罢。  
忽遇明眼人，即自流天下。

卷 806\_2 【三字诗六首】

寒山

寒山道，无人到。若能行，称十号。有蝉鸣，  
无鸦噪。黄叶落，白云扫。石磊磊，山隩隩。  
我独居，名善导。子细看，何相好。

寒山寒，冰锁石。藏山青，现雪白。  
日出照，一时释。从兹暖，养老客。

我居山，勿人识。白云中，常寂寂。

寒山深，称我心。纯白石，勿黄金。  
泉声响，抚伯琴。有子期，辨此音。

重岩中，足清风。扇不摇，凉冷通。  
明月照，白云笼。独自坐，一老翁。

寒山子，长如是。独自居，不生死。

卷 806\_3 【拾遗二首新添】

寒山

我见世间人，个个争意气。一朝忽然死，只得一片地。  
阔四尺，长丈二。汝若会出来争意气，我与汝立碑记。

家有寒山诗，胜汝看经卷。书放屏风上，时时看一遍。 .

## 第八百零七卷

### 卷 807\_1 【诗】

#### 拾得

诸佛留藏经，只为人难化。不唯贤与愚，个个心构架。  
造业大如山，岂解怀忧怕。那肯细寻思，日夜怀奸诈。

嗟见世间人，个个爱吃肉。碗碟不曾干，长时道不足。  
昨日设个斋，今朝宰六畜。都缘业使牵，非干情所欲。  
一度造天堂，百度造地狱。阎罗使来追，合家尽啼哭。  
炉子边向火，镬子里澡浴。更得出头时，换却汝衣服。

出家要清闲，清闲即为贵。如何尘外人，却入尘埃里。  
一向迷本心，终朝役名利。名利得到身，形容已憔悴。  
况复不遂者，虚用平生志。可怜无事人，未能笑得尔。

养儿与娶妻，养女求媒娉。重重皆是业，更杀众生命。  
聚集会亲情，总来看盘钉。目下虽称心，罪簿先注定。

得此分段身，可笑好形质。面貌似银盘，心中黑如漆。  
烹猪又宰羊，夸道甜如蜜。死后受波吒，更莫称冤屈。

佛哀三界子，总是亲男女。恐沈黑暗坑，示仪垂化度。  
尽登无上道，俱证菩提路。教汝痴众生，慧心勤觉悟。

佛舍尊荣乐，为愍诸痴子。早愿悟无生，办集无上事。  
后来出家者，多缘无业次。不能得衣食，头钻入于寺。

嗟见世间人，永劫在迷津。不省这个意，修行徒苦辛。

我诗也是诗，有人唤作偈。诗偈总一般，读时须子细。  
缓缓细披寻，不得生容易。依此学修行，大有可笑事。

有偈有千万，卒急速应难。若要相知者，但入天台山。  
岩中深处坐，说理及谈玄。共我不相见，对面似千山。

世间亿万人，面孔不相似。借问何因缘，致令遣如此。  
各执一般见，互说非兼是。但自修己身，不要言他已。

男女为婚嫁，俗务是常仪。自量其事力，何用广张施。  
取债夸人我，论情入骨痴。杀他鸡犬命，身死堕阿鼻。

世上一种人，出性常多事。终日傍街衢，不离诸酒肆。  
为他作保见，替他说道理。一朝有乖张，过咎全归你。

我劝出家辈，须知教法深。专心求出离，辄莫染贪淫。  
大有俗中士，知非不爱金。故知君子志，任运听浮沈。

寒山住寒山，拾得自拾得。凡愚岂见知，丰干却相识。

见时不可见，觅时何处觅。借问有何缘，却道无为力。

从来是拾得，不是偶然称。别无亲眷属，寒山是我兄。  
两人心相似，谁能徇俗情。若问年多少，黄河几度清。

若解捉老鼠，不在五白猫。若能悟理性，那由锦绣包。  
真珠入席袋，佛性止蓬茅。一群取相汉，用意总无交。

运心常宽广，此则名为布。辍己惠于人，方可名为施。  
后来人不知，焉能会此义。未设一庸僧，早拟望富贵。

猕猴尚教得，人何不愤发。前车既落坑，后车须改辙。  
若也不知此，恐君恶合杀。此来是夜叉，变即成菩萨。

自从到此天台寺，经今早已几冬春。  
山水不移人自老，见却多少后生人。

君不见，三界之中纷扰扰，只为无明不了绝。  
一念不生心澄然，无去无来不生灭。

故林又斩新，剡源溪上人。天姥峡关岭，通同次海津。  
湾深曲岛间，淼淼水云云。借问松禅客，日轮何处暎。

自笑老夫筋力败，偏恋松岩爱独游。  
可叹往年至今日，任运还同不系舟。

一入双溪不计春，炼暴黄精几许斤。炉灶石锅频煮沸，

土甑久蒸气味珍。谁来幽谷餐仙食，独向云泉更勿人。  
延龄寿尽招手石，此栖终不出山门。

踟躅一群羊，沿山又入谷。看人贪竹塞，且遭豺狼逐。  
元不出孳生，便将充口腹。从头吃至尾，讷讷无余肉。

银星钉称衡，绿丝作称纽。买人推向前，卖人推向后。  
不愿他心怨，唯言我好手。死去见阎王，背后插扫帚。

闭门私造罪，准拟免灾殃。被他恶部童，抄得报阎王。  
纵不入镬汤，亦须卧铁床。不许雇人替，自作自身当。

悠悠尘里人，常道尘中乐。我见尘中人，心生多愍顾。  
何哉愍此流，念彼尘中苦。

无去无来本湛然，不居内外及中间。  
一颗水精绝瑕翳，光明透满出人天。

少年学书剑，叱馭到荆州。闻伐匈奴尽，婆娑无处游。  
归来翠岩下，席草玩清流。壮士志未骋，猕猴骑土牛。

三界如转轮，浮生若流水。蠢蠢诸品类，贪生不觉死。  
汝看朝垂露，能得几时子。

闲入天台洞，访人人不知。寒山为伴侣，松下啖灵芝。  
每谈今古事，嗟见世愚痴。个个入地狱，早晚出头时。

古佛路凄凄，愚人到却迷。只缘前业重，所以不能知。  
欲识无为理，心中不挂丝。生生勤苦学，必定睹天师。

各有天真佛，号之为宝王。珠光日夜照，玄妙卒难量。  
盲人常兀兀，那肯怕灾殃。唯贪淫泆业，此辈实堪伤。

出家求出离，哀念苦众生。助佛为扬化，令教选路行。  
何曾解救苦，恣意乱纵横。一时同受溺，俱落大深坑。

常饮三毒酒，昏昏都不知。将钱作梦事，梦事成铁围。  
以苦欲舍苦，舍苦无出期。应须早觉悟，觉悟自归依。

云山叠叠几千重，幽谷路深绝人踪。  
碧涧清流多胜境，时来鸟语合人心。

后来出家子，论情入骨痴。本来求解脱，却见受驱驰。  
终朝游俗舍，礼念作威仪。博钱沽酒吃，翻成客作儿。

若论常快活，唯有隐居人。林花长似锦，四季色常新。  
或向岩间坐，旋瞻见桂轮。虽然身畅逸，却念世间人。

我见出家人，总爱吃酒肉。此合上天堂，却沈归地狱。  
念得两卷经，欺他道鄜俗。岂知鄜俗士，大有根性熟。

我见顽钝人，灯心柱须弥。蚊子啣大树，焉知气力微。  
学咬两茎菜，言与祖师齐。火急求忏悔，从今辄莫迷。

· 全唐诗 ·

---

若见月光明，照烛四天下。圆晖挂太虚，莹净能潇洒。  
人道有亏盈，我见无衰谢。状似摩尼珠，光明无昼夜。

余住无方所，盘泊无为理。时陟涅盘山，或玩香林寺。  
寻常只是闲，言不干名利。东海变桑田，我心谁管你。

左手握骊珠，右手执慧剑。先破无明贼，神珠自吐焰。  
伤嗟愚痴人，贪爱那生厌。一堕三途间，始觉前程险。

般若酒泠泠，饮多人易醒。余住天台山，凡愚那见形。  
常游深谷洞，终不逐时情。无思亦无虑，无辱也无荣。

平生何所忧，此世随缘过。日月如逝波，光阴石中火。  
任他天地移，我畅岩中坐。

嗟见多知汉，终日枉用心。岐路逞喽罗，欺谩一切人。  
唯作地狱滓，不修来世因。忽尔无常到，定知乱纷纷。

迢迢山径峻，万仞险隘危。石桥莓苔绿，时见白云飞。  
瀑布悬如练，月影落潭晖。更登华顶上，犹待孤鹤期。

松月冷飕飕，片片云霞起。匱匝几重山，纵目千万里。  
谿潭水澄澄，彻底镜相似。可贵灵台物，七宝莫能比。

世有多解人，愚痴学闲文。不忧当来果，唯知造恶因。  
见佛不解礼，睹僧倍生瞋。五逆十恶辈，三毒以为邻。  
死去入地狱，未有出头辰。

人生浮世中，个个愿富贵。高堂车马多，一呼百诺至。  
吞并田地宅，准拟承后嗣。未逾七十秋，冰消瓦解去。

水浸泥弹丸，思量无道理。浮沤梦幻身，百年能几几。  
不解细思惟，将言长不死。诛剥垒千金，留将与妻子。

云林最幽栖，傍涧枕月谿。松拂盘陀石，甘泉涌淒淒。  
静坐偏佳丽，虚岩矇雾迷。怡然居憩地，日（以下缺）

可笑是林泉，数里少人烟。云从岩嶂起，瀑布水潺潺。  
猿啼唱道曲，虎啸出人间。松风清飒飒，鸟语声关关。  
独步绕石涧，孤陟上峰峦。时坐盘陀石，偃仰攀萝沿。  
遥望城隍处，惟闻闹喧喧。

## 卷 807\_2 【壁上诗二首】

丰干

余自来天台，凡经几万回。一身如云水，悠悠任去来。  
逍遥绝无闹，忘机隆佛道。世途岐路心，众生多烦恼。  
兀兀沈浪海，飘飘轮三界。可惜一灵物，无始被境埋。  
电光瞥然起，生死纷尘埃。寒山特相访，拾得常往来。  
论心话明月，太虚廓无碍。法界即无边，一法普遍该。

本来无一物，亦无尘可拂。若能了达此，不用坐兀兀。

## 第八百零八卷

### 卷 808\_1 【奉和窦使君同恭法师咏高僧二首·竺佛图澄】

慧宣

大誓悯涂炭，乘机入生死。中州法既弘，葛陂暴亦止。  
乳孔光一室，掌镜彻千里。道盛咒莲华，灾生吟棘子。  
埋石缘虽谢，流沙化方始。

### 卷 808\_2 【奉和窦使君同恭法师咏高僧二首·释僧肇】

慧宣

般若唯绝凿，涅槃固无名。先贤未始觉，之子唱希声。  
秦王嗟理诣，童寿揖词清。徽音闻庐岳，精难动中京。  
适验方袍里，奇才复挺生。

### 卷 808\_3 【秋日游东山寺寻殊昙二法师】

慧宣

木落树萧槿，水清流 寂。属此悲哉气，复兹羁旅戚。

奚用写烦忧，山泉恣游历。万丈窥深涧，千寻仰绝壁。  
傍岭竹参差，缘崖藤<sup>罍</sup>历。行行极幽邃，去去逾空寂。  
果值息心侣，乔枝方挂锡。围绕悉梅檀，纯良岂沙砾。  
妙法诚无比，深经解怨敌。心欢即顶礼，道存仍目击。  
慧刀幸已逢，疑网于焉析。岂直却烦恼，方期拯沈溺。

卷 808\_4 【句】

慧宣

如蒙一被服，方堪称福田。

卷 808\_5 【爱妾换马】

法宣

朱鬣饰金镮，红妆束素腰。似云来躩蹀，如雪去摇飏。  
桃花含浅汗，柳叶带余娇。骋光将独立，双绝不俱标。

卷 808\_6 【和赵王观妓】

法宣

桂山留上客，兰室命妖饶。城中画广黛，宫里束纤腰。

舞袖风前举，歌声扇后娇。周郎不须顾，今日管弦调。

卷 808\_7 【听独杵捣衣】

慧偁

非是无人助，意欲自鸣砧。向月怜孤影，承风送迥音。  
疑捣双丝练，似奏一弦琴。令君闻独杵，知妾有专心。

卷 808\_8 【闻侯方儿来寇】

慧偁

羊皮赎去士，马革敛还尸。天下方无事，孝廉非哭时。

卷 808\_9 【和琳法师初春法集之作】

慧净

鹫岭光前选，祇园表昔恭。哲人崇踵武，弘道会群龙。  
高座登莲叶，麈尾振霜松。尘飞扬雅梵，风度引疏钟。  
静言澄义海，发论上词锋。心虚道易合，迹广席难重。  
和风动淑气，丽日启时雍。高才掞雅什，顾己滥朋从。  
因兹仰积善，灵华庶可逢。

卷 808\_10 【与英才言聚赋得升天行】

慧净

驭风过阆苑，控鹤下瀛洲。欲采三芝秀，先从千仞游。  
驾凤吟虚管，乘槎泛浅流。颓龄一已驻，方验大椿秋。

卷 808\_11 【和卢赞府游纪国道场】

慧净

日光通汉室，星彩晦周朝。法城从此构，香阁本岩峤。  
株盘仰承露，刹凤俯摩霄。落照侵虚牖，长虹拖跨桥。  
高才暂骋目，云藻随飘飘。欲追千里骥，终是谢连镳。

卷 808\_12 【冬日普光寺卧疾，值雪简诸旧游】

慧净

卧疴苦留滞，辟户望遥天。寒云舒复卷，落雪断还连。  
凝华照书阁，飞素澹琴弦。回飘洛神赋，皎映齐纨篇。  
萦阶如鹤舞，拂树似花鲜。徒赏丰年瑞，沈忧终自怜。

卷 808\_13 【杂言（一作义净诗）】

慧净

观化祇山顶，流睇古王城。万载池犹洁，千年苑尚清。  
仿佛影坚路，摧残广胁岷。七宝仙台亡旧迹，  
四彩天花绝雨声。声华日以远，自恨生何晚。  
既伤火宅眩中门，还嗟宝渚迷长坂。步陟平郊望，  
心游七海上。扰扰三界溺邪津，浑浑万品忘真匠。  
唯有能仁独圆悟，廓尘静浪开玄路。创逢肌命弃身城，  
更为求人崩意树。持囊毕契戒珠净，被甲要心忍衣固。  
三祇不倦陵二车，一足忘劳超九数。定漱江清沐久结，  
智剑霜凝斩新雾。无边大劫无不修，六时愍生遵六度。  
度有流光功德收，金河示灭归常住。鹤林权唱演功周，  
圣德佳音传余响。龙宫秘典海中探，石室真言山处仰。  
流教在兹辰，传芳代有人。沙河雪岭迷朝径，  
巨海鸿崖乱夜津。入万死，求一生。投针偶穴非同喻，  
束马悬车岂等程。不徇今身乐，无祈后代荣。  
誓舍危躯追胜义，咸希毕契传灯情。劳歌勿复陈，  
延眺且周巡。东睇女峦留二迹，西驰鹿苑去三轮。  
北睨舍城池尚在，南睇尊岭穴犹存。五峰秀，百池分。  
粲粲鲜花明四曜，辉辉道树镜三春。扬锡指山阿，  
携步上祇陀。既睹如来叠衣石，复观天授进余峨。  
伫灵镇梵岳，凝思遍生河。金花逸掌仪前奉，  
芳盖陵虚殿后过。旋绕经行砌，目想如神契。  
回斯少福润生津，共会龙华舍尘翳。

卷 808\_14 【三不为篇】

海顺

我欲偃文修武，身死名存。斫石通道，祈井流泉。  
君肝在内，我身处边。荆轲拔剑，毛遂捧盘。不为则已，  
为则不然。将恐两虎共斗，势不俱全。永 今好，  
长绝来怨。是以返迹荒径，息影柴门。

我欲刺股锥刃，悬头屋梁。书临雪彩，牒映萤光。  
一朝鹏举，万里鸾翔。纵任才辩，游说君王。高车反邑，  
衣锦还乡。将恐鸟残以羽，兰折由芳。笼餐讵贵，  
钩饵难尝。是以高巢林藪，深穴池塘。

我欲衒才鬻德，入市趋朝。四众瞻仰，三槐附交。  
标形引势，身达名超。箱盈绮服，厨富甘肴。讽扬弦管，  
咏美歌谣。将恐尘栖弱草，露宿危条。无过日旦，  
靡越风朝。是以还伤乐浅，非惟苦遥。

卷 808\_15 【出赐玄奘衲、袈裟衣应制】

道恭

福田资象德，圣种理幽薰。不持金作缕，还用彩成文。  
朱青自掩映，翠绮相氤氲。独有离离叶，恒向稻畦分。

卷 808\_16 【设缸面酒款萧翼，探得来字】

辨才

初酝一缸开，新知万里来。披云同落寞，步月共裴回。  
夜久孤琴思，风长旅雁哀。非君有秘术，谁照不然灰。

卷 808\_17 【书遗文后】

僧凤

苦哉黑闇女，乐矣功德天。智者俱不受，愚夫纳二边。  
我奉能仁教，归依弥勒前。愿阐摩诃衍，成就那罗延。

卷 808\_18 【讥韦玘吟以韦字为韵】

利涉

我之佛法是无为，何故今朝得有为。  
无韦始得三数载，不知此复是何韦。

卷 808\_19 【别三辅诸僧】

道会

去住俱为客，分悲损性情。共作无期别，谁能访死生。

卷 808\_20 【赠王仙柯】

中寤

瞻思不及望仙兄，早晚升霞入太清。手种一株松未老，  
炉烧九转药新成。心中已得黄庭术，头上应无白发生。  
异日却归华表语，待教凡俗普闻名。

卷 808\_21 【在西国怀王舍城（一三五七九言）】

义净

游，愁。赤县远，丹思抽。鹫岭寒风驶，龙河激水流。  
既喜朝闻日复日，不觉颓年秋更秋。  
已毕耆山本愿城难遇，终望持经振锡住神州。

卷 808\_22 【与无行禅师同游鹞岭瞻奉...杂言诗（一作慧净诗）】

义净

观化祇山顶，流睇古王城。万载池犹洁，千年苑尚清。  
仿佛影坚路，摧残广胁嶷。七宝仙台亡旧迹，  
四彩天花绝雨声。声华日以远，自恨生何晚。  
既伤火宅眩中门，还嗟宝渚迷长坂。步陟平郊望，  
心游七海上。扰扰三界溺邪津，浑浑万品亡真匠。  
唯有能仁独圆悟，廓尘静浪开玄路。创逢肌命弃身城，  
更为求人崩意树。持囊毕契戒珠净，被甲要心忍衣固。  
三祇不倦陵二车，一足忘劳超九数。定漱江清沐久结，  
智剑霜凝斩新雾。无边大劫无不修，六时愍生遵六度。  
度有流光功德收，金河示灭归常住。鹤林权唱演功周，  
圣徒往昔传余响。龙宫秘典海中探，石室真言山处仰。  
流教在兹辰，传芳代有人。沙河雪岭迷朝径，  
巨海鸿崖乱夜津。入万死，求一生。投针偶穴非同喻，  
束马悬车岂等程。不徇今身乐，无祈后代荣。  
誓舍危躯追胜义，咸希毕契传灯情。劳歌勿复陈，  
延眺且周巡。东睇女峦留二迹，西驰鹿苑去三轮。  
北睨舍城池尚在，南睇尊岭穴犹存。五峰秀，百池分。  
粲粲鲜花明四曜，辉辉道树镜三春。扬锡指山阿，  
携步上祇陀。既睹如来叠衣石，复观天授进余峨。  
伫灵镇梵岳，凝思遍生河。金花逸掌仪前奉，  
芳盖陵虚殿后过。旋绕经行砌，目想如神契。  
回斯少福润生津，共会龙华舍尘翳。

卷 808\_23 【玄逵律师言离广府还望桂林去留怆然自述赠怀】

义净

标心之梵宇，运想入仙洲。婴痼乖同好，沈情阻若抽。  
叶落乍难聚，情离不可收。何日乘杯至，详观演法流。

卷 808\_24 【余以咸亨元年在西京寻听于时与并部处一法师...聊  
题两绝】

义净

我行之数万，愁绪百重思。那教六尺影，独步五天陲。  
上将可陵师，匹士志难移。如论惜短命，何得满长祇。

卷 808\_25 【西域寺】

义净

众美仍罗列，群英已古今。也知生死分，那得不伤心。

卷 808\_26 【道希法师求法西域终于庵摩罗跋国后...聊题一绝】

义净

百苦忘劳独进影，四恩在念契流通。  
如何未尽传灯志，溘然于此遇途穷。

卷 808\_27 【行路难】

宝月

君不见，孤雁关外发，酸嘶度杨越。空城客子心肠断，  
幽闺思妇气欲绝。凝霜夜下拂罗衣，浮云中断开明月。  
夜夜遥遥徒相思，年年望望情不歇。取我匣中青铜镜，  
情人为我除白发。行路难，行路难。夜闻南城汉使度，  
使我流泪忆长安。

卷 808\_28 【老僧（一作郑綮诗）】

景云

日照西山雪，老僧门始开。冻瓶粘柱础，宿火焰炉灰。  
童子病归去，鹿麕寒入来。斋钟知渐近，枝鸟下生台。

卷 808\_29 【谿叟】

景云

谿翁居处静，谿鸟入门飞。早起钓鱼去，夜深乘月归。  
露香菰米熟，烟暖苜丝肥。潇洒尘埃外，扁舟一草衣。

卷 808\_30 【画松】

景云

画松一似真松树，且待寻思记得无。  
曾在天台山上见，石桥南畔第三株。

卷 808\_31 【送戴三征君还谷口旧居】

理莹

岩穴多遗秀，弓车屡远招。周王尊渭叟，颍客傲唐尧。  
出处天波洽，关河地势遥。瞻星吴郡夜，作雾华山朝。  
清论虚重席，闲居挂一瓢。渔歌思坐酌，宸渥宠行轺。  
春为荷裳暖，霜因葛履消。层崖悬瀑溜，万壑振清飙。  
谷鸟犹迁木，场驹正食苗。谢安何日起，台鼎伫君调。

卷 808\_32 【送童子下山】

金地藏

空门寂寞汝思家，礼别云房下九华。爰向竹栏骑竹马，  
懒于金地聚金沙。添瓶涧底休招月，烹茗瓿中罢弄花。  
好去不须频下泪，老僧相伴有烟霞。

卷 808\_33 【题张僧繇醉僧图】

怀素

人人送酒不曾沽，终日松间挂一壶。  
草圣欲成狂便发，真堪画入醉僧图。

卷 808\_34 【寄衡岳僧】

怀素

祝融高座对寒峰，云水昭丘几万重。  
五月衲衣犹近火，起来白鹤冷青松。

## 第八百零九卷

### 卷 809\_1 【酬皇甫冉西陵见寄（一作西陵渡）】

灵一

西陵潮信满，岛屿没中流。越客依风水，相思南渡头。  
寒光生极浦，落日映沧洲。何事扬帆去，空惊海上鸥。

### 卷 809\_2 【溪行即事】

灵一

近夜山更碧，入林溪转清。不知伏牛事，潭洞何从横。  
野岸烟初合，平湖月未生。孤舟屡失道，但听秋泉声。

### 卷 809\_3 【栖霞山夜坐】

灵一

山头戒坛路，幽映雪岩侧。四面青石床，一峰苔藓色。

· 全唐诗 ·

---

松风静复起，月影开还黑。何独乘夜来，殊非昼所得。

卷 809\_4 【宿天柱观（一作宿灵洞观）】

灵一

石室初投宿，仙翁喜暂容。花源隔水见，洞府过山逢。  
泉涌阶前地，云生户外峰。中宵自入定，非是欲降龙。

卷 809\_5 【酬皇甫冉将赴无锡，于云门寺赠别】

灵一

湖南通古寺，来往意无涯。欲识云门路，千峰到若耶。  
春山子敬宅，古木谢敷家。自可长偕隐，那言相去赊。

卷 809\_6 【宜丰新泉】

灵一

泉源新涌出，洞澈映纤云。稍落芙蓉沼，初淹苔藓文。  
素将空意合，净与众流分。每到清宵月，泠泠梦里闻。

卷 809\_7 【静林精舍】

灵一

静林溪路远，萧帝有遗踪。水击罗浮磬，山鸣于阗钟。  
灯传三世火，树老万株松。无数烟霞色，空闻昔卧龙。

卷 809\_8 【江行寄张舍人】

灵一

客程终日风尘苦，蓬转还家未有期。林色晓分残雪后，  
角声寒奏落帆时。月高星使东看远，云破霜鸿北度迟。  
流荡此心难共说，千峰澄霁隔琼枝。

卷 809\_9 【送王颖悟归左绵】

灵一

客意天南兴已阑，不堪言别向仙官。梦摇玉珮随旄节，  
心到金华忆杏坛。荒郊极望归云尽，瘦马空嘶落日残。  
想得故山青霭里，泉声入夜独潺潺。

卷 809\_10 【安公】

灵一

弥天称圣哲，象法初繁赖。弘道识行藏，匡时知进退。  
秦王轻与举，习生重酬对。学文古篆中，义显心经内。  
法服应华夏，金言流海岱。西方浮云间，更陪龙华会。

卷 809\_11 【林公】

灵一

支公信高逸，久向山林住。时将孙许游，岂以形骸遇。  
幸辞天子诏，复览名臣疏。西晋尚虚无，南朝久沦误。  
因谈老庄意，乃尽逍遥趣。谁为竹林贤，风流相比附。

卷 809\_12 【远公】

灵一

远公逢道安，一朝弃儒服。真机久消歇，世教空拘束。  
誓入罗浮中，遂栖庐山曲。禅经初纂定，佛语新名目。  
钵帽绝朝宗，簪裾翻拜伏。东林多隐士，为我辞荣禄。

卷 809\_13 【雨后欲寻天目山，问元、骆二公溪路】

灵一

昨夜云生天井东，春山一雨一回风。  
林花并逐溪流下，欲上龙池通不通。

卷 809\_14 【题僧院】

灵一

虎溪闲月引相过，带雪松枝挂薜萝。  
无限青山行欲尽，白云深处老僧多。

卷 809\_15 【宿静林寺】

灵一

山寺门前多古松，溪行欲到已闻钟。  
中宵引领寻高顶，月照云峰凡几重。

卷 809\_16 【再还宜丰寺】

灵一

再寻招隐地，重会息心期。樵客问归日，山僧记别时。  
野云阴远甸，秋雨涨前陂。勿谓探形胜，吾今不好奇。

卷 809\_17 【春日山斋】

灵一

野径东风起，山扉度日开。晴光拆红萼，流水长青苔。  
逋客殊未去，芳时已再来。非关恋春草，自是欲裴回。

卷 809\_18 【留别忠州故人（一作惟审诗）】

灵一

一身无定处，万里独销魂。芳草迷归路，春流滴泪痕。  
几时休旅食，何夜宿江村。欲识相思苦，空山啼暮猿。

卷 809\_19 【送别】

灵一

凭高莫送远，看欲断归心。别恨啼猿苦，相思流水深。  
翠云南涧影，丹桂晚山阴。若未来双鹄，辽城何更寻。

卷 809\_20 【送冽寺主之京迎禅和尚】

灵一

禅门居此地，瞻望在虚空。水国月未上，苍生如梦中。  
上人知机士，瓶锡慰樊笼。彼土诸梵众，嗟君扬道风。

卷 809\_21 【送王法师之西川】

灵一

旅游无近远，要自别魂销。官柳乡愁乱，春山客路遥。  
伴行芳草远，缘兴野花飘。计日功成后，还将辅圣朝。

卷 809\_22 【送范律师往果州】

灵一

终南千古后，独尔继卿名。离障非今日，修因是几生。  
乱峰寒影暮，深涧野流清。远客归心苦，难为此别情。

卷 809\_23 【送明素上人归楚覲省】

灵一

能将疏懒背时人，不厌孤萍任此身。江上昔年同出处，  
天涯今日共风尘。平湖旧隐应残雪，芳草归心未隔春。  
前路倍怜多胜事，到家知庆彩衣新。

卷 809\_24 【项王庙（一作栖一诗）】

灵一

缅想咸阳事可嗟，楚歌哀怨思无涯。八千子弟归何处，  
万里鸿沟属汉家。弓断阵前争日月，血流垓下定龙蛇。  
拔山力尽乌江水，今日悠悠空浪花。

卷 809\_25 【酬陈明府舟中见赠】

灵一

长溪通夜静，素舸与人闲。月影沈秋水，风声落暮山。  
稻花千顷外，莲叶两河间。陶令多真意，相思一解颜。

卷 809\_26 【题东兰若】

灵一

上人禅室路裴回，万木清阴向日开。寒竹影侵行径石，  
秋风声入诵经台。闲云不系从舒卷，狎鸟无机任往来。  
更惜片阳谈妙理，归时莫待暝钟催。

卷 809\_27 【送朱放】

灵一

苦见人间世，思归洞里天。纵令山鸟语，不废野人眠。

卷 809\_28 【归岑山过惟审上人别业（一作归岑山留别）】

灵一

禅客无心忆薜萝，自然行径向山多。  
知君欲问人间事，始与浮云共一过。

卷 809\_29 【于潜道中呈元八处士】

灵一

茗水滩行浅，潜州路渐深。参差远岫色，迢递野人心。  
冻涧冰难释，秋山日易阴。不知天目下，何处是云林。

卷 809\_30 【送殷判官归上都】

灵一

漾舟云路客，来过夕阳时。向背堪遗恨，逢迎宿未期。  
水容愁暮急，花影动春迟。别后王孙草，青青入梦思。

卷 809\_31 【赠别皇甫曾】

灵一

幽人从远岳，过客爱春山。高驾能相送，孤游且未还。  
紫苔封井石，绿竹掩柴关。若到云峰外，齐心去住间。

卷 809\_32 【送陈允初卜居麻园】

灵一

欲向麻源隐，能寻谢客踪。空山几千里，幽谷第三重。  
茅宇宁须葺，荷衣不待缝。因君见往事，为我谢乔松。

卷 809\_33 【秋题刘逸人林泉】

灵一

凉飙乱黄叶，迟客橘阴清。萝径封行迹，云门闭野情。  
零林秋露响，穿竹暮烟轻。莫恋幽栖地，怀安却败名。

卷 809\_34 【自大林与韩明府归郭中精舍】

灵一

野客同舟楫，相携复一归。孤烟生暮景，远岫带春晖。  
不道还山是，谁云向郭非。禅门有通隐，喧寂共忘机。

卷 809\_35 【同使君宿大梁驿】

灵一

旌旗江上出，花外卷帘空。夜色临城月，春寒度水风。  
虽然行李别，且喜语音同。若问匡庐事，终身愧远公。

卷 809\_36 【题黄公陶翰别业（一作处一诗，一作苏广文诗）】

灵一

闻说花源堪避秦，幽寻数月不逢人。烟霞洞里无鸡犬，  
风雨林间有鬼神。黄公石上三芝秀，陶令门前五柳春。  
醉卧白云闲入梦，不知何物是吾身。

卷 809\_37 【哭卫尚书】

灵一

画戟重门楚水阴，天涯欲暮共伤心。南荆双戟痕犹在，  
北斗孤魂望已深。莲花幕下悲风起，细柳营边晓月临。  
有路茫茫向谁问，感君空有泪沾襟。

卷 809\_38 【赠灵澈禅师】

灵一

禅师来往翠微间，万里千峰到剡山。  
何时共到天台里，身与浮云处处闲。

卷 809\_39 【将出宜丰寺留题山房】

灵一

池上莲荷不自开，山中流水偶然来。  
若言聚散定由我，未是回时那得回。

卷 809\_40 【妙乐观（一作题王乔观传道士所居）】

灵一

王乔所居空山观，白云至今凝不散。坛场月路几千年，  
往往吹笙下天半。瀑布西行过石桥，黄精采根还采苗。  
忽见一人擎茶碗，簞花昨夜风吹满。自言家处在东坡，  
白犬相随邀我过。松间石上有棋局，能使樵人烂斧柯。

卷 809\_41 【与元居士青山潭饮茶】

灵一

野泉烟火白云间，坐饮香茶爱此山。  
岩下维舟不忍去，青溪流水暮潺潺。

卷 809\_42 【送人得荡子归倡妇（一作行不归）】

灵一

垂涕凭回信，为语柳园人。情知独难守，又是一阳春。

· 全唐诗 ·

---

卷 809\_43 【句】

灵一

滤泉侵月起，扫径避虫行。

## 第八百一十卷

### 卷 810\_1 【听莺歌】

灵澈

新莺傍檐晓更悲，孤音清冷啭素枝。口边血出语未尽，  
岂是怨恨人不知。不食枯桑葚，不衔苦李花。偶然弄枢机，  
婉转凌烟霞。众雏飞鸣何踟促，自覩游蜂啄枯木。  
玄猿何事朝夜啼，白鹭长在汀洲宿。黑雕黄鹤岂不高，  
金笼玉钩伤羽毛。三江七泽去不得，风烟日暮生波涛。  
飞去来，莫上高城头，莫下空园里。城头鸱乌拾膾腥，  
空园燕雀争泥滓。愿当结舌含白云，五月六月一声不可闻。

### 卷 810\_2 【归湖南作】

灵澈

山边水边待月明，暂向人间借路行。  
如今还向山边去，只有湖水无行路。

卷 810\_3 【初到汀州】

灵澈

初放到沧洲，前心讵解愁。旧交容不拜，临老学梳头。  
禅室白云去，故山明月秋。几年犹在此，北户水南流。

卷 810\_4 【九日和于使君思上京亲故】

灵澈

清晨有高会，宾从出东方。楚俗风烟古，汀洲草木凉。  
山情来远思，菊意在重阳。心忆华池上，从容鸳鹭行。

卷 810\_5 【送道虔上人游方】

灵澈

律仪通外学，诗思入玄关。烟景随缘到，风姿与道闲。  
贯花留净室，咒水度空山。谁识浮云意，悠悠天地间。

卷 810\_6 【送鉴供奉归蜀宁亲】

灵澈

林间出定恋庭闹，圣主恩深暂许归。双树欲辞金锡冷，  
四花犹向玉阶飞。梁山拂汉分清境，蜀雪和烟惹翠微。  
此去不须求彩服，紫衣全胜老莱衣。

卷 810\_7 【天姥岑望天台山】

灵澈

天台众峰外，华顶当寒空。有时半不见，崔嵬在云中。

卷 810\_8 【远公墓】

灵澈

古墓石棱棱，寒云晚景凝。空悲虎溪月，不见雁门僧。

卷 810\_9 【宿东林寺（一作云门雪夜）】

灵澈

天寒猛虎叫岩雪，林下无人空有月。  
千年像教今不闻，焚香独为鬼神说。

卷 810\_10 【简寂观】

灵澈

古松古柏岩壁间，猿攀鹤巢古枝折。  
五月有霜六月寒，时见山翁来取雪。

卷 810\_11 【元日观郭将军早朝】

灵澈

欲曙九衢人更多，千条香烛照星河。  
今朝始见金吾贵，车马纵横避玉珂。

卷 810\_12 【东林寺酬韦丹刺史】

灵澈

年老心闲无外事，麻衣草座亦容身。  
相逢尽道休官好，林下何曾见一人。

卷 810\_13 【东林寺寄包侍御】

灵澈

古殿清阴山木春，池边跂石一观身。  
谁能来此焚香坐，共作垆峰二十人。

卷 810\_14 【西林寄杨公】

灵澈

日日爱山归已迟，闲闲空度少年时。  
余身定寄林中老，心与长松片石期。

卷 810\_15 【答徐广叔四问】

灵澈

童子出家无第行，随师乞食遣称名。  
长沙岂敢论年几，绛老惟知甲子生。

卷 810\_16 【闻李处士亡】

灵澈

时时闻说故人死，日日自悲随老身。  
白发不生应不得，青山长在属何人。

卷 810\_17 【句】

灵澈

松树有死枝，冢上唯莓苔。石门无人入，古木花不开。

绿竹岁寒在，故人衰老多。

月色静中见，泉声深处闻。

· 全唐诗 ·

---

古观茅山下，诸峰欲曙时。真人是黄子，玉堂生紫芝。

禅门至六祖，衣钵无人得。

古墓碑表折，荒垄松柏稀。

秋深知气正，家近觉山寒。

山僧不记重阳日，因见茱萸忆去年。

今非古狱下，莫向斗边看。

海月生残夜，江春入暮年。

窗风枯砚水，山雨慢琴弦。

卷 810\_18 【湘夫人祠】

大易

灵祠古木合，波扬大江濱。未 湘南雨，知为何处云。  
苔痕涩珠履，草色妒罗裙。妙鼓彤云瑟，羈臣不可闻。

卷 810\_19 【赠司空拾遗】

大易

侍臣何事辞云陛，江上微云见雪花。望阁未承丹凤诏，  
掩门空对楚人家。陈琳草奏才还在，王粲登楼兴未赊。  
高馆更容尘外客，仍令归路待瑶华。

卷 810\_20 【寄钱郎中】

法照

闭门深树里，闲足鸟来过。五马不复贵，一僧谁奈何。  
药苗家自有，香饭乞时多。寄语婵娟客，将心向薜萝。

卷 810\_21 【送清江上人】

法照

越人僧体古，清虑洗尘劳。一国诗名远，多生律行高。  
见山援葛藟，避世著方袍。早晚云门去，依应逐尔曹。

卷 810\_22 【送无著禅师归新罗】

法照

万里归乡路，随缘不算程。寻山百衲弊，过海一杯轻。  
夜宿依云色，晨斋就水声。何年持贝叶，却到汉家城。

卷 810\_23 【游元象泊】

释泚

空水潮色净，澹然湖上心。舳舻轻且进，汀洲如可寻。  
秋风洄溯险，落日波涛深。寂寞武陵去，中流方至今。

卷 810\_24 【北原别业】

释泚

野外车骑绝，古村桑柘阴。流莺出谷静，春草闭门深。  
学稼农为业，忘情道作心。因知上皇日，凿井在灵林。

卷 810\_25 【杂诗】

庞蕴

未识龙宫莫说珠，识珠言说与君殊。  
空拳只是婴儿信，岂得将来诳老夫。

万法从心起，心生万法生。法生同日了，来去在虚行。  
寄语修道人，空生慎勿生。如能达此理，不动出深坑。

极目观前境，寂寞无一人。回头看后底，影亦不随身。

神识苟能无挂碍，廓周法界等虚空。  
不假坐禅持戒律，超然解脱岂劳功。

日用事无别，惟吾自偶偕。头头非取舍，处处勿张乖。  
朱紫谁为号，青山绝点埃。神通并妙用，运水及搬柴。

十方同聚会，个个学无为。此是选佛场，心空及第归。

焰水无鱼下底钩，觅鱼无处笑君愁。  
可怜谷隐老禅伯，被唾如何见亦羞。

.

## 第八百一十一卷

### 卷 811\_1 【归山作】

护国

喧静各有路，偶随心所安。纵然在朝市，终不忘林峦。  
四皓将拂衣，二疏能挂冠。窗前隐逸传，每日三时看。  
靳尚那可论，屈原亦可叹。至今黄泉下，名及青云端。  
松牖见初月，花间礼古坛。何处论心怀，世上空漫漫。

### 卷 811\_2 【题醴陵玉仙观歌（一作灵一诗）】

护国

王乔一去空仙观，白云至今凝不散。星垣松殿几千秋，  
往往笙歌下天半。瀑布西行过石桥，黄精采根还采苗。  
路逢一人擎药碗，松花夜雨风吹满。自言家住在东坡，  
白犬相随邀我过。南山石上有棋局，曾使樵夫烂斧柯。

卷 811\_3 【访云母山僧】

护国

森然古岩里，净行一番僧。松下滤寒水，佛前挑夜灯。  
莲花国土异，贝叶梵书能。想到空王境，无心问爱憎。

卷 811\_4 【题王班水亭】

护国

湖上见秋色，旷然如尔怀。岂惟欢陇亩，兼亦外形骸。  
待月归山寺，弹琴坐暝斋。布衣闲自贵，何用谒天阶。

卷 811\_5 【山中寄王员外】

护国

为问幽兰桂，空山复若何。芬芳终有分，采折更谁过。  
望在轩阶近，恩沾雨露多。移居傥得地，长愿接琼柯。

卷 811\_6 【许州郑使君孩子（一作法振诗）】

护国

毛骨贵天生，肌肤片玉明。见人空解笑，弄物不知名。  
国器嗟犹小，门风望益清。抱来芳树下，时引凤雏声。

卷 811\_7 【怆故人旧居】

护国

惆怅至日暮，寒鸦啼树林。破阶苔色厚，残壁雨痕深。  
命与时不遇，福为祸所侵。空余行径在，令我叹人吟。

卷 811\_8 【逢灵道士】

护国

浮丘山上见黄冠，松柏森森登古坛。一茎青竹以为杖，  
数颗仙桃仍未餐。长安市里仍卖卜，武陵溪畔每烧丹。  
缩地往来无定所，桃源到处路漫漫。

卷 811\_9 【别盛安】

护国

情人取次几淹留，别后南州与北州。月色为怜今夜客，  
砧声那似去年秋。欲除豺虎论三略，莫对云山咏四愁。  
亲故相逢且借问，古来无种是王侯。

卷 811\_10 【伤蔡处士】

护国

篋中遗草是琅玕，对此空令洒泪看。三径尚余行迹在，  
数萤犹是映书残。晨光不借泉门晓，暝色唯添陇树寒。  
欲问皇天天更远，有才无命说应难。

卷 811\_11 【临川道中】

护国

出谷入谷路回转，秋风已至归期晚。  
举头何处望来踪，万仞千山鸟飞远。

卷 811\_12 【赠张驸马斑竹柱杖】

护国

此君与我在云溪，劲节奇文胜杖藜。  
为有岁寒堪赠远，玉阶行处愿提携。

卷 811\_13 【病愈寄友】

法振

哀乐暗成疾，卧中芳月移。西山有清士，孤啸不可追。  
捣药昼林静，汲泉阴涧迟。微踪与麋鹿，远谢求羊知。

卷 811\_14 【程评事西园之作】

法振

谁向春莺道，名园已共知。檐前回水影，城上出花枝。  
摇拂烟云动，登临翰墨随。相招能不厌，山舍为君移。

卷 811\_15 【陈九溪中草堂】

法振

溪草落溅溅，鱼飞入稻田。早寒临洞月，轻素卷帘烟。  
颯帟题新句，蓑衣象古贤。曙花闲秀色，三十六峰前。

卷 811\_16 【题天长阮少府湖上客归】

法振

孤棹移官舍，新农寄楚田。晴林渡海日，春草长湖烟。  
卧对闲鸥戏，谈经稚子贤。佳期更何许，应向啸台前。

卷 811\_17 【题万山许炼师】

法振

道成人不识，流水响空山。花暗轩窗外，云随坐卧间。  
验图名已久，绝粒事长闲。更欲昆仑去，羞看绛节还。

卷 811\_18 【河源破贼后赠袁将军】

法振

白羽三千驻，萧萧万里行。出关深汉垒，带月破蕃营。  
蔓草河原色，悲笳碎叶声。欲朝王母殿，前路驻高旌。

卷 811\_19 【越中赠程先生】

法振

纱帽度残春，虚舟寄一身。溪边逢越女，花里问秦人。  
古塞连山静，阴霞落海新。有时城郭去，暗与酒家亲。

卷 811\_20 【送常大夫赴朔方】

法振

关山今不掩，军候鸟先知。大汉嫖姚入，乌孙部曲随。  
高旌天外驻，寒角月中吹。归到长安第，花应再满枝。

卷 811\_21 【送人游闽越】

法振

不须行借问，为尔话闽中。海岛阴晴日，江帆来去风。  
道游玄度宅，身寄朗陵公。此别何伤远，如今关塞通。

卷 811\_22 【送褚先生海上寻封炼师】

法振

潮落风初定，天吴避客舟。近承三殿旨，欲向五湖游。  
不厌乌皮几，新缝鹤氅裘。明珠漂断岸，阴火映中流。  
华盖芝童引，神丹桂女收。悬知居缥缈，因为识浮丘。

卷 811\_23 【送韩侍御自使幕巡海北】

法振

微雨空山夜洗兵，绣衣朝拂海云清。幕中运策心应苦，  
马上吟诗卷已成。离亭不惜桃源醉，古道犹看蔓草生。  
因说元戎能破敌，高歌一曲陇关情。

卷 811\_24 【张舍人南溪别业】

法振

新田绕屋半春耕，藜杖闲门引客行。山翠自成微雨色，  
谿花不隐乱泉声。渔家远到堪留兴，公府悬知欲厌名。  
入夜更宜明月满，双童唤出解吹笙。

卷 811\_25 【别卢使君归故栅村】

法振

归风白马引嘶声，落日犹看楚客情。塞口竹缘空戍没，  
潮头沙拥慢冈成。松田且欲亲耕种，郡守何偏问姓名。  
东道宿程投故栅，依依渔父解相迎。

卷 811\_26 【丹阳浦送客之海上】

法振

不到终南向几秋，移居更欲近沧洲。风吹雨色连村暗，  
潮拥菱花出岸浮。漠漠望中春自艳，寥寥泊处夜堪愁。  
如君岂得空高枕，只益天书遣远求。

卷 811\_27 【月夜泛舟】

法振

西塞长云尽，南湖片月斜。漾舟人不见，卧入武陵花。

卷 811\_28 【送友人之上都】

法振

玉帛征贤楚客稀，猿啼相送武陵归。  
湖头望入桃花去，一片春帆带雨飞。

卷 811\_29 【句】

法振

画鼓催来锦臂襄，小娥双起整霓裳。

## 第八百一十二卷

### 卷 812\_1 【早发陕州途中赠严秘书】

清江

此身虽不系，忧道亦劳生。万里江湖梦，千山雨雪行。  
人家依旧垒，关路闭层城。未尽交河虏，犹屯细柳兵。  
艰难嗟远客，栖托赖深情。贫病吾将有，精修许少卿。

### 卷 812\_2 【早春书情寄河南崔少府】

清江

春日春风至，阳和似不均。病身空益老，愁鬓不知春。  
宇宙成遗物，光阴促幻身。客游伤末路，心事向行人。  
道薄犹怀土，时难欲厌贫。微才如可寄，赤县有乡亲。

卷 812\_3 【春游司直城西鸂鶒谿别业】

清江

别墅军城下，闲喧未可齐。春深花蝶梦，晓隔柳烟鞞。  
韶景浮寒水，疏杨映绿堤。沿洄看竹色，来往听莺啼。  
久慢持生术，多亲种药畦。家贫知素行，心苦见清溪。  
越客初投分，南枝得寄栖。禅机空寂寞，雅趣赖招携。  
本寺重江外，游方二室西。裴回恋知己，日夕草萋萋。

卷 812\_4 【夕次襄邑】

清江

何处戒吾道，经年远路中。客心犹向北，河水自归东。  
古戍鸣寒角，疏林振夕风。轻舟惟载月，那与故人同。

卷 812\_5 【宿严维宅简章八元（一作宿严秘书宅）】

清江

佳期曾不远，甲第即南邻。惠爱偏相及，经过岂厌频。  
秋寒林叶动，夕霁月华新。莫话羁栖事，平原是主人。

卷 812\_6 【赠淮西贾兵马使】

清江

破虏功成百战场，天书新拜汉中郎。映门旌旆春风起，  
对客弦歌白日长。阶下斗鸡花乍发，营南试马柳初黄。  
由来吴楚多同调，感激逢君共异乡。

卷 812\_7 【送坚上人归杭州天竺寺】

清江

十年劳负笈，经论化中朝。流水知乡近，和风惜别遥。  
云山零夜雨，花岸上春潮。归卧南天竺，禅心更寂寥。

卷 812\_8 【送赞律师归嵩山（一作无可诗）】

清江

禅意归心急，山深定易安。清贫修道苦，孝友别家难。  
雪路侵溪转，花宫映岳看。到时瞻塔暮，松月向人寒。

卷 812\_9 【上都酬章十八兄】

清江

每叹经年别，人生有几年。关河长问道，风雨独随缘。  
寓蝶成庄梦，怀人识祢贤。徽猷不及此，空愧白华篇。

卷 812\_10 【登楼望月寄凤翔李少尹】

清江

陌上凉风槐叶凋，夕阳秋露湿寒条。登楼望月楚山上，  
月到楼南山独遥。心送秦人趋凤阙，月随阳雁极烟霄。  
轩车不重无名客，此地谁能访寂寥。

卷 812\_11 【湘川怀古】

清江

潇湘连汨罗，复对九疑河。浪势屈原冢，竹声渔父歌。  
地荒征骑少，天暖浴禽多。脉脉东流水，古今同奈何。

卷 812\_12 【七夕】

清江

七夕景迢迢，相逢只一宵。月为开帐烛，云作渡河桥。  
映水金冠动，当风玉珮摇。惟愁更漏促，离别在明朝。

卷 812\_13 【长安卧病】

清江

身世足堪悲，空房卧病时。卷帘花雨滴，扫石竹阴移。  
已觉生如梦，堪嗟寿不知。未能通法性，讵可免支离。

卷 812\_14 【送婆罗门（一作可止诗）】

清江

雪岭金河独向东，吴山楚泽意无穷。  
如今白首乡心尽，万里归程在梦中。

卷 812\_15 【喜皇甫大夫同宿大梁驿】

清江

江头旌旆去，花外卷帘空。夜色临城月，春声渡水风。  
也知行李别，暂喜话言同。若问庐山事，终身愧远公。

卷 812\_16 【酬姚补阙南仲云溪馆中戏题随书见寄】

清江

寺溪临使府，风景借仁祠。补袞周官贵，能名汉主慈。  
卧云知独处，望月忆同时。忽枉缄中赠，琼瑶满手持。

卷 812\_17 【喜严侍御蜀还赠严秘书】

清江

往年分首出咸秦，木落花开秋又春。江客不曾知蜀路，  
旅魂何处访情人。当时望月思文友，今日迎骢见近臣。  
多羨二龙同汉代，绣衣芸阁共荣亲。

卷 812\_18 【送韦参军江陵（一作戴叔伦诗）】

清江

槐花落尽柳阴清，萧索凉天楚客情。海上旧山无的信，  
东门归路不堪行。身随幻境劳多事，迹学禅心厌有名。  
公子道存知不弃，欲依刘表住南荆。

卷 812\_19 【月夜有怀黄端公兼简朱孙二判官】

清江

月照疏林惊鹊飞，羁人此夜共无依。青门旅寓身空老，  
白首头陀力渐微。屡向曲池陪逸少，几回戎幕接玄晖。  
四科弟子称文学，五马诸侯是绣衣。江雁往来曾不定，  
野云摇曳本无机。修行未尽身将尽，欲向东山掩旧扉。

卷 812\_20 【精舍遇雨（一作可止诗）】

清江

空门寂寂淡吾身，溪雨微微洗客尘。  
卧向白云情未尽，任他黄鸟醉芳春。

卷 812\_21 【小雪（一作可止诗）】

清江

落雪临风不厌看，更多还恐蔽林峦。  
愁人正在书窗下，一片飞来一片寒。

卷 812\_22 【句】

清江

万木无一叶，客心悲此时。

## 第八百一十三卷

### 卷 813\_1 【送吕郎中赴沧州】

无可

出守沧州去，西风送旆旌。路遥经几郡，地尽到孤城。  
拜庙千山绿，登楼遍海清。何人共东望，日向积涛生。

### 卷 813\_2 【书马如文石门居】

无可

别业逸高情，暮泉喧客亭。林回天阙近，雨过石门青。  
野果谁来拾，山禽独卧听。要迎文会友，时复扫柴扃。

### 卷 813\_3 【送章正字秩满东归】

无可

朝衣登别席，春色满秦关。芸阁吏谁替，海门身又还。

寻僧流水僻，见月远林闲。虽是忘机者，难齐去住间。

卷 813\_4 【赋得望远山送客归】

无可

遥山寒雨过，正向暮天横。隐隐凌云出，苍苍与水平。  
何时凝厚地，几处映孤城。归客秋风里，回看伤别情。

卷 813\_5 【送宜春裴宰是将军旻之孙】

无可

垂白方为县，徒知大父雄。山春南去棹，楚夜北飞鸿。  
叠嶂和云灭，孤城与岭通。谁知持惠化，一境动清风。

卷 813\_6 【送朴山人归日本】

无可

海雾晚帆开，应无乡信催。水从荒外积，人指日边回。  
望国乘风久，浮天绝岛来。傥因华夏使，书札转悠哉。

卷 813\_7 【送姚宰任吉州安福县（一作送王明府之任安福）】

无可

落絮满衣裳，携琴问酒乡。挂帆南入楚，到县半浮湘。  
吏散翠禽下，庭闲斑竹长。人安宜远泛，沙上蕙兰香。

卷 813\_8 【送李少府之任临邛】

无可

邛南方作尉，调补一何卑。发论唯公干，承家乃帝枝。  
山长风袅栈，江荫石和澌。旧井王孙宅，还寻独有期。

卷 813\_9 【游山寺】

无可

千峰路盘尽，林寺昔何名。步步入山影，房房闻水声。  
多年人迹断，残照石阴清。自可求居止，安闲过此生。

卷 813\_10 【酬姚员外见过林下】

无可

扫苔迎五马，蒔药过申钟。鹤共林僧见，云随野客逢。  
入楼山隔水，滴旆露垂松。日暮题诗去，空知雅调重。

卷 813\_11 【寄华州马戴（一作秋中闻马戴游华山因寄）】

无可

三峰待秋上，鸟外挂衣巾。犹见无穷景，应非暂往身。  
水寒仙掌路，山远华阳人。欲问坛边月，寻思阙复新。

卷 813\_12 【秋夜寄青龙寺空贞二上人】

无可

夜来思道侣，木叶向人飘。精舍池边古，秋山树下遥。  
磬寒彻几里，云白已经宵。未得同居止，萧然自寂寥。

卷 813\_13 【过杏溪寺寄姚员外】

无可

门径众峰头，盘岩复转沟。云僧随树老，杏水落江流。  
峡狖有时到，秦人今日游。谢公多晚眺，此景在南楼。

卷 813\_14 【送僧归中条（一作送觉法师往中条旧隐）】

无可

夜叶动飘飘，寒来话数宵。卷经归鸟外，转雪过山椒。  
旧长松杉大，难行水石遥。元戎宗内学，应就白云招。

卷 813\_15 【送人罢举东游】

无可

东堂今已负，况此远行难。兼雨风声过，连天草色干。  
鸿嘶荒垒闭，兵烧广川寒。若向龙门宿，悬知拭泪看。

卷 813\_16 【金州冬月陪太守游池（一作林下对雪送僧归草堂寺）】

无可

残腊雪纷纷，林间起送君。苦吟行迥野，投迹向寒云。  
绝顶晴多去，幽泉冻不闻。唯应草堂寺，高枕脱人群。

卷 813\_17 【寄青龙寺原上人（一作冬日寄僧友）】

无可

敛屣入寒竹，安禅过漏声。高杉残子落，深井冻痕生。  
罢磬风枝动，悬灯雪屋明。何当招我宿，乘月上方行。

卷 813\_18 【秋寄从兄贾岛（一作秋夜宿西林寄贾岛）】

无可

暝虫喧暮色，默思坐西林。听雨寒更彻，开门落叶深。  
昔因京邑病，并起洞庭心。亦是吾兄事，迟回共至今。

卷 813\_19 【新年】

无可

燃灯朝复夕，渐作长年身。紫阁未归日，青门又见春。  
掩关寒过尽，开定草生新。自有林中趣，谁惊岁去频。

卷 813\_20 【夏日送崔秀才游南】

无可

南方山水地，念子为贫游。纵是逢佳景，那能缓旅愁。  
夕阳行远道，烦暑在孤舟。莫向巴江过，猿啼促泪流。

卷 813\_21 【晚秋酬姚合见寄】

无可

新命起高眠，江湖空浩然。木衰犹有菊，燕去即无蝉。  
分察千官内，孤怀远岳边。萧条人外寺，暌阻又经年。

卷 813\_22 【暮秋宿友人居】

无可

招我郊寄宿，开门但苦吟。秋眠山烧尽，暮歇竹园深。  
寒浦鸿相叫，风窗月欲沈。翻嫌坐禅石，不在此松阴。

卷 813\_23 【送李骑曹之武宁（一作送威武李骑曹之灵武宁省）】

无可

一岁一归宁，凉天数骑行。河来当塞曲，山远与沙平。  
纵猎旗风卷，听笳帐月生。新鸿引寒色，回日满京城。

卷 813\_24 【秋日寄厉玄先辈】

无可

杨柳起秋色，故人犹未还。别离俱自苦，少壮岂能闲。  
夜雨吟残烛，秋城忆远山。何当一相见，语默此林间。

卷 813\_25 【冬晚与诸文士会太仆田卿宅】

无可

从容启华馆，馥玉复烧兰。是岁兹旬尽，良宵几刻残。  
风回松竹动，人息斗牛寒。此后思良集，须期月再圆。

卷 813\_26 【赠诗僧】

无可

寒山对水塘，竹叶影侵堂。洗药冰生岸，开门月满床。  
病多身又老，枕倦夜兼长。来谒吾曹者，呈诗问否臧。

卷 813\_27 【寒夜过睿川师院】

无可

长生推献寿，法坐四朝登。问难无强敌，声名掩古僧。  
绝尘苔积地，栖竹鸟惊灯。语默俱忘寐，残窗半月棱。

卷 813\_28 【送颢法师往太原讲兼呈李司徒】

无可

近腊辞精舍，并州谒尚公。路长山忽尽，塞广雪无穷。  
讲席开晴垒，禅衣涉远风。闻经诸弟子，应满此门中。

卷 813\_29 【冬日诸禅自商山礼正师真塔回见访】

无可

久思今忽来，双屦污青苔。拂雪从山起，过房礼塔回。  
偈留闲夜作，禅请暂时开。欲作孤云去，赋诗余不才。

卷 813\_30 【题青龙寺纵公房】

无可

从谁得法印，不离上方传。夕磬城霜下，寒房竹月圆。  
烟残衰木畔，客住积云边。未隐沧洲去，时来于此禅。

卷 813\_31 【赠圭峰禅师（一作寄圭峰宗密师）】

无可

绝壑禅床底，泉分落石层。雾交高顶草，云隐下方灯。  
朝满倾心客，溪连学道僧。半旬持一食，此事有谁能。

卷 813\_32 【陪姚合游金州南池（一作金州夏晚陪姚合员外游南池）】

无可

柳暗清波涨，冲萍复漱苔。张筵白鸟起，扫岸使君来。  
洲岛秋应没，荷花晚尽开。高城吹角绝，驺驭尚裴回。

卷 813\_33 【金州别姚合】

无可

日日西亭上，春留到夏残。言之离别易，勉以道途难。  
山出一千里，溪行三百滩。松间楼里月，秋入五陵看。

卷 813\_34 【夏日送田中丞赴蔡州】

无可

出守汝南城，应多恋阙情。地遥人久望，风起旆初行。  
楚庙繁蝉断，淮田细雨生。赏心知有处，蒋宅古津平。

卷 813\_35 【菊】

无可

东篱摇落后，密艳被寒催。夹雨惊新拆，经霜忽尽开。  
野香盈客袖，禁蕊泛天杯。不共春兰并，悠扬远蝶来。

卷 813\_36 【松】

无可

枝干怪鳞皴，烟梢出涧新。屈盘高极目，苍翠远惊人。  
待鹤移阴过，听风落子频。青青寒木外，自与九霄邻。

卷 813\_37 【兰】

无可

兰色结春光，氛氲掩众芳。过门阶露叶，寻泽径连香。  
畹静风吹乱，亭秋雨引长。灵均曾采撷，纫珮挂荷裳。

卷 813\_38 【陨叶】

无可

绕巷夹溪红，萧条逐北风。别林遗宿鸟，浮水载鸣虫。  
石小埋初尽，枝长落未终。带霜书丽什，闲读白云中。

卷 813\_39 【李常侍书堂】

无可

结构因坟籍，檐前竹未生。涂油窗日早，阅槧幌风轻。  
息架蛩惊客，垂灯雨过城。已应穷古史，师律孰齐名。

卷 813\_40 【寄和蔡州田郎中（一作寄和蔡州中丞题蒋亭）】

无可

遗迹仍留蔡，幽人出汉朝。门深荒径在，台迥数峰遥。  
岸石鼓相倚，窗松偃未凋。寻思方一去，岂待使君招。

卷 813\_41 【经贞女祠】

无可

朝赛暮还祈，开唐复历隋。精诚山雨至，岁月庙松衰。  
窥穴龙潭黑，过门鸟道危。不同巫峡女，来往楚王祠。

卷 813\_42 【行汉水晚次神滩阻风】

无可

惊风山半起，舟子忽停桡。岸荻吹先乱，滩声落更跳。  
听松今欲暮，过岛或明朝。若尽平生趣，东浮看石桥。

卷 813\_43 【送田中丞使西戎（同用旗字）】

无可

朝元下赤墀，玉节使西夷。关陇风回首，河湟雪洒旗。  
碛砂行几月，戎帐到何时。应尽平生志，高全大国仪。

卷 813\_44 【送董正字归觐毗陵】

无可

暂辞黜校去，未见见新鸿。路入江波上，人归楚邑东。  
山遥晴出树，野极暮连空。何以念兄弟，应思洁膳同。

卷 813\_45 【送邵锡及第归湖州】

无可

春关鸟罢啼，归庆浙烟西。郡守招延重，乡人慕仰齐。  
橘青逃暑寺，茶长隔湖溪。乘暇知高眺，微应辨会稽。

卷 813\_46 【送薛重中丞充太原副使】

无可

中司出华省，副相晋阳行。书答偏州启，筹参上将营。  
踏沙夜马细，吹雨晓笳清。正报胡尘灭，桃花汾水生。

卷 813\_47 【送灵武李侍御】

无可

灵州天一涯，幕客似还家。地得江南壤，程分碛里砂。  
禁盐调上味，麦穗结秋花。前席因筹画，清吟塞日斜。

卷 813\_48 【冬夜姚侍御宅送李廓少府】

无可

王事圭峰下，将还禁漏余。偶欢新岁近，惜别后期疏。  
雪罢见来吏，川昏聊整车。独吟多暇日，应寄柏台书。

卷 813\_49 【送喻臬及第归阳羨】

无可

姓字载科名，无过子最荣。宗中初及第，江上覲难兄。  
月向波涛没，茶连洞壑生。石桥高思在，且为看东坑。

卷 813\_50 【送沅江宋明府即开府璟之孙】

无可

初闻从事日，鄂渚动芳菲。一遂钧衡荐，今为长吏归。  
人临沅水望，雁映楚山飞。唯有传声政，家风重发挥。

卷 813\_51 【送薛秀才游河中兼投任郎中留后】

无可

诗古赋纵横，令人畏后生。驾言游禹迹，知己在蒲城。  
日射云烟散，风吹草木荣。孤吟临寇境，莫问请长缨。

卷 813\_52 【寄姚谏议】

无可

鸣鞭静路尘，籍籍谏垣臣。函疏辞专密，炉香立独亲。  
篋多临水作，窗宿卧云人。危坐开寒纸，灯前起草频。

卷 813\_53 【大理正任二十和江淹拟古诗二十章寄示】

无可

不啻回青眼，应疑似碧云。古风真往哲，雅道滥朝闻。  
活狱威豪右，销时赖典坟。如何经济意，未克致吾君。

卷 813\_54 【寄殿院薛侍御】

无可

名高意本闲，浮俗自难攀。佐蜀连钱出，朝天獬豸还。  
回翔历清院，弹奏迥离班。休浣通玄旨，留僧昼掩关。

卷 813\_55 【禅林寺】

无可

台山朝佛陇，胜地绝埃氛。冷色石桥月，素光华顶云。  
远泉和雪溜，幽磬带松闻。终断游方念，炉香继此焚。

## 第八百一十四卷

### 卷 814\_1 【奉和裴舍人春日杜城旧事】

无可

早晚辞纶綍，观农下杜西。草新池似镜，麦暖土如泥。  
鸬鹭依川宿，骅骝向野嘶。春来诗更苦，松韵亦含凄。

### 卷 814\_2 【酬厉侍御秋中思归树石所居见寄】

无可

三峰居接近，数里蹑云行。深去通仙境，思归厌宦名。  
月从高掌出，泉向乱松鸣。坐石眠霞侣，秋来短褐成。

### 卷 814\_3 【奉和段著作山居呈诸同志三首次本韵】

无可

香花怀道侣，巾舄立双童。解印鸳鸿内，抽毫水石中。

· 全唐诗 ·

---

履温行烧地，衣赤动霞风。又似朝天去，诸僧不可同。

官辞中秘府，疏放野麋齐。偃仰青霄近，登临白日低。  
折腰窥乳窦，定足涉冰溪。染翰挥岚翠，僧名几处题。

暂收丹陛迹，独往乱山居。入雪知人远，眠云觉俗虚。  
足垂岩顶石，纓濯洞中渠。只见僧酬答，新归绝壑书。

卷 814\_4 【春日送丽处士归龙山】

无可

爱弟直霜台，家山羨独回。出门时返顾，何日更西来。  
柳亦临关发，花应到越开。渔舟谁伴上，依旧恣沿洄。

卷 814\_5 【寄兴善寺崔律师】

无可

沐浴前朝像，深秋白发师。从来居此寺，未省有东池。  
幽石丛圭片，孤松动雪枝。顷曾听道话，别起远山思。

卷 814\_6 【送清散游太白山】

无可

卷经归太白，蹑藓别萝龕。若履浮云上，须看积翠南。  
倚身松入汉，瞑目月离潭。此境堪长往，尘中事可谙。

卷 814\_7 【冬晚姚谏议宅会送元绪上人归南山】

无可

禅客诗家见，凝寒忽告还。分题回谏笔，留偈在商关。  
盘径缘高雪，闲房在半山。自知麋鹿性，亦欲离人间。

卷 814\_8 【送契公自桂阳赴南海】

无可

南行登岭首，与俗洗烦埃。罄罢孤舟发，禅移积瘴开。  
中餐湘鸟下，朝讲海人来。莫便将经卷，炎方去不回。

卷 814\_9 【冬中与诸公会宿姚端公宅，怀永乐殷侍御】

无可

柱史静开筵，所思何地偏。故人为县吏，五老远峰前。  
宾榻寒侵树，公庭夜落泉。会当随假务，一就白云禅。

卷 814\_10 【同刘秀才宿见赠】

无可

浮云流水心，只是爱山林。共恨多年别，相逢一夜吟。  
既能持苦节，勿谓少知音。忆就西池宿，月圆松竹深。

卷 814\_11 【官池上】

无可

迴疏城阙内，寒泻出云波。岸广山鱼到，汀闲海鹭过。  
泛沟侵道急，流叶入宫多。移舸浮中沚，清宵彻晓河。

卷 814\_12 【中秋月】

无可

蟾宜天地静，三五对阶蓂。照耀超诸夜，光芒掩众星。  
影寒池更澈，露冷树销青。枉值中秋半，长乖宿洞庭。

卷 814\_13 【雪】

无可

松亚竹珊珊，心知万井欢。山明迷旧径，溪满涨新澜。  
客醉瑶台曙，兵防玉塞寒。红楼知有酒，谁肯学袁安。

卷 814\_14 【宿西岳白石院】

无可

白石上嵌空，寒云西复东。瀑流悬住处，雏鹤失禅中。  
岳壁松多古，坛基雪不通。未能亲近去，拥褐愧相同。

卷 814\_15 【送僧】

无可

四海无拘系，行心兴自浓。百年三事衲，万里一枝筇。  
夜减当晴影，春消过雪踪。白云深处去，知宿在何峰。

卷 814\_16 【送赞律师归嵩山（一作清江诗）】

无可

禅意归心急，山深定易安。清贫修道苦，孝友别家难。  
雪路寻溪转，花宫映岳看。到时孤塔暮，松月向人寒。

卷 814\_17 【春晚喜悟禅师自琉璃上方见过】

无可

琉璃师到城，谈性外诸经。下岭雪霜在，近人林木清。  
苔痕深草履，瀑布滴铜瓶。乐问山中事，宵言彻晓星。

卷 814\_18 【秋暮与诸文士集宿姚端公所居】

无可

宵清月复圆，共集侍臣筵。独寡区中学，空论树下禅。  
风多秋晚竹，云尽夜深天。此会东西去，堪愁又隔年。

卷 814\_19 【客中闻从兄岛游蒲绛因寄】

无可

遥遥行李心，苍野入寒深。吟待黄河雪，眠听绛郡砧。  
差期逢缺月，访信出空林。何处孤灯下，只闻嘹唳禽。

卷 814\_20 【送李长吉之任东井】

无可

江盘栈转虚，候吏拜行车。家世维城后，官资宰邑初。  
市饶黄犊卖，田蹶白云鉏。万里千山路，何因欲寄书。

卷 814\_21 【宿安国简公院（一作安国寺静居法师故院）】

无可

雨后清凉境，因还欲不回。井甘桐有露，竹迸地多苔。  
幡映宫墙动，香从御苑来。青龙旧经疏，寥落有谁开。

卷 814\_22 【京口别崔固】

无可

积雨晴时近，西风叶满泉。相逢嵩岳客，共听楚城蝉。  
宿馆横秋岛，归帆张远田。别君还寂寞，不似剡中年。

卷 814\_23 【中秋夜陇州徐常侍座中咏月】

无可

陇城秋月满，太守待停歌。与鹤来松杪，开烟出海波。  
气笼星欲尽，光满露初多。若遣山僧说，高明不可过。

卷 814\_24 【中秋江驿示韦益】

无可

莫惜三更坐，难销万里情。同看一片月，俱在广州城。  
泪逐金波满，魂随夜鹊惊。支颐乡思断，无语到鸡鸣。

卷 814\_25 【中秋台看月】

无可

海雨洗烟埃，月从空碧来。水光笼草树，练影挂楼台。  
皓耀迷鲸口，晶荧失蚌胎。宵分凭栏望，应合见蓬莱。

卷 814\_26 【中秋夜南楼寄友人】

无可

海月出白浪，湖光射高楼。朗吟无绿酒，贱价买清秋。  
气冷鱼龙寂，轮高星汉幽。他乡此夜客，对酌经多愁。

卷 814\_27 【吊从兄岛】

无可

尽日叹沉沦，孤高碣石人。诗名从盖代，谪宦竟终身。  
蜀集重编否，巴仪薄葬新。青门临旧卷，欲见永无因。

卷 814\_28 【题崔驸马林亭】

无可

宫花野药半相和，藤蔓参差惜不科。纤草连门留径细，  
高楼出树见山多。洞中避暑青苔满，池上吟诗白鸟过。  
更买太湖千片石，叠成云顶绿嵒峨。

卷 814\_29 【送韩校书赴江西】

无可

车马东门别，扬帆过楚津。花繁期到幕，雪在已离秦。  
吟落江沙月，行飞驿骑尘。猿声孤岛雨，草色五湖春。  
折苇鸣风岸，遥烟起暮蘋。鄱江连郡府，高兴寄何人。

卷 814\_30 【送姚中丞赴陕州】

无可

二陕周分地，恩除左掖臣。门阑开幕重，枪甲下天新。  
夹道行霜骑，迎风满草人。河流银汉水，城赛铁牛神。  
意气思高谢，依违许上陈。何妨向红旆，自与白云亲。

卷 814\_31 【送李使君赴琼州兼五州招讨使】

无可

分竹雄兼使，南方到海行。临门双旆引，隔岭五州迎。  
猿鹤同枝宿，兰蕉夹道生。云垂前骑失，山豁去帆轻。  
雨雾蒸秋岸，浪涛震夜城。政闲开迥阁，鼓枕岛风清。

卷 814\_32 【送姚明府赴招义县】

无可

濠梁古县城，结束赴王程。道路携家去，波涛隔月行。  
车临芳草下，吏踏落花迎。暮郭山遥见，春洲鸟不惊。  
风烟谿国远，桑柘楚田平。何以书能化，长淮彻海清。

卷 814\_33 【送杜司马再游蜀中】

无可

为客应非愿，愁成欲别时。还游蜀国去，不惜杜陵期。  
剑水啼猿在，关林转栈迟。日光低峡口，雨势出蛾眉。  
山迥逢残角，云开识远夷。勿令双鬓发，并向锦城衰。

卷 814\_34 【赠王将军】

无可

勋高绝少年，分卫玉阶前。雄勇明王重，温恭执友贤。  
功书唐史满，名到虏庭偏。剑彩浮龙影，衣香袭御烟。  
搜书秋霁阁，走马夕阳田。急兔投深草，瞋鹰下半天。  
野人盈邸第，朝客醉盘筵。位在将军列，官随宪府迁。  
刻心思报国，吁气欲开边。选帅如公议，须知少比肩。

卷 814\_35 【寄羽林卢大夫将军】

无可

将军直禁闱，绣服耀金羁。羽卫九天静，英豪四塞知。  
望云回朔雁，隔水射宫麋。旧国无归思，秋堂梦战时。

门风荀氏敌，剑艺霍家推。计日旌旄下，萧萧万马随。

卷 814\_36 【书事寄万年厉员外】

无可

帝城皆剧县，令尹美居东。遂拜赵张下，暂离星象中。  
拥归从北阙，送上动南宫。举起盆中日，驱行草上风。  
不惊卢犬吠，渐见夏台空。紫禁黄山绕，沧溟素浚通。  
封疆亲日月，邑里出王公。逐盗千门启，兴祥五稼丰。  
胥徒迎晓集，赋税共秋终。条教关天道，歌谣入圣聪。  
土膏寒麦覆，人海昼尘蒙。廨宇松连翠，朝街日散红。  
文场新桂茂，粉署旧兰崇。留客把盈爵，抽毫咏早鸿。  
前驺潘岳贵，故里邵平穷。劝隐莲峰久，期耕树谷同。  
鳧飞将去叶，剑气尚埋丰。何必华阴土，方垂拂拭功。

卷 814\_37 【小雪】

无可

片片互玲珑，飞扬玉漏终。乍微全满地，渐密更无风。  
集物圆方别，连云远近同。作膏凝瘠土，呈瑞下深宫。  
气射重衣透，花窥小隙通。飘秦增旧岭，发汉揽长空。  
迥冒巢松鹤，孤鸣穴岛虫。过三知腊尽，盈尺贺年丰。  
委积休闻竹，稀疏渐见鸿。盖沙资澶漫，洒海助冲融。

草木潜加润，山河更益雄。因知天地力，覆育有全功。

卷 814\_38 【和宾客相国咏雪诗】

无可

近腊千岩白，迎春四气催。云阴连海起，风急度山来。  
尽日隋堤絮，经冬越岭梅。艳疑歌处散，轻似舞时回。  
道蕴诗传丽，相如赋骋才。霁添松筱媚，寒积蕙兰猜。  
暗涨宫池水，平封辇路埃。烛龙初照耀，巢鹤乍裴回。  
檐日琼先挂，墙风粉旋摧。五门环玉垒，双阙对瑶台。  
绮席陵寒坐，珠帘远曙开。灵芝霜下秀，仙桂月中栽。  
卷幌书千帙，援琴酒百杯。垂休编太史，呈瑞表中台。  
皓夜迷三径，浮光彻九垓。兹辰是丰岁，歌咏属良哉。

卷 814\_39 【中秋夜君山脚下看月】

无可

汹涌吹苍雾，朦朧吐玉盘。雨师清滓秽，川后扫波澜。  
气射繁星灭，光笼八表寒。来驱云涨晚，路上碧霄宽。  
熠熠游何在，蟾蜍食渐难。棹飞银电碎，林映白虹攒。  
水魄连空合，霜辉压树干。夜深高不动，天下仰头看。

卷 814\_40 【哭张籍司业】

无可

先生抱衰疾，不起茂陵间。夕临诸孤少，荒居吊客还。  
遗文禅东岳，留语葬乡山。多雨铭旌故，残灯素帐闲。  
乐章谁与集，垄树即堪攀。神理今难问，予将叫帝关。

卷 814\_41 【寄题庐山二林寺】

无可

庐岳东南秀，香花惠远踪。名齐松岭峻，气比沃州浓。  
积岫连何处，幽崖越几重。双流溢隐隐，九派棹憧憧。  
山限东西寺，林交旦暮钟。半天倾瀑溜，数郡见炉峰。  
岩并金绳道，潭分玉像容。江微匡俗路，日杲晋朝松。  
棕径新苞拆，梅篱故叶壅。岚光生叠砌，霞焰发高墉。  
窗籁虚闻狖，庭烟黑过龙。定僧仙峤起，逋客虎溪逢。  
濩落垂杨户，荒凉种杏封。塔留红舍利，池吐白芙蓉。  
画壁披云见，禅衣对鹤缝。喧经泉滴沥，没履草丰茸。  
翠窦鼓攀乳，苔桥侧杖筇。探奇盈梦想，搜峭涤心胸。  
冥奥终难尽，登临惜未从。上方薇蕨满，归去养乖慵。

卷 814\_42 【御沟水】

无可

鉴禁疏云数道开，垂风岸柳拂青苔。  
银波玉沫空池去，曾历千岩万壑来。

卷 814\_43 【中秋月彩如昼，寄上南海从翁侍御】

无可

海静天高景气殊，鲸睛失彩蚌潜珠。  
不知今夜越台上，望见瀛洲方丈无？

.

## 第八百一十五卷

### 卷 815\_1 【奉酬于中丞使君郡斋卧病见示一首】

皎然

宿昔祖师教，了空无不可。枯槁未死身，理心寄行坐。  
仁公施春令，和风来泽我。生成一草木，大道无负荷。  
论入空王室，明月开心胸。性起妙不染，心行寂无踪。  
若非禅中侣，君为雷次宗。比闻朝端名，今贻郡斋作。  
真思凝瑶瑟，高情属云鹤。抉得骊龙珠，光彩曜掌握。  
若作诗中友，君为谢康乐。盘薄西山气，贮在君子衿。  
澄澹秋水影，用为字人心。群物如凫鹭，游翱爱清深。  
格居第一品，高步凌前躅。精义究天人，四坐听不足。  
伊昔柳太守，曾赏汀洲蘋。如何五百年，重见江南春。  
公每省往事，咏歌怀昔辰。以兹得高卧，任物化自淳。  
还因访禅隐，知有雪山人。

### 卷 815\_2 【赠李中丞洪一首】

皎然

深沈阃外略，奕世当荣寄。地裂大将封，家传介珪瑞。

至今漳河俗，犹受仁人赐。公初镇惟邢，决胜无精兵。  
重围逼大敌，六月守孤城。政用仁恕立，恩由赏罚明。  
遂令麾下士，感德不顾生。于时闻王师，诸将兵颇黷。  
天子狩南汉，烟尘满函谷。纯臣独耿介，下士多反覆。  
明公仗忠节，一言感万夫。物性如蒺藜，化作春兰敷。  
见说金被烁，终期玉有瑜。移官万里道，君子情何如。  
伊昔避事心，乃是方袍客。顿了空王旨，仍高致君策。  
安知七十年，一朝值宗伯。言如及清风，醒然开我怀。  
宴息与游乐，不将衣褐乖。海底取明月，鲸波不可度。  
上有巨蟒吞，下有毒龙护。一与吾师言，乃于中心悟。  
咄哉冥冥子，胡为自尘污。

卷 815\_3 【杼山禅居寄赠东溪吴处士冯一首】

皎然

青云何润泽，下有贤人隐。路入菱湖深，迹与黄鹤近。  
野风吹白芷，山月摇清轸。诗祖吴叔庠，致君名不尽。  
身当青山秀，文体多郢声。澄澈湘水碧，沉寥楚山青。  
时人格不同，至今罕知名。昔贤敦师友，此道君独行。  
既得庐霍趣，乃高雷远情。别时春风多，扫尽雪山雪。  
为君中夜起，孤坐石上月。悠然遗尘想，邈矣达性说。  
故人不在兹，幽桂惜未结。

卷 815\_4 【妙喜寺高房期灵澈上人不至，重招之一首】

皎然

晨起峰顶心，怀人望空碧。扫雪开寺门，洒水净僧席。  
言笑形外阻，风仪想中覿。驰心惊叶动，倾耳闻泉滴。  
岂虑咆虎逢，乍疑崩湍隔。前期或不顾，知尔隳常格。  
如今谁山下，秋霖步淅沥。吾亦聊自得，行禅荷轻策。  
松声畅幽情，山意导遐迹。举目无世人，题诗足奇石。  
贫山何所有，特此邀来客。

卷 815\_5 【奉和薛员外谊赠汤评事衡反招隐之迹兼见寄十二韵】

皎然

喜友称高儒，旷怀美无度。近为东田诱，遂耽西山趣。  
庭有介隐心，得无云泉误。府公中司贵，频贻咫尺素。  
郡佐仙省高，亦赠琼瑶句。诮兹长往志，纒彼独游步。  
禅子方外期，梦想山中路。艰难亲稼穡，晨夕苦烟雾。  
曷若孟尝门，日荣国土遇。铿锵聆绮瑟，攀折迩琼树。  
幽践随鹿麋，久期怨蟾兔。情同不系舟，有迹道所恶。

卷 815\_6 【答黎士曹黎生前适越后之楚】

皎然

楚木纷如麻，高松自孤直。愿得苦寒枝，与君比颜色。  
故乡眇天末，羁旅沧江隅。委质在忠信，苦心无变渝。  
何繇表名义，赠君金轳钭。何以美知才，投我悬黎珠。  
遽为千里别，南风思越绝。爱君随海鸥，倚棹宿沙月。  
不栖恶木上，肯蹈巴蛇穴。一上萧然峰，拟踪幽人辙。  
晨兴独西望，郢水期溯沿。夜到洞庭月，秋经云梦天。  
黎生知吾道，此地不潸然。欲寄楚人住，学拏渔子船。  
奈何北风至，搅我窗中弦。游子动归思，江蓠亦绵绵。  
筐中封禅书，欲献无由缘。岂乏晨风翼，翻飞到日边。

卷 815\_7 【答豆卢次方】

皎然

吾爱道交论，为高贵世名。昔称柴桑令，今闻豆卢生。  
彼生清淮气，独钟文中彩。近作公宴诗，如逢何柳在。  
吾用古人耳，采君四坐珍。贤士胜朝晖，温温无冬春。  
朝晖烁我肌，贤士清我神。微尔与云鹤，幽怀何由申。  
别来秋风至，独坐楚山碧。高月当清冥，禅心正寂历。  
增波徒相骇，人远情不隔。有书遗琼什，以代貂襜褕。  
风教凌越绝，声名掩吴趋。悬璧安可酬，徒倚还踟蹰。

卷 815\_8 【答苏州韦应物郎中】

皎然

诗教殆沦缺，庸音互相倾。忽观风骚韵，会我夙昔情。  
荡漾学海资，郁为诗人英。格将寒松高，气与秋江清。  
何必邺中作，可为千载程。受辞分虎竹，万里临江城。  
到日扫烦政，况今休黠兵。应怜禅家子，林下寂无营。  
迹隳世上华，心得道中精。脱略文字累，免为外物撓。  
书衣流埃积，砚石驳藓生。恨未识君子，空传手中琼。  
安可诱我性，始愿愆素诚。为无鸞鷟音，继公云和笙。  
吟之向禅藪，反愧幽松声。

卷 815\_9 【答郑方回】

皎然

独禅外念入，中夜不成定。顾我憔悴容，泽君阳春咏。  
词贞思且逸，琼彩何晖映。如聆云和音，况睹声名盛。  
琴语掩为闻，山心声宜听。是时寒光澈，万境澄以净。  
高秋日月清，中气天地正。远情偶兹夕，道用增寥曩。  
思君处虚空，一操不可更。时美城北徐，家承谷口郑。  
轩车未有辙，蒿兰且同径。庄生诚近名，夫子罕言命。  
是以耕楚田，旷然殊独行。萎蕤鸾凤彩，特达珪璋性。  
通隐嘉黄绮，高儒重荀孟。世污我未起，道蹇吾犹病。

· 全唐诗 ·

---

逸翮思冥冥，潜鳞乐游泳。宗师许学外，恨不逢孔圣。  
说诗迷颓靡，偶俗伤趋竞。此道谁共诤，因君情欲罄。

卷 815\_10 【答俞校书冬夜】

皎然

夜闲禅用精，空界亦清迥。子真仙曹吏，好我如宗炳。  
一宿覩幽胜，形清烦虑屏。新声殊激楚，丽句同歌郢。  
遗此感予怀，沈吟忘夕永。月彩散瑶碧，示君禅中境。  
真思在杳冥，浮念寄形影。遥得四明心，何须蹈岑岭。  
诗情聊作用，空性惟寂静。若许林下期，看君辞簿领。

卷 815\_11 【妙喜寺达公禅斋寄李司直公孙、房都曹德裕...四十二韵】

皎然

我祖传六经，精义思朝彻。方舟颇周览，逸书亦备阅。  
墨家伤刻薄，儒氏知优劣。弱植庶可凋，苦心未尝辍。  
中年慕仙术，永愿传其诀。岁驻若木景，日餐琼禾屑。  
婣娟羨门子，斯语岂徒设。天上生白榆，葳蕤信好折。  
实可反柔颜，花堪养玄发。求之性分外，业弃金亦竭。  
药化成白云，形凋辞素穴。一闻西天旨，初禅已无热。  
涓子非我宗，然公有真诀。却寻丘壑趣，始与纓绂别。  
野饭敌膏粱，山楹代藻悦。与君北岩侣，游寓日常晷。

静对春谷泉，晴披阳林雪。境清觉神王，道胜知机灭。  
诣寂长杳冥，忘归暂采撷。物生岂有心，丽容俟予别。  
桂子何莫苓，琪葩亦皎洁。此木生意高，亦与众芳列。  
赏墨识屡换，省躬悟弥切。微尚若不亏，足以全吾节。  
北风吹蕙带，萧寥闻蜻蛚。宿昔庐峰期，流芳已再歇。  
不有清屏鉴，使我商弦绝。愿寄千里心，月高不可掇。  
优游邦之直，远矣踵前烈。立俗忘毁誉，遇物遗巧拙。  
真气独翛然，轩裳讵能继。都曹风韵整，纲纪信明决。  
于交必倾写，立行岂矜伐。政与清渭同，分流自澄澈。  
裴侯资亮直，中诚岂徒说。古人比明义，清士愿交结。  
温温躬珪彩，终始声不缺。颜生炯介士，有志不可越。  
仗义冒险难，持操去淄涅。世论高二贤，贤贤继前哲。  
四子遭明盛，哀然皆秀杰。理名虽殊迹，悟道宁异辙。  
爱尔竹柏姿，为予寒不折。

卷 815\_12 【遥酬袁使君高春暮行县，过报德寺见怀】

皎然

江春行求瘼，偶与真境期。见说三陵下，前朝开佛祠。  
停舟仰丽刹，绣组发香墀。咫尺空界色，天人花落时。  
盛游限羸疾，悚踊瞻旌旗。峰翠羨闲步，松声入遥思。  
素高淮阳理，况负东山姿。迨此一登览，深情见新诗。

卷 815\_13 【冬日遥和卢使君幼平、綦毋居士游法华寺高顶临湖亭】

皎然

仁坊标绝境，廉守躡高踪。天晓才分刹，风传欲尽钟。  
城中归路远，湖上碧山重。水照千花界，云开七叶峰。  
寒芳艾绶满，空翠白纶浓。逸韵知难继，佳游恨不逢。  
仍闻抚禅石，为我久从容。

卷 815\_14 【秋日遥和卢使君游何山寺宿敷上人房论涅槃经义】

皎然

江郡当秋景，期将道者同。迹高怜竹寺，夜静赏莲宫。  
古磬清霜下，寒山晓月中。诗情缘境发，法性寄筌空。  
翻译推南本，何人继谢公。

卷 815\_15 【酬秦山人系题赠】

皎然

出斋步杉影，手自开禅扉。花满不污地，云多从触衣。  
思山石藓净，款客露葵肥。果得宗居士，论心到极微。

卷 815\_16 【奉酬袁使君高寺院新亭对雨（其亭即使君所创）】

皎然

兹亭迹素浅，胜事并随公。法界飘香雨，禅窗洒竹风。  
浮烟披夕景，高鹤下秋空。冥寂四山久，宁期此会同。

卷 815\_17 【奉酬颜使君真卿见过郭中寺寺无山水之赏...以答焉】

皎然

州西柳家寺，禅舍隐人间。证性轻观水，栖心不买山。  
履声知客贵，云影悟身闲。彦会前贤事，方今可得攀。

卷 815\_18 【酬乌程杨明府华雨后小亭对月见呈】

皎然

夜凉喜无讼，霁色摇闲情。暑退不因雨，陶家风自清。  
凝弦停片景，发咏静秋声。何事禅中隐，诗题忽记名。

卷 815\_19 【自苏州访医回酬卢士关判官见赠】

皎然

寻医初疾理，忽忆故山云。远访桑公子，还依柳使君。  
周旋承惠爱，佩服比兰薰。从事因高唱，秋风起处闻。

卷 815\_20 【题沈道士新亭】

皎然

何处好攀跻，新亭俯旧溪。坐中千里近，檐下四山低。  
小浦依林曲，回塘绕郭西。桃花春满地，归路莫相迷。

卷 815\_21 【送卢仲舒移家海陵】

皎然

世故多离散，东西不可嗟。小秦非本国，楚塞复移家。  
海岛无邻里，盐居少物华。山中吟夜月，相送在天涯。

卷 815\_22 【陪卢使君登楼送方巨之还京】

皎然

万里汀洲上，东楼欲别离。春风潮水漫，正月柳条寒。  
旅逸逢渔浦，清高爱鸟冠。云山宁不起，今日向长安。

卷 815\_23 【同裴录事楼上望】

皎然

退食高楼上，湖山向晚晴。桐花落万井，月影出重城。  
水竹凉风起，帘帟暑气清。萧萧独无事，因见莅人情。

卷 815\_24 【寓兴】

皎然

天下生白榆，白榆直上连天根。高枝不知几万丈，  
世人仰望徒攀援。谁能上天采其子，种向人间笑桃李。  
因问老仙求种法，老仙哈我愚不答。始知此道无所成，  
还如瞽夫学长生。

卷 815\_25 【寄常一上人】

皎然

雁塞五山临汗漫，云州一路出青冥。  
何因请住嘉祥寺，内史新修湖上亭。

卷 815\_26 【送秘上人游京】

皎然

共君方异路，山伴与谁同。日冷行人少，时清古镇空。  
暖瓶和雪水，鸣锡带江风。撩乱终南色，遥应入梦中。

卷 815\_27 【赋得啼猿送客】

皎然

万里巴江外，三声月峡深。何年有此路，几客共沾襟。  
断壁分垂影，流泉入苦吟。凄凉离别后，闻此更伤心。

卷 815\_28 【南楼望月】

皎然

夜月家家望，亭亭爱此楼。纤云溪上断，疏柳影中秋。  
渐映千峰出，遥分万派流。关山谁复见，应独起边愁。

卷 815\_29 【寻陆鸿渐不遇】

皎然

移家虽带郭，野径入桑麻。近种篱边菊，秋来未著花。  
扣门无犬吠，欲去问西家。报道山中去，归时每日斜。

卷 815\_30 【怀旧山（一作沧浩诗，题云留别嘉兴知己）】

皎然

一坐西林寺，从来未下山。不因寻长者，无事到人间。  
宿雨愁为客，寒花笑未还。空怀旧山月，童子念经闲。

卷 815\_31 【宿吴匡山破寺】

皎然

双峰百战后，真界满尘埃。蔓草缘空壁，悲风起故台。  
野花寒更发，山月暝还来。何事池中水，东流独不回。

卷 815\_32 【九月十日】

皎然

爱杀柴桑隐，名溪近讼庭。扫沙开野步，摇舸出闲汀。  
宿简邀诗伴，余花在酒瓶。悠然南望意，自有岷山情。

卷 815\_33 【秋晚宿破山寺】

皎然

秋风落叶满空山，古寺残灯石壁间。  
昔日经行人去尽，寒云夜夜自飞还。

卷 815\_34 【青阳上人院说金陵故事】

皎然

君说南朝全盛日，秣陵才子更多人。  
千年秋色古池馆，谁见齐王西邸春。

卷 815\_35 【送僧之京师】

皎然

绵绵渺渺楚云繁，万里西归望国门。  
禅子初心易凄断，秋风莫上少陵原。

卷 815\_36 【送许丞还洛阳】

皎然

剡茗情来亦好斟，空门一别肯沾襟。  
悲风不动罢瑶轸，忘却洛阳归客心。

卷 815\_37 【题湖上草堂】

皎然

山居不买剡中山，湖上千峰处处闲。  
芳草白云留我住，世人何事得相关。

卷 815\_38 【酬李司直纵诸公冬日游妙喜寺题照、昱二上人房  
...述】

皎然

达贤贵贞隐，常惧迹不灭。遂与永公期，遗身坐林樾。  
华轩何辘辘，为我到幽绝。心境寒草花，空门青山月。  
潘生独不见，清景屡盈缺。林下常寂寥，人间自离别。  
何时解轻佩，来税丘中辙。

卷 815\_39 【赠乌程李明府伯宜、沈兵曹仲昌】

皎然

水国苦凋瘵，东皋岂遗黍。云阴无尽时，日出常带雨。  
昨夜西溪涨，扁舟入檐庑。野人同鸟巢，暴客若蜂聚。  
岁晏无斗粟，寄身欲何所。空羨鸾鹤姿，翩翩自轻举。

卷 815\_40 【奉酬颜使君真卿、王员外圆宿寺兼送员外使回】

皎然

鲁公邀省客，贫寺人过少。锦帐惟野花，竹屏有窗筱。  
朝行石色净，夜听泉声小。释事情已高，依禅境无扰。  
超遥长路首，怅望空林杪。离思从此生，还将此心了。

卷 815\_41 【杼山上峰和颜使君真卿、袁侍御五韵赋得印字...  
之会】

皎然

道情寄远岳，放旷临千仞。香路延绛驺，华泉写金印。  
日敲诸天近，雨过三华润。留客云外心，忘机松中韵。  
灵嘉早晚期，为布东山信。

卷 815\_42 【同薛员外谊喜雨诗兼上杨使君】

皎然

积旱忽飞澍，烝民心亦倾。郊云不待族，雨色飞江城。  
焦稼濯又发，败荷滋更荣。时随雾縠重，乍集柳丝轻。  
一宿恐鱼飞，数朝征鹤鸣。毒暑澄为冷，高尘涤还清。

乃知阴鹭数，制在造化情。及此接欢贺，临风闻颂声。

卷 815\_43 【南湖春泛有客自北至说友人岑元...叙相思之志以寄焉】

皎然

故人隔楚水，日夕望芳洲。春草思眇眇，征云暮悠悠。  
心期无形影，迹旷成阻修。有客江上至，知君佐雄州。  
铿锵佩苍玉，躑躅驱絳驹。伊昔中峰心，从来非此流。  
资予长生诀，希彼高山俦。此情今如何，宿昔师吾谋。  
别年谒禅老，更添石室筹。深见人间世，飘如水上沤。  
蝉号齐王邸，月苦隋帝楼。声华尽冥寞，麋鹿徒呦呦。  
我有一字教，坐然遗此忧。何烦脱珪组，不用辞王侯。  
只在名位中，空门兼可游。

卷 815\_44 【同薛员外谊久旱感怀寄兼呈上杨使君】

皎然

皇天鉴不昧，恸想何亢极。丝雨久愆期，绮霞徒相惑。  
阴云舒又卷，濯枝安可得。涸井不累瓶，干溪一凭轼。  
赤地芳草死，飙尘惊四塞。戎冠夜刺闺，民荒岁伤国。  
赖以王猷盛，中原无凶慝。杨公当此晨，省灾常吁食。  
独感下堂雨，偏嘉越境域。秋郊天根见，我疆看稼穡。

请回云汉诗，为君歌乐职。

卷 815\_45 【兵后早春登故鄣南楼望昆山寺白鹤观示清道人并沈道士】

皎然

新阳故楼上，眇眇伤遐眷。违世情易忘，羈时得无倦。  
春归华柳发，世故陵谷变。扰扰陌上心，悠悠梦中见。  
苍林有灵境，杳映遥可羨。春日倚东峰，华泉落西甸。  
钟声在空碧，幡影摇葱蒨。缅想山中人，神期如会面。  
别离芳月积，岐路浮云偏。正入空门，仙君依苦县。  
隳形舍簪绂，烹玉思精炼。事外宜我心，人间岂予恋。  
身遗世自薄，道胜名必贱。耳目何所娱，白云与黄卷。

卷 815\_46 【酬乌程杨明府华将赴渭北对月见怀】

皎然

释印及秋夜，身闲境亦清。风襟自潇洒，月意何高明。  
闻说武安君，万里驱妖精。开府集秀士，先招士林英。  
晋家用元凯，亦是鲁诸生。北望抚长剑，感君知己行。  
边尘昏玉帐，杀气凝金镫。大敌折齐俎，一书下聊城。  
翻飞青云路，宿昔沧洲情。

卷 815\_47 【酬邢端公济春日苏台有呈袁州李使君...辛阳王三侍御】

皎然

大贤当佐世，尧时难退身。如何丹青侣，却在沧江滨。  
柳色变又遍，莺声闻亦频。赖逢宜春守，共赏南湖春。  
营道知止足，饰躬无缁磷。家将诗流近，迹与禅僧亲。  
放旷临海门，翱翔望云津。虽高空王说，不久山中人。

卷 815\_48 【奉和裴使君清春夜南堂听陈山人弹白雪】

皎然

春宵凝丽思，闲坐开南围。郢客弹白雪，纷纶发金徽。  
散从天上至，集向琼台飞。弦上凝飒飒，虚中想霏霏。  
通幽鬼神骇，合道精鉴稀。变态风更入，含情月初归。  
方知阮太守，一听识其微。

卷 815\_49 【答孟秀才】

皎然

羸疾依小院，空闲趣自深。蹑苔怜静色，扫树共芳阴。

物外好风至，意中佳客寻。虚名谁欲累，世事我无心。  
投赠荷君芷，馨香满幽襟。

卷 815\_50 【酬崔侍御见赠】

皎然

买得东山后，逢君小隐时。五湖游不厌，柏署迹如遗。  
市隐何妨道，禅栖不废诗。与君为此说，长破小乘疑。

卷 815\_51 【赠柳喜得嵩山法门自号嵩山老（一作赠柳先生）】

皎然

一见嵩山老，吾生恨太迟。问君年几许，曾出上皇时。

卷 815\_52 【酬李补阙纾】

皎然

不住东林寺，云泉处处行。近臣那得识，禅客本无名。

卷 815\_53 【湖南兰若示大乘诸公】

皎然

未到无为岸，空怜不系舟。东山白云意，岁晚尚悠悠。

卷 815\_54 【兵后经永安法空寺寄悟禅师（其寺贼所焚）】

皎然

常说人间法自空，何言出世法还同。微踪旧是香林下，  
余烬今成火宅中。后夜池心生素月，春天树色起悲风。  
吾知世代相看尽，谁悟浮生似影公。

卷 815\_55 【春日杼山寄赠李员外纵】

皎然

南山唯与北山邻，古树连拳伴我身。黄鹤有心多不住，  
白云无事独相亲。闲持竹锡深看水，懒系麻衣出见人。  
欲掇幽芳聊赠远，郎官那赏石门春。

卷 815\_56 【酬秦山人赠别二首】

皎然

知君高隐占贤星，卷叶时时注佛经。姓被名公题旧里，  
诗将丽句号新亭。来观新月依清室，欲漱香泉护触瓶。  
我有主人江太守，如何相伴住禅灵。

谁知卧病不妨禅，迹寄诗流性似偏。叶示黄金童子爱，  
书题青字古人传。时高独鹤来云外，每羨闲花在眼前。  
对此留君还欲别，应思石濞访春泉。

卷 815\_57 【山居示灵澈上人】

皎然

晴明路出山初暖，行踏春芜看茗归。乍削柳枝聊代札，  
时窥云影学裁衣。身闲始觉隳名是，心了方知苦行非。  
外物寂中谁似我，松声草色共无机。

卷 815\_58 【遥和康录事李侍御萼小寒食夜重集康氏园林】

皎然

习家寒食会何频，应恐流芳不待人。已爱治书诗句逸，

更闻从事酒名新。庭芜暗积承双履，林花雷飞洒幅巾。  
谁见柰园时节共，还持绿茗赏残春。

卷 815\_59 【释裴循春愁】

皎然

蝶舞莺歌喜岁芳，柳丝袅袅蕙带长。  
江南春色共君有，何事君心独自伤。

卷 815\_60 【西白溪期裴方舟不至】

皎然

望君不见复何情，野草闲云处处生。  
应向秦时武陵路，花间寂历一人行。

卷 815\_61 【劳山忆栖霞寺道素上人久期不至】

皎然

远寺萧萧独坐心，山情自得趣何深。泉声稍滴芙蓉漏，  
月影才分鸚鵡林。满地云轻长碍屣，绕松风近每吹襟。  
贪闲不记前心偈，念别聊为出世吟。更待花开遍山雪，

山山相似若为寻。

卷 815\_62 【酬秦山人出山见呈】

皎然

手携酒榼共书帙，回语长松我即归。  
若是出山机已息，岭云何事背君飞。

卷 815\_63 【酬秦山人见寻】

皎然

左右香童不识君，担簦访我领鸥群。  
山僧待客无俗物，唯有窗前片碧云。

卷 815\_64 【宿法华寺简灵澈上人】

皎然

至道无机但杳冥，孤灯寒竹自青荧。  
不知何处小乘客，一夜风来闻诵经。

· 全唐诗 ·

---

卷 815\_65 【潜别离】

皎然

乌头虽黑白有时，唯有潜离与暗别，彼此甘心无后期。

## 第八百一十六卷

### 卷 816\_1 【奉酬袁使君高春游鹄鷄峰兰若见怀】

皎然

鹄鷄中峰近，高奇古人遗。常欲乞此地，养松挂藤丝。  
昨闻双旌出，一川花满时。恨无翔云步，远赴关山期。  
跻险与谁赏，折芳应自怡。遥知忘归趣，喜得春景迟。  
已见郢人唱，新题石门诗。

### 卷 816\_2 【答裴济从事】

皎然

迟迟云鹤意，奋翅知有期。三乘纲纪局，累登清白资。  
应怀青塘居，蕙草没前墀。旧月照秋水，废田留故陂。  
至今高风在，为君吹桂枝。昨逢洞庭客，果得故人诗。  
何异王内史，来招道林师。欲携山侣出，难与白云辞。

卷 816\_3 【白云上人精舍寻杼山禅师兼示崔子向何山道上人】

皎然

望远涉寒水，怀人在幽境。为高皎皎姿，及爱苍苍岭。  
果见栖禅子，潺湲灌真顶。积疑一念破，澄息万缘静。  
世事花上尘，惠心空中境。清闲诱我性，遂使肠虑屏。  
许共林客游，欲从山王请。木栖无名树，水汲忘机井。  
持此一日高，未肯谢箕颍。夕霁山态好，空月生俄顷。  
识妙聆细泉，悟深涤清茗。此心谁得失，笑向西林永。

卷 816\_4 【酬薛员外谊苦热行见寄】

皎然

六月金数伏，兹辰日在庚。炎曦烁肌肤，毒雾昏性情。  
安得奋轻翮，超遥出云征。不知天地心，如何匠生成。  
火德烧百卉，瑶草不及荣。省客当此时，忽贻怀中琼。  
捧玩烦袂涤，啸歌美风生。迟君佐元气，调使四序平。  
中令霜不祓，大余气常贞。江南诗骚客，休吟苦热行。

卷 816\_5 【采实心竹杖寄赠李萼侍御】

皎然

竹杖裁碧鲜，步林赏高直。实心去内矫，全节无外饰。  
行药聊自持，扶危资尔力。初生在榛莽，孤秀岂封殖。  
干雪不死枝，赠君期君识。

卷 816\_6 【酬薛员外谊见戏一首】

皎然

方知正始作，丽掩碧云诗。文彩盈怀袖，风规发咏思。  
遗弓逢大敌，摩垒怯偏师。频有移书让，多惭系组迟。  
浅才迂且拙，虚誉喜还疑。犹倚披沙鉴，长歌向子期。

卷 816\_7 【奉酬李中丞洪湖州西亭即事见寄兼呈吴冯处士...  
长史】

皎然

爱君溪上住，迟月开前扃。山火照书卷，野风吹酒瓶。  
为谁留此物，意在眼中青。樵子逗烟墅，渔翁宿沙汀。  
主人非楚客，莫谩讥独醒。宿昔邢城功，道高心已冥。

贪将到处士，放醉乌家亭。

卷 816\_8 【苕溪草堂自大历三年夏新营泊秋及春...四十三韵】

皎然

万虑皆可遗，爱山情不易。自从东溪住，始与人群隔。  
应物非宿心，遗身是吾策。先民崆峒子，沦景事金液。  
绮里犹近名，於陵未泯迹。吾师逆流教，禅隐殊古昔。  
洗足临潺湲，销声寄松柏。缃荷采堪服，柔草持可席。  
道心制野猿，法语授幽客。境净万象真，寄目皆有益。  
原上无情花，山中听经石。竹生自萧散，云性常洁白。  
却见羈世人，远高摩霄翮。达贤观此意，烦想遂冰蘖。  
伊予战苦胜，览境情不溺。智以动念昏，功由无心积。  
形骸尔何有，生死谁所戚。为与胜悟冥，不忧颓龄迫。  
春风自骀荡，禅地常阒寂。擲札成柳枝，溉瓶养泉脉。  
道人知止足，盥漱聊自适。学外见古贤，颇令我心惕。  
眇绵云官世，梦幻羽陵籍。鬼篆徒相矜，九原谁家宅。  
俗情封浅近，至理昧尧跖。蹈善嗟沈冥，履仁伤堙厄。  
匠心圣亦尤，攻异天见责。试以慧眼观，斯言谅可覷。  
外事非吾道，忘缘倦所历。中宵废耳目，形静神不役。  
色天夜清迥，花漏时滴沥。东风吹杉梧，幽月到石壁。  
此中一悟心，可与千载敌。故交徒好我，筐中无咫尺。  
潘生入空门，祖师传秘赜。汤子自天德，精诣功不僻。  
放世与成名，两图在所择。吾高鸱夷子，身退无瑕摘。  
吾嘉鲁仲连，功成弃珪璧。二贤兼彼才，晚节何感激。

不然作山计，改服我下泽。君隳元亮冠，我脱潜师屐。  
倚卧高松根，共逃金闺籍。

卷 816\_9 【答裴集、阳伯明二贤各垂赠二十韵今以一章用酬  
两作】

皎然

知音如琼枝，天生为予有。攀折若无阶，何殊天上柳。  
裴生清通嗣，阳子盛德后。诗名比元长，赋体凌延寿。  
珠生骊龙颔，或生灵蛇口。何似双琼章，英英曜吾手。  
白日不可污，清源肯容垢。持此山上心，待君忘情友。  
且伴丘壑赏，未随名宦诱。坐石代琼茵，制荷捐艾绶。  
清宵集我寺，烹茗开禅牖。发论教可垂，正文言不朽。  
白云供诗用，清吹生座右。不嫌逸令醉，莫试仙壶酒。  
皎皎寻阳隐，千年可为偶。一从汉道平，世事无纷纠。  
星文齐七政，天轴明二斗。召士扬弓旌，知君在林藪。  
莫学颍阳子，请师高山叟。出处藩我君，还来会匡阜。

卷 816\_10 【答豆卢居士春夜游东园见怀】

皎然

春意赏不足，承夕步东园。事表精虑远，月中华木繁。  
开襟寄清景，遐想属空门。安得纒芳屣，看君幽径萱。

卷 816\_11 【寄崔万芳夔】

皎然

气杀高隼击，惜芳步寒林。风摇苍琅根，霜剪<sub>遥</sub>苒心。  
归思忽眇眇，佳气亦沉沉。我身岂遐远，如隔湘汉深。  
事迹智莫及，愿乖情不任。迟君忘言侣，一笑开吾襟。

卷 816\_12 【访朱放山人】

皎然

野人未相识，何处异乡隔。昨逢云阳信，教向云阳觅。  
空闻天上风，飘飘不可覩。应非鬻铎翁，或是沧浪客。  
早晚从我游，共携春山策。

卷 816\_13 【晚冬废溪东寺怀李司直纵】

皎然

废溪无人迹，益见离思深。归来始昨日，恍惚惊岁阴。  
清想属遥夜，圆景当空林。宿昔月未改，何如故人心。  
游从间芳趾，摇落栖寒岑。眇眇湖上别，含情初至今。  
道流安寂寞，世路倦岖欵。此意欲谁见，怀贤独难任。

徽声反冥默，夕籁何哀吟。禅念破离梦，吾师诚援琴。  
耿耿已及旦，曷由开此襟。幽期谅未偶，胜境徒自寻。  
安得西归云，因之传素音。

卷 816\_14 【兵后与故人别，予西上，至今在扬楚，因有是寄】

皎然

日月不相待，思君魂屡惊。草玄寄扬子，作赋得芜城。  
温温独游迹，遥遥相望情。淮上春草歇，楚子秋风生。  
辟土天下尽，君何独屏营。运开应佐世，业就可成名。  
谁借楚山住，年年事耦耕。

卷 816\_15 【因游支硎寺寄邢端公】

皎然

大厦资多士，抡材得豫章。清门推问望，早岁骋康庄。  
作用方开物，声名久擅场。丹延分塞郡，宿昔领戎行。  
始驭屏星乘，旋阴蔽葦棠。朝端瞻鹗立，关右仰鹰扬。  
威令兼宁朔，英声重护羌。三军成父子，杂虏避封疆。  
身执金吾贵，时遭宝运昌。雍容持汉槊，肃穆卫周堂。  
排难知臣节，攻疑定国章。一言明大义，千载揖休光。  
践职勋庸列，修躬志行彰。优游应慕陆，止足定师张。  
中宸怀殊政，南州伫小康。仁为桂江雨，威是柏台霜。

謇谔言无隐，公忠祸不防。谴深辞紫禁，恩在副朱方。  
切玉锋休淬，垂天翅罢翔。论文征贾马，述隐许求羊。  
肘后看金碧，腰间笑水苍。诗题白羽扇，酒挈绿油囊。  
旷达机何有，深沈器莫量。时应登古寺，佳趣在春冈。  
止水平香砌，鲜云满石床。山情何寂乐，尘世自飞扬。  
已遇炉峰社，还思缉蕙房。外心亲地主，内学事空王。  
花会宜春浅，禅游喜夜凉。高明依月境，萧散蹑庭芳。  
得道殊秦佚，隳名似楚狂。余生于此足，不欲返韶阳。

卷 816\_16 【同诸公奉侍祭岳渎使大理卢幼平自会稽回经平望  
...不至】

皎然

望祀崇周典，皇华出汉庭。紫泥颁会计，玄酒荐芳馨。  
圣虑多虔肃，斋心合至灵。占祥刊史竹，筮日数尧蓂。  
礼秩加新命，朝章笃理刑。敷诚通北阙，遗爱在南亭。  
茗水思曾泛，矾山忆重经。清风门客仰，佳颂国人听。  
攀桂留卿月，征文待使星。春郊回骊牡，遥识故林青。

卷 816\_17 【早秋桐庐思归示道谚上人】

皎然

桐江秋信早，忆在故山时。静夜风鸣磬，无人竹扫墀。

猿来触净水，鸟下啄寒梨。可即关吾事，归心自有期。

卷 816\_18 【劳劳山居寄呈吴处士】

皎然

山事由来别，只应中老身。寒园扫绽栗，秋浪拾干薪。  
领鹤闲书竹，夸云笑向人。俗家相去远，野水作东邻。

卷 816\_19 【寄报德寺从上人（鼓吹山在寺西）】

皎然

宗流许身子，物表养高闲。空色清凉寺，秋声鼓吹山。  
看心水磬后，行道雨花间。七叶翻章句，时时启义关。

卷 816\_20 【山中月夜寄无锡长官】

皎然

湖上凉风早，双峰月色秋。遥知秣陵令，今夜在西楼。  
别叶萧萧下，含霜处处流。如何共清景，异县不同游。

卷 816\_21 【奉贺颜使君真卿二十八郎隔绝自河北远归】

皎然

相失值氛烟，才应掌上年。久离惊貌长，多难喜身全。  
比信尚书重，如威太守怜。满庭看玉树，更有一枝连。

卷 816\_22 【题湖上兰若示清会上人】

皎然

峰心惠忍寺，崦顶谢公山。何似南湖近，芳洲一亩间。  
意中云木秀，事外水堂闲。永日无人到，时看独鹤还。

卷 816\_23 【秋宵书事寄吴凭处士】

皎然

真性在方丈，寂寥无四邻。秋天月色正，清夜道心真。  
大梦观前事，浮名悟此身。不知庭树意，荣落感何人。

卷 816\_24 【题山壁示道维上人】

皎然

独居何意足，山色在前门。身野长无事，心冥自不言。  
闲行数乱竹，静坐照清源。物外从知少，禅徒不耐烦。

卷 816\_25 【晚秋登佛川南峰怀裴例】

皎然

登岭望落日，眇然伤别魂。亭皋秋色遍，游子在荆门。  
世故东西客，山空断续猿。此心谁复见，寂寞偶芳荪。

卷 816\_26 【访陆处士羽（一作访陆羽处士不遇）】

皎然

太湖东西路，吴主古山前。所思不可见，归鸿自翩翩。  
何山赏春茗，何处弄春泉。莫是沧浪子，悠悠一钓船。

卷 816\_27 【酬李侍御萼题看心道场赋以眉毛肠心牙等五字（得牙字）】

皎然

我法从谁悟，心师是贯花。三尘观种子，一雨发萌牙。  
定起轮灯缺，宵分印月斜。了空如藏史，始肯会禅家。

卷 816\_28 【酬姚补阙南仲云溪馆中戏题随书见寄（一作清江诗）】

皎然

寺溪临使府，风景借仁祠。补袞周官贵，能名汉主思。  
卧云知独处，望月忆同时。忽枉缄中赠，琼瑶满手持。

卷 816\_29 【春夜期裴都曹济集心上人院不至】

皎然

东林期隐吏，日月为虚盈。远望浮云隔，空怜定水清。  
逍遥方外侣，荏苒府中情。渐听寒鞞发，渊渊在郡城。

卷 816\_30 【和裴少府怀京兄弟】

皎然

宦游三楚外，家在五陵原。凉夜多归梦，秋风满故园。  
北书无远信，西候独伤魂。空念青门别，殷勤岐路言。

卷 816\_31 【和阎士和望池月答人】

皎然

片月忽临池，双蛾忆画时。光浮空似粉，影散不成眉。  
孤枕应惊梦，寒林正入帷。情知两处望，莫怨独相思。

卷 816\_32 【遥和尘外上人与陆澧夜集山寺问涅槃义兼赏陆生文卷】

皎然

共是竹林贤，心从贝叶传。说经看月喻，开卷爱珠连。  
清净遥城外，萧疏古塔前。应随北山子，高顶枕云眠。

卷 816\_33 【春日和卢使君幼平开元寺听妙奘上人讲】

皎然

仁圣垂文在，虚空日月悬。陵迟追哲匠，宗旨发幽诠。  
法受诸侯请，心教四子传。春生雪山草，香下棘林天。  
顾我从今日，闻经悟宿缘。凉山万里去，应为教犹偏。

卷 816\_34 【答李侍御问】

皎然

入道曾经离乱前，长干古寺住多年。爱贫唯制莲花足，  
取性闲书树叶篇。自笑不归看石榜，谁高无事弄苔泉。  
身外空名何足问，吾心已出第三禅。

卷 816\_35 【奉酬李员外使君嘉祐苏台屏营居春首有怀】

皎然

昔岁为邦初未识，今朝休沐始相亲。移家水巷贫依静，  
种柳风窗欲占春。诗思先邀乌府客，山情还访白楼人。  
登临许作烟霞伴，高在方袍间幅巾。

卷 816\_36 【和李舍人使君纾题云明府道室】

皎然

许令如今道姓云，曾经西岳事桐君。流霞手把应怜寿，  
黄鹤心期拟作群。金篆时教弟子检，砂床不遣世人闻。  
桂阳亦是神仙守，分别无嗟两地分。

卷 816\_37 【奉和陆中丞使君长源寒食日作】

皎然

寒食江天气最清，庾公晨望动高情。因逢内火千家静，  
便睹行春万木荣。深浅山容飞雨细，萦纡水态拂云轻。  
腰章本郡谁相似，数日临人政已成。

卷 816\_38 【奉酬袁使君送陆灏却回期道寺院】

皎然

欲别湖上客，暮期西林还。高歌风音表，放舟月色间。  
更人莫报夜，禅阁本无关。

卷 816\_39 【招韩武康章】

皎然

山僧虽不饮，酤酒引陶潜。此意无人别，多为俗士嫌。

卷 816\_40 【秋居法华寺下院望高顶赠如献上人】

皎然

峰色秋天见，松声静夜闻。影孤长不出，行道在寒云。

卷 816\_41 【赠韦早陆羽】

皎然

只将陶与谢，终日可忘情。不欲多相识，逢人懒道名。

卷 816\_42 【戏呈薛彝】

皎然

山僧不厌野，才子会须狂。何处销君兴，春风摆绿杨。

卷 816\_43 【赠颜主簿】

皎然

汉家仪礼盛，名教出诸颜。更见尚书后，能文在子山。

卷 816\_44 【赠融上人】

皎然

常爱西林寺，池中月出时。芭蕉一片叶，书取寄吾师。

卷 816\_45 【听寒更寄朱兵曹巨川】

皎然

敲枕听寒更，寒更发还住。一夜千万声，几声到君处。

卷 816\_46 【早春书怀寄李少府仲宣】

皎然

早年初问法，因悟目中花。忽值胡雏起，芟夷若乱麻。

脱身投彼岸，吊影念生涯。迹与空门合，心将世路赊。  
东田已芜没，南涧益伤嗟。崇替惊人事，凋残感物华。  
知君过我里，惆怅旧烟霞。

卷 816\_47 【赠和评事判官】

皎然

廷评年少法家流，心似澄江月正秋。学究天人知远识，  
权分盐铁许良筹。春风忆酒乌家近，好月论禅谢寺幽。  
清白比来谁见赏，怜君独有富人侯。

卷 816\_48 【酬秦系山人题赠】

皎然

云林出空鸟未归，松吹时飘雨浴衣。  
石语花愁徒自诧，吾心见境尽为非。

卷 816\_49 【酬秦系山人戏赠】

皎然

正论禅寂忽狂歌，莫是尘心颠倒多。

白足行花曾不染，黄囊贮酒欲如何。

卷 816\_50 【贻李汤】

皎然

茅氏常论七真记，壶公爱说三山事。宁知梅福在人间，  
独为苍生作仙吏。日服丹砂骨自清，肤如冰雪心更明。  
山中玉笋是仙药，袖里素书题养生。愿随黄鹤一轻举，  
仰望青霄独延伫。平生好骏君已知，何必山阴访王许。

卷 816\_51 【述祖德赠湖上诸沈】

皎然

我祖文章有盛名，千年海内重嘉声。雪飞梁苑操奇赋，  
春发池塘得佳句。世业相承及我身，风流自谓过时人。  
初看甲乙矜言语，对客偏能鸕鹚舞。饱用黄金无所求，  
长裾曳地干王侯。一朝金尽长裾裂，吾道不行计亦拙。  
岁晚高歌悲苦寒，空堂危坐百忧攒。昔时轩盖金陵下，  
何处不传沈与谢。绵绵芳籍至今闻，眷眷通宗有数君。  
谁见予心独飘泊，依山寄水似浮云。

卷 816\_52 【舟行怀阎士和】

皎然

二月湖南春草遍，横山渡口花如霰。  
相思一日在孤舟，空见归云两三片。

卷 816\_53 【赠张道士】

皎然

玉京真子名太一，因服日华心如日。  
此心不许世人知，只向仙宫未曾出。

卷 816\_54 【戏呈吴冯】

皎然

世人不知心是道，只言道在他方妙。  
还如瞽者望长安，长安在西向东笑。

卷 816\_55 【宿山寺寄李中丞洪】

皎然

偶来中峰宿，闲坐见真境。寂寂孤月心，亭亭圆泉影。  
满山，花落始知静。从他半夜愁猿惊，  
不废此心长杳冥。

卷 816\_56 【戏赠吴冯】

皎然

予读古人书，遂识古人面。不是识古人，邪正心自见。  
贵义轻财求俗誉，一钱与人便骄傲。昨朝为火今为冰，  
此道非君独抚膺。

卷 816\_57 【感兴赠乌程李明府伯宜兼简诸秀才】

皎然

门前岷山近，无路可登陟。徒爱岷山高，仰之常叹息。  
不如松与桂，生在重岩侧。

卷 816\_58 【晚秋宿李军道所居】

皎然

清溪路不遥，都尉每相招。落日休戎马，秋风罢射雕。  
朮花生野径，柏实满寒条。永夜依山府，禅心共寂寥。

卷 816\_59 【送陆判官归杭州】

皎然

芳草潜州路，乘轺忆再旋。余花故林下，残月旧池边。  
峰色云端寺，潮声海上天。明朝富春渚，应见谢公船。

## 第八百一十七卷

### 卷 817\_1 【奉和颜使君真卿与陆处士羽登妙喜寺三癸亭】

皎然

秋意西山多，列岑萦左次。缮亭历三癸，疏趾邻什寺。  
元化隐灵踪，始君启高誨。诛榛养翘楚，鞭草理芳穗。  
俯砌披水容，逼天扫峰翠。境新耳目换，物远风烟异。  
倚石忘世情，援云得真意。嘉林幸勿剪，禅侣欣可庇。  
卫法大臣过，佐游群英萃。龙池护清澈，虎节到深邃。  
徒想嵎顶期，于今没遗记。

### 卷 817\_2 【奉陪陆使君长源、裴端公枢春游东西武丘寺】

皎然

云水夹双刹，遥疑涌平陂。入门见藏山，元化何由窥。  
曳组探诡怪，停骢访幽奇。情高气为爽，德暖春亦随。  
瑶草自的皪，蕙楼争蔽亏。金精落坏陵，剑彩沈古池。  
一览匝天界，中峰步未移。应嘉生公石，列坐援松枝。

卷 817\_3 【奉和陆使君长源夏月游太湖（此时公权领湖州）】

皎然

庾公心旷远，府事局耳目。遂与南湖游，虚襟涤烦燠。  
始知皇天意，积水在亭育。细流信不让，动物欣所蓄。  
万顷合天容，洗然无云族。峭蒨瞩仙岭，超遥随明牧。  
知公爱澄清，波静气亦肃。已见横流极，况闻长鲸戮。  
中洲暂采蘋，南郡思剖竹。向夕分好风，飘然送归舳。

卷 817\_4 【奉和崔中丞使君论李侍御萼登烂柯山宿石桥寺效小谢体】

皎然

常爱谢公郡，幽期愿相从。果回青骢臆，共蹑玄仙踪。  
灵境若仿佛，烂柯思再逢。飞梁丹霞接，古局苍苔封。  
往想冥昧理，谁亲冰雪容。蕙楼耸空界，莲宇开中峰。  
昔化冲虚鹤，今藏护法龙。云窥香树沓，月见色天重。  
永夜寄岑寂，清言涤心胸。盛游千年后，书在岩中松。

卷 817\_5 【同颜使君真卿、李侍御萼游法华寺登凤翅山望太湖】

皎然

双峰开凤翅，秀出南湖州。地势抱郊树，山威增郡楼。  
正逢周柱史，来会鲁诸侯。缓步凌彩蒨，清饶发飕飕。  
披云得灵境，拂石临芳洲。积翠遥空碧，含风广泽秋。  
萧辰资丽思，高论惊精修。何似钟山集，征文及惠休。

卷 817\_6 【奉陪陆使君长源诸公游支硎寺（寺即支公学道处）】

皎然

尝览高逸传，山僧有遗踪。佐游继雅篇，嘉会何由逢。  
尘世即下界，色天当上峰。春晖遍众草，寒色留高松。  
缭绕彩云合，参差绮楼重。琼葩洒巾舄，石漈清心胸。  
灵境若可托，道情知所从。

卷 817\_7 【奉陪郑使君谔游太湖至洞庭山登上真观却望湖水】

皎然

郡斋得无事，放舟下南湖。湖中见仙邸，果与心赏俱。  
不远风物变，忽如寰宇殊。背云视层崖，别是登蓬壶。

突兀盘水府，参差沓天衢。回瞻平芜尽，洪流豁中区。  
气吞江山势，色净氛霭无。灵长习水德，胜势当地枢。  
朝宗动归心，万里思鸿途。

卷 817\_8 【奉和袁使君高，郡中新亭会张炼师昼会二上人】

皎然

置亭隐城堞，事简迹易幽。公性崇俭素，雅才非广求。  
傍檐竹雨清，拂案杉风秋。不移府中步，登兹如远游。  
坐觉诗思高，俯知物役休。虚寂偶禅子，逍遥亲道流。  
更闻临川作，下节安能酬。

卷 817\_9 【奉和陆使君长源水堂纳凉效曹刘体】

皎然

柳家陶暑亭，意远不可齐。烦襟荡朱弦，高步援绿萸。  
爱公满亭客，来是清风携。滢滢前溪上，旷望古郡西。  
六月正中伏，水轩气常凄。野香袭荷芰，道性亲鳧鹭。  
禅子顾惠休，逸民重刘黎。乃知高世量，不以出处睽。

卷 817\_10 【夏日奉陪陆使君长源公堂集】

皎然

府中自清远，六月高梧间。寥亮泛雅瑟，逍遥扣玄关。  
岭云与人静，庭鹤随公闲。动息谅兼遂，兹情即东山。

卷 817\_11 【九日和于使君思上京亲故】

皎然

霁景满水国，我公望江城。碧山与黄花，烂熳多秋情。  
摇落见松柏，岁寒比忠贞。欢娱在鸿都，是日思朝英。

卷 817\_12 【伏日就汤评事衡湖上避暑】

皎然

大火方燥石，停云昼亦收。将从赏心侣，寸景难远游。  
拥几苦炎伏，出门望汀洲。回溪照轩宇，广陌临梧楸。  
释闷命雅瑟，放情思乱流。更持无生论，可以清烦忧。

卷 817\_13 【奉和颜使君真卿修《韵海》毕会诸文士东堂重校】

皎然

外学宗硕儒，游焉从后进。恃以仁恕广，不学门栏峻。  
著书裨理化，奉上表诚信。探讨始河图，纷纶归海韵。  
亲承大匠琢，况睹颓波振。错简记铅槧，阅书移玉镇。  
曷由旌不朽，盛美流歌引。

卷 817\_14 【喜义兴权明府自君山至，集陆处士羽青塘别业】

皎然

应难久辞秩，暂寄君阳隐。已见县名花，会逢闾是粉。  
本自寻人至，宁因看竹引。身关白云多，门占春山尽。  
最赏无事心，篱边钓溪近。

卷 817\_15 【夏日集李司直纵溪斋】

皎然

修景属良会，远飙生烦襟。泄云收净绿，众木积芳阴。  
疏涤府中务，逍遥湖上心。习闲得招我，赏夜宜泛琴。  
山近资性静，月来寄情深。澹然若事外，岂藉隳华簪。

卷 817\_16 【夏日题桐庐杨明府纳凉山斋】

皎然

陶家无炎暑，自有林中峰。席上落山影，桐梢回水容。  
放怀凉风至，缓步清阴重。何事亲堆案，犹多高世踪。

卷 817\_17 【和杨明府早秋游法华寺】

皎然

释事出县閤，初闻兹山灵。寺扉隐天色，影刹遥丁丁。  
碧峰委合沓，香蔓垂萸苓。清景为公有，放旷云边亭。  
秋赏石潭洁，夜嘉杉月清。诵空性不昧，助道迹又经。  
是以于物理，纷然若未形。移来字人要，全与此道冥。

卷 817\_18 【宿道士观】

皎然

古观秋木秀，冷然属鲜飙。琼葩被修蔓，柏实满寒条。  
影殿山寂寂，寥天月昭昭。幽期寄仙侣，习定至中宵。  
清佩闻虚步，真官方宿朝。

卷 817\_19 【冬日天井西峰张炼师所居】

皎然

采薪逢野泉，渐见栖闲所。坎坎山上声，幽幽林中语。  
仙乡何代隐，乡服言亦楚。开水净药苗，扫雪候山侣。  
零叶聚败篱，幽花积寒渚。冥冥孤鹤性，天外思轻举。

卷 817\_20 【奉同颜使君真卿开元寺经藏院会观树文殊碑】

皎然

万国布殊私，千年降祖师。雁门传法至，龙藏立言时。  
故实刊周典，新声播鲁诗。六铢那更拂，劫石尽无期。

卷 817\_21 【奉同卢使君幼平游精舍寺】

皎然

影刹西方在，虚空翠色分。人天霁后见，猿鸟定中闻。  
真界隐青壁，春山凌白云。今朝石门会，千古仰斯文。

卷 817\_22 【奉同颜使君真卿、袁侍御骆驼桥玩月】

皎然

山中常见月，不及共游时。水上恐将缺，林端爱落迟。  
乌惊宪府客，人咏鲍家诗。永夜南桥望，裴回若有期。

卷 817\_23 【和邢端公登台春望句，句有春字之什】

皎然

春日绣衣轻，春台别有情。春烟间草色，春鸟隔花声。  
春树乱无次，春山遥得名。春风正飘荡，春瓮莫须倾。

卷 817\_24 【经仙人渚即沈山下古人沈义白日升仙处】

皎然

日月人间短，何时此得仙。古山春已尽，遗渚事空传。  
不见腾云驾，徒临洗药泉。如今成逝水，翻使恨流年。

卷 817\_25 【独游二首】

皎然

性野趣无端，春晴路又干。逢泉破石弄，放鹤向云看。  
好僻谁相似，从狂我自安。芳洲亦有意，步上白沙滩。

临水兴不尽，虚舟可同嬉。还云与归鸟，若共山僧期。  
世事吾不预，此心谁得知。西峰有禅老，应见独游时。

卷 817\_26 【游溪待月】

皎然

溪色思泛月，沿洄欲未归。残灯逢水店，疏磬忆山扉。  
夜浦鱼惊少，空林鹊绕稀。可中才望见，撩乱捣寒衣。

卷 817\_27 【西溪独泛】

皎然

道情何所寄，素舸漫流间。真性怜高鹤，无名羨野山。  
经寒丛竹秀，人静片云闲。泛泛谁为侣，唯应共月还。

卷 817\_28 【早秋陪韩明府泛阮元公溪】

皎然

雨信清残暑，萧条古县西。早凉生浦溽，秋意满高低。  
前事虽堆案，闲情得溯溪。何言战未胜，空寂用还齐。

卷 817\_29 【九日陪颜使君真卿登水楼】

皎然

重阳荆楚尚，高会此难陪。偶见登龙客，同游戏马台。  
风文向水叠，云态拥歌回。持菊烦相问，扪襟愧不才。

卷 817\_30 【与卢孟明别后宿南湖对月】

皎然

五湖生夜月，千里满寒流。旷望烟霞尽，凄凉天地秋。  
相思路渺渺，独梦水悠悠。何处空江上，裴回送客舟。

卷 817\_31 【自义亭驿送李长史纵，夜泊临平东湖】

皎然

长亭宾驭散，岐路起悲风。千里勤王事，驱车明月中。  
寒生洞庭水，夜度塞门鸿。处处堪伤别，归来山又空。

卷 817\_32 【出游】

皎然

少时不见山，便觉无奇趣。狂发从乱歌，情来任闲步。  
此心谁共证，笑看风吹树。

卷 817\_33 【界石守风，望天竺、灵隐二寺】

皎然

山顶东西寺，江中旦暮潮。归心不可到，松路在青霄。

卷 817\_34 【奉和颜使君真卿修《韵海》毕，州中重宴】

皎然

世学高南郡，身封盛鲁邦。九流宗韵海，七字揖文江。

借赏云归堞，留欢月在窗。不知名教乐，千载与谁双。

卷 817\_35 【晦日陪颜使君白蘋洲集】

皎然

南朝分古郡，山水似湘东。堤月吴风在，湔裾楚客同。  
桂寒初结旆，蘋小欲成丛。时晦佳游促，高歌听未终。

卷 817\_36 【冬至日陪裴端公使君清水堂集】

皎然

亚岁崇佳宴，华轩照绿波。渚芳迎气早，山翠向晴多。  
推往知时训，书祥辨政和。从公惜日短，留赏夜如何。

卷 817\_37 【陪卢判官水堂夜宴】

皎然

暑气当宵尽，裴回坐月前。静依山堞近，凉入水扉偏。  
久是栖林客，初逢佐幕贤。爱君高野意，烹茗钓沦涟。

卷 817\_38 【新秋同卢侍御、薛员外白蘋洲月夜】

皎然

隔暑蘋洲近，迎凉欲泛舟。荣从宪府至，喜会夕郎游。  
气夺沧浪色，风欺汗漫流。谁言三伏夜，独此月前秋。

卷 817\_39 【夏日集裴录事北亭避暑】

皎然

前林夏雨歇，为我生凉风。一室烦暑外，众山清景中。  
忘归亲野水，适性许云鸿。萧散都曹吏，还将静者同。

卷 817\_40 【与王录事会张征君姊妹炼师院玩雪兼怀清会上人】

皎然

何意廉从事，还来会默仙。寒空惊雪遍，春意入歌偏。  
瑶草三花发，琼林七叶连。飘飘过柳寺，应满译经前。

卷 817\_41 【和李侍御萼岁初夜集处士书阁（书阁即侍御所创）】

皎然

迟贤新置阁，高意此郊居。古径行春早，新窗见月初。  
放歌还倚瑟，讲道亦观书。为我留禅位，来逢此会疏。

卷 817\_42 【汤评事衡水亭会觉禅师】

皎然

山侣相逢少，清晨会水亭。雪晴松叶翠，烟暖药苗青。  
静对沧洲鹤，闲看古寺经。应怜叩关子，了义共心冥。

卷 817\_43 【与朝阳山人张朝夜集湖亭，赋得各言其志】

皎然

洞庭孤月在，秋色望无边。零露积衰草，寒螿鸣古田。  
茫茫区中想，寂寂尘外缘。从此悟浮世，胡为伤暮年。

卷 817\_44 【晦夜李侍御萼宅集招潘述、汤衡、海上人饮茶赋】

皎然

晦夜不生月，琴轩犹为开。墙东隐者在，淇上逸僧来。  
茗爱传花饮，诗看卷素裁。风流高此会，晓景屡裴回。

卷 817\_45 【寄昱上人上方居】

皎然

厌向人间住，逢山欲懒归。片云闲似我，日日在禅扉。  
地静松阴遍，门空鸟语稀。夜凉疏磬尽，师友自相依。

卷 817\_46 【夏日与綦毋居士、昱上人纳凉】

皎然

为依炉峰住，境胜增道情。凉日暑不变，空门风自清。  
坐援香实近，转爱绿芜生。宗炳青霞士，如何知我名。

卷 817\_47 【建元寺集皇甫侍御书阁】

皎然

不因居佛里，无事得相逢。名重朝端望，身高俗外踪。  
机闲看净水，境寂听疏钟。宣室恩长在，知君志未从。

卷 817\_48 【郭北寻徐主簿别业】

皎然

近依城北住，幽远少人知。积雪行深巷，闲云绕古篱。  
竹花冬更发，橙实晚仍垂。还共岩中鹤，今朝下渌池。

卷 817\_49 【题报德寺清幽上人西峰（寺即陈文帝故乡）】

皎然

陈世凋亡后，仁祠识旧山。帝乡乔木在，空见白云还。  
双塔寒林外，三陵暮雨间。此中难战胜，君独启禅关。

卷 817\_50 【题郑谷江畔桐斋（郑生好琴，性达，兼寡欲）】

皎然

客斋开别住，坐占绿江滨。流水非外物，闲云长属君。  
浮荣未可累，旷达若为群。风起高梧下，清弦日日闻。

卷 817\_51 【和阎士和李蕙冬夜重集】

皎然

郡理日闲旷，洗心宿香峰。双林秋见月，万壑静闻钟。  
珮玉行山翠，交麾动水容。如何股肱守，尘外得相从。

卷 817\_52 【春日陪颜使君真卿、皇甫曾西亭重会《韵海》诸生】

皎然

为重南台客，朝朝会鲁儒。暄风众木变，清景片云无。  
峰翠飘檐下，溪光照座隅。不将簪艾隔，知与道情俱。

卷 817\_53 【寒食日同陆处士行报德寺，宿解公房】

皎然

古寺章陵下，潜公住几年。安心生软草，灌顶引春泉。  
寂寂传灯地，寥寥禁火天。世间多暗室，白日为谁悬。

卷 817\_54 【兵马曹季良宅夜集】

皎然

清景不可失，寻君趣有余。身高避事后，道长问心初。  
出处名则异，游从迹何疏。吟看刻尽烛，笑卷读残书。  
露彩生笔砚，风音入庭除。平明仙侣散，轂舄动回车。

卷 817\_55 【同李侍御萼、李判官集陆处士羽新宅】

皎然

素风千户敌，新语陆生能。借宅心常远，移篱力更弘。  
钓丝初种竹，衣带近裁藤。戎佐推兄弟，诗流得友朋。  
柳阴容过客，花径许招僧。不为墙东隐，人家到未曾。

卷 817\_56 【题报恩寺惟照上人房】

皎然

上界雨色干，凉宫日迟迟。水文披菡萏，山翠动罽毳。  
中有清真子，愔愔步闲墀。手萦颇黎缕，愿证黄金姿。  
旋草阶下生，看心当此时。

卷 817\_57 【寻天目徐君】

皎然

常见仙翁变姓名，岂知松子号初平。逢人不道往来处，  
卖药还将鸡犬行。独鹤天边俱得性，浮云世上共无情。  
三花落地君犹在，笑抚安期昨日生。

卷 817\_58 【同李著作纵题尘外上人院】

皎然

百缘唯有什公瓶，万法但看一字经。从遣鸟喧心不动，  
任教香醉境常冥。莲花天昼浮云卷，贝叶宫春好月停。  
禅伴欲邀何著作，空音宜向夜中听。

卷 817\_59 【题周谏别业（予寺与周生所居俱临茗水）】

皎然

隐身茗上欲如何，不著青袍爱绿萝。柳巷任疏容马入，  
水篱从破许船过。昂藏独鹤闲心远，寂历秋花野意多。  
若访禅斋遥可见，竹窗书幌共烟波。

卷 817\_60 【同李中丞洪水亭夜集】

皎然

佳人但莫吹参差，正怜月色生酒卮。  
山公取醉不关我，为爱尊前白鹭鸕。

卷 817\_61 【题秦系山人丽句亭】

皎然

独将诗教领诸生，但看青山不爱名。  
满院竹声堪愈疾，乱床花片足忘情。

卷 817\_62 【春夜集陆处士居玩月】

皎然

欲赏芳菲肯待辰，忘情人访有情人。  
西林可是无清景，只为忘情不记春。

卷 817\_63 【寄题云门寺梵月无侧房（时人相传是宝月道人后身也）】

皎然

越山千万云门绝，西僧貌古还名月。  
清朝扫石行道归，林下眠禅看松雪。

卷 817\_64 【法华寺上方题江上人禅空】

皎然

路入松声远更奇，山光水色共参差。  
中峰禅寂一僧在，坐对梁朝老桂枝。

卷 817\_65 【冬日山行过薛征君】

皎然

我行倦修坂，四顾无平陆。雨霁鸣鹰鹞，天寒聚麋鹿。  
幽人访名士，家在南冈曲。菜实萦小园，稻花绕山屋。  
深居寡忧悔，胜境怡耳目。徵心尚与我，永言谢浮俗。

卷 817\_66 【往丹阳寻陆处士不遇】

皎然

远客殊未归，我来几惆怅。叩关一日不见人，  
绕屋寒花笑相向。寒花寂寂遍荒阡，柳色萧萧愁暮蝉。  
行人无数不相识，独立云阳古驿边。凤翅山中思本寺，  
鱼竿村口望归船。归船不见见寒烟，离心远水共悠然。  
他日相期那可定，闲僧著处即经年。

卷 817\_67 【集汤评事衡湖上望微雨】

皎然

苍凉远景中，雨色缘山有。云送满洞庭，风吹绕杨柳。  
萧萧解轻袂，尽日随林叟。

卷 817\_68 【九日与陆处士羽饮茶】

皎然

九日山僧院，东篱菊也黄。俗人多泛酒，谁解助茶香。

卷 817\_69 【夜过康录事造会兄弟】

皎然

爱君门馆夜来清，琼树双枝是弟兄。  
月在诗家偏足思，风过客位更多情。

卷 817\_70 【题沈少府书斋】

皎然

不下南昌县，书斋每日闲。野花当砌落，溪鸟逐人还。  
有兴常临水，无时不见山。千峰数可尽，不出小窗间。

卷 817\_71 【春夜与诸公同宴呈陆郎中】

皎然

南国宴嘉宾，交情老倍亲。月惭红泪烛，花笑白头人。

宝瑟絙余怨，琼枝不让春。更闻歌子夜，桃李艳妆新。

卷 817\_72 【九日阻雨简高侍御（时与高公近邻）】

皎然

江上重云起，何曾裹 尘。不能成落帽，翻欲更摧巾。  
素发闲依枕，黄花暗待人。且应携下价，芒屨就诸邻。

卷 817\_73 【晚春寻桃源观】

皎然

武陵何处访仙乡，古观云根路已荒。细草拥坛人迹绝，  
落花沈涧水流香。山深有雨寒犹在，松老无风韵亦长。  
全觉此身离俗境，玄机亦可照迷方。

卷 817\_74 【同卢使君幼平郊外送阎侍御归台】

皎然

留钱飞旌驻，离亭草色间。柏台今上客，竹使旧朝班。  
日落东西水，天寒远近山。古江分楚望，残柳入隋关。  
恋阙心常积，回轩日不闲。芳辰倚门道，犹得及春还。

## 第八百一十八卷

### 卷 818\_1 【送梁拾遗肃归朝】

皎然

明主重文谏，才臣出江东。束书辞东山，改服临北风。  
万里望皇邑，九重当曙空。天开芙蓉阙，日上蒲桃宫。  
天子初未起，金闺籍先通。身逢轩辕世，名贵鸳鸾中。  
故人荣此别，何用悲丝桐。

### 卷 818\_2 【奉陪杨使君瑛送段校书赴南海幕】

皎然

硕贤静广州，信为天下贞。屈兹大将佐，藉彼延阁英。  
声动柳吴兴，郊饯意不轻。吾知段夫子，高论关苍生。  
处以德为藩，出则道可行。遥知南楼会，新景当诗情。  
天高林瘴洗，秋远海色清。时泰罢飞檄，唯应颂公成。

卷 818\_3 【送陆侍御士佳赴上京】

皎然

长安三千里，喜行不言永。清路黄尘飞，大河沧流静。  
更怀西川府，主公昔和鼎。伊郁瑶瑟情，威迟花骢影。  
此时已难别，日又无停景。出饯阙相从，心随过前岭。

卷 818\_4 【奉陪颜使君真卿登岷山，送张侍御严归台】

皎然

岷首千里情，北辕自兹发。烟霞正登览，簪笔限趋谒。  
黄鹤望天衢，白云归帝阙。客心南浦柳，离思西楼月。  
留赏景不延，感时芳易歇。他晨有山信，一为访林樾。

卷 818\_5 【酬元主簿子球别赠】

皎然

故人方远适，访我陈别情。此夜偶禅室，一言了无生。  
览君缄中宝，如掌清玉瑛。胡为蕴高价，岁晚徒营营。  
辞秩贫且病，何人见艰贞。出无黄金囊，空歌白苧行。  
威迟策弩马，独望故关树。渺渺千里心，春风起中路。

近闻新拜命，鸾凤犹栖棘。劝君寄一枝，且养冥冥翼。  
甘泉多竹花，明年待君食。

卷 818\_6 【答道素上人别】

皎然

春色遍远道，寂寞闽中行。碧水何渺渺，白云亦英英。  
离人不可望，日暮芳洲情。黄鹤有逸翮，翘首白云倾。  
欲为山中侣，肯秘辽天声。蓝缕真子褐，葳蕤近臣纓。  
以兹夺尔怀，常恐道不成。吾门弟子中，不减惠休名。  
一性研已远，五言功更精。从君汗漫游，莫废学无生。  
忍草肯摇落，禅枝不枯荣。采采慰长路，知吾心不轻。  
幻情有去住，真性无离别。留取老桂枝，归来共攀折。

卷 818\_7 【雪溪馆送韩明府章辞满归】

皎然

洛令从告还，故人东门饯。惠爱三年积，轩车一夜远。  
晓月离馆空，秋风故山晚。荣君有嘉荐，顾我阻游衍。  
宿昔峰顶心，依依不可卷。

卷 818\_8 【送穆寂赴举】

皎然

天子锡玄纁，倾山礼隐沦。君抛青霞去，荣资观国宾。  
剑光既陆离，琼彩何璘玢。凤驾别情远，商弦秋意新。  
冥冥鸿鹄姿，数尺看苍旻。残寇近宋郊，西行恶飙尘。  
立身素耿介，处难思经纶。春府搜才日，高科得一人。

卷 818\_9 【送张彝归长沙】

皎然

早闻凌云彩，谓在鸳鹭俦。华发始相遇，沧江仍旅游。  
策名忘苟进，澹虑轻所求。常服远游诫，缅怀经世谋。  
片帆背风渚，万里还湘洲。别望荆云积，归心汉水流。  
兰苕行采采，桂棹思悠悠。宿昔无机者，为君动离忧。

卷 818\_10 【秋日毗陵南寺送潘述之扬州】

皎然

孤客秋易伤，嘶蝉静仍续。佳晨亦已屡，欢会常不足。  
禅地非路岐，我心岂羁束。情生远别时，坐恨清景促。

望中千里隔，暮归西山曲。萧条月中道，彩萼原上绿。  
不见同心人，幽怀增踟躅。

卷 818\_11 【春日又送潘述之扬州】

皎然

别渚望邗城，岐路春日遍。柔风吹杨柳，芳景流郊甸。  
日日东林期，今夕异乡县。文房旷佳士，禅室阻清盼。  
离恨夺赏心，不得谐所愿。莫忆山中人，碧云遥可见。

卷 818\_12 【新秋送卢判官】

皎然

故人念宿昔，欲别增远情。入座炎气屏，为君秋景清。  
由来空山客，不怨离弦声。唯有暮蝉起，相思碧云生。

卷 818\_13 【奉送袁高使君诏征赴行在，效曹刘体】

皎然

皇心亭毒广，螫贼皆陶甄。未刈蚩尤旗，方同轩后年。  
天子幸汉中，轘辕阻氛烟。玺书召幕牧，名在列岳仙。

国难倚长城，庙谋资大贤。清损休汝骑，仁留述职篇。  
遐路渺天末，繁笳思河边。饰徒促远期，祇命赴急宣。  
謏才岂足称，深仁顾何偏。那堪临流意，千里望旗旃。

卷 818\_14 【奉送陆中丞长源诏征入朝】

皎然

诏下鄴侯幕，征贤宠上勋。才当持汉典，道可致尧君。  
藩牧今荣饒，诗流此盛文。水从吴渚别，树向楚门分。  
宿寺期嘉月，看山识故云。归心复何奈，怊怅在江濱。

卷 818\_15 【奉送李中丞道昌入朝】

皎然

文宪中司盛，恩荣外镇崇。诸侯皆取则，八使独推功。  
诏喜新衔凤，车看旧饰熊。去思今武子，余教昔文翁。  
清在如江水，仁留是国风。光征二千石，扫第望司空。

卷 818\_16 【冬日送颜延之明府抚州觐叔父】

皎然

临川千里别，惆怅上津桥。日暮人归尽，山空雪未消。

乡云心渺渺，楚水路遥遥。林下方欢会，山中独寂寥。  
天寒惊断雁，江信望回潮。岁晚流芳歇，思君在此宵。

卷 818\_17 【送关小师还金陵】

皎然

如何有归思，爱别欲忘难。白鹭沙洲晚，青龙水寺寒。  
蕉花铺净地，桂子落空坛。持此心为境，应堪月夜看。

卷 818\_18 【岷山送裴秀才赴举】

皎然

汉家招秀士，岷上送君行。万里见秋色，两河伤远情。  
王师出西镐，虏寇避东平。天府登名后，回看楚水清。

卷 818\_19 【酬别襄阳诗僧少微（诗中答上人归梦之意）】

皎然

证心何有梦，示说梦归频。文字赍秦本，诗骚学楚人。  
兰开衣上色，柳向手中春。别后须相见，浮云是我身。

卷 818\_20 【送契上人游扬州】

皎然

西陵古江口，远见东扬州。渌水不同泛，春山应独游。  
寻僧白岩寺，望月谢家楼。宿昔心期在，人寰非久留。

卷 818\_21 【送德清卫明府赴选（时柳黜陟有荐状）】

皎然

八使慎求能，东人独荐君。身犹千里限，名已九霄闻。  
远路翻喜别，离言暂惜分。凤门多士会，拥佩入卿云。

卷 818\_22 【送郑孝廉淮西覲省】

皎然

离袂翠华满，晨羞欲早行。春风生楚树，晓角发隋城。  
野霭湿衣彩，江鸿增客情。征途不用戒，坐见白波清。

卷 818\_23 【送沈秀才之闽中】

皎然

越客不成歌，春风起绿波。岭重寒不到，海近瘴偏多。  
野戍桄榔发，人家翡翠过。翻疑此中好，君问定如何。

卷 818\_24 【送清会上人游京】

皎然

佳游限衰疾，一笑向西风。思见青门外，曾临素沪东。  
峰明云际寺，日出露寒宫。行道禅长在，香尘不染空。

卷 818\_25 【送沈居士还太原】

皎然

辞官因世难，家族盛南朝。名重郊居赋，才高独酌谣。  
浪花飘一叶，峰色向三条。高逸虽成性，弓旌肯忘招。

卷 818\_26 【同颜使君真卿岷山送李法曹阳冰西上献书时会有诏征赴京】

皎然

汉日中郎妙，周王太史才。云书捧日去，鹤版下天来。  
草见吴洲发，花思御苑开。羊公惜风景，欲别几迟回。

卷 818\_27 【兵后送姚太祝赴选】

皎然

两河兵已偃，处处见归舟。日夜故人散，江皋芳树秋。  
楚云伤远思，秦月忆佳游。名动春官籍，翩翩才少俦。

卷 818\_28 【兵后送薛居士移家安吉】

皎然

旧游经丧乱，道在复何人。寒草心易折，闲云性常真。  
交情别后见，诗句比来新。向我桃州住，惜君东岭春。

卷 818\_29 【送邬倬之洪州覲兄弟】

皎然

年少足诗情，西江楚月清。书囊山翠湿，琴匣雪花轻。  
久别经离乱，新正忆弟兄。赠君题乐府，为是豫章行。

卷 818\_30 【送乾封李成】

皎然

羽檄飞未息，离情远近同。感君由泛瑟，关我是征鸿。  
眇默归人尽，疏芜夜渡空。还期当岁晚，独在路行中。

卷 818\_31 【送崔判官还扬子】

皎然

轻传祇远役，依依下姑亭。秋声满杨柳，暮色绕郊坰。  
烟水摇归思，山当楚驿青。

卷 818\_32 【奉酬袁使君西楼饯秦山人与昼同赴李侍御招三韵】

皎然

秋风怨别情，江守上西城。竹署寒流浅，琴窗宿雨晴。  
治书招远意，知共楚狂行。

卷 818\_33 【送清凉上人】

皎然

何意欲归山，道高由境胜。花空觉性了，月尽知心证。  
永夜出禅吟，清猿自相应。

卷 818\_34 【送李丞使宣州】

皎然

结驷何翩翩，落叶暗寒渚。梦里春谷泉，愁中洞庭雨。  
聊持剡山茗，以代宣城醕。

卷 818\_35 【送至洪沙弥游越】

皎然

知尔学无生，不应伤此别。相逢宿我寺，独往游灵越。  
早晚花会中，经行剡山月。

卷 818\_36 【送皇甫侍御曾还丹阳别业】

皎然

云阳别夜忆春耕，花发菱湖问去程。积水悠扬何处梦，  
乱山稠叠此时情。将离有月教弦断，赠远无兰觉意轻。  
朝右要君持汉典，明年北墅可须营。

卷 818\_37 【白蘋洲送洛阳李丞使还】

皎然

蘋洲北望楚山重，千里回轺止一封。临水情来还共载，  
看花醉去更相从。罢官风渚何时别，寄隐云阳几处逢。  
后会那应似畴昔，年年觉老雪山容。

卷 818\_38 【送履霜上人还金陵西山】

皎然

携锡西山步绿莎，禅心未了奈情何。  
湘宫水寺清秋夜，月落风悲松柏多。

卷 818\_39 【送辨聪上人还广陵】

皎然

莫学休公学远公，了心须与我心同。  
隋家古柳数株在，看取人间万事空。

卷 818\_40 【送清励上人游福建】

皎然

禅子自矜禅性成，将来拟照建溪清。  
南看闽树花不落，更取何缘了妄情。

卷 818\_41 【送顾道士游洞庭山】

皎然

见说洞庭无上路，春游乱踏五灵芝。  
含桃风起花狼藉，正是仙翁棋散时。

卷 818\_42 【送邢台州济（一作送独孤使君赴岳州）】

皎然

海上仙山属使君，石桥琪树古来闻。  
他时画出白团扇，乞取天台一片云。

卷 818\_43 【送柳察谏议叔】

皎然

东城南陌强经过，怨别无心亦放歌。  
明日院公应问我，闲云长在石门多。

卷 818\_44 【送柳淡扶侍赴洪州（此子素少宦情共予有西山之好）】

皎然

中林许师友，忽阻夙心期。自顾青綈好，来将黄鹤辞。  
少年轻远涉，世道得无欺。烟雨孤舟上，晨昏千里时。  
离魂渺天末，相望在江湄。无限江南柳，春风卷乱丝。

卷 818\_45 【同李司直题武丘寺兼留诸公与陆羽之无锡】

皎然

陵寝成香阜，禅枝出白杨。剑池留故事，月树即他方。  
应世缘须别，栖心趣不忘。还将陆居士，晨发泛归航。

卷 818\_46 【夏日题郑谷江上纳凉馆】

皎然

迢遥山意外，清风又对君。若为于此地，翻作路岐分。  
别馆琴徒语，前洲鹤自群。明朝天畔远，何处逐闲云。

卷 818\_47 【太湖馆送殷秀才赴举】

皎然

春风洞庭路，摇荡暮天多。衰疾见芳草，别离伤远波。  
诗名推首荐，赋甲拟前科。数日闻天府，山衣制芰荷。

卷 818\_48 【送重钧上人游天台】

皎然

渐看华顶出，幽赏意随生。十里行松色，千重过水声。  
海容云正尽，山色雨初晴。事事将心证，知君道可成。

卷 818\_49 【早春送颜主簿游越东，兼谒元中丞】

皎然

轻舸趣不已，东风吹绿蘋。欲看梅市雪，知赏柳家春。  
别意倾吴醕，芳声动越人。山阴三月会，内史得嘉宾。

卷 818\_50 【同颜使君清明日游，因送萧主簿】

皎然

谁知赏佳节，别意忽相和。暮色汀洲遍，春情杨柳多。  
高城恋旌旆，极浦宿风波。惆怅支山月，今宵不再过。

卷 818\_51 【送道琚上人还金陵】

皎然

一与钟山别，山中得信稀。经年求法后，及夏问安归。  
野实充甘膳，池花当彩衣。慈亲莫返拜，外礼欲无为。

卷 818\_52 【送裴邕之上京】

皎然

辞山偶世清，挟策忽西行。帆过随江疾，衣沾楚雪轻。  
尚文须献赋，重道莫论兵。东观今多事，应高白马生。

卷 818\_53 【送珍上人还天竺，兼寄广通上人、秦山人】

皎然

江寺名天竺，多居蹑远踪。春帆依柳浦，轻履上莲峰。  
禅子兼三隐，空书共一封。因君达山信，应向白云逢。

卷 818\_54 【送张孝廉赴举】

皎然

名在诸生右，家经见素风。春田休学稼，秋赋出儒宫。  
别路残云湿，离情晚桂丛。明年石渠署，应继叔孙通。

卷 818\_55 【送刘司法之越】

皎然

萧萧鸣夜角，驱马背城濠。雨后寒流急，秋来朔吹高。  
三山期望海，八月欲观涛。几日西陵路，应逢谢法曹。

卷 818\_56 【送简栖上人之建州覲使君舅】

皎然

乱峰江上色，羨尔及秋行。释氏推真子，郗家许贵甥。  
鬣花新雨净，帆叶好风轻。千里依元舅，回潮亦有情。

卷 818\_57 【登开元寺楼送崔少府还平望驿】

皎然

登望思虑积，长亭树连连。悠扬下楼日，杳映傍帆烟。  
入夜四郊静，南湖月待船。

卷 818\_58 【送王居士游越】

皎然

野性配云泉，诗情属风景。爱作烂熯游，闲寻东路永。  
何山最好望，须上萧然岭。

卷 818\_59 【杂言重送皇甫侍御曾】

皎然

人独归，日将暮。孤帆带孤屿，远水连远树。  
难作别时心，还看别时路。

卷 818\_60 【送演上人之抚州瓢使君叔】

皎然

临川内史怜诸谢，尔在生缘比惠宗。远别应将秦本去，  
幽寻定有楚僧逢。停船夜坐亲孤月，把锡秋行入乱峰。  
便道须过大师寺，白莲池上访高踪。

卷 818\_61 【送大宝上人归楚山】

皎然

厌上乌桥送别频，湖光烂熳望行人。欲将夜舸陪嘉月，  
肯住空林伴老身。独鹤翩翩飞不定，归云萧散会无因。  
从何得道怀惆怅，莫是人间屡见春。

卷 818\_62 【送侯秀才南游】

皎然

芳草随君自有情，不关山色与猿声。  
为看严子滩头石，曾忆题诗不著名。

卷 818\_63 【别洞庭维谅上人】

皎然

白云关我不关他，此物留君情最多。  
情著春风生橘树，归心不怕洞庭波。

卷 818\_64 【康造录事宅送太祝侄之虔吉访兄弟】

皎然

阮咸别曲四座愁，赖是春风不是秋。  
漫漫江行访兄弟，猿声几夜宿芦洲。

卷 818\_65 【冬日梅溪送裴方舟宣州】

皎然

平明匹马上村桥，花发梅溪雪未消。  
日短天寒愁送客，楚山无限路遥遥。

卷 818\_66 【送韦向睦州谒独孤使君汜】

皎然

才子南看多远情，闲舟荡漾任春行。  
新安江色长如此，何似新安太守清。

卷 818\_67 【送至严山人归山（一作送严上人）】

皎然

初到人间柳始阴，山书昨夜报春深。  
朝朝花落几株树，恼杀禅僧未证心。

卷 818\_68 【送僧游扬州】

皎然

平明择钵向风轻，正及隋堤柳色行。  
知尔禅心还似我，故宫春物肯伤情。

卷 818\_69 【对陆迅饮天目山茶，因寄元居士晟】

皎然

喜见幽人会，初开野客茶。日成东井叶，露采北山芽。  
文火香偏胜，寒泉味转嘉。投铛涌作沫，著碗聚生花。  
稍与禅经近，聊将睡网赊。知君在天目，此意日无涯。

卷 818\_70 【渡前溪】

皎然

不意入前溪，爱溪从错落。清清鉴不足，非是深难度。

卷 818\_71 【送灵澈】

皎然

我欲长生梦，无心解伤别。千里万里心，只似眼前月。

卷 818\_72 【寄路温州】

皎然

欲问采灵药，如何学无生。爱鹤颇似君，且非求仙情。

卷 818\_73 【浣纱女（一作王维诗，题云白石滩）】

皎然

清浅白沙滩，绿蒲尚堪把。家住水东西，浣纱明月下。

卷 818\_74 【待山月】

皎然

夜夜忆故人，长教山月待。今宵故人至，山月知何在。

卷 818\_75 【杂兴】

皎然

人生分已定，富贵岂妄来。不见海底泥，飞上成尘埃。

卷 818\_76 【舂陵登望】

皎然

西底空流水，东垣但聚云。最伤梅岭望，花雪正纷纷。

卷 818\_77 【投知己】

皎然

若为令忆洞庭春，上有闲云可隐身。  
无限白云山要买，不知山价出何人。

## 第八百一十九卷

### 卷 819\_1 【兵后余不亭重送卢孟明游江西】

皎然

携手曾此分，恍如隔胡越。伦侯古封邑，荣盛风雨歇。  
饥鹯号空亭，野草生故辙。如何此路岐，更作千年别。  
冯轼望远道，春山无断绝。朝行入郢树，夜泊依楚月。  
佳士持操高，扬才日昭晰。离言何所赠，盈满有亏缺。  
时节伤蟋蟀，芳菲忌澹蕤。予思鹿门隐，心迹贵冥灭。  
颓颜反芝朮，昔貌成冰雪。岁晏期尔来，销声坐岩穴。

### 卷 819\_2 【别山诗】

皎然

山翁亦好禅，借我风溪树。采药多近峰，汲泉有春渡。  
幽僧时相遇，仙子或与晤。自许战胜心，弥高独游步。  
如何区中事，夺我林栖趣。辞山下复上，恋石行仍顾。  
宿昔情或乖，庶几迹无误。松声莫相谗，此心冥去住。

卷 819\_3 【同袁高使君送李判官使回】

皎然

庾公欢此别，路远意犹赊。为出塘边柳，荣归府中花。  
驰阳照古堞，遥思凝寒笳。延步下前渚，溯觞流浅沙。  
湖光引行色，轻舸傍残霞。

卷 819\_4 【陪颜使君饯宣谕萧常侍】

皎然

江涛凋瘵后，远使发天都。昏垫宸心及，哀矜诏命敷。  
恤民驱急传，访旧枉征舳。外镇藩条最，中朝顾问殊。  
文皆正风俗，名共溢寰区。已事方怀阙，归期早戒涂。  
繁笳咽水阁，高盖拥云衢。暮色生千嶂，秋声入五湖。  
离歌犹宛转，归驭已踟躇。今夕庾公意，西楼月亦孤。

卷 819\_5 【奉陪颜使君修《韵海》毕，东溪泛舟饯诸文士】

皎然

诸侯崇鲁学，羔雁日成群。外史刊新韵，中郎定古文。  
菁华兼百氏，缣素备三坟。国语思开物，王言欲致君。

研精业已就，欢宴惜应分。独望西山去，将身寄白云。

卷 819\_6 【今上初登极岁送皇甫孝廉赴选（孝廉即故大夫之子）】

皎然

行应会府春，欲劝及芳辰。北极天文正，东风汉律新。  
少年逢圣代，欢笑别情亲。况是勋庸后，恩荣袭尔身。

卷 819\_7 【同杨使君白蘋洲送陆侍御士佳入朝】

皎然

久爱吴兴客，来依道德藩。旋师闻杖杜，归路忆轘辕。  
旧佩苍玉在，新歌白芷繁。今朝天地静，北望重飞翻。

卷 819\_8 【雪夜送海上人常州觐叔父，上人殷仲文后】

皎然

继世风流在，传心向一灯。望云裁衲惯，玩雪步花能。  
交战情忘久，销魂别未曾。明朝阮家集，知有竹林僧。

卷 819\_9 【送常清上人还舒州】

皎然

灊人思尔法，楚信有回船。估客亲宵语，闲鸥偶昼禅。  
经声含石漱，麈尾拂江烟。常说归山意，诛茅庐霍前。

卷 819\_10 【岷山送崔子向之宣州谒裴使君】

皎然

楚思入诗清，晨登岷山情。秋天水西寺，古木宛陵城。  
琴匣应将往，书车亦共行。吾知江太守，一顾重君名。

卷 819\_11 【送严明府入关谒黎京兆】

皎然

春日异秋风，何为怨别同。潮回芳渚没，花落昼山空。  
旅候闻嘶马，残阳望断鸿。应思右内史，相见直城中。

卷 819\_12 【送丘秀才游越】

皎然

山情与诗思，烂熳欲何从。夜舸谁相逐，空江月自逢。  
春期越草秀，晴忆剡云浓。便拟将轻锡，携居入乱峰。

卷 819\_13 【送杨校书还济源】

皎然

妖烽昨日静，故里近嵩丘。楚月摇归梦，江枫见早秋。  
乡心无远道，北信减离忧。禅子还无事，辞君买沃州。

卷 819\_14 【送杨遂初赴选】

皎然

秋风吹别袂，客思在长安。若得临觴醉，何须减瑟弹。  
秉心凌竹柏，仗信越波澜。春会文昌府，思君每北看。

卷 819\_15 【送赞上人还京】

皎然

久游春草尽，还寄北船归。沙鸟窥中食，江云入净衣。  
秦原山色近，楚寺磬声微。见说翻经馆，多闻似者稀。

卷 819\_16 【送广通上人游江西】

皎然

香炉七岭秀，秋色九江清。自古多禅隐，吾常爱此行。  
寻师经鄂渚，受请到青城。离别人间事，何关道者情。

卷 819\_17 【送罗判官还寿州幕】

皎然

君章才五色，知尔得家风。故里旋归驾，寿春思奉戎。  
天寒长蛇伏，飙烈文虎雄。定颂张征虏，桓桓戡难功。

卷 819\_18 【送李秀才赴婺州招】

皎然

山开江色上，孤赏去应迟。绿水迎吴榜，秋风入楚词。  
猿清独宿处，木落远行时。见说东阳守，登楼为尔期。

卷 819\_19 【送薛逢之宣州谒废使（一作谒裴使君）】

皎然

六月鹏尽化，鸿飞独冥冥。秋烽家不定，险路客频经。  
牛渚何时到，渔船几处停。遥知咏史夜，谢守月中听。

卷 819\_20 【送德守二叔侄上人还国清寺觐师】

皎然

道贤齐二阮，俱向竹林归。古偈穿花线，春装卷叶衣。  
僧墟回水寺，佛陇启山扉。爱别吾何有，人心强有违。

卷 819\_21 【同明府章送沈秀才还石门山读书】

皎然

身为郢令客，心许楚山云。文墨应经世，林泉漫诱君。  
欲随樵子去，惜与道流分。肯谢申公辈，治诗事汉文。

卷 819\_22 【送吉判官还京赴崔尹幕】

皎然

江南梅雨天，别思极春前。长路飞鸣鹤，离帆聚散烟。  
清晨趋九陌，秋色望三边。见说王都尹，山阳辟一贤。

卷 819\_23 【送裴判官赴商幕】

皎然

商洛近京师，才难赴幕时。离歌纷白纻，候骑拥青丝。  
会喜疲人息，应逢猾虏衰。看君策高足，自此烟霄期。

卷 819\_24 【送李喻之处士洪州谒曹王】

皎然

独思贤王府，遂作豫章行。雄镇庐霍秀，高秋江汉清。  
见闻惊苦节，艰故伤远情。西邸延嘉士，遗才得正平。

卷 819\_25 【送唐赞善游越】

皎然

田园临汉水，离乱寄随关。今日烟尘尽，东西又未还。  
长亭百越外，孤棹五湖间。何处游芳草，云门千万山。

卷 819\_26 【送韦秀才】

皎然

晨装行堕叶，万里望桑干。旧说泾关险，犹闻易水寒。  
黄云战后积，白草暮来看。近得君苗信，时教旅思宽。

卷 819\_27 【送陈秀才赴举】

皎然

诸侯惧削地，选士皆不羈。休隐脱荷芰，将鸣矜羽仪。  
甲科争玉片，诗句拟花枝。君实三楚秀，承家有清规。

卷 819\_28 【乌程李明府水堂同卢使君幼平送奘上人游五台】

皎然

身将刘令隐，经共谢公翻。有此宗师在，应知我法存。  
问心常寂乐，为别岂伤魂。独访华泉去，秋风入雁门。

卷 819\_29 【送李季良北归】

皎然

风吹残柳丝，孤客欲归时。掩抑楚弦绝，离披湘叶衰。  
前军犹转战，故国杳难期。北望雁门雪，空吟平子诗。

卷 819\_30 【送淳于秀才兰陵覲省】

皎然

欢言欲忘别，风信忽相惊。柳浦归人思，兰陵春草生。  
撷芳心未及，视枕恋常盈。此去非长路，还如千里情。

卷 819\_31 【送至洪沙弥赴上元受戒（上元江中蔡州有梁戒坛）】

皎然

不肯资章甫，胜衣被木兰。今随秣陵信，欲及蔡州坛。  
野寺钟声远，春山戒足寒。归来次第学，应见后心难。

卷 819\_32 【九日同卢使君幼平吴兴郊外送李司仓赴选】

皎然

重阳千骑出，送客为踟蹰。旷野多摇落，寒山满路隅。  
晴空悬菡萏，秋色起菱湖。几日登司会，扬才盛五都。

卷 819\_33 【送卢孟明还上都】

皎然

江皋北风至，归客独伤魂。楚水逢乡雁，平陵忆故园。  
征骖嘶别馆，落日隐寒原。应及秦川望，春华满国门。

卷 819\_34 【送李少宾赴举】

皎然

岂谓江南别，心如塞上行。苦云摇阵色，乱木搅秋声。  
周谷雨未散，汉河流尚横。春司迟尔策，方用静妖兵。

卷 819\_35 【留别阎士和】

皎然

不惯人间别，多应忘别时。逢山又逢水，只畏却来迟。

卷 819\_36 【送李道士】

皎然

常随山上下，忽限江南北。共是忘情人，何由肯相忆。

卷 819\_37 【送裴参军还下邳旧居】

皎然

北望烟铺骠骑营，虏烽无火楚天晴。  
此时千里西归客，泗上春风得及耕。

卷 819\_38 【送文会上人还富阳】

皎然

悠悠渺渺属寒波，故寺思归意若何。  
长忆孤洲二三月，春山偏爱富春多。

卷 819\_39 【送维谅上人归洞庭】

皎然

从来湖上胜人间，远爱浮云独自还。  
孤月空天见心地，寥寥一水镜中山。

卷 819\_40 【九月八日送萧少府归洪州】

皎然

明日重阳今日归，布帆丝雨望霏霏。  
行过鹤渚知堪住，家在龙沙意有违。

卷 819\_41 【同颜鲁公泛舟送皇甫侍御曾】

皎然

维舟若许暂从容，送过重江不厌重。  
霜简别来今始见，雪山归去又难逢。

卷 819\_42 【送孙侍御游越】

皎然

不知持斧客，吟会是何情。丹陛恩犹在，沧洲赏暂行。  
江桡随月泛，山策逐云行。佳句传零雨，诗流许盛名。

卷 819\_43 【送颜处士还长沙覲省】

皎然

西候风信起，三湘孤客心。天寒汉水广，乡远楚云深。  
服彩将侍膳，撷芳思满襟。归人忘艰阻，别恨独何任。

卷 819\_44 【送还本上人游江西】

皎然

欲广分何教，心将江汉期。云招望寺处，月待溯杯时。  
真侣谁伤别，降猿汝自悲。多应过庐阜，幽赏却来迟。

卷 819\_45 【送路少府使京兼覲侍御兄】

皎然

国赋推能吏，今朝发贡湖。伫瞻双阙凤，思见柏台乌。  
树向秦关远，江分楚驿孤。荣君有兄弟，相继骋长途。

卷 819\_46 【于武原从送卢士举】

皎然

落日独归客，空山匹马嘶。萧条古关外，岐路更东西。  
大泽云寂寂，长亭雨凄凄。君还到湘水，寒夜满猿啼。

卷 819\_47 【送乌程李明府得陟状赴京】

皎然

驿吏满江城，深仁见此情。士林推玉振，年府荐冰清。  
为政移风久，承恩就日行。仲容纶綍贵，南巷有光荣。

卷 819\_48 【送裴秀才往会稽山读书】

皎然

一身赍万卷，编室寄烟萝。砚滴穿池小，书衣种楮多。  
吟诗山响答，泛瑟竹声和。鹤板求儒术，深居意若何。

卷 819\_49 【送崔詹事论之上都（崔尝典吴兴）】

皎然

金虎城池在，铜龙剑珮新。重看前浦柳，犹忆旧洲蘋。  
远思秦云暮，归心腊月春。青园昔游处，惆怅别离人。

卷 819\_50 【京口送卢孟明还扬州】

皎然

萧萧北风起，孤棹下江滨。暮客去来尽，春流南北分。  
萋萋御亭草，渺渺芜城云。相送目千里，空山独望君。

卷 819\_51 【送沙弥大智游五台】

皎然

童年随法侣，家世本儒流。章句三生学，清凉万里游。  
云归龙沼暗，木落雁门秋。长老应相问，传予向祖州。

卷 819\_52 【送稟上人游越】

皎然

云泉谁不赏，独见尔情高。投石轻龙窟，临流笑鹭涛。  
折荷为片席，洒水净方袍。剡路逢禅侣，多应问我曹。

卷 819\_53 【送潘秀才之舒州】

皎然

楚水清风生，扬舲泛月行。荻洲寒露彩，雷岸曙潮声。  
东道思才子，西人望客卿。从来金谷集，相继有诗名。

卷 819\_54 【送王山人游庐山】

皎然

千里访灵奇，山资亦相随。叶舟过鹤市，花漏宿龙池。  
峰顶应闲散，人间足别离。白云将世事，吾见尔心知。

卷 819\_55 【送道契上人之越覲大夫叔】

皎然

楚僧推后辈，唐本学新经。外国传香鬘，何人施竹瓶。  
秋风别李寺，春日向柯亭。大阮今为郡，看君眼最青。

卷 819\_56 【送沙弥长文游京】

皎然

白版年犹小，黄花褐已通。若为诗思逸，早欲似休公。  
迈俗多真气，传家有素风。应须学心地，宗旨在关东。

卷 819\_57 【秋日送择高上人往江西谒曹王】

皎然

超然独游趣，无限别山情。予病不同赏，云闲应共行。  
斋容秋水照，香鬣早风轻。曾被陈王识，遥知江上迎。

卷 819\_58 【送如献上人游长安】

皎然

关中四子教犹存，见说新经待尔翻。为法应过七祖寺，  
忘名不到五侯门。闲寻鄠杜看修竹，独上风凉望古原。  
高逸诗情无别怨，春游从遣落花繁。

卷 819\_59 【日曜上人还润州】

皎然

送君何处最堪思，孤月停空欲别时。露茗犹芳邀重会，  
寒花落尽不成期。鹤令先去看山近，云碍初飞到寺迟。  
莫倚禅功放心定，萧家陵树误人悲。

卷 819\_60 【寺院听胡笳送李殷】

皎然

一奏胡笳客未停，野僧还欲废禅听。  
难将此意临江别，无限春风葭菼青。

卷 819\_61 【送僧绎】

皎然

斜日摇扬在柳丝，孤亭寂寂水逶迤。  
谁堪别后行人尽，唯有春风起路岐。

卷 819\_62 【答裴评事澄荻花间送梁肃拾遗】

皎然

波上荻花非雪花，风吹撩乱满袈裟。  
如今岁晏无芳草，独对离樽作物华。

卷 819\_63 【送胜云小师】

皎然

昨日雪山记尔名，吾今坐石已三生。  
少年道性易流动，莫遣秋风入别情。

卷 819\_64 【诮士和别】

皎然

今日同，明日隔，何事悠悠久为客。君怜溪上去来云，  
我羡磷磷水中石。

卷 819\_65 【送吴冯游京】

皎然

北期何意促，蕙草夜来繁。清月思淮水，春风望国门。  
此时休旋逸，万里忽飞翻。若忆山阴会，孤琴为我援。

卷 819\_66 【送僧游宣州】

皎然

楚山千里一僧行，念尔初缘道未成。  
莫向舒姑泉口泊，此中呜咽为伤情。

卷 819\_67 【宿支硎寺上房】

皎然

上方精舍远，共宿白云端。寂寞千峰夜，萧条万木寒。  
山光霜下见，松色月中看。却与西林别，归心即欲阑。

卷 819\_68 【答胡处士】

皎然

西山禅隐比来闻，长道唯应我与君。  
书上无名心忘却，人间聚散似浮云。

卷 819\_69 【答张乌程】

皎然

莫道谪官无主人，秣陵才令日相亲。  
前溪更有忘忧处，荷叶田田间白蘋。

卷 819\_70 【酬张明府】

皎然

爱君诗思动禅心，使我休吟待鹤吟。  
更说郡中黄霸在，朝朝无事许招寻。

卷 819\_71 【劳山居寄呈吴处士】

皎然

官居鼎鼐古今无，名世才臣独一余。  
贤阁御题龙墨灿，诏归补袞在须臾。

## 第八百二十卷

### 卷 820\_1 【从军行五首】

皎然

候骑出纷纷，元戎霍冠军。汉鞞秋聒地，羌火昼烧云。  
万里戈城合，三边羽檄分。乌孙驱未尽，肯顾辽阳勋。

韩旆拂丹青，汉军新破辽。红尘驱卤簿，白羽拥嫖姚。  
战苦军犹乐，功高将不骄。至今丁零塞，朔吹空萧萧。

百万逐呼韩，频年不解鞍。兵屯绝漠暗，马饮浊河干。  
破虏功未录，劳师力已殫。须防肘腋下，飞祸出无端。

飞将下天来，奇谋阃外裁。水心龙剑动，地肺雁山开。  
望气燕师锐，当锋虏阵摧。从今射雕骑，不敢过云堆。

黄纸君王诏，青泥校尉书。誓师张虎落，选将擐犀渠。  
雾暗津蒲失，天寒塞柳疏。横行十万骑，欲扫虏尘余。

卷 820\_2 【陇头水二首】

皎然

陇头水欲绝，陇水不堪闻。碎影摇枪垒，寒声咽幔军。  
素从盐海积，绿带柳城分。日落天边望，逶迤入塞云。

秦陇逼氐羌，征人去未央。如何幽咽水，并欲断君肠。  
西注悲穷漠，东分忆故乡。旅魂声搅乱，无梦到咸阳。

卷 820\_3 【塞下曲二首】

皎然

寒塞无因见落梅，胡人吹入笛声来。  
劳劳亭上春应度，夜夜城南战未回。

都护今年破武威，胡沙万里鸟空飞。  
旄竿瀚海扫云出，毡骑天山蹋雪归。

卷 820\_4 【览史】

皎然

黄绮皆皓发，秦时隐商山。嘉谋匡帝道，高步游天关。

不爱珪组绶，却思林壑还。放歌长松下，日与孤云闲。

卷 820\_5 【咏史】

皎然

独负高世资，冥冥寄浮俗。卞子去不归，何人辩荆玉。  
鬻春意不浅，污迹身岂辱。鸾铎乐迢遰，虬蟠甘窘束。  
五噫谿且正，可以见心曲。

卷 820\_6 【咏史】

皎然

田氏门下客，冯公众中贱。一朝市义还，百代名独擅。  
始知下客不可轻，能使主人功业成。借问高车与珠履，  
何如卑贱一书生。

卷 820\_7 【读张曲江集】

皎然

相公乃天盖，人文佐生成。立程正颓靡，绎思何纵横。  
春杼弄缃绮，阳林敷玉英。飘然飞动姿，邈矣高简情。

后辈惊失步，前修敢争衡。始欣耳目远，再使机虑清。  
体正力已全，理精识何妙。昔年歌阳春，徒推郢中调。  
今朝听鸾凤，岂独羨门啸。帝命镇雄州，待济寄上流。  
才兼荆衡秀，气助潇湘秋。逸荡子山匹，经奇文畅俦。  
沈吟未终卷，变态纷难数。曜耳代明瑯，袭衣同芳杜。  
愔愔闻玉磬，寤寐在灵府。

卷 820\_8 【奉酬陆使君见过，各赋院中一物，得江蓠】

皎然

江蓠生古砌，花每落禅床。嘉客未采掇，空门自馨香。  
名因诗目见，色对道心忘。不遇陆内史，谁知殊众芳。

卷 820\_9 【赋得谢墅送王长史（其墅即昼七代祖吴兴守旧居）】

皎然

世业西山墅，移家长我身。萧疏遗树老，寂寞废田春。  
车巷伤前辙，篱沟忆旧邻。何堪再过日，更送北归人。

卷 820\_10 【夏日同崔使君论登城楼赋得远山】

皎然

远山湖上小，青翠望依稀。才向窗中列，还从林表微。  
色浓春草在，峰起夏云归。不是蓬莱岛，如何人去稀。

卷 820\_11 【咏数探得七】

皎然

邹子谭天岁，黄童对日年。求真初作传，炼魄已成仙。  
鹤驾迎缙岭，星桥下蜀川。逢君竹林客，相对弄清弦。

卷 820\_12 【奉同颜使君真卿送李侍御萼，赋得荻塘路】

皎然

落日车遥遥，客心在归路。细草暗回塘，春泉萦古渡。  
遗踪叹芜没，远道悲去住。寂寞荻花空，行人别无数。

卷 820\_13 【赋颜氏古今一事，得《晋仙传》，送颜逸】

皎然

曾看颜氏传，多记晋时仙。却忆桐君老，俱还桂父年。  
青春留鬓发，白日向云烟。远别赍遗简，囊中有几篇。

卷 820\_14 【赋得石梁泉送崔逵】

皎然

架石通霞壁，悬崖散碧沙。天晴虹影渡，风细练文斜。  
举陟幽期阻，沿洄客意赊。河梁非此路，别恨亦无涯。

卷 820\_15 【赋得夜雨滴空阶，送陆羽归龙山（同字）】

皎然

闲阶夜雨滴，偏入别情中。断续清猿应，淋漓候馆空。  
气令烦虑散，时与早秋同。归客龙山道，东来杂好风。

卷 820\_16 【赋得灯心送李侍御萼（光字）】

皎然

灯心生众草，因有始知芳。彩妓窗偏丽，金桃动更香。  
花惊春未尽，焰喜夜初长。别后空离室，何人借末光。

卷 820\_17 【赋得竹如意送详师赴讲（青字）】

皎然

缥竹湘南美，吾师尚毁形。仍留负霜节，不变在林青。  
每入杨枝手，因谈贝叶经。谁期沃州讲，持此别东亭。

卷 820\_18 【听素法师讲《法华经》】

皎然

法子出西秦，名齐漆道人。才敷药草义，便见雪山春。  
护讲龙来远，闻经鹤下频。应机如一雨，谁不涤心尘。

卷 820\_19 【咏馘上人座右画松】

皎然

写得长松意，千寻数尺中。翠阴疑背日，寒色欲生风。  
真树孤标在，高人立操同。一枝遥可折，吾欲问生公。

卷 820\_20 【夏日登观农楼和崔使君】

皎然

片雨拂檐楹，烦襟四坐清。霏微过麦陇，萧散傍莎城。  
静爱和花落，幽闻入竹声。朝观趣无限，高咏寄深情。

卷 820\_21 【妙喜寺逵公院赋得夜磬送吕评事】

皎然

一磬寒山至，凝心转清越。细和虚籁尽，疏绕悬泉发。  
在夜吟更长，停空韵难绝。幽僧悟深定，归客忘远别。  
寂历无性中，真声何起灭。

卷 820\_22 【咏小瀑布】

皎然

瀑布小更奇，潺湲二三尺。细脉穿乱沙，丛声咽危石。  
初因智者赏，果会幽人迹。不向定中闻，那知我心寂。

卷 820\_23 【仙女台（得仙字）】

皎然

寂寂旧桑田，谁家女得仙。应无鸡犬在，空有子孙传。  
古木花犹发，荒台路未迁。暮来云一片，疑是欲归年。

卷 820\_24 【灵澈上人何山寺七贤石诗】

皎然

七石配七贤，隐僧山上移。石性殊磊落，君子又高奇。  
跂禅服宜坏，坐客冠可隳。夜倚月树影，昼倾风竹枝。  
集质患追琢，表顽用磷缁。佚火玉亦害，块然长在兹。

卷 820\_25 【潘丞孩子】

皎然

爱子性情奇，初生玉树枝。人曾天上见，名向月中知。  
我识婴儿意，何须待佩觿。

卷 820\_26 【南池杂咏五首·水月】

皎然

夜夜池上观，禅身坐月边。虚无色可取，皎洁意难传。  
若向空心了，长如影正圆。

卷 820\_27 【南池杂咏五首·溪云】

皎然

舒卷意何穷，萦流复带空。有形不累物，无迹去随风。  
莫怪长相逐，飘然与我同。

卷 820\_28 【南池杂咏五首·虚舟】

皎然

虚舟动又静，忽似去逢时。触物知无迁，为梁幸见遗。  
因风到此岸，非有济川期。

卷 820\_29 【南池杂咏五首·寒山】

皎然

侵空撩乱色，独爱我中峰。无事负轻策，闲行蹑幽踪。  
众山摇落尽，寒翠更重重。

卷 820\_30 【南池杂咏五首·寒竹】

皎然

袅袅孤生竹，独立山中雪。苍翠摇动风，婵娟带寒月。  
狂花不相似，还共凌冬发。

卷 820\_31 【望远村】

皎然

林杪不可分，水步遥难辨。一片山翠边，依稀见村远。

卷 820\_32 【惜暮景】

皎然

疏阴花不动，片景松梢度。夏日旧来长，佳游何易暮。

卷 820\_33 【效古（天宝十四年）】

皎然

日出天地正，煌煌辟晨曦。六龙驱群动，古今无尽时。  
夸父亦何愚，竞走先自疲。饮干咸池水，折尽扶桑枝。  
渴死化爝火，嗟嗟徒尔为。空留邓林在，折尽令人嗤。

卷 820\_34 【古别离（代人答阎士和）】

皎然

太湖三山口，吴王在时道。寂寞千载心，无人见春草。

谁识缄怨者，持此伤怀抱。孤舟畏狂风，一点宿烟岛。  
望所思兮若何，月荡漾兮空波。云离离兮北断，  
鸿眇眇兮南多。身去兮天畔，心折兮湖岸。  
春风胡为兮塞路，使我归梦兮撩乱。

卷 820\_35 【拟长安春词】

皎然

春信在河源，春风荡妾魂。春歌杂鶗鴂，春梦绕轘辕。  
春絮愁偏满，春丝闷更繁。春期不可定，春曲懒新翻。

卷 820\_36 【效古】

皎然

思君转战度交河，强弄胡琴不成曲。日落应愁陇底难，  
春来定梦江南数。万丈游丝是妾心，惹蝶萦花乱相续。

卷 820\_37 【昭君怨】

皎然

自倚婵娟望主恩，谁知美恶忽相翻。

黄金不买汉宫貌，青冢空埋胡地魂。

卷 820\_38 【铜雀妓】

皎然

强开尊酒向陵看，忆得君王旧日欢。  
不觉余歌悲自断，非关艳曲转声难。

卷 820\_39 【长门怨】

皎然

春风日日闭长门，摇荡春心似梦魂。  
谁遣花开只笑妾，不如桃李正无言。

卷 820\_40 【哭吴县房耸明府】

皎然

仁人迈厚德，可谓名实全。抚迹若疏旷，会心极精研。  
履危节讷屈，著论识不偏。恨以荣级浅，嘉猷未及宣。  
伊人期远大，志业难比肩。昭世既合并，吾君藉陶甄。  
奈何明明理，与善徒空诠。征教或稽圣，穷源反问天。

一官自吴邑，六翮委江壖。始是牵丝日，翻成撒瑟年。  
金膏果不就，玉珮长此捐。倚伏信冥昧，天修惊后先。  
安知忘情子，爱网素已褰。为有深仁感，遂令真性迁。  
心悲空林下，泪洒秋景前。夫子寡兄弟，抚孤伤藐然。  
倾云为惨结，吊鹤共联翩。割念命归驾，诀词向空筵。  
树桃阴始合，爱客位常悬。幡然远行时，崇望归朝旋。  
悟兹欢宴隔，哀被岁月延。书带变芳草，履痕移绿钱。  
冥期傥可逢，生尽会无缘。幸愿示因业，代君运精专。  
相思转寂寞，独往西林泉。欲见故人心，时阅所赠篇。  
素高陶靖节，今重楚先贤。芳躅将遗爱，可为终古传。

卷 820\_41 【哭觉上人（时绊剡中）】

皎然

忆君南适越，不作买山期。昨得耶溪信，翻为逝水悲。  
神交如可见，生尽杳难思。白日东林下，空怀步影时。

卷 820\_42 【题余不溪废寺】

皎然

武原离乱后，真界积尘埃。残月生秋水，悲风起故台。  
居人今已尽，栖鸽暝还来。不到无生理，应堪赋七哀。

卷 820\_43 【同李洗马入余不溪经辛将军故城】

皎然

惨惨寒城望，将军下世时。高墉暮草遍，大树野风悲。  
壁垒今惟在，勋庸近可思。苍然古溪上，川逝共凄其。

卷 820\_44 【忆天台】

皎然

箬溪朝雨散，云色似天台。应是东风便，吹从海上来。  
灵山游汗漫，仙石过莓苔。误到人间世，经年不早回。

卷 820\_45 【万回寺】

皎然

万里称逆化，愚蠢性亦全。紫绂拖身上，妖姬安膝前。  
见他拘坐寂，故我是眠禅。吾知至人心，杳若青冥天。

卷 820\_46 【禅诗】

皎然

万法出无门，纷纷使智昏。徒称谁氏子，独立天地元。  
实际且何有，物先安可存。须知不动念，照出万重源。

卷 820\_47 【哀教】

皎然

本师不得已，强为我著书。知尽百虑遣，名存万象拘。  
如何工言子，终日论虚无。伊人独冥冥，时人以为愚。

卷 820\_48 【闻钟】

皎然

古寺寒山上，远钟扬好风。声余月树动，响尽霜天空。  
永夜一禅子，泠然心境中。

卷 820\_49 【溪上月】

皎然

秋水月娟娟，初生色界天。蟾光散浦溆，素影动沦涟。  
何事无心见，亏盈向夜禅。

卷 820\_50 【山雪】

皎然

夕阳在西峰，叠翠萦残雪。狂风卷絮回，惊猿攀玉折。  
何意山中人，误报山花发。

卷 820\_51 【江上风】

皎然

江风西复东，飘暴忽何穷。初生虚无际，稍起荡漾中。  
应吹夏口樯竿折，定蹙湓城浪花咽。今朝莫怪沙岸明，  
昨夜声狂卷成雪。

卷 820\_52 【山雨】

皎然

一片雨，山半晴。长风吹落西山上，满树萧萧心耳清。  
云鹤惊乱下，水香凝不然。风回雨定芭蕉湿，  
一滴时时入昼禅。

卷 820\_53 【问遥山禅老】

皎然

天与松子寿，独饮日月精。复令颜子贤，胡为天其生。  
吾将寻河源，上天问天何不平？吾将诘仙老，  
大道无私谁强名？仙老难逢天不近，世人何人解应尽。  
明朝欲向翘头山，问取禅公此义还。

卷 820\_54 【禅思】

皎然

真我性无主，谁为尘识昏。奈何求其本，若拔大木根。  
妄以一念动，势如千波翻。伤哉子桑扈，虫臂徒虚言。  
神威兴外论，宗邪生异源。空何妨色在，妙岂废身存。

寂灭本非寂，喧哗曾未喧。嗟嗟世上禅，不共智者论。

卷 820\_55 【支公诗】

皎然

支公养马复养鹤，率性无机多脱略。天生支公与凡异，  
凡情不到支公地。得道由来天上仙，为僧却下人间寺，  
道家诸子论自然，此公唯许逍遥篇。山阴诗友喧四座，  
佳句纵横不废禅。

卷 820\_56 【述梦】

皎然

梦中归见西陵雪，渺渺茫茫行路绝。觉来还在剡东峰，  
乡心缭绕愁夜钟。寺北禅冈犹记得，梦归长见山重重。

卷 820\_57 【赤松（一作赤松涧）】

皎然

缘岸蒙笼出见天，晴沙沥沥水溅溅。  
何处羽人长洗药，残花无数逐流泉。

卷 820\_58 【戏题松树】

皎然

为爱松声听不足，每逢松树遂忘还。  
翛然此外更何事，笑向闲云似我闲。

卷 820\_59 【戏题二首】

皎然

看饮逢歌日屡曛，我身何似系浮云。  
时人不解野僧意，归去溪头作鸟群。

喧喧共在是非间，终日谁知我自闲。  
偶客狂歌何所为，欲于人事强相关。

卷 820\_60 【杂寓兴】

皎然

嗟嗟号呶子，世称谪仙俦。媚俗被皎绡，欺天荐昉修。  
奔景谓可致，驰龄言易流。燕昭昧往事，嬴政亡前筹。  
三山果不见，九仙忽悠悠。君看牛山乐，君见麋浦游。

昨日千金子，联绵成古丘。吾将揽明月，照尔生死流。  
至乐喜爱居，惭贻达者尤。冥冥光尘内，机丧成海馭。

卷 820\_61 【杂兴六首】

皎然

吾观谈天客，工言丧其精。万物资广庇，此中何有情。  
若为昧颜跖，修短怨太清。高论让邹子，放词征屈生。  
请从象外推，至论尤明明。

短龄役长世，扰扰悟不早。嫫女身后空，欢娱梦中好。  
从教西陵树，千载伤怀抱。鹤驾何冥冥，鳌洲去浩浩。  
柔颜感三花，凋发悲蔓草。月中伐桂人是谁，  
翻使年年不衰老。

谁高齐公子，泣听雍门琴。死且何足伤，殊非达人心。

独高庭中鹤，意远贵氛埃。有时青冥游，顾我还下来。

白云琅玕色，一片生虚无。此物若无心，若何卷还舒。

疏散遂吾性，栖山更无机。寥寥高松下，独有闲云归。  
精意不可道，冥然还掩扉。

卷 820\_62 【偶然五首】

皎然

乐禅心似荡，吾道不相妨。独悟歌还笑，谁言老更狂。

偶然寂无喧，吾了心性源。可嫌虫食木，不笑鸟能言。

隐心不隐迹，却欲住人寰。欠树移春树，无山看画山。  
居喧我未错，真意在其间。

虏语嫌不学，胡音从不翻。说禅颠倒是，乐杀金王孙。

真隐须无矫，忘名要似愚。只将两条事，空却汉潜夫。

卷 820\_63 【问天】

皎然

天公何时，谈者皆不经。谁道贤人死，今为传说星。

卷 820\_64 【寓言】

皎然

吾道本无我，未曾嫌世人。如今到城市，弥觉此心真。

卷 820\_65 【前溪作】

皎然

春歌已寂寂，古水自涓涓。徒误时人辈，伤心作逝川。

卷 820\_66 【戏作】

皎然

乞我百万金，封我异姓王。不如独悟时，大笑放清狂。

卷 820\_67 【浮云三章】

皎然

浮云浮云，集于扶桑。扶桑茫茫，日暮之光。

非日之暮，浮云之污。嗟我怀人，犹心如蠹。

浮云浮云，集于咸池。咸池微微，日昃之时。  
非日之昃，浮云之惑。嗟我怀人，忧心如织。

浮云浮云，集于高春。高春濛濛，日夕之容。  
非日之夕，浮云之积。嗟我怀人，忧心如怒。

卷 820\_68 【寓言】

皎然

人生百年我过半，天生才定不可换。  
东海钓鳌鳌不食，南山坐石石欲烂。

卷 820\_69 【若邪春兴】

皎然

夫春生若邪水，雨后漫流通。芳草行无尽，清源去不穷。  
野烟迷极浦，斜日起微风。数处乘流望，依稀似剡中。

卷 820\_70 【晨登乐游原，望终南积雪】

皎然

凌晨拥弊裘，径上古原头。雪霁山疑近，天高思若浮。  
琼峰埋积翠，玉嶂掩飞流。曜彩含朝日，摇光夺寸眸。  
寒空标瑞色，爽气袭皇州。清眺何人得，终当独再游。

卷 820\_71 【送商季皋】

皎然

比来知尔有诗名，莫恨东归学未成。  
新丰有酒为我饮，消取故园伤别情。

## 卷八百二十一

### 卷 821\_1【吊灵均词】

皎然

昧天道兮有无，听汨渚兮踌躇。期灵均兮若存，  
问神理兮何如。愿君精兮为月，出孤影兮示予。  
天独何兮有君，君在万兮不群。既冰心兮皎洁，  
上问天兮胡不闻。天不闻，神莫睹，若云冥冥兮雷霆怒，  
萧条杳眇兮馀草莽。古山春兮为谁，今猿哀兮何思。  
风激烈兮楚竹死，国殇人悲兮雨飏飏。雨飏飏兮望君时，  
光芒荡漾兮化为水，万古忠贞兮徒尔为。

### 卷 821\_2【步虚词】

皎然

予因览真诀，遂感西城君。玉笙下青冥，人间未曾闻。  
日华炼精魄，皎皎无垢氛。谓我有仙骨，且令饵氤氲。  
俯仰愧灵颜，愿随鸾鹄群。俄然动风驭，缥缈归青云。

卷 821\_3 【奉应颜尚书真卿观玄真子置酒张乐舞破阵画洞庭三山歌】

皎然

道流迹异人共惊，寄向画中观道情。如何万象自心出，  
而心澹然无所营。手援毫，足蹈节，披缣洒墨称丽绝。  
石文乱点急管催，云态徐挥慢歌发。乐纵酒酣狂更好，  
攒峰若雨纵横扫。尺波澶漫意无涯，片岭峻嶒势将倒。  
盼睐方知造境难，象忘神遇非笔端。昨日幽奇湖上见，  
今朝舒卷手中看。兴馀轻拂远天色，曾向峰东海边识。  
秋空暮景飒飒容，翻疑是真画不得。颜公素高山水意，  
常恨三山不可至。赏君狂画忘远游，不出轩墀坐苍翠。

卷 821\_4 【答韦山人隐起龙文药瓢歌】

皎然

野人药瓢天下绝，全如浑金割如月。彪炳文章智使然，  
生成在我不在天。若言有物不由物，何意中虚道性全。  
韦生能诗兼好异，获此灵瓢远相遗。仙侯玉帖人漫传，  
若士青囊世何秘。一捧一开如见君，药盛五色香氛氲。  
背上骊龙蟠不睡，张鳞摆颌生风云。世人强知金丹道，  
默仙不成秽仙老。年少纷如陌上尘，不见吾瓢尽枯槁。  
聊将系肘步何轻，便有三山孤鹤情。东方小儿乏此物，  
遂令仙籍独无名。

卷 821\_5【桃花石枕歌赠康从事】

皎然

卞山幽石产奇璞，荆人至死采不著。何人琢枕持赠君，  
片片桃花开未落。剑工见兮可为剑，玉工辨兮知非石。  
至宝由来览者稀，今君独鉴应欲惜。何辞售与章天真，  
幸得提携近玉人。可中弃置君不顾，天生秀色徒磷玢。  
四座喧喧争目悦，巧过造化称一绝。莫言昨日因错磨，  
看取从来无点缺。六月江南暑未阑，一尺花冰试枕看。  
高窗正午风飒变，室中不减春天寒。主人所重重枕德，  
文章外饰徒相惑。更有坚贞不易心，与君天下为士则。

卷 821\_6【张伯英草书歌】

皎然

伯英死后生伯高，朝看手把山中毫。先贤草律我草狂，  
风云阵发愁钟王。须臾变态皆自我，象形类物无不可。  
阆风游云千万朵，惊龙蹴踏飞欲堕。更睹邓林花落朝，  
狂风乱搅何飘飘。有时凝然笔空握，情在寥天独飞鹤。  
有时取势气更高，忆得春江千里涛。张生奇绝难再遇，  
草罢临风展轻素。阴惨阳舒如有道，鬼状魑容若可惧。  
黄公酒垆兴偏入，阮籍不嗔嵇亦顾。长安酒榜醉后书，  
此日骋君千里步。

卷 821\_7【寒栖子歌（曾居庐山，欲有事罗浮之行）】

皎然

君在庐山知不群，有疑是鹤又是云。生死尘埃污不得，  
眼前荣利徒纷纷。今日惠然来访我，酒榼书囊肩背荷。  
拂除衣上饵烟霞，昨夜胥门宿蔡家。天然不饮亦不食，  
抛名换姓觅不得。且向人间作酒仙，不肯将身生羽翼。  
停形为饵天地根，世人皆死我独存。洗虑因吞清明策，  
世人皆贪我常足。栖子妙今道已成，手把玄枢心运冥。  
能令鬼哭神效灵，身如飘风不可绊。朝游崆峒夕汗漫，  
向来坐客犹未散。忽忆罗浮欲去时，遥指孤云作路岐。  
海上仙游不可见，人间日落空桑枝。

卷 821\_8【翔隼歌送王端公】

皎然

古人赏神骏，何如秋隼击。独立高标望霜翻，  
应看天宇如咫尺。低回拂地凌风翔，鹏雏敢下雁断行。  
晴空四顾忽不见，有时独出青霞傍。穷阴万里落寒日，  
气杀草枯增奋逸。云塞斜飞搅叶迷，雪天直上穿花疾。  
见君高情有所属，赠别因歌翔隼曲。离亭惨惨客散时，  
歌尽路长意不足。

卷 821\_9【白云歌寄陆中丞使君长源】

皎然

一见西山云，使人情意远。凭高发咏何超遥，  
道妙如君有舒卷。萦空叠景多丽容，众峰峰上自为峰。  
洁白不由阴雨积，高明肯共杂烟重。万物有形皆有著，  
白云有形无系缚。黄金被烁玉亦瑕，一片飘然污不著。  
或逢天上或人间，人自营营云自闲。忽尔飞来暂为侣，  
忽然飞去莫能攀。逸民对云效高致，禅子逢云增道意。  
白云遇物无偏颇，自是人心见同异。阖闾天门宜曙看，  
为纓作盖拥千官。从龙合沓临清暑，就日逶迤绕露寒。  
谁怜西山云，亭亭处幽绝。坐石长看非我羁，  
手中欲揽待君说。贞白先生那得知，只向空山自怡悦。

卷 821\_10【裴端公使君清席，赋得青桂歌送徐长史】

皎然

昔年攀桂为留人，今朝攀桂送归客。秋风桃李摇落尽，  
为君青青伴松柏。谢公南楼送客还，高歌桂树凌寒山。  
应怜独秀空林上，空赏敷华积雪间。昨夜一枝生在月，  
婵娟可望不可折。若为天上堪赠行，徒使亭亭照离别。

卷 821\_11【周长史昉画毗沙门天王歌】

皎然

长史画神独感神，高步区中无两人。雅而逸，高且真，  
形生虚无忽可亲。降魔大戟缩在手，倚天长剑横诸绅。

慈威示物虽凛凛，在德无秋唯有春。吾知真象本非色，  
此中妙用君心得。苟能下笔合神造，误点一点亦为道。

写出霜缣可舒卷，何人应识此情远。秋斋清寂无外物，  
盥手焚香聊自展。忆昔胡兵围未解，感得此神天上下。  
至今云旗图我形，为君一顾烟尘清。

卷 821\_12【奉和颜鲁公真卿落玄真子舴艋舟歌】

皎然

沧浪子后玄真子，冥冥钓隐江之汜。剡木新成舴艋舟，  
诸侯落舟自兹始。得道身不系，无机舟亦闲。  
从水远逝兮任风还，朝五湖兮夕三山。停纶乍入芙蓉浦，  
击汰时过明月湾。太公取璜我不取，龙伯钓鳌我不钓。  
竹竿袅袅鱼筱筱，此中自得还自笑。汗漫一游何可期，  
后来谁遇冰雪姿。上古初闻出尧世，今朝还见在尧时。

卷 821\_13【郑容全成蛟形木机歌】

皎然

万物贵天然，天然不可得。浑朴无劳剞劂工，  
幽姿自可蛟龙质。欲腾未去何翩翩，扬袂争前谁敢拂。  
可中风雨一朝至，还应不是池中物。苍山万重采一枝，  
形如器车生意奇。风号雨喷心不折，众木千丛君独知。  
高人心，多越格。有时就月吟春风，持来座右惊神客。  
爱君开閤江之滨，白云黄鹤长相亲。南郭子綦我不识，  
非君独是是何人。

卷 821\_14【奉同颜使君真卿清风楼赋得洞庭歌送吴炼师归林屋洞】

皎然

名山洞府到金庭，三十六洞称最灵。不有古仙启其秘，  
今日安知灵宝经。中山炼师栖白云，道成仙秩号元君。  
三千甲子朝玉帝，世上如今名始闻。吐纳青牙养肌发，  
花冠玉舄何高洁。不闻天上来谪仙，自是人间授真诀。  
吴兴太守道家流，仙师远放清风楼。应将内景还飞去，  
且从分风当此留。湖之山兮楼上见，山冥冥兮水悠悠。  
世人不到君自到，缥缈仙都谁与俦。黄鹤孤云天上物，  
物外飘然自天匹。一别千年未可期，仙家不数人间日。

卷 821\_15【夏铜碗为龙吟歌】

皎然

逸僧夏碗为龙吟，世上未曾闻此音。一从太尉房公赏，  
遂使秦人传至今。初夏徐徐声渐显，乐音不管何人辨。  
似出龙泉万丈底，乍怪声来近而远。未必全由夏者功，  
真生虚无非碗中。寥亮掩清笛，萦回凌细风。  
遥闻不断在烟杪，万籁无声天境空。乍向天台宿华顶，  
秋宵一吟更清迥。能令听者易常性，忧人忘忧躁人静。  
今日铿镗江上闻，蛟螭奔飞如得群。声过阴岭恐成雨，  
响驻晴天将起云。坐来吟尽空江碧，却寻向者听无迹。  
人生万事将此同，暮贱朝荣动还寂。

卷 821\_16【饮茶歌诮崔石使君】

皎然

越人遗我剡溪茗，采得金牙爨金鼎。素瓷雪色缥沫香，  
何似诸仙琼蕊浆。一饮涤昏寐，情来朗爽满天地。  
再饮清我神，忽如飞雨洒轻尘。三饮便得道，  
何须苦心破烦恼。此物清高世莫知，世人饮酒多自欺。  
愁看毕卓瓮间夜，笑向陶潜篱下时。崔侯啜之意不已，  
狂歌一曲惊人耳。孰知茶道全尔真，唯有丹丘得如此。

卷 821\_17【买药歌送杨山人】

皎然

华阴少年何所希，欲饵丹砂化骨飞。江南药少淮南有，  
暂别胥门上京口。京口斜通江水流，斐回应上青山头。  
夜惊潮没鸬鹚堰，朝看日出芙蓉楼。摇荡春风乱帆影，  
片云无数是扬州。扬州喧喧卖药市，浮俗无由识仙子。  
河间姹女直千金，紫阳夫人服不死。吾于此道复何如，  
昨朝新得蓬莱书。

卷 821\_18【薛卿教长行歌（时量移湖州别驾）】

皎然

桂阳仙柳道家说，昔传苏君今是薛。聊将握槊偶时人，  
便被人间称冠绝。黄杨文局龟螭蟠，琢成骰子双琅玕。  
初疑月破云中堕，复怪星移指下攒。谁识兵奇势可保，  
坐看将军上一道。有时彩王非所希，笑击单于出重围。  
鳧惊隼击疾若飞，左顾右盼生光辉。家本联姻汉戚里，  
身是长安贵公子。名高艺绝何翩翩，几回决胜君王前。  
扈游长乐与祈年，人望青云白日边。谪宦江南岁阴晚，  
还将此道聊自遣。由来君子行最长，予亦知君寄心远。

卷 821\_19【桃花石枕歌送安吉康丞】

皎然

君吏桃州尚奇迹，桃州采得桃花石。烂疑朝日照已舒，  
含似春风吹未坼。珪璋特达世所珍，吾知此物亦其伦。

应羨花开不凋悴，应嘉玉片无缁磷。立性坚刚平若砥，  
君子偏将交道比。何人亦秉坚刚姿，吾见君心得如此。

君心所好我独知，别多见少长相思。从来赏玩安左右，  
万里提携君莫辞。

卷 821\_20【赋得吴王送女潮歌，送李判官之河中府】

皎然

见说吴王送女时，行宫直到荆溪口。溪上千年送女潮，  
为感吴王至今有。乃知昔人由志诚，流水无情翻有情。  
平波忽起二三尺，此上疑与神仙宅。今人犹望荆之湄，  
长令望者增所思。吴王已歿女不返，潮水无情那有期。  
溪草何草号帝女，溪竹何竹号湘妃。灵涛旦暮自堪伤，  
的烁婵娟又争发。客归千里自兹始，览古高歌感行子。  
不知别后相见期，君意何如此潮水。

卷 821\_21 【观李中丞洪二美人唱歌轧筝歌（时量移湖州长史）】

皎然

君家双美姬，善歌工筝人莫知。轧用蜀竹弦楚丝，  
清哇宛转声相随。夜静酒阑佳月前，高张水引何渊渊。  
美人矜名曲不误，蹙响时时如迸泉。赵琴素所嘉，  
齐讴世称绝。筝歌一动凡音辍，凝弦且莫停金罍。  
淫声已阕雅声来，游鱼噉喙鹤裴回。主人高情始为开，  
高情放浪出常格。偶世有名道无迹，勋业先登上将科。  
文章已冠诸人籍。每笑石崇无道情，轻身重色祸亦成。  
君有佳人当禅伴，于中不废学无生。爱君天然性寡欲，  
家贫禄薄常知足。谪官无愠如古人，交道忘言比前躅。  
不意全家万里来，湖中再见春山绿。吴兴公舍幽且闲，  
何妨寄隐在其间。时议名齐谢太傅，更看携妓似东山。

卷 821\_22 【陈氏童子草书歌】

皎然

书家孺子有奇名，天然大草令人惊。僧虔老时把笔法，  
孺子如今皆暗合。飙挥电洒眼不及，但觉毫端鸣飒飒。  
有时作点险且能，太行片石看欲崩。偶然长掣浓入燥，  
少室枯松欹不倒。夏室炎炎少人欢，山轩日色在阑干。  
桐花飞尽子规思，主人高歌兴不至。浊醪不饮嫌昏沈，

欲玩草书开我襟。龙爪状奇鼠须锐，水笺白皙越人惠。  
王家小令草最狂，为予洒出惊腾势。

卷 821\_23 【饮茶歌送郑容】

皎然

丹丘羽人轻玉食，采茶饮之生羽翼。名藏仙府世空知，  
骨化云宫人不识。云山童子调金铛，楚人茶经虚得名。  
霜天半夜芳草折，烂漫缃花啜又生。赏君此茶祛我疾，  
使人胸中荡忧栗。日上香炉情未毕，醉踏虎溪云，  
高歌送君出。

卷 821\_24 【花石长枕歌答章居士赠】

皎然

楚山有石郢人琢，琢成长枕知是玉。全疑冰片坐恐销，  
间发花丛惊不足。赠予比之金琅玕，琼花烂熳浮席端。  
吾师道吾不执宝，今日感君因执看。试叩铿然应清律，  
纤尘不留蝇敢拂。万物皆因造化资，如何独负清贞质。  
南山有云鹤在空，长松为我生凉风。高友朗咏乐其中，  
行住四仪皆道意。不学小乘一曲士，唯将此物安座隅，  
取次闲眠有禅味。

卷 821\_25【观王右丞维沧洲图歌】

皎然

沧洲误是真，萋萋忽盈视。便有春渚情，褰裳掇芳芷。

飒然风至草不动，始悟丹青得如此。丹青变化不可寻，  
翻空作有移人心。犹言雨色斜拂座，乍似水凉来入襟。

沧洲说近三湘口，谁知卷得在君手。披图拥褐临水时，  
翛然不异沧洲叟。

卷 821\_26【洞庭山维谅上人院阶前孤生橘树歌】

皎然

洞庭仙山但生橘，不生凡木与梨栗。真子无私自不栽，  
感得一株阶下出。细叶繁枝委露新，四时常绿不关春。  
若言此物无道性，何意孤生来就人。二月三月山初暖，  
最爱低檐数枝短。白花不用乌衔来，自有风吹手中满。  
九月十月争破颜，金实离离色殷殷，一夜天晴香满山。  
天生珍木异于俗，俗士来逢不敢触。清阴独步禅起时，  
徙倚前看看不足。

卷 821\_27【春夜赋得漉水囊歌，送郑明府】

皎然

吴缣楚练何白皙，居士持来遗禅客。禅客能裁漉水囊，  
不用衣工秉刀尺。先师遗我式无缺，一滤一翻心敢除。  
夕望东峰思漱盥，矍矍斜月悬灯纱。徙倚花前漏初断，  
白猿争啸惊禅伴。玉瓶徐泻赏涓涓，溅著莲衣水珠满。  
因识仁人为宦情，还如漉水爱苍生。聊歌一曲与君别，  
莫忘寒泉见底清。

卷 821\_28【湛处士枸杞架歌】

皎然

天生灵草生灵地，误生人间人不贵。独君井上有一根，  
始觉人间众芳异。拖线垂丝宜曙看，裴回满架何珊珊。  
春风亦解爱此物，袅袅时来傍香实。湿云缀叶摆不去，  
翠羽衔花惊畏失。肯羨孤松不凋色，皇天正气肃不得。  
我独全生异此辈，顺时荣落不相背。孤松自被斧斤伤，  
独我柔枝保无害。黄油酒囊石棋局，吾羨湛生心出俗。  
撷芳生影风洒怀，其致翛然此中足。

卷 821\_29【观裴秀才松石障歌】

皎然

谁工此松唯拂墨，巧思丹青营不得。初写松梢风正生，  
此中势与真松争。高柯细叶动飒飒，乍听幽飈如有声。

左右双松更奇绝，龙鳞麈尾仍半折。经春寒色聚不散，  
逼座阴阴将下雪。荆门石状凌玃璠，蹙成数片倚松根。

何年蓊蓊苔黏迹，几夜潺潺水击痕。裴生诗家后来客，  
为我开图玩松石。对之自有高世心，何事劳君上山屐。

卷 821\_30【送顾处士歌】

皎然

吴门顾子予早闻，风貌真古谁似君。人中黄宪与颜子，  
物表孤高将片云。性背时人高且逸，平生好古无俦匹。  
醉书在箠称绝伦，神画开厨怕飞出。谢氏檀郎亦可俦，  
道情还似我家流。安贫日日读书坐，不见将名干五侯。  
知君别业长洲外，欲行秋田循畎浍。门前便取馥觥乘，  
腰上还将鹿卢佩。禅子有情非世情，御菴贡馀聊赠行。  
满道喧喧遇君别，争窥玉润与冰清。

卷 821\_31 【水精数珠歌】

皎然

西方真人为行密，臂上记珠皎如日。佛名无著心亦空，  
珠去珠来体常一。谁道佛身千万身，重重只向心中出。

卷 821\_32 【兵后西日溪行】

皎然

一从清气上为天，仙叟何年见乾海。黄河几度浊复清，  
此水如今未曾改。西寻仙人渚，误入桃花穴。  
风吹花片使我迷，时时问山惊踏雪。石梁丹灶意更奇，  
春草不生多故辙。我来隐道非隐身，如今世上无风尘。  
路是武陵路，人非秦代人。饭松得高侣，濯足偶清津。  
数片昔贤磐石在，几回并坐戴纶巾。

卷 821\_33 【姑苏行】

皎然

古台不见秋草衰，却忆吴王全盛时。千年月照秋草上，  
吴王在时几回望。至今月出君不还，世人空对姑苏山。

山中精灵安可睹，辙迹人踪麋鹿聚。婵娟西子倾国容，  
化作寒陵一堆土。

卷 821\_34 【短歌行】

皎然

古人若不死，吾亦何所悲。萧萧烟雨九原上，  
白杨青松葬者谁。贵贱同一尘，死生同一指。  
人生在世共如此，何异浮云与流水。短歌行，  
短歌无穷日已倾。邺宫梁苑徒有名，春草秋风伤我情。  
何为不学金仙侣，一悟空王无死生。

卷 821\_35 【山月行（一作关山月）】

皎然

家家望秋月，不及秋山望。山中万境长寂寥，  
夜夜孤明我山上。海人皆言生海东，山人自谓出山中。  
忧虞欢乐皆占月，月本无心同不同。自从有月山不改，  
古人望尽今人在。不知万世今夜时，孤月将谁更待。

卷 821\_36 【顾渚行寄裴方舟】

皎然

我有云泉邻渚山，山中茶事颇相关。鶗鴂鸣时芳草死，  
山家渐欲收茶子。伯劳飞日芳草滋，山僧又是采茶时。  
由来惯采无近远，阴岭长兮阳崖浅。大寒山下叶未生，  
小寒山中叶初卷。吴婉携笼上翠微，蒙蒙香刺冒春衣。  
迷山乍被落花乱，度水时惊啼鸟飞。家园不远乘露摘，  
归时露彩犹滴沥。初看怕出欺玉英，更取煎来胜金液。  
昨夜西峰雨色过，朝寻新茗复如何。女宫露涩青芽老，  
尧市人稀紫笋多。紫笋青芽谁得识，日暮采之长太息。  
清冷真人待子元，贮此芳香思何极。

卷 821\_37 【武源行赠丘卿岑】

皎然

昔年群盗阻江东，吴山动摇楚泽空。齐人亦戴蜂虿毒，  
美稷化为荆棘丛。汹汹四顾多窟穴，浮云白波名不同。  
万人死地当虎口，一旦生涯悬毂中。昨日将军殉死节，  
悉向生民陷成血。胸中豹略张阵云，握内蛇矛挥白雪。  
长洲南去接孤城，居人散尽鼓噪惊。三春不见芳草色，  
四面唯闻刁斗声。此时狂寇纷如市，君当要冲固深垒。  
纵横计出皆获全，士卒身先每轻死。扫平氛祲望吴门，

人间岁美桑柘繁。比屋生全受君赐，连营罢战赖君恩。  
如何弃置功不录，通籍无名滞江曲。灞亭不重李将军，  
汉爵犹轻苏属国。荒营寂寂隐山椒，春意空惊故柳条。  
野战攻城尽如此，即今谁是霍嫫媸。

卷 821\_38 【长安少年行】

皎然

翠楼春酒虾蟆陵，长安少年皆共矜。  
纷纷半醉绿槐道，躑躅花骢骄不胜。

卷 821\_39 【风入松】

皎然

西岭松声落日秋，千枝万叶风飕飕。美人援琴弄成曲，  
写得松间声断续。声断续，清我魂。流波坏陵安足论，  
美人夜坐月明里。含少商兮点清徵，风何凄兮飘飘。  
搅寒松兮又夜起。夜未央，曲何长，金徽更促声泱泱。  
何人此时不得意，意苦弦悲闻客堂。

卷 821\_40 【陪卢中丞闲游山寺】

皎然

野寺出人意，舍舟登远峰。林开明见月，万壑静闻钟。  
拥烛明山翠，交麾动水容。如何股肱守，尘外得相逢。

卷 821\_41 【湖南草堂读书招李少府】

皎然

削去僧家事，南池便隐居。为怜松子寿，还卜道家书。  
药院常无客，茶樽独对余。有时招逸史，来饭野中蔬。

卷 821\_42 【答李季兰】

皎然

天女来相试，将花欲染衣。禅心竟不起，还捧旧花归。

卷 821\_43 【酬郑判官湖上见赠】

皎然

岁岁湖南隐已成，如何星使忽知名。

沙鸥惯识无心客，今日逢君不解惊。

卷 821\_44【送旻上人游天台】

皎然

真心不废别，试看越溪清。知汝机忘尽，春山自有情。  
月思华顶宿，云爱石门行。海近应须泛，无令鸥鹭惊。

卷 821\_45【送别】

皎然

闻说情人怨别情，霜天淅沥在寒城。  
长宵漫漫角声发，禅子无心恨亦生。

卷 821\_46【与昂上人两字继合四句初字日】

皎然

有一鸟雏，凌寒独宿。若逢云雨，两两相逐。

· 全唐诗 ·

---

卷 821\_47【次日】

皎然

野外有一人，独立无四邻。彼见是我身，我见是彼身。

## 卷八百二十二

### 卷 822\_1【皇太子频赐存问，并索唱和新诗，因有陈谢】

广宣

望苑招延后，禅扉访道馀。祇言俟文雅，何意及庸虚。  
率性多非学，缘情偶自书。清风闻寺响，白日见心初。  
重道逢轩后，崇儒过魏储。青宫列芳梓，玄圃积琼琚。  
郑鼠宁容者，齐竽久舍诸。空怀受恩感，含思几踟蹰。

### 卷 822\_2【禁中法会应制】

广宣

天上万年枝，人间不可窥。道场三教会，心地百王期。  
侍读沾恩早，传香驻日迟。在筵还向道，通籍许言诗。  
空愧陪仙列，何阶答圣慈。从今精至理，长愿契无为。

### 卷 822\_3【降诞日内庭献寿应制】

广宣

庆寿千龄远，敷仁万国通。登霄欣有路，捧日愧无功。

仙驾三山上，龙生二月中。修斋长乐殿，讲道大明宫。  
此地人难到，诸天事不同。法筵花散后，空界满香风。

卷 822\_4【寺中柿树一蒂四颗咏应制】

广宣

珍木生奇亩，低枝拂梵宫。因开四界分，本自百花中。  
当夏阴涵绿，临秋色变红。君看药草喻，何减太阳功。

卷 822\_5【早秋降诞日献寿二首应制】

广宣

秋萸开六叶，元圣诞千年。绕殿祥风起，当空瑞日悬。  
道光中国主，人识大罗仙。敢赞无疆寿，香花上法筵。

万方瞻圣日，九土仰清光。罄地山河壮，弥天福寿长。  
瑞烟薰法界，真偈启仁王。看献千秋乐，千秋乐未央。

卷 822\_6【驾幸天长寺应制】

广宣

天界宜春赏，禅门不掩关。宸游双阙外，僧引百花间。

车马喧长路，烟云净远山。观空复观俗，皇鉴此中闲。

卷 822\_7【九月菊花咏应制（一作清江诗）】

广宣

可讶东篱菊，能知节候芳。细枝青玉润，繁蕊碎金香。  
爽气浮朝露，浓姿带夜霜。泛杯传寿酒，应共乐时康。

卷 822\_8【驾幸圣容院应制】

广宣

大唐国里千年圣，王舍城中百亿身。却指容颜非我相，  
自言空色是吾真。深殿虔心随宝辇，广庭徐步引金轮。  
古来贵重缘亲近，狂客惭为侍从臣。

卷 822\_9【圣恩顾问，独游月磴阁，直书其事应制】

广宣

禅居河畔无多地，来往寻春物正华。磴道上盘千亩竹，  
栏干低压万人家。檐前施饭来飞鸟，林下行香踏落花。  
自解刹那知佛性，不劳更喻几尘沙。

卷 822\_10 【安国寺随驾幸兴唐观应制】

广宣

东林何殿是西邻，禅客垣墙接羽人。万乘游仙宗有道，  
三车引路本无尘。初传宝诀长生术，已证金刚不坏身。  
两地尽修天上事，共瞻銮驾重来巡。

卷 822\_11 【贺王起（一作贺王侍郎典贡放榜）】

广宣

从辞凤阁掌丝纶，便向青云领贡宾。再辟文场无枉路，  
两开金榜绝冤人。眼看龙化门前水，手放莺飞谷口春。  
明日定归台席去，鹓鷖原上共陶钧。

卷 822\_12 【贺幸普济寺应制】

广宣

南方宝界几由旬，八部同瞻一佛身。寺压山河天宇静，  
楼悬日月镜光新。重城柳暗东风曙，复道花明上苑春。  
向晚銮舆归凤阙，曲江池上动青蘋。

卷 822\_13【红楼院应制（一作沈佺期诗）】

广宣

红楼疑见白毫光，寺逼宸居福盛唐。支遁爱山情谩切，  
昙摩泛海路空长。经声夜色闻天语，炉气晨飘接御香。  
谁道此中难可到，自怜深院得徊翔。

卷 822\_14【再入道场纪事应制（一作沈佺期诗）】

广宣

南方归去再生天，内殿今年异昔年。见辟乾坤新定位，  
看题日月更高悬。行随车辇登仙路，坐近炉烟讲法筵。  
自喜恩深陪侍从，两朝长在圣人前。

卷 822\_15【寺中赏花应制】

广宣

东风万里送香来，上界千花向日开。  
却笑霞楼紫芝侣，桃源深洞访仙才。

卷 822\_16【九月十五日夜宿郑尚书絅东亭，望月寄杜给事】

广宣

霜天晴夜宿东斋，松竹交阴惬素怀。迥出风尘心得地，  
可怜三五月当阶。清光满院恩情见，寒色临门笑语谐。  
霄汉路殊从道合，往来人事不相乖。

## 卷八百二十三

### 卷 823\_1【酬卢仝见访不遇题壁】

含曦

长寿寺石壁，卢公一首诗。渴读即不渴，饥读即不饥。  
鲸吞海水尽，露出珊瑚枝。海神知贵不知价，  
留向人间光照夜。

### 卷 823\_2【旅中答喻军事问客情】

善生

一自游他国，相逢少故人。纵然为客乐，争似在家贫。  
畜恨霜侵鬓，搜诗病入神。若非怜片善，谁肯问风尘。

### 卷 823\_3【赠卢逸人】

善生

高眠岩野间，至艺敌应难。诗苦无多首，药灵惟一丸。

引泉鱼落釜，攀果露沾冠。已得嵇康趣，逢迎事每阑。

卷 823\_4【送玉禅师】

善生

飘然无定迹，迥与律乘违。入郭随缘住，思山破夏归。  
盂擎数家饭，衲乞几人衣。洞了曹溪旨，宁输俗者机。

卷 823\_5【送智光之南值雨】

善生

结束衣囊了，炎州定去游。草堂方惜别，山雨为相留。  
又得一宵话，免生千里愁。莫辞重卜日，后会必经秋。

卷 823\_6【谢白乐天招】

韬光

山僧野性好林泉，每向岩阿倚石眠。不解栽松陪玉勒，  
惟能引水种金莲。白云乍可来青嶂，明月难教下碧天。  
城市不能飞锡去，恐妨莺啭翠楼前。

卷 823\_7【五岁咏花】

知玄

花开满树红，花落万枝空。唯馀一孕在，明日定随风。

卷 823\_8【祝尧诗】

知玄

生天本自生天业，未必求仙便得仙。  
鹤背倾危龙背滑，君王且住一千年。

卷 823\_9【答僧澈】

知玄

观君法苑思冲虚，使我真乘刃有馀。若使龙光时可待，  
应怜僧肇论成初。五车外典知谁敌，九趣多才恐不如。  
萧寺讲轩横淡荡，帝乡云树正扶疏。几生曾得闍瑜意，  
今日堪将贝叶书。一振微言冠千古，何人执卷问吾庐。

卷 823\_10【月夜怀刘秀才】

元孚

独夜相思但自劳，阮生吟罢梦云涛。  
此时小定未禅寂，古塔月中松磬高。

卷 823\_11【送李四校书】

元孚

朱丝写别鹤泠泠，诗满红笺月满庭。  
莫学楚狂隳姓字，知音还有子期听。

卷 823\_12【边思】

栖白

西北黄云暮，声声画角愁。阴山一夜雨，白草四郊秋。  
乱雁鸣寒渡，飞沙入废楼。何时番色尽，此地见芳洲。

卷 823\_13【八月十五夜玩月】

栖白

寻常三五夜，不是不婵娟。及至中秋满，还胜别夜圆。  
清光凝有露，皓魄爽无烟。自古人皆望，年来又一年。

卷 823\_14【寻山僧真胜上人不遇】

栖白

松下禅栖所，苔滋径莫分。青山春暮见，流水夜深闻。  
不坐看心石，应随出定云。猿猱非可问，岩谷自空曛。

卷 823\_15【赠李溟秀才】

栖白

南居古庙深，高树宿山禽。明月上清汉，骚人动楚吟。  
数篇正始韵，一片补亡心。孤悄欺何谢，云波不可寻。

卷 823\_16【送石秀才】

栖白

正是叹羈游，知音拜楚侯。何须辞远道，自可乐扁舟。  
倚棹江洲雨，闻猿岛岫秋。谢家山水兴，终日待诗流。

卷 823\_17【送造微上人游五台及礼本师】

栖白

寒空金锡响，欲过渭阳津。极目多来雁，孤城少故人。  
与师虽别久，于法本相亲。又对清凉月，中宵语宿因。

卷 823\_18【送禅师宗极归玉峰】

栖白

背郭去归宿，头陀意颇浓。鹤争栖远树，猿斗上孤峰。  
夜戍经霜月，秋城过雨钟。由来无定止，何处访高踪。

卷 823\_19【送僧归旧山】

栖白

谈空与破邪，献寿复荣家。白日得何偈，青天落几花。  
传灯皆有分，化俗独无涯。却入中峰寺，还知有聚沙。

卷 823\_20【送圆仁三藏归本国】

栖白

家山临晚日，海路信归桡。树灭浑无岸，风生只有潮。  
岁穷程未尽，天末国仍遥。已入闽王梦，香花境外邀。

卷 823\_21【送王炼师归嵩岳】

栖白

飘然绿毛节，杳去洛城端。隔水见秋岳，兼霜扫石坛。  
一溪松色古，半夜鹤声寒。迥与人寰别，劳生不可观。

卷 823\_22【寿昌节赋得红云表夏日】

栖白

景候融融阴气潜，如峰云共火相兼。霞光捧日登天上，  
丹彩乘风入殿檐。行逐赤龙千岁出，明当朱夏万方瞻。  
微臣多幸逢佳节，得赋殊祥近御帘。

卷 823\_23【经废宫】

栖白

终日河声咽暮空，烟愁此地昼濛濛。锦帆东去沙侵苑，  
玉辇西来树满宫。鲁客望津天欲雪，朔鸿离岸苇生风。  
那堪独立思前事，回首残阳雉堞红。

卷 823\_24【赠识古法师】

栖白

重城深寺讲初休，却忆家山访旧游。对月与君相送夜，  
闻蛩教我独惊秋。云心杳杳难为别，鹤性萧萧不可留。  
遥想孤舟清渭上，飘然帆影起离愁。

卷 823\_25 【月夜怀刘秀才（一作元孚诗）】

栖白

独夜相思但自劳，阮生吟罢梦云涛。  
此时小定未禅寂，古塔月中松磬高。

卷 823\_26 【寄南山景禅师】

栖白

一度林前见远公，静闻真语世情空。  
至今寂寞禅心在，任起桃花柳絮风。

卷 823\_27 【哭刘得仁】

栖白

为爱诗名吟至死，风魂雪魄去难招。  
直须桂子落坟上，生得一枝冤始消。

卷 823\_28【龙潭】

应物

石激悬流雪满湾，五龙潜处野云闲。暂收雷电九峰下，  
且饮溪潭一水间。浪引浮槎依北岸，波分晓日浸东山。  
回瞻四面如看画，须信游人不欲还。

卷 823\_29【题化城寺】

应物

平高选处创莲宫，一水萦流处处通。画阁昼开迟日畔，  
禅房夜掩碧云中。平川不见龙行雨，幽谷遥闻虎啸风。  
偶与游人论法要，真元浩浩理无穷。

卷 823\_30【戴云山吟】

智亮

人间谩说上天梯，上万千回总是迷。  
曾似老人岩上坐，清风明月与心齐。  
  
戴云山顶白云齐，登顶方知世界低。

异草奇花人不识，一池分作九条溪。

卷 823\_31 【答卢邕】

良乂

风泉只向梦中闻，身外无馀可寄君。  
当户一轮惟晓月，挂檐数片是秋云。

卷 823\_32 【山居八咏】

常达

身闲依祖寺，志僻性多慵。少室遗真旨，层楼起暮钟。  
啜茶思好水，对月数诸峰。有问山中趣，庭前是古松。

晚望虚庭物，心心见祖情。烟开分岳色，雨雾减泉声。  
远树猿长啸，层岩日乍明。更堪论的意，林下笋新生。

一室尘埃外，翛然祇么常。睡来开寝帐，钟动下禅床。  
溪浸山光冷，秋凋木叶黄。时提祖师意，欹石看斜阳。

西来真祖意，只在见闻中。寒雁一声过，疏林几叶空。  
心闲怜水石，身老怯霜风。为报参玄者，山山月色同。

真性寂无机，尘尘祖佛师。日明庭砌暖，霜苦药苗衰。  
汲水和烟酌，栽松带雪移。好听玄旨处，猿啸岭南枝。

古寺凭栏危，时闻举妙机。庭空月色净，夜迥磬声移。  
漏转寒更急，灯残冷焰微。太虚同万象，相谓话玄微。

胡僧论的旨，物物唱圆成。疏柳春来翠，幽窗日渐明。  
禅心清石室，蝶翅覆花英。好听谈玄处，乔松鹤数声。

祖祖唯心旨，春融日正长。霜轻莎草绿，风细药苗香。  
月满真如净，花开觉树芳。庭前莺啭处，时听语圆常。

卷 823\_33【苦热行】

僧鸾

烛龙衔火飞天地，平陆无风海波沸。彤云叠叠耸奇峰，  
焰焰流光热凝翠。烟岛抟鹏翮双翅，羲和赫怒强总辔。  
饮流夸父毙长途，如见当中印王字。明明夜西朝又东，  
古来有道仍再中。扶桑老叶蔽不得，辉华直欲凌苍空。  
行人挥汗翻成雨，口燥喉干嗌尘土。西郊云色昼冥冥，  
如何不救生灵苦。何山怪木藏蛟龙，缩鳞卷鬣为乖慵。  
不发滂泽注天下，欲使风雷何所从。旱苗原上枯成焰，  
岳灵徒祝无神验。豪家帘外唤清风，水纹明角铺长簟。  
玉扇画堂凝夜秋，歌艳绕梁催莫愁。阳乌落尽酒不醒，  
扶上西园当月楼。废田渴死非吾属，库有黄金仓有粟。

卷 823\_34 【赠李粲秀才（字辉用）】

僧鸾

陇西辉用真才子，搜奇探险无伦比。笔下铦磨巨阙锋，  
胸中静滟西江水。哀弦古乐清人耳，月露激寒哭秋鬼。  
苔地无尘到晓吟，杉松老叶风干起。十轴示余三百篇，  
金碧烂光烧蜀笺。雄芒逸气测不得，使我踟躅成狂颠。  
大郊远阔空无边，凝明淡绿收馀烟。旷怀相对景何限，  
落日乱峰青倚天。又惊大舶帆高悬，行涛劈浪凌飞仙。  
回首瞥见五千仞，扑下香炉瀑布泉。何事古人夸八斗，  
焉敢今朝定妍丑。飒风驱雷暂不停，始向场中称大手。  
骏如健鶻鸮与雕，拏云猎野翻重霄。狐狸窜伏不敢动，  
却下双鸣当迅飙。愁如湘灵哭湘浦，咽咽哀音隔云雾。  
九嶷深翠转巍峨，仙骨寒消不知处。清同野客敲越瓯，  
丁当急响涵清秋。鸾雏相引叫未定，霜结夜阑仍在楼。  
高若太空露云物，片白激青皆仿佛。仙鹤闲从净碧飞，  
巨鳌头戴蓬莱出。前辈歌诗惟翰林，神仙老格何高深。  
鞭驰造化绕笔转，灿烂不为酸苦吟。梦乘明月清沈沈，  
飞到天台天姥岑。倾湖涌海数百字，字字不朽长搢金。  
此日多君可俦侣，堆珠叠玑满玄圃。终日并辔游昆仑，  
十二楼中宴王母。

卷 823\_35【和王季文题九华山】

神颖

众岳雄分野，九华镇南朝。彩笔凝空远，崔嵬寄青霄。  
龙潭古仙府，灵药今不凋。莹为沧海镜，烟霞作荒标。  
造化心数奇，性状精气饶。玉树郁玲珑，天籁韵萧寥。  
寂寂寻乳窦，兢兢行石桥。通泉漱云母，藉草萦香苕。  
我住幽且深，君赏昏复朝。稀逢发清唱，片片霜凌飙。

卷 823\_36【宿严陵钓台】

神颖

寒谷荒台七里洲，贤人永逐水东流。  
独猿叫断青天月，千古冥冥潭树秋。

卷 823\_37【效古】

澹交

荣辱又荣辱，一何翻与覆。人生百岁中，孰肯死前足。  
玄鬓忽如丝，青丛不再绿。自古争名徒，黄金是谁禄。

卷 823\_38【病后作】

澹交

未得忘身法，此身终未安。病肠犹可洗，瘦骨不禁寒。  
药少心情饥，经无气力看。悠悠片云质，独对夕阳残。

卷 823\_39【写真】

澹交

图形期自见，自见却伤神。已是梦中梦，更逢身外身。  
水花凝幻质，墨彩染空尘。堪笑予兼尔，俱为未了人。

卷 823\_40【端午】

文秀

节分端午自谁言，万古传闻为屈原。  
堪笑楚江空渺渺，不能洗得直臣冤。

卷 823\_41 【谢友人见访留诗】

怀楚

轩车谁肯到，泉石自相亲。暮雨凋残寺，秋风怅望人。  
庭新一片叶，衣故十年尘。赖有瑶华赠，清吟愈病身。

卷 823\_42 【送新平故人】

怀楚

常听仓庚思旧友，又因蝴蝶梦生涯。一千馀里河连郭，  
三十六峰寒到家。阴岛直分东虢雁，晴楼高入上阳鸦。  
姜嫄庙北与君别，应笑薄寒悲落花。

卷 823\_43 【辞南平钟王召】

耽章

摧残枯木倚寒林，几度逢春不变心。  
樵客见之犹不采，郢人何事苦搜寻。

## 卷八百二十四

### 卷 824\_1【短歌行】

子兰

日月何忙忙，出没住不得。使我勇壮心，少年如顷刻。  
人生石火光，通时少于塞。四季倏往来，寒暑变为贼。  
偷人面上花，夺人头上黑。

### 卷 824\_2【饮马长城窟】

子兰

游客长城下，饮马长城窟。马嘶闻水腥，为浸征人骨。  
岂不是流泉，终不成潺湲。洗尽骨上土，不洗骨中冤。  
骨若比流水，四海有还魂。空流呜咽声，声中疑是言。

### 卷 824\_3【夜直】

子兰

大内隔重墙，多闻乐未央。灯明宫树色，茶煮禁泉香。

· 全唐诗 ·

---

凤辇通门静，鸡歌入漏长。宴荣陪御席，话密近龙章。  
吟步彤庭月，眠分玉署凉。欲黏朱绂重，频草白麻忙。  
笔力将群吏，人情在致唐。万方瞻仰处，晨夕面吾皇。

卷 824\_4【赠行脚僧】

子兰

世界曾行遍，全无行可修。炎凉三衲共，生死一身体。  
片断云随体，稀疏雪满头。此门无所著，不肯暂淹留。

卷 824\_5【秋日思旧山】

子兰

咸言上国繁华，岂谓帝城羁旅。十点五点残萤，  
千声万声秋雨。白云江上故乡，月下风前吟处。  
欲去不去迟迟，未展平生所伫。

卷 824\_6【寄乾陵杨侍郎】

子兰

冷落官资不畏贫，司曹且共内官分。步量野色成公案，

· 全唐诗 ·

---

点检樵声入奏闻。陵庙路因朝去扫，御炉香每夜来焚。  
碑寒树古神门上，管得无穷空白云。

卷 824\_7【登楼忆友】

子兰

物象远濛濛，周回极望中。带烟千井树，和磬一楼风。  
月色寒沈地，波声夜飏空。登临无限趣，恨不与君同。

卷 824\_8【华严寺望樊川】

子兰

万木叶初红，人家树色中。疏钟摇雨脚，秋水浸云容。  
雪碛回寒雁，村灯促夜舂。旧山归未得，生计欲何从。

卷 824\_9【与道侣同于水陆寺会宿】

子兰

论道穷心少有朋，此时清话昔年曾。柿凋红叶铺寒井，  
鹤坠霜毛著定僧。风递远声秋涧水，竹穿深色夜房灯。  
出门尽是劳生者，只此长闲几个能。

卷 824\_10【城上吟】

子兰

古冢密于草，新坟侵官道。城外无闲地，城中人又老。

卷 824\_11【襄阳曲】

子兰

为忆南游人，移家大堤住。千帆万帆来，尽过门前去。

卷 824\_12【诫贪】

子兰

多求待心足，未足旋倾覆。明知贪者心，求荣不求辱。

卷 824\_13【蝉二首】

子兰

独蝉初唱古槐枝，委曲悲凉断续迟。

雨后忽闻谁最苦，异乡孤馆忆家时。

衰柳蝉吟旁浊河，正当残日角声和。  
寻常不足少愁思，此际闻时愁更多。

卷 824\_14【太平坊寻裴郎中故宅】

子兰

不语凄凉无限情，荒阶行尽又重行。  
昔年住此何人在，满地槐花秋草生。

卷 824\_15【登楼】

子兰

边邑鸿声一例秋，大波平日绕山流。  
故人千里同明月，尽夕无言空倚楼。

卷 824\_16【长安早秋】

子兰

风舞槐花落御沟，终南山色入城秋。

门门走马征兵急，公子笙歌醉玉楼。

卷 824\_17【对雪】

子兰

密密无声坠碧空，霏霏有韵舞微风。  
幽人吟望搜辞处，飘入窗来落砚中。

卷 824\_18【鹦鹉】

子兰

翠毛丹觜乍教时，终日无寥似忆归。  
近来偷解人言语，乱向金笼说是非。

卷 824\_19【晚景】

子兰

池荷衰飒菊芬芳，策杖吟诗上草堂。  
满目暮云风卷尽，郡楼寒角数声长。

卷 824\_20 【长安伤春】

子兰

霜陨中春花半无，狂游恣饮尽凶徒。  
年年赏玩公卿辈，今委沟塍骨渐枯。

卷 824\_21 【河梁晚望二首】

子兰

水势滔滔不可量，渔舟容易泛沧浪。  
连山翠霭笼沙渚，白鸟翩翩下夕阳。

雨添一夜秋涛阔，极目茫茫似接天。  
不知龙物潜何处，鱼跃蛙鸣满槛前。

卷 824\_22 【悲长安】

子兰

何事天时祸未回，生灵愁悴苦寒灰。  
岂知万顷繁华地，强半今为瓦砾堆。

卷 824\_23【千叶石榴花】

子兰

一朵花开千叶红，开时又不藉春风。  
若教移在香闺畔，定与佳人艳态同。

卷 824\_24【观棋】

子兰

拂局尽消时，能因长路迟。点头初得计，格手待无疑。  
寂默亲遗景，凝神入过思。共藏多少意，不语两相知。

## 卷八百二十五

### 卷 825\_1【山居】

可止

雪消春力展，花漫洞门垂。果长纤枝曲，岩崩直道移。  
重猿围浅井，斗鼠下疏篱。寒食微灯在，高风势彻陂。

### 卷 825\_2【赠樊川长老（一作清尚诗）】

可止

瘦颜颧骨见，满面雪毫垂。坐石鸟疑死，出门人谓痴。  
照身潭入楚，浸影桧生隋。太白曾经夏，清风凉四肢。

### 卷 825\_3【寄积麦山会如长老】

可止

默然如大道，尘世不相关。青桧行时静，白云禅处闲。

贫高一生行，病长十年颜。夏满期游寺，寻山又下山。

卷 825\_4【送僧】

可止

四海无拘系，行心兴自浓。百年三事衲，万里一枝筇。  
夜减当晴影，春消过雪踪。白云深处去，知宿在何峰。

卷 825\_5【哭贾岛】

可止

燕生松雪地，蜀死葬山根。诗僻降今古，官卑误子孙。  
冢栏寒月色，人哭苦吟魂。墓雨滴碑字，年年添藓痕。

卷 825\_6【雪十二韵】

可止

落处咸过尺，倏然物象凄。瑞凝金殿上，寒甚玉关西。  
润比江河普，明将日月齐。凌云花顶腻，锁径竹梢低。  
出谷樵童怯，归林野鸟迷。煮茶融破练，磨墨染成鬣。  
陷兔埋平泽，和鱼冻合溪。入楼消酒力，当槛写诗题。

· 全唐诗 ·

---

道路依凭马，朝昏委托鸡。洞深猿作族，松亚鹤移栖。  
及夏清岩穴，经春溜石梯。丰年兼泰国，天道育黔黎。

卷 825\_7【精舍遇雨】

可止

空门寂寂淡吾身，溪雨微微洗客尘。  
卧向白云情未尽，任他黄鸟醉芳春。

卷 825\_8【小雪】

可止

落雪临风不厌看，更多还恐蔽林峦。  
愁人正在书窗下，一片飞来一片寒。

卷 825\_9【送婆罗门僧】

可止

雪岭金河独向东，吴山楚泽意无穷。  
如今白首乡心尽，万里归程在梦中。

卷 825\_10【句】

可止

不知谁会喃喃语，必向王前报太平。（中山节度王处直座咏白鹊，时诸侯兼并，王欲继好息民，故云。《高僧传》）

卷 825\_11【寒食日】

云表

寒食悲看郭外春，野田无处不伤神。  
平原累累添新冢，半是去年来哭人。

卷 825\_12【自遣】

归仁

日日为诗苦，谁论春与秋。一联如得意，万事总忘忧。  
雨堕花临砌，风吹竹近楼。不吟头也白，任白此生头。

卷 825\_13【酬沈先辈卷】

归仁

一百八十首，清冷韵可敲。任从人不爱，终是我难抛。  
桂魄吟来满，蒲团坐得凹。先生声价在，寰宇几人抄。

卷 825\_14【题贾岛吟诗台】

归仁

此台如可废，此恨有谁平。纵使迷青草，终难没旧名。  
天悲朝雨色，岳哭夜猿声。不是心偏苦，应关自古情。

卷 825\_15【悼罗隐】

归仁

一著逸书未快心，几抽胸臆纵狂吟。管中窥豹我犹在，  
海上钓鳌君也沈。岁月尽能消愤懑，寰区那更有知音。  
长安冠盖皆涂地，仍喜先生葬碧岑。

卷 825\_16【题楚庙】

归仁

羞容难更返江东，谁问从来百战功。天地有心归道德，  
山河无力为英雄。芦花尚认霜戈白，海日犹思火阵红。  
也是男儿成败事，不须惆怅对西风。

卷 825\_17【牡丹】

归仁

三春堪惜牡丹奇，半倚朱栏欲绽时。天下更无花胜此，  
人间偏得贵相宜。偷香黑蚁斜穿叶，飏蕊黄蜂倒挂枝。  
除却解禅心不动，算应狂杀五陵儿。

卷 825\_18【旧国里】

卿云

旧居梨岭下，风景近炎方。地暖生春早，家贫觉岁长。  
石房云过湿，杉径雨馀香。日夕竟无事，诗书聊自强。

卷 825\_19【秋日江居闲咏】

卿云

寄居江岛边，闲咏见秋残。草白牛羊瘦，风高猿鸟寒。  
检方医故疾，挑荠备中餐。时复停书卷，鉏莎种木兰。

卷 825\_20【长安言怀寄沈彬侍郎】

卿云

故园梨岭下，归路接天涯。生作长安草，胜为边地花。  
雁南飞不到，书北寄来赊。堪羨神仙客，青云早致家。

卷 825\_21【送人游塞】

卿云

去去玉关路，省君曾未行。塞深多伏寇，时静亦屯兵。  
雪每先秋降，花尝近夏生。闲陪射雕将，应到受降城。

卷 825\_22 【逢老人】

隐峦

路逢一老翁，两鬓白如雪。一里二里行，四回五回歇。

卷 825\_23 【牧童】

隐峦

牧童见人俱不识，尽着芒鞋戴箬笠。朝阳未出众山晴，  
露滴蓑衣犹半湿。二月三月时，平原草初绿。  
三个五个骑羸牛，前村后村来放牧。笛声才一举，  
众稚齐歌舞。看看白日向西斜，各自骑牛又归去。

卷 825\_24 【蜀中送人游庐山】

隐峦

居游正值芳春月，蜀道千山皆秀发。溪边十里五里花，  
云外三峰两峰雪。君上匡山我旧居，松萝抛掷十年馀。  
君行试到山前问，山鸟只今相忆无。

卷 825\_25 【琴】

隐峦

七条丝上寄深意，涧水松风生十指。  
自乃知音犹尚稀，欲教更入何人耳。

卷 825\_26 【浮桥】

隐峦

横压惊波防没溺，当初元创是军机。  
行人到此全无滞，一片江云踏欲飞。

卷 825\_27 【宿九华化成寺庄】

冷然

佛寺孤庄千嶂间，我来诗境强相关。岩边树动猿下涧，  
云里锡鸣僧上山。松月影寒生碧落，石泉声乱喷潺湲。  
明朝更蹑层霄去，誓共烟霞到老闲。

卷 825\_28【乞荆浩画】

大愚

六幅故牢健，知君恣笔踪。不求千涧水，止要两株松。  
树下留盘石，天边纵远峰。近岩幽湿处，惟藉墨烟浓。

卷 825\_29【上归州刺史代通状二首】

怀濬

家在闽山西复西，其中岁岁有莺啼。  
如今不在莺啼处，莺在旧时啼处啼。

家在闽山东复东，其中岁岁有花红。  
而今不在花红处，花在旧时红处红。

卷 825\_30【辞郡守李公恩命】

恒超

虚著褐衣老，浮杯道不成。誓传经论死，不染利名生。  
厌树遮山色，怜窗向月明。他时随范蠡，一棹五湖清。

卷 825\_31 【题广爱寺楞伽山】

净显

灵异不能栖鸟雀，幽奇终不着猿猱。为经巢贼应无损，  
纵使秦驱也谩劳。珍重昔贤留像迹，陵迁谷变自坚牢。  
(失二句)

卷 825\_32 【闻诵《法华经》歌】

修雅

山色沈沈，松烟幂幂。空林之下，盘陀之石。石上有僧，  
结跏横膝。诵白莲经，从旦至夕。左之右之，虎迹狼迹。  
十片五片，异花狼藉。偶然相见，未深相识。知是古之人，  
今之人，是昙彦，是昙翼？我闻此经有深旨，  
觉帝称之有妙义。合目冥心子细听，醍醐滴入焦肠里。  
佛之意兮祖之髓，我之心兮经之旨。可怜弹指及举手，  
不达目前今正是。大矣哉，甚奇特，空王要使群生得。  
光辉一万八千土，土土皆作黄金色。四生六道一光中，  
狂夫犹自问弥勒，我亦当年学空寂，一得无心便休息。  
今日亲闻诵此经，始觉驴乘匪端的。我亦当年不出户，  
不欲红尘沾步武。今日亲闻诵此经，始觉行行皆宝所。  
我亦当年爱吟咏，将谓冥搜乱神定。今日亲闻诵此经，  
何妨笔砚资真性。我亦当年狎儿戏，将谓光阴半虚弃。

今日亲闻诵此经，始觉聚沙非小事。我昔曾游山与水，  
将谓他山非故里。今日亲闻诵此经，始觉山河无寸地。  
我昔心猿未调伏，常将金锁虚拘束。今日亲闻诵此经，  
始觉无物为拳拳。师诵此经经一字，字字烂嚼醍醐味。  
醍醐之味珍且美，不在唇，不在齿，只在劳生方寸里。  
师诵此经经一句，句句白牛亲动步。白牛之步疾如风，  
不在西，不在东，只在浮生日用中。日用不知一何苦，  
酒之肠，饭之腑，长者扬声唤不回。何异聋，何异瞽，  
世人之耳非不聪，耳聪特向经中聩。世人之目非不明，  
目明特向经中盲。合聪不聪，合明不明，辘轳上下，  
浪死虚生。世人纵识师之音，谁人能识师之心。  
世人纵识师之形，谁人能识师之名。师名医王行佛令，  
来与众生治心病。能使迷者醒，狂者定，垢者净，邪者正，  
凡者圣。如是则非但天恭敬，人恭敬，亦合龙赞咏，  
鬼赞咏，佛赞咏。岂得背觉合尘之徒，不稽首而归命。

卷 825\_33【歌】

元寂

酒秃酒秃，何荣何辱。但见衣冠成古丘，不见江河变陵谷。

卷 825\_34【怀庐山旧隐】

若虚

九叠嵯峨倚着天，悔随寒瀑下岩烟。深秋猿鸟来心上，

· 全唐诗 ·

---

夜静松杉到眼前。书架想遭苔藓裹，石窗应被薜萝缠。  
一枝筇竹游江北，不见炉峰二十年。

卷 825\_35【乐仙观】

若虚

乐氏骑龙上碧天，东吴遗宅尚依然。悟来大道无多事，  
真后丹元不值钱。老树夜风虫咬叶，古垣春雨藓生砖。  
松倾鹤死桑田变，华表归乡未有年。

卷 825\_36【古镜】

若虚

轩后红炉独铸成，藓痕磨落月轮呈。万般物象皆能鉴，  
一个人心不可明。匣内乍开鸾凤活，台前高挂鬼神惊。  
百年肝胆堪将比，只怕看频素发生。

卷 825\_37【睹木平和尚】

文益

木平山里人，貌古年复少。相看陌路同，论心秋月皎。

怀衲线非蚕，助歌声有鸟。城阙今日来，一讴曾已晓。

卷 825\_38 【鹭鸯】

无则

白蘋红蓼碧江涯，日暖双双立睡时。  
愿揭金笼放归去，却随沙鹤斗轻丝。

卷 825\_39 【百舌鸟二首】

无则

千愁万恨过花时，似向春风怨别离。  
若使众禽俱解语，一生怀抱有谁知。

长截邻鸡叫五更，数般名字百般声。  
饶伊摇舌先知晓，也待青天明即鸣。

卷 825\_40 【赏牡丹应教】

谦光

拥衲对芳丛，由来事不同。鬓从今日白，花似去年红。  
艳异随朝露，馨香逐晓风。何须对零落，然后始知空。

## 卷八百二十六

### 卷 826\_1【善哉行（伤古曲无知音）】

贯休

有美一人兮，婉如青扬。识曲别音兮，令姿煌煌。  
绣袂捧琴兮，登君子堂。如彼萱草兮，使我忧忘。  
欲赠之以紫玉尺，白银铛。久不见之兮，湘水茫茫。

### 卷 826\_2【读离骚经】

贯休

湘江滨，湘江滨，兰红芷白波如银，终须一去呼湘君。  
问湘神，云中君，不知何以交灵均。我恐湘江之鱼兮，  
死后尽为人。曾食灵均之肉兮，个个为忠臣。  
又想灵均之骨兮终不曲。千年波底色如玉，  
谁能入水少取得，香沐函题贡上国。贡上国，  
即全胜和璞悬璃，垂棘结绿。

卷 826\_3【阳春曲（江东广明初作）】

贯休

为口莫学阮嗣宗，不言是非非至公。为手须似朱云辈，  
折槛英风至今在。男儿结发事君亲，须敦前贤多慷慨。  
历数雍熙房与杜，魏公姚公宋开府。尽向天上仙宫闲处坐，  
何不却辞上帝下下土，忍见苍生苦苦苦。

卷 826\_4【白雪曲】

贯休

列鼎佩金章，泪眼看风枝。却思食藜藿，身作屠沽儿。  
负米无远近，所希升斗归。为人无贵贱，莫学鸡狗肥。  
斯言如不忘，别更无光辉。斯言如或忘，即安用人为。

卷 826\_5【上留田】

贯休

父不父，兄不兄。上留田，螫贼生。徒陟冈，泪峥嵘。  
我欲使诸凡鸟雀，尽变为鹪鷯。我欲使诸凡草木，  
尽变为田荆。邻人歌，邻人歌。古风清，清风生。

卷 826\_6【胡无人】

贯休

霍嫖姚，赵充国，天子将之平朔漠。肉胡之肉，烬胡帐幄。  
千里万里，唯留胡之空壳。边风萧萧，榆叶初落。  
杀气昼赤，枯骨夜哭。将军既立殊勋，遂有胡无人曲。  
我闻之，天子富有四海，德被无垠。但令一物得所，  
八表来宾，亦何必令彼胡无人。

卷 826\_7【苦寒行】

贯休

北风北风，职何严毒。摧壮士心，缩金乌足。冻云噤噤，  
碍雪一片下不得。声绕枯桑，根在沙塞。黄河彻底，  
顽直到海。一气抟束，万物无态。唯有吾庭前杉松树枝，  
枝枝健在。

卷 826\_8【蒿里】

贯休

兔不迟，乌更急，但恐穆王八骏，著鞭不及。所以蒿里，

坟出戢戢。气凌云天，龙腾凤集。尽为风消土吃，  
狐掇蚁拾。黄金不啼玉不泣，白杨骚屑，乱风愁月。  
折碑石人，莽秽榛没。牛羊恣宰，时见牧童儿，弄枯骨。

卷 826\_9【临高台】

贯休

凉风吹远念，使我升高台。宁知数片云，不是旧山来。  
故人天一涯，久客殊未回。雁来不得书，空寄声哀哀。

卷 826\_10【杞梁妻】

贯休

秦之无道兮四海枯，筑长城兮遮北胡。筑人筑土一万里，  
杞梁贞妇啼呜呜。上无父兮中无夫，下无子兮孤复孤。  
一号城崩塞色苦，再号杞梁骨出土。疲魂饥魄相逐归，  
陌上少年莫相非。

卷 826\_11【古离别】

贯休

离恨如旨酒，古今饮皆醉。只恐长江水，尽是儿女泪。

伊余非此辈，送人空把臂。他日再相逢，清风动天地。

卷 826\_12【战城南二首】

贯休

万里桑干傍，茫茫古蕃壤。将军貌憔悴，抚剑悲年长。  
胡兵尚陵逼，久住亦非强。邯郸少年辈，个个有伎俩。  
拖枪半夜去，雪片大如掌。

碛中有阴兵，战马时惊蹶。轻猛李陵心，摧残苏武节。  
黄金锁子甲，风吹色如铁。十载不封侯，茫茫向谁说。

卷 826\_13【少年行】

贯休

锦衣鲜华手擎鹞，闲行气貌多轻忽。  
稼穡艰难总不知，五帝三皇是何物。

自拳五色裘，进入他人宅。却捉苍头奴，玉鞭打一百。  
面白如削玉，猖狂曲江曲。马上黄金鞍，适来新赌得。

卷 826\_14【梦游仙四首】

贯休

梦到海中山，入个白银宅。逢见一道士，称是李八伯。  
三四仙女儿，身著瑟瑟衣。手把明月珠，打落金色梨。

车渠地无尘，行至瑶池滨。森森椿树下，白龙来嗅人。

宫殿峥嵘笼紫气，金渠玉砂五色水。  
守阁仙婢相倚睡，偷摘蟠桃几倒地。

卷 826\_15【轻薄篇二首】

贯休

绣林锦野，春态相压。谁家少年，马蹄蹋蹋。  
斗鸡走狗夜不归，一掷赌却如花妾。谁云不颠不狂，  
其名不彰，悲夫！

木落萧萧，虫鸣唧唧。不觉朱萸脸红，霜劫鬓漆。  
世途多事，泣向秋日。方今少壮不努力，老大徒伤悲，  
如何？

卷 826\_16【长安道】

贯休

憧憧合合，八表一辙。黄尘雾合，车马火热。名汤风雨，  
利辗霜雪。千车万驮，半宿关月。上有尧禹，下有夔高。  
紫气银轮兮常覆金阙。仙掌捧日兮浊河澄澈。  
愚将草木兮有言，与华封人兮不别。

卷 826\_17【洛阳尘】

贯休

昔时昔时洛城人，今作茫茫洛城尘。我闻富有石季伦，  
楼台五色干星辰。乐如天乐日夜闻，锦姝绣妾何纷纷。  
真珠帘中，姑射神人。文金线玉，香成暮云。孙秀若不杀，  
晋室应更贫。伊水削行路，冢石花磷磷。苍茫金谷园，  
牛羊齧荆榛。飞鸟好羽毛，疑是绿珠身。

卷 826\_18【富贵曲二首】

贯休

有金张族，骄奢相续。琼树玉堂，雕墙绣毂。纨绮杂杂，

· 全唐诗 ·

---

钟鼓合合。美人如白牡丹花，半日只舞得一曲。乐不乐，  
足不足，争教他爱山青水绿。

如神若仙，似兰同雪。乐戒于极，胡不知辍。  
只欲更缀上落花，恨不能把住明月。太山肉尽，东海酒竭。  
佳人醉唱，敲玉钗折。宁知耘田车水翁，日日日灸背欲裂。

卷 826\_19【野田黄雀行】

贯休

高树风多，吹尔巢落。深蒿叶暖，宜尔依泊。莫近鸱类，  
蛛网亦恶。饮野田之清水，食野田之黄粟。深花中睡，  
葑土里浴。如此即全胜啄太仓之谷，而更穿人之屋。

卷 826\_20【古意九首】

贯休

一雨火云尽，闭门心冥冥。兰花与芙蓉，满院同芳馨。  
佳人天一涯，好鸟何嚶嚶。我有双白璧，不羨于虞卿。  
我有径寸珠，别是天地精。玩之室生白，潇洒身安轻。  
只应天上人，见我双眼明。

阳乌烁万物，草木怀春恩。茫茫尘土飞，培壅名利根。

· 全唐诗 ·

---

我本是蓑笠，幼知天子尊。学为毛氏诗，亦多直致言。  
不慕需臠类，附势同崩奔。唯寻桃李蹊，去去长者门。

美人如游龙，被服金鸳鸯。手把古刀尺，在彼白玉堂。  
文章深掣曳，珂珮鸣丁当。好风吹桃花，片片落银床。  
何妨学羽翰，远逐朱鸟翔。

乾坤有清气，散入诗人脾。圣贤遗清风，不在恶木枝。  
千人万人中，一人两人知。忆在东溪日，花开叶落时。  
几拟以黄金，铸作钟子期。

莫轻白云白，不与风雨会。莫见守羊儿，或是初平辈。  
人生非日月，光辉岂常在。一荣与一辱，古今常相对。  
君不见于公门，子孙好冠盖。

古交如真金，百炼色不回。今交如暴流，倏忽生尘埃。  
我愿君子气，散为青松栽。我恐荆棘花，只为小人开。  
伤心复伤心，吟上高高台。

常思谢康乐，文章有神力。是何清风清，凛然似相识。  
一种为顽嚚，得作翻经石。一种为枯槁，得作登山屐。  
永嘉为郡后，山水添鲜碧。何当学羽翰，一去观遗迹。

常思李太白，仙笔驱造化。玄宗致之七宝床，  
虎殿龙楼无不可。一朝力士脱靴后，玉上青蝇生一个。  
紫皇殿前五色麟，忽然掣断黄金锁。五湖大浪如银山，  
满船载酒挝鼓过。贺老成异物，颠狂谁敢和。

宁知江边坟，不是犹醉卧。

忆在山中时，丹桂花葳蕤。红泉浸瑶草，白日生华滋。  
箬屋开地炉，翠墙挂藤衣。看经竹窗边，白猿三两枝。  
东峰有老人，眼碧头骨奇。种蕤煮白石，旨趣如婴儿。  
月上来打门，月落方始归。授我微妙诀，恬澹无所为。  
别来六七年，只恐白日飞。

卷 826\_21 【酷吏词】

贯休

霰雨灏灏，风吼如鬪。有叟有叟，暮投我宿。吁叹自语，  
云太守酷。如何如何，掠脂斡肉。吴姬唱一曲，  
等闲破红束。韩娥唱一曲，锦段鲜照屋。宁知一曲两曲歌，  
曾使千人万人哭。不惟哭，亦白其头，饥其族。  
所以祥风不来，和气不复。蝗乎螿乎，东西南北。

卷 826\_22 【还举人歌行卷】

贯休

厚于铁围山上铁，薄似双成仙体缣。蜀机凤雏动整翮，  
珊瑚枝枝撑著月。王恺家中藏难掘，颜回饥僇愁天雪。  
古松直笔雷不折，雪衣女啄蟠桃缺。珮入龙宫步迟迟，

绣帘银殿何参差，即不知骊龙失珠知不知。

卷 826\_23【陈宫词】

贯休

缅想当时宫阙盛，荒宴椒房懣尧圣。玉树花歌百花里，  
珊瑚窗中海日迸。大臣来朝酒未醒，酒醒忠谏多不听。  
陈宫因此成野田，耕人犁破宫人镜。

卷 826\_24【拟齐梁酬所知见赠二首】

贯休

静只焚香坐，咏怀悲岁阑。佳人忽有赠，满手红琅玕。  
不独耀肌魄，将行为羽翰。酬如上青天，风雪空漫漫。

美如仙鼎金，清如纤手琴。孙登啸一声，缥缈不可寻。  
但觉神洋洋，如入三昧林。释手复在手，古意深复深。  
惭无英琼瑶，何以酬知音。

卷 826\_25【经古战场】

贯休

茫茫凶荒，迥如天设。驻马四顾，气候迂结。秋空峥嵘，

黄日将没。多少行人，白日见物。莫道路高低，尽是战骨。  
莫见地赤碧，尽是征血。昔人昔人既能忠尽于力，  
身糜戈戟，脂其风，膏其域。今人何不绳其媵，植其食。  
而使空旷年年，常贮愁烟。使我至此，不能无言。

卷 826\_26 【村行遇猎】

贯休

猎师纷纷走榛莽，女亦相随把弓矢。南北东西尽杀心，  
断烧残云在围里。鹞拂荒田兔成血，竿打黄茅雉惊起。  
伤嗟个辈亦是人，一生将此关身己。我闻天地之大德曰生，  
又闻万事皆天意，何遣此人又如此。犹更愿天公一丈雪，  
深山麋鹿尽冻死。

卷 826\_27 【渔家】

贯休

赤芦盖屋低压恰，沙涨柴门水痕叠。黄鸡青犬花蒙笼，  
渔女渔儿扫风叶。有叟相逢带秋醉，自拔船桩色无愧。  
前山脚下得鱼多，恶浪堆中尽头睡。但得忘筌心自乐，  
肯羨前贤钓清渭。终须画取挂秋堂，与尔为邻有深意。

卷 826\_28【田家作】

贯休

田家老翁无可作，昼甑蒸梨香漠漠。只向阶前曝背眠，  
赤桑大叶时时落。古湓侵门桃竹密，仓囤峨峨欲遮日。  
白云孙子解耕耘，四五年来腹多实。我闻此语心自悲，  
世上悠悠岂得知，稼而不穡徒尔为。

卷 826\_29【江边祠】

贯休

松森森，江浑浑，江边古祠空闭门。精灵应醉社日酒，  
白龟咬断菖蒲根。花残冷红宿雨滴，土龙甲湿鬼眼赤。  
天符早晚下空碧，昨夜前村行霹雳。

卷 826\_30【苦热寄赤松道者】

贯休

天云如烧人如炙，天地炉中更何适。蝉喘雷干冰井融，  
些子清风有何益。守羊真人聃之役，高吟招隐倚碧壁。  
紫气红烟鲜的的，润茗园瓜麴尘色，骄冷奢凉合相忆。

卷 826\_31 【偶作二首】

贯休

新诗一千首，古锦初下机。除月与鬼神，别未有人知。  
子期去不返，浩浩良不悲。不知天地间，知者复是谁。

门前数枝路，路路车马鸣。名埃与利尘，千里万里行。  
只见青山高，岂见青山平。朱门势峨峨，冠盖何光明。  
黄鸟在花里，青蝉夺其声。尔生非金玉，岂常贵复贞。  
寄言之子心，可以归无形。

卷 826\_32 【夜夜曲】

贯休

蟋蟀切切风骚骚，芙蓉喷香蟾蜍高。  
孤灯耿耿征妇劳，更深扑落金错刀。

卷 826\_33 【春晚书山家屋壁二首】

贯休

柴门寂寂黍饭馨，山家烟火春雨晴。

庭花濛濛水泠泠，小儿啼索树上莺。

水香塘黑蒲森森，鸳鸯鸂鶒如家禽。前村后垄桑柘深，  
东邻西舍无相侵。蚕娘洗茧前溪渌，牧童吹笛和衣浴。  
山翁留我宿又宿，笑指西坡瓜豆熟。

卷 826\_34 【春晚闲居寄陈嵩伯】

贯休

春霖闭门久，春色聚庭木。一梦辞旧山，四邻有新哭。  
菰蒲生白水，风篁擢纤玉。为忆湖上翁，花时独冥目。

卷 826\_35 【长持经僧】

贯休

唠唠长夜坐，唠唠早起。杉森森，不见长，  
人声续续如流水。搃金掙玉，吐宫咽徵。头低草木，  
手合神鬼。日消三两黄金争得止，而槁木朽枝，一食而已。  
伤嗟浮世之人，善事不曾入耳。

卷 826\_36 【茫茫曲】

贯休

茫茫复茫茫，满眼皆埃尘。莫言白发多，茎茎是愁筋。  
未达苦雕伪，及达多不仁。浅深与高低，尽能生棘榛。  
茫茫四大愁杀人。

卷 826\_37 【古镜词上刘侍郎】

贯休

至宝不自宝，照古还照今。仙人手胼胝，寥泯秋沈沈。  
不是十二面，不是百炼金。若非八彩眉，不可辄照临。  
即归玉案头，为君整冠簪。即居吾君手，照出天下心。  
恭闻太宗朝，此镜当宸襟。六合悬清光，万里无尘侵。  
此镜今又出，天地还得一。

卷 826\_38 【送姜道士归南岳】

贯休

松品落落，雪格索索。眼有三角，头峭五岳。若不居岳，  
此处难著。药僮貌蛮名鄙彼，葫芦酒满担劣起。

万里长风啸一声，九贞须拍黄金几。落叶萧萧 杳 ，  
送师言了意未了。意未了，他时为我致取一部音声鸟。

卷 826\_39【了仙谣】

贯休

海中紫雾蓬莱岛，安期子乔去何早。游戏多骑白骐驎，  
须发如银未曾老。亦留仙诀在人间，啮镞终言药非道。  
始皇不得此深旨，远遣徐福生烦恼。紫术黄精心上苗，  
大还小还行中宝。若师方术弃心师，浪似雪山何处讨。

## 卷八百二十七

### 卷 827\_1【循吏曲上王使君】

贯休

需宿需宿，炳烂光合。蒸蒸婺民，钟此多福。自东自西，  
自南自北。伊飞伊走，乳乳良牧。和气无形，春光自成。  
大信不信，贻厥无朕。需女需女，尔亦须语。使君为理，  
玄风震古。需女需女，尔亦须语。我愿喙长三千里，  
枕著玉阶奏明主。

### 卷 827\_2【古镜词】

贯休

我有一面镜，新磨似秋月。上唯金膏香，下状骊龙窟。  
等闲不欲开，丑者多不悦。或问几千年，轩辕手中物。

### 卷 827\_3【怀张为、周朴】

贯休

张周二夫子，诗好人太癡。更不过岭来，如今头尽白。

人传禹力不到处，河声流向西。又到处即闭户，  
逢君方展眉。不知是不是，若是即大奇。我又闻二公，  
心与人不同，一生常在寂寞中。有时狂吟入僧宅，  
锦囊鸟啼荔枝红。有时冥搜海山脑，珊瑚枝动日杲杲。  
圣君在上知不知，赤面浊醪许多好。

卷 827\_4【题弘颢三藏院】

贯休

仪清态淡雕琼瑰，卷帘潇洒无尘埃。岳茶如乳庭花开，  
信心弟子时时来。灌顶坛严伸噩塞，三十年功苦拘束。  
梵僧梦里授微言，雪岭白牛力深得。水精一索香一炉，  
红莲花舌生醍醐。初听喉音宝楼阁，  
如闻魔王宫殿拉金瓦落。次听妙音大随求，  
更觉人间万事深悠悠。四音俱作清且柔，  
爱河浊浪却倒流。却倒流兮无处去，碧海含空日初曙。

卷 827\_5【古意代友人投所知】

贯休

青松虽有花，有花不如无。贫井泉虽清，且无金辘轳。  
客从远方来，遗我古铜镜。挂之玉堂上，如对轩辕圣。  
天龙睡坤腹，土蚀金鬣绿。因知燕赵佳人颜似玉，

不得此镜终不（缺一字）。

卷 827\_6【闻知己入翰林】

贯休

天骥头似鸟，倏忽四天下。南金色如椹，入火不见火。  
吾交二名士，遽立于帝左。凤姿既出世，天意嘱在我。  
奇哉子渊颂，无可无不可。

卷 827\_7【上裴大夫二首】

贯休

我有一端绮，花彩鸾凤群。佳人金错刀，何以裁此文。

我有白云琴，朴斫天地精。俚耳不使闻，虑同众乐听。  
指指法仙法，声声圣人声。一弹四时和，再弹中古清。  
庭前梧桐枝，飒飒南风生。还希师旷怀，见我心不轻。

卷 827\_8【上刘商州】

贯休

周邵吁嘘气，结为祲祥云。客从远方来，持此将赠君。

时命偶不谬，授馆终南东。愔愔良吏师，不寐如老农。  
丘轲文之天，代天有馀功。代天复代天，后稷何所从。

卷 827\_9【闲居拟齐梁四首】

贯休

夜雨山草滋，爽籁生古木。闲吟竹仙偈，清于嚼金玉。  
蟋蟀啼坏墙，苟免悲局促。道人优昙花，迢迢远山绿。

果熟无低枝，芳香入屏帷。故人久不来，萱草何离离。  
苦吟斋貌减，更被杉风吹。独赖湖上翁，时为烹露葵。

红藕映嘉鲂，澄池照孤坐。池痕放文彩，雨气增慵堕。  
山翁寄术药，幸得秋病可。终召十七人，云中备香火。

清气生沧洲，残云落林藪。放鹤久不归，不知更归否。  
支策到江湄，江皋木叶飞。自怜为客远，还如鹤绕枝。  
南枝复北枝，玉露沾毛衣。

卷 827\_10【塞上曲二首】

贯休

锦袷胡儿黑如漆，骑羊上冰如箭疾。蒲萄酒白雕腊红，

苜蓿根甜沙鼠出。单于右臂何须断，天子昭昭本如日。  
一握鬣髯一握丝，须知只为平戎术。

去年转斗阴山脚，生得单于却放却。今年深入于不毛，  
胡兵拔帐遗弓刀。男儿须展平生志，为国输忠合天地。

甲穿虽即失黄金，剑缺犹能生紫气。塞草萋萋兵士苦，  
胡虏如今勿胡虏。封侯十万始无心，玉关凯入君看取。

卷 827\_11 【拟齐梁体寄冯使君三首】

贯休

庭鸟多好音，相呼灌木中。竹房更何有，还如鸟巢空。  
赖逢富人侯，真东晋谢公。煌煌发令姿，珂珮鸣丁冬。  
故山有深霞，未如旌旗红。惭非卫霍松，何以当清风。

露益蝉声长，蕙兰垂紫带。清吟待明月，孤云忽为盖。  
伊余石林人，本是烧畬辈。频接谢公棋，输多未曾赛。

大道贵无心，圣贤为始慕。秋空共澄洁，美玉同贞素。  
伟哉桐江守，雌黄出金口。为文能废兴，谈道弭空有。  
雪林槁枯者，坐石听亦久。还疑紫磨身，成居灵运后。

卷 827\_12【书匡山老僧庵】

贯休

笊笠红实好鸟语，银髯瘦僧貌如祖。香烟濛濛衣上聚，  
冥心缥缈入铁圜。白麈作梦枕藤屨，东峰山媪贡瓜乳。

卷 827\_13【读顾况歌行】

贯休

雪泥露金冰滴瓦，枫桎火著僧留坐。忽睹逋翁一轴歌，  
始觉诗魔辜负我。花飞飞，雪霏霏，三珠树晓珠累累。  
妖狐爬出西子骨，雷车拶破织女机。忆昔鄱阳寺中见一碣，  
逋翁词兮逋翁札。庾翼未伏王右军，李白不知谁拟杀。  
别，别，若非仙眼应难别。不可说，不可说，  
离乱乱离应打折。

卷 827\_14【冬末病中作二首】

贯休

冬风吹草木，亦吹我病根。故人久不来，冷落如丘园。  
聃龙与摩诃，吁叹非不闻。顾惟年少时，未合多忧勤。

风钟远孤枕，雪水流冻痕。空馀微妙心，期空静者论。

胸中有一物，旅拒复攻击。向下还上来，唯疑是肺石。  
山童顽且小，用之复何益。教洗煮茶铛，雪团打邻壁。  
宛转无好姿，裴回更何适。庭前早梅树，坐见花尽碧。  
屋老多鼠窠，窗卑露山脊。近来胸中物，已似输药力。  
微吟复微吟，依稀似庄舄。

卷 827\_15【遇叶进士】

贯休

文章拟真宰，仪冠冷如璧。山寺偶相逢，眼青胜山色。  
气隆多慷慨，语澹无他力。金绳残果落，竹阁凉雨滴。  
自愧龙钟人，见此冲天翼。

卷 827\_16【寄杜使君】

贯休

清晨卷珠帘，盥漱香满室。杉松经雪后，别有精彩出。  
琅函芙蓉书，开之向阶日。好鸟常解来，孤云偶相失。  
有时作章句，气概还鲜逸。茫茫世情世，谁人爱真实。  
清高慕玄度，宴默攀道一。残磬隔风林，微阳解冰笔。  
亦知休明代，谅无经济术。门前九个峰，终拟为文乞。

卷 827\_17【寄高员外】

贯休

冷冽苍黄风似劈，雪骨冰筋满瑶席。庭松流污相抵吃，  
霜絮重裘火无力。孤峰地炉烧白枥，庞眉道者应相忆。  
倏忽维阳岁云暮，寂寥不觉成章句。惟应将寄蕊珠宫，  
禅刹云深一来否。

卷 827\_18【书陈处士屋壁二首】

贯休

有叟傲尧日，发白肌肤红。妻子亦读书，种兰清溪东。  
白云有奇色，紫桂含天风。即应迎鹤书，肯羨于洞洪。

高步前山前，高歌北山北。数载卖甘橙，山货近云足。  
新诗不将出，往往僧乞得。唯云李太白，亦是偷桃贼。  
吟狂鬼神走，酒酳天地黑。青乌生阶除，擷之束成束。

卷 827\_19【对月作】

贯休

今人看此月，古人看此月。如何古人心，难向今人说。

古人求禄以及亲，及亲如之何？忠孝为朱轮。  
今人求禄唯庇身，庇身如之何？恶木多斜文。  
斜文复斜文，颠室何纷纷。

卷 827\_20【山茶花】

贯休

风裁日染开仙圃，百花色死猩血谬。  
今朝一朵堕阶前，应有看人怨孙秀。

卷 827\_21【上孙使君】

贯休

圣主得贤臣，天地方交泰。恭惟岳精粹，多出于昭代。  
君侯握文镜，独立尘埃外。王演俗容仪，崔陵小风概。  
馨香拥兰雪，峻秀高高岱。嵇松领岁寒，庄剑无苍淬。  
威棱玉霜直，匠石金槌大。诗穿明月珠，道拍安期背。  
中兴鸾凤集，直道风云会。万卷似无书，三山如历块。  
德乎天所纵，清矣谁堪对。有法在朝端，无尘到冠盖。  
具瞻从密勿，旦夕调鼎鼐。为君整衢尊，为君戢蕃塞。  
岂知吾后意，忧此毗陵最。亲手赐彤弓，苍生是繫赖。  
下车邻寇散，是物冰壶内。龚遂爱廉平，次公太繁碎。  
袴襦砧动地，父母歌闐闐。雪锁戈鋌，非烟绕旌旆。

宁思子产冰，肯羨任棠薤。忽如春再来，不独天重戴。  
昂藏海峤鹤，冷碧仙庭桧。物物动和气，家家有新态。  
芙蓉开帘幕，锦帐无纤馥。鼓角穿冻云，恩波动耕耒。  
奸回改精魄，礼教书绅带。必于尧舜日，还似房杜辈。  
野人有章句，格力亦慷慨。若不入丘门，世间更谁爱。

卷 827\_22【哭灵一上人】

贯休

一公何不在，空有远公名。共说岑山路，今时不可行。  
旧房松更老，新塔草初生。经论传缁侣，文章遍墨卿。  
禅林枝干折，法宇栋梁倾。谁俊修僧史，应知传已成。

卷 827\_23【行路难】

贯休

君不见山高海深人不测，古往今来转青碧。  
浅近轻浮莫与交，地卑只解生荆棘。谁道黄金如粪土，  
张耳陈馥断消息。行路难，行路难，君自看。

不会当时作天地，刚有多般愚与智。到头还用真宰心，  
何如上下皆清气。大道冥冥不知处，那堪顿得羲和轡。  
义不义兮仁不仁，拟学长生更容易。负心为垆复为火，

缘木求鱼应且止。君不见烧金炼石古帝王，  
鬼火荧荧白杨里。

君不见道傍废井生古木，本是骄奢贵人屋。  
几度美人照影来，素绠银瓶濯纤玉。云飞雨散今如此，  
绣闼雕甍作荒谷。沸渭笙歌君莫夸，不应常是西家哭。  
休说遗编行者几，至竟终须合天理。败他成此亦何功，  
苏张终作多言鬼。行路难，行路难，不在羊肠里。

九有茫茫共尧日，浪死虚生亦非一。清净玄音竟不闻，  
花眼酒肠暗如漆。或偶因片言只字登第光二亲，  
又不能献可替否航要津。口谭羲轩与周孔，  
履行不及屠沽人。行路难，行路难，日暮途远空悲叹。

君不见道傍树有寄生枝，青青郁郁同荣衰。  
无情之物尚如此，为人不及还堪悲。父归坟兮未朝夕，  
已分黄金争田宅。高堂老母头似霜，心作数支泪常滴。  
我闻忽如负芒刺，不独为君空叹息。古人尺布犹可缝，  
浔阳义犬令人忆。寄言世上为人子，孝义团圆莫如此。  
若如此，不遑死兮更何俟。

## 卷 827\_24【泊秋江】

贯休

岸如洞庭山似剡，船漾清溪凉胜簟。

月白风高不得眠，  
枯苇丛边钓师魔。

卷 827\_25 【嘲商客】

贯休

苇萧萧，风撼撼，  
落日江头何处客。  
斜倚帆樯不唤人，  
五湖浪向心中白。

卷 827\_26 【寄王涤】

贯休

梅月多开户，衣裳润欲滴。  
寂寥虽无形，不是小讎敌。  
地虚草木壮，雨白桃李赤。  
永日无人来，庭花苦狼藉。  
吟高好鸟鬪，风静茶烟直。  
唯思菜子来，衣拖五般色。

卷 827\_27 【上冯使君五首】

贯休

撑船碧江上，春日何迟迟。  
汀花最深处，拾得鸳鸯儿。  
渔父无忧苦，水仙亦何别。  
眠在绿苇边，不知钓筒发。

· 全唐诗 ·

---

樵叟无忧苦，地仙亦何别。茆屋岸花中，弄孙头似雪。  
扣舷得新诗，茶煮桃花水。擘擘数片帆，去去殊未已。  
仁政无不及，乳獭将子行。谁家苦竹林，中有读书声。

卷 827\_28【拟君子有所思二首】

贯休

我爱正考甫，思贤作商颂。我爱扬子云，理乱皆如凤。  
振衣中夜起，露花香旖旎。扑碎骊龙明月珠，  
敲出凤凰五色髓。陋卷萧萧风析析，缅想斯人胜珪璧。  
寂寥千载不相逢，无限区区尽虚掷。君不见沈约道，  
佳人不在兹，春光为谁惜。

安得龙猛笔，点石为黄金。散为酷吏家，使无贪残心。  
甘棠密叶成翠幄，款凤不来天地塞。所以倾国倾城人，  
如今如今不可得。

卷 827\_29【古塞下曲四首】

贯休

古塞腥膻地，胡兵聚如蝇。寒雕中鞬石，落在黄河冰。

· 全唐诗 ·

---

苍茫逻迤城，枿枿贼气兴。铸金祷秋穹，还拟相凭陵。

战骨践成尘，飞入征人目。黄云忽变黑，战鬼作阵哭。  
阴风吼大漠，火号出不得。谁为天子前，唱此边城曲。

日向平沙出，还向平沙没。飞蓬落军营，惊雕去天末。  
帝乡青楼倚霄汉，歌吹掀天对花月。岂知塞上望乡人，  
日日双眸滴清血。

狼烟在阵云，匈奴爱轻敌。领兵不知数，牛羊复吞碛。  
严冬大河枯，嫫姚去深击。战血染黄沙，风吹映天赤。

卷 827\_30【鼓腹曲】

贯休

我昔不幸兮遭百罹，苍苍留我兮到好时。  
耳闻钟鼓兮生丰肌，白发却黑兮自不知。东邻老人好吹笛，  
仓囤峨峨谷多赤。饼红虾兮析麋腊，有酒如浊醪兮呼我吃。  
往往醉倒潢湾之水边兮人尽识，孰云六五帝兮四三皇。  
如夔如龙兮如龚黄，吾不知此之言兮是何之言兮。

卷 827\_31【经旷禅师院】

贯休

吾师楞伽山中人，气岸古淡僧麒麟。曹溪老兄一与语，

金玉声利，泥弃唾委。兀兀如顽云，骊珠兮固难价其价，  
灵芝兮何以根其根。真貌枯槁言朴略，衲衣烂黑烧岳痕。  
忆昔十四五年前苦寒节，礼师问师楞伽月。  
此时师握玉麈尾，报我却云非日月，一敲粉碎狂性歇。  
庭松无韵冷撼骨，搔窗擦檐数枝雪。迩来流浪于吴越，  
一片闲云空皎洁。再来寻师已蝉蜕，薤卜枝枯醴泉竭。  
水檀香火遗影在，甘露松枝月中折。宝师往日真隐心，  
今日不能堕双血。

卷 827\_32【边上作三首】

贯休

山无绿兮水无清，风既毒兮沙亦腥。  
胡儿走马疾飞鸟，联翩射落云中声。

阵云忽向沙中起，探得胡兵过辽水。  
堪嗟护塞征戍儿，未战已疑身是鬼。

见说青冢穴，中有白野狐。时时出沙碛，向东而号呼。  
号呼复号呼，画师图得无。

卷 827\_33【送张拾遗赴施州司户】

贯休

道之大道古太古，二字为名争莽卤。社稷安危在直言，

须历尧阶挝谏鼓。恭闻吾皇至圣深无比，推席却几听至理。  
一言偶未合尧聪，贾生须看湘江水。  
君不见顷者百官排闥赴延英，阳城不死存令名。  
又不见仲尼遥奇司马子，珮玉垂绅合如此。  
公乎公乎施之掾，江上春风喜相见。畏天之命复行行，  
芙蓉为衣胜絺绢。好音入耳应非久，三峡闻猿莫回首。  
且啜千年羹，醉巴酒。

卷 827\_34 【书倪氏屋壁三首】

贯休

茶烹绿乳花映帘，撑沙苦笋银纤纤。  
窗中山色青翠粘，主人于我情无厌。

白桑红椹莺咽咽，面揉玉尘饼挑雪。  
将为数日已一月，主人于我特地切。

水娇草媚掩山路，睡槎鸳鸯如画作。  
春光霭霭忽已暮，主人刚地不放手。

卷 827\_35 【续姚梁公坐右铭】

贯休

善为尔诸身，行为尔性命。祸福必可转，莫恚言前定。

见人之得，如己之得，则美无不克。见人之失，如己之失，是亨贞吉。反此之徒，天鬼必诛。福先祸始，好杀灭纪，不得止。守谦寡欲，善善恶恶，不得不作。无见贵热，谄走蹙蹙。无轻贱微，上下相依。古圣著书，矻矻孳孳。忠孝信行，越食逾衣。生天地间，未或非假。身危彩虹，景速奔马。胡不自强，将升玉堂。胡为自坠，言虚行伪。艳殃尔寿须戒，酒腐尔肠须畏。励志须至，扑满必破。非莫非于饰非，过莫过于文过。及物阴功，子孙必封。无恃文学，是司奇薄。患随不忍，害逐无足。一此一彼，谐宫合徵。亲仁下问，立节求己。恶木之阴匪阴，盗泉之水匪水。世孚草草，能生几几。直须如冰如玉，种桃种李。嫉人之恶，酬恩报义。忽己之慢，成人之美。毋担虚誉，无背至理。恬和慈畅，冲融终始。天人之行，尽此而已。丁宁丁宁，戴发含齿。

卷 827\_36【上卢少卿觅千文】

贯休

荆山有美玉，含华尚炳烂。堪为圣君玺，堪为圣君案。  
草木润不凋，烟霞覆不散。野人到山下，仰视星辰畔。  
倘或如栗黄，保之上霄汉。

卷 827\_37【谢卢少卿惠千文】

贯休

庐山有石镜，高倚无尘垢。昼景分烟萝，夜魄侵星斗。  
苞合物象列，搜照鱼龙吼。寄谢天地间，毫端皆我有。

## 卷八百二十八

### 卷 828\_1 【大蜀皇帝寿春节进尧铭舜颂二首·尧铭】

贯休

金册昭昭，列圣孤标。仲尼有言，巍巍帝尧。承天眷命，罔厥矜骄。四德炎炎，阶莫不凋。永孚于休，垂衣飘飘。吾皇则之，小心翼翼。秉阳亭毒，不遑暇食。土阶苔绿，茅茨雪滴。君既天赋，相亦天锡。德轡金镜，以圣继圣。汉高将将，太宗兵柄。吾皇则之，日新德盛。朽索六马，罔坠厥命。熙熙蓼萧，块润风调。舞擎干羽，囿入刍蕘。既玉其叶，亦金其枝。叶叶枝枝，百工允釐。享国如尧，不疑不疑。

### 卷 828\_2 【大蜀皇帝寿春节进尧铭舜颂二首·舜颂】

贯休

高高历山，有黍有粟。皇皇大舜，合尧玄德。五典克从，四门伊穆。大道将行，天下为公。临下有赫，选贤用能。吾皇则之，无斁无逸。绥厥品汇，光光得一。千辐临顶，十在随躅。大哉大同，为光为龙。吾皇则之，圣谋隆隆。

纳隍孜孜，考考切切。六宗是禋，五瑞斯列。排麟环凤，  
披香立雪。四夷纳颺，九围有截。昔救世师，降生竺乾。  
寿春亦然，万年万年。

卷 828\_3【大蜀高祖潜龙日献陈情偈颂】

贯休

有叟有叟，居岳之室。忽振金汤，下彼巉峯。闻蜀风景，  
地宁得一。富人侯王，旦爽摩诘。龙角日角，紫气盘屈。  
揭日月行，符汤禹出。天步孔艰，横流犯跸。穆穆蜀俗，  
整整师律。髯发垂雪，忠贞贯日。四人苏活，万里丰谧。  
无雨不膏，有露皆滴。有叟有叟，无实行实。一瓶一衲，  
既朴且质。幸蒙顾盼，词暖恩郁。轩镜光中，愿如善吉。

卷 828\_4【寄大愿和尚】

贯休

道朗居太山，达磨住熊耳。手擎清凉月，灵光溢天地。  
尽骑金师子，去世久已矣。吾师隐庐岳，外念全割削。  
掷孔圣之日月，相空王之橐籥。曾升麟德殿，谭无著，  
赐衣三铢让不著。唯思红泉白石阁，因随裴楷离京索。  
迩来便止于匡霍，瀑布千寻喷冷烟，旃檀一枝翘瘦鹤。  
岷首故人清信在，千书万书取不诺。微人昔为门下人，

扣玄佩惠无边垠。自怜亦是师子子，未逾三载能嗔呻。  
一从散席归宁后，溪寺更有谁相亲。青山古木入白浪，  
赤松道士为东邻。焚香西望情何极，不及昙洗泪空滴。  
桐江太守社中人，还送郗超米千石。宝书遽掩修章句，  
万里空函亦何益。终须一替辟蛇人，未解融神出空寂。

卷 828\_5【上顾大夫】

贯休

碧海漾仙洲，骊珠外无宝。一岳倚青冥，群山尽如草。  
君侯圣朝瑞，动只关玄造。谁云倚天剑，含霜在怀抱。  
谁云青云险，门前是平道。洪民亦何幸，里巷清如扫。  
至化无经纶，至神无祝祷。即应炳文柄，孤平去浩浩。  
即应调鼎味，比屋堪封保。野人慕正化，来自海边岛。  
经传髻里珠，诗学池中藻。闭门十馀载，庭杉共枯槁。  
今朝投至鉴，得不倾肝脑。斯文如未精，归山更探讨。

卷 828\_6【寒月送玄士入天台】

贯休

之子逍遥尘世薄，格淡于云语如鹤。相见唯谈海上山，  
碧侧青斜冷相沓。芒鞋竹杖寒冻时，玉霄忽去非有期。  
僮担赤笼密雪里，世人无人留得之。想入红霞路深邃，

孤峰纵啸仙飙起。星精聚观泣海鬼，月涌薄烟花点水。  
送君丁宁有深旨，好寻佛窟游银地。雪眉衲僧皆正气，  
伊昔贞白先生同此意。若得神圣之药，即莫忘远相寄。

卷 828\_7【上杜使君】

贯休

为鱼须处海，为木须在岳。一登君子堂，顿觉心寥廓。  
右听青女镜，左听宣尼铎。政术似蒲卢，诗情出冲漠。  
从来苦清苦，近更加澹薄。讼庭何所有，一只两只鹤。  
烟霞色拥墙，禾黍香侵郭。严霜与美雨，皆从二天落。  
苍生苦疮痍，如何尽消削。圣君新雨露，更作谁恩渥。  
即捉五色笔，密勿金銮角。即同房杜手，把乾坤橐籥。  
休说卜圭峰，开门对林壑。

卷 828\_8【送僧入马头山】

贯休

马头宝峰，秀塞寒空。有叟有叟，真隐其中。无味醍醐，  
亦非般若。白趾碧目，数百潇洒。苦竹大于杉，  
白熊卧如马。金钟撼壑，布水喷瓦。芙蓉堂开峰月入，  
岳精踏雪立屋下。伊余解攀缘，已是非常者。更有叟，  
独往来，与我语。情无刚强，气透今古。竹笠援补，

芒鞋藤乳。北风倒人，干雪不聚，满头霜雪汤雪去。  
汤雪去，无人及，空望真气江上立。

卷 828\_9【上卢使君】

贯休

夔龙在庙堂，虽然有金议。苍生得父母，自是天之意。  
鄱阳气候正，文物皆鲜媚。金镜有馀光，春风少闲地。  
鹰门倚寒碧，到者宁容易。宾从皆凤毛，爪牙悉猿臂。  
楼台千万户，锦绣龙歌沸。大惠虫鸟全，至严龙虎畏。  
可怜召伯树，婆娑不胜翠。诗搜日月华，道咽神仙味。  
嘉树白雀来，祥烟甘露坠。中川一带香，开幽邃地。  
逸少情有馀，东山境不啻。恭闻圣天子，廊庙犹虚位。  
应知黎庶心，只恐征书至。

卷 828\_10【送颢雅禅师】

贯休

霜锋擗石鸟雀聚，帆冻阴飙吹不举。芬陀利香释麟虎，  
幡幢冒雪争迎取。春光主，芙蓉堂窄堆花乳，  
手提金桴打金鼓。天花娉婷下如雨，狻猊座上师子语。  
苦却乐，乐却苦，卢至黄金忽如土。

卷 828\_11 【和杨使君游赤松山】

贯休

为郡三星无一事，龚黄意外扳乔松。日边扬历不争路，  
云外苔藓须留踪。溪月未落漏滴滴，隼旟已入山重重。

扪萝盖输山屐伴，驻旆不见朝霞浓。乳猿剧黠挂险树，  
露木翠脆生诸峰。初平谢公道非远，黯然物外心相逢。

石羊依稀龔瑶草，桃花仿佛开仙宫。终当归补吾君衮，  
好山好水那相容。

卷 828\_12 【送崔使君】

贯休

柳门柳门，芳草芊绵。日日日日，黯黯黯黯。  
子牟恋阙归阙，王粲下楼相别。食实得地，颇淹岁月。  
今朝天子在上，合雪必雪。况绛之牧，文行炳洁。  
释谓缘因，久昵清尘。王嘉迎安，远狎遗民。媿彼二子，  
厥或相似。论文不文，话道无滓。士有贵逼，势不可遏。  
麟步规矩，凤翥昂枿。岷首仁踪项频跋，商云乳麝香可撮，  
望尘 连紫闼。吾皇必用整乾坤，莫忘江头白头达。

卷 828\_13【杜侯行】

贯休

天目连天搏秀气，峥嵘作起新城地。德门钟秀光盛时，  
三虎八龙皆世瑞。顷者天厯乱下鲸翻海，烽火崩腾照行在。  
江表唯传君子营，剑冲牛斗疏真宰。金昆玉季轻三鼓，  
煮海悬鱼臣节苦。雁影参差入瑞烟，荆花灿烂开仙圃。  
我闻大中咸通真令主，相惟大杜兼小杜。  
但能致君活国济生人，亦何必须踏金梯，折桂树。  
宣宗懿宗调舜琴，大杜小杜为殷霖。出将入相兮功德深，  
生人受赐兮直至今。杜侯兄弟继之后，璞玉浑金美腾口。  
常言一呼百万何足云，终取封侯之印大如斗。  
恭闻吾皇似尧禹，搜索贤良皆面睹。杜侯杜侯，  
君傥修令德，克有终，即必还为大杜兼小杜。  
人之戴兮天笔注，国之福兮天固祚。四海无波八表臣，  
如今而后君看取。

卷 828\_14【偶作五首】

贯休

谁信心火多，多能焚大国。谁信鬓上丝，茎茎出蚕腹。  
尝闻养蚕妇，未晓上桑树。下树畏蚕饥，儿啼亦不顾。  
一春膏血尽，岂止应王赋。如何酷吏酷，尽为搜将去。

蚕蛾为蝶飞，伪叶空满枝。冤梭与恨机，一见一沾衣。

机生机，巧生巧，心镗烘烘日煎炒。闯蜀眉嚬游海岛，  
扶桑椹熟金乌饱。金乌饱，飞复飞，四天下人眼眈眈。

孰云我轻薄，石头如何唤作玉。孰云我是非，  
随邪逐恶又争得。古人终不事悠悠，一言道合死即休。  
岂不见大鹏点翼盖十洲，是何之物鸣啾啾。

君子食即食，何必在珍华。小人食不食，纵食如泥沙。  
清歌且莫唱，妙舞亦休夸。尔非凤炙麒麟肉，  
焉能一挂于齿牙。去来去来归去来，红泉正洒芙蓉霞。

君不见金陵风台月榭烟霞光，如今五里十里野火烧茫茫。  
君不见西施绿珠颜色可倾国，乐极悲来留不得。  
君不见汉王力尽得乾坤，如何秋雨洒庙门。  
铜台老树作精魅，金谷野狐多子孙。几许繁华几更改，  
唯有尧舜周召丘轲似长在。坐看楼阁成丘墟，  
莫话桑田变成海。吾有清凉雪山雪，天上人间常皎洁。  
茫茫欲火欲烧人，惆怅无因为君说。

卷 828\_15【山中作】

贯休

山为水精宫，藉花无尘埃。吟狂岳似动，笔落天琼瑰。

伊余自乐道，不论才不才。有时鬼笑两三声，  
疑是大谢小谢李白来。

卷 828\_16【闻前王使君在泽潞居】

贯休

为善无近名，窃名者得声不如心，诚哉是言也。  
使君圣朝瑞，乾符初刺婺。德变人性灵，笔变人风土。  
烟霞与虫鸟，和气将美雨。千里与万里，各各来相附。  
信哉有良吏，玄谶应百数。古人古人自古人，  
今日又见民歌六七袴。不幸大寇崩腾来，孤城势孤固难锢。  
攀辕既不及，旌旆冲风露。大驾已西幸，飘零何处去。  
婺人空悲哀，对生祠泣沾莓苔。忽闻暂寄河之北，  
兵强四面无尘埃。唯祝銮舆早归来，用此咎繇仲虺才。  
使四野雾廓，八纮镜开。皇天无亲，长与善邻，宜哉宜哉。

卷 828\_17【将入匡山别芳昼二公二首（一作将入庐山别僧）】

贯休

喷岚堆黛塞寒碧，窗前古雪如白石。  
临歧约我来不来，若来须拨红霞觅。  
  
红豆树间滴红雨，恋师不得依师住。

世情世界愁杀人，锦绣谷中归舍去。

卷 828\_18【送杨秀才】

贯休

北山峨峨香拂拂，翠涨青奔势巉峯。赤松君宅在其中，  
紫金为墙珠作室。玻璃门外仙獬睡，幢节森森绛烟密。  
水精帘卷桃花开，文锦娉婷众非一。抚长离，坎笳鼓。  
花姑吹箫，弄玉起舞。三万八千为半日，海涸鳌枯等闲睹。  
爰共安期棋，苦识彭祖祖。有时朝玉京，红云拥金虎。  
石桥亦是神仙住，白凤飞来又飞去。五云缥缈羽翼高，  
世人仰望心空劳。

卷 828\_19【别杜将军】

贯休

伊余本是胡为者，采蕈锄茶在穷野。偶披蓑笠事空王，  
馀力为文拟何谢。少年心在青云端，知音满地皆龙鸾。  
遽逢天步艰难日，深藏溪谷空长叹。偶出重围遇英哲，  
留我江楼经岁月。身隈玉帐香满衣，梦历金盆雨和雪。  
东风来兮歌式微，深云道人召来归。燕辞大厦兮将何为，  
濛濛花雨兮莺飞飞，一汀杨柳同依依。

卷 828\_20 【送梦上人归京】

贯休

伊余龙钟归海涯，千山万水情自怡。梦公别我还上国，  
江边惨执行迟迟。向我道云中觅伴未得伴，  
又示我数首新诗尽是诗。只恐不如此，若如此如此，  
即须天子知。萧萧金吹荆门口，槐菊斗黄落叶走。  
前程胜事未可涯，但恐圭峰难入手。莲峰掌记韩拾遗，  
雁行雍穆世所稀。二十年前即别离，凭师一话吟朝饥。

卷 828\_21 【问岳禅师疾】

贯休

世病如山岳，世医皆拱手。道病如金锁，师遭锁锁否。  
伊昔芙蓉颊，谈经似主涉。苏合昼氤氲，天花似飞蝶。  
觉树垂实，魔辈刺疾。病也不问，终不皱膝。春光冉冉，  
不上尔质。东风浩浩，谩入尔室。云何斯人，而有斯疾。

卷 828\_22 【上荆南府主三让德政碑】

贯休

明明赫赫中兴主，动纳诸隍冠前古。四海英雄尽戢兵，

皆如屹屹天金柱。万姓多论政与德，请树丰碑似山岳。  
一从寇灭二十年，琬琰雕镌赐重叠。荆州化风何卓异，  
寡欲无为合天地。虽立贞碑与众殊，字字皆是吾皇意。  
君侯捧碑西拜泣，臣且何人恩洊及。凤凰衔下雕龙文，  
德味政虚争敢立。函封三奏心匍匐，坚让此碑声盖国。  
我恐江淹五色笔，作不立此碑之碑文不得。

卷 828\_23 【施万病丸】

贯休

我闻昔有海上翁，须眉皎白尘土中。葫芦盛药行如风，  
病者与药皆惺惚。药王药上亲兄弟，救人急于己诸体。  
玉毫调御偏赞扬，金轮释梵咸归礼。贤守运心亦相似，  
不吝亲亲拘子子。曾闻古德有深言，由来大士皆如此。

卷 828\_24 【甘雨应祈】

贯休

春雨偶愆期，草木亦未觉。君侯不遑处，退食或闭阁。  
东海浪滔滔，西江波漠漠。得不愿身为大虬，金其角，  
玉其甲。一吸再唾，云平雾匝。华畅九有，清倾六合。  
使不苏者苏，不足者足。情通上玄，如膏绵绵。有叟有叟，  
鼓腹歌于道边。歌曰：“麦苗芄芄兮鷓鴣飞，

日出而作兮日入归，如彼草木兮雨露肥。古人三乐兮，  
我乐多之。天之成兮，地之平兮。柘系黄兮，瓠叶青兮。  
乳女啼兮，蒸黍馨兮。炙背扞虱兮，复何经营兮。

卷 828\_25【寄韩团练】

贯休

真宰动洪炉，万物皆消息。唯有三珠树，不用东风力。  
君子天庙器，头骨何嶮巖。海内久闻名，江西偶相识。  
谁不有诗机，麟龙不解织。谁不有心地，兰茝不曾植。  
多君二俱作，独立千仞壁。话道出先天，凭师动臻极。  
青霄雁行律，红露荆花滴。偶然成远别，别后长相忆。  
行至鄱阳郡，又见谢安石。留我遇残冬，身心苦恬寂。  
江上春又至，引颈山空积。何日再相逢，天香满瑶席。

卷 828\_26【春野作五首】

贯休

闲步浅青平绿，流水征车自逐。  
谁家挟弹少年，拟打红衣啄木。

山花雨打尽，满地如烂锦。远寻鹧鸪雏，拾得一团蕈。

· 全唐诗 ·

---

大牛苦耕田，乳犊望似泣。万事皆天意，绿草头戴戴。  
斜阳射破冢，髑髅半出地。不知谁氏子，独自作意气。  
牛儿小，牛女少，抛牛沙上斗百草。鉏陇老人又太老，  
薄烟漠漠覆桑枣，戴嵩醉后取次扫。

卷 828\_27【深山逢老僧二首】

贯休

衲衣线粗心似月，自把短锄锄枵枵。  
青石溪边踏叶行，数片云随两眉雪。  
山童貌顽名乞乞，放火烧畬采崖蜜。  
担头何物带山香，一箩白蕈一箩栗。

卷 828\_28【道情偈】

贯休

草木亦有性，与我将不别。我若似草木，成道无时节。  
世人不会道，向道却嗔道。伤嗟此辈人，宝山不得宝。

卷 828\_29【怀二三朝友】

贯休

伤心复伤心，流光似飞电。有惠骊龙十斛珠，  
不如一见君子面。愁人复愁人，满眼皆埃尘。  
有惠黄金一万斤，不如一见于仁人。我昔读诗书，  
如今尽抛也。只记得田叔孟温舒，帝王满口呼长者。

卷 828\_30【偶作】

贯休

君子称一善，馨香遍九垓。小人妒一善，处处生嫌猜。  
口如暴死人，铁尺拗不开。稂莠蚀田髓，积阴成冬雷。  
因知咋舌人，千古空悠哉。

卷 828\_31【义士行】

贯休

先生先生不可遇，爱平不平眉斗竖。  
黄昏雨霭空似鬣，别我不知何处去。

卷 828\_32 【观怀素草书歌】

贯休

张颠颠后颠非颠，直至怀素之颠始是颠。师不谭经不说禅，  
筋力唯于草书朽。颠狂却恐是神仙，有神助兮人莫及。  
铁石画兮墨须入，金尊竹叶数斗馀。半斜半倾山衲湿，  
醉来把笔狞如虎。粉壁素屏不问主，乱拏乱抹无规矩。  
罗刹石上坐伍子胥，蒯通八字立对汉高祖。  
势崩腾兮不可止，天机暗转锋铓里。闪电光边霹雳飞，  
古柏身中淖龙死。骇人心兮目眦瞋，顿人足兮神辟易。  
乍如沙场大战后，断枪檄箭皆狼藉。又似深山朽石上，  
古病松枝挂铁锡。月兔笔，天灶墨，斜凿黄金侧銼玉，  
珊瑚枝长大束束。天马骄狞不可勒，东却西，南又北，  
倒又起，断复续。忽如鄂公喝住单雄信，  
秦王肩上塔著枣木槊。怀素师，怀素师，  
若不是星辰降瑞，即必是河岳孕灵。固宜须冷笑逸少，  
争得不心醉伯英。天台古杉一千尺，崖崩剝折何峥嵘。  
或细微，仙衣半拆金线垂。或妍媚，桃花半红公子醉。  
我恐山为墨兮磨海水，天与笔兮书大地，乃能略展狂僧意。  
常恨与师不相识，一见此书空叹息。伊昔张渭任华叶季良，  
数子赠歌岂虚饰，所不足者浑未曾道著其神力。  
石桥被烧烧，良玉土不蚀，锥画沙兮印印泥。  
世人世人争得测，知师雄名在世间，明月清风有何极。

卷 828\_33【送卢舍人三首】

贯休

一曰：劝君不用登岷首山，读羊祜碑，男儿事业须自奇。  
此碑山头如日月，日日照人人不知。人不知，  
青山白云徒尔为。

二曰：劝君登商山，不用觅商山皓，云深雪深骡马倒。  
我愿终南太华变为金，吾后见之不为宝。我愿九州四海纸，  
幅幅与君为谏草。使躡高践夔，逢轩见皞。日环五色，  
是物得老，如此即商山皓。商山皓，君不用讨他，  
他必来相讨。

三曰：君不见释梵诸天寿亿垓，天上人间去复来。  
君又不见紫金为轮一千幅，宝洲四皆臣伏。  
轮王释梵作何因，只是弘隆重大乘福。自古皇王与贤哲，  
顶敬心师刻金玉。报通三世释迦言，莫将梁武为题目。  
君不见近代韦裴蒋与萧，文房书府师百僚。  
代天理物映千古，布发掩泥非一朝。大哉释梵轮王璞，  
已矣何人继先觉。行行珍重寄斯言，斯言不是寻常曲。

卷 828\_34【宿深村】

贯休

行行一宿深村里，鸡犬丰年闹如市。

黄昏见客合家喜，月下取鱼戽塘水。

卷 828\_35 【黄莺】

贯休

一种为春禽，花中开羽翼。如何此鸟身，便是黄金色。  
黄金色，若逢竹实终不食。

卷 828\_36 【送越将归会稽】

贯休

面如玉盘身八尺，燕语清狞战袍窄。古岳龙腥一匣霜，  
江上相逢双眼碧。冉冉春光方婉娩，黯黯别我归稽巘。  
他年必帅邯郸儿，与我杀轻班定远。

卷 828\_37 【别仙客】

贯休

巨鳌头缩翻仙翠，蟠桃烂落珊瑚地。  
浪溅霓旌湿鹏翅，略别千年太容易。

卷 828\_38【寒江上望】

贯休

荒岸烧未死，白云痴不动。极目无人行，浪打取鱼笼。

卷 828\_39【读唐史】

贯休

我爱李景伯，内宴执良规。君臣道昭彰，天颜终熙怡。  
大籓怕清风，糠粃缭乱飞。洪炉烹五金，黄金终自奇。  
大哉为忠臣，舍此何所之。

卷 828\_40【樵叟】

贯休

樵父貌饥带尘土，自言一生苦寒苦。  
担头担个赤瓷罍，斜阳独立濛笼坞。

## 卷八百二十九

### 卷 829\_1【春山行】

贯休

重叠太古色，濛濛花雨时。好峰行恐尽，流水语相随。  
黑壤生红黍，黄猿领白儿。因思石桥月，曾与故人期。

### 卷 829\_2【送谏官南迁】

贯休

危行危言者，从天落海涯。如斯为远客，始是好男儿。  
瘴杂交州雨，犀揩马援碑。不知千万里，谁复识辛毗。

### 卷 829\_3【怀香炉峰道人】

贯休

常思峰顶叟，石窟土为床。日日先见日，烟霞多异香。  
冥心同槁木，扫雪带微阳。终必相寻去，斯人不可忘。

卷 829\_4【观李翰林真二首】

贯休

日角浮紫气，凜然尘外清。虽称李太白，知是那星精。  
御宴千钟饮，蕃书一笔成。宜哉杜工部，不错道骑鲸。

谁氏子丹青，毫端曲有灵。屹如山忽堕，爽似酒初醒。  
天马难拢勒，仙房久闭扃。若非如此辈，何以傲彤庭。

卷 829\_5【晚泊湘江作（一作晚泊湘江怀古）】

贯休

烟浪漾秋色，高吟似有邻。一轮湘渚月，万古独醒人。  
岸湿穿花远，风香禱庙频。只应谀佞者，到此不伤神。

卷 829\_6【淮上逢故人】

贯休

故园离乱后，十载始逢君。长恨南熏奏，寻常只自闻。  
荒窗秋见岳，赤地夜生云。莫叹谋身晚，中兴正用文。

卷 829\_7【读《杜工部集》二首】

贯休

造化拾无遗，唯应杜甫诗。岂非玄域橐，夺得古人旗。  
日月精华薄，山川气概卑。古今吟不尽，惆怅不同时。

甫也道亦丧，孤身出蜀城。彩毫终不掇，白雪更能轻。  
命薄相如命，名齐李白名。不知耒阳令，何以葬先生。

卷 829\_8【题简禅师院】

贯休

机忘室亦空，静与沃洲同。唯有半庭竹，能生竟日风。  
思山海月上，出定印香终。继后传衣者，还须立雪中。

卷 829\_9【读刘得仁、贾岛集二首】

贯休

二公俱作者，其奈亦迂儒。且有诸峰在，何将一第吁。  
句还如菡萏，谁复赠襜褕。想得重泉下，依前与众殊。

· 全唐诗 ·

---

役思曾冲尹，多言阻国亲。桂枝何所直，陋巷不胜贫。  
马病唯汤雪，门荒劣有人。伊余吟亦苦，为尔一眉颦。

卷 829\_10【天台老僧】

贯休

独住无人处，松龕岳色侵。僧中九十腊，云外一生心。  
白发垂不剃，青眸笑转深。犹能指孤月，为我暂开襟。

卷 829\_11【经费隐君旧宅】

贯休

巉岩玉九株，秀湿掩苍梧。祥瑞久不出，羲轩消得无。  
雨和高瀑浊，烧燿大楮枯。到此思归去，迢迢隔五湖。

卷 829\_12【秋末怀旧山】

贯休

昔住匡庐北，无人知姓名。侵云收谷粟，引蚁上柑橙。  
寒雨雪兼落，枯林虎独行。谁能将白发，共向此中生。

卷 829\_13【春过鄱阳湖】

贯休

百虑片帆下，风波极目看。吴山兼鸟没，楚色入衣寒。  
过此愁人处，始知行路难。夕阳沙岛上，回首一长叹。

卷 829\_14【寄僧野和尚】

贯休

鸟外更谁亲，诸峰即四邻。白头寒枕石，青衲烂无尘。  
橡栗堆行径，猿猴绕定身。傥然重结社，愿作扫坛人。

卷 829\_15【寄冯使君】

贯休

端居碧云暮，好鸟啼红芳。满郭桃李熟，卷帘风雨香。  
清吟绣段句，默念芙蓉章。未得归山去，频升谢守堂。

卷 829\_16【寄紫阁隐者】

贯休

积翠藏一叟，常思未得游。不知在岩下，为复在峰头。  
苔上枯藤笏，泉淋破石楼。伊余更何事，不学此翁休。

卷 829\_17【寄天台道友】

贯休

大是清虚地，高吟到日晡。水声金磬乱，云片玉盘粗。  
仙有遗踪在，人还得意无。石碑文不直，壁画色多枯。  
冷立千年鹤，闲烧六一炉。松枝垂似物，山势秀难图。  
紫府程非远，清溪径不迂。馨香柏上露，皎洁水中珠。  
贤圣无他术，圆融只在吾。寄言桐柏子，珍重保之乎。

卷 829\_18【旅中怀孙路】

贯休

暮尘微雨收，蝉急楚乡秋。一片月出海，几家人上楼。  
砌香残果落，汀草宿烟浮。唯有知音者，相思歌白头。

卷 829\_19【贻世】

贯休

至理不误物，悠悠自不明。黄金烧欲尽，白发火边生。  
苦惑神仙谜，难收日月精。捕风兼系影，信矣不须争。

卷 829\_20【览李秀才卷】

贯休

香沐整山衣，开君一轴诗。吟当秋景苦，味出雪林迟。  
经济几人到，工夫两鬓知。因嗟和氏泪，不是等闲垂。

卷 829\_21【怀方干、张为】

贯休

冥搜入仙窟，半夜水堂前。吾道只如此，古人多亦然。  
萤沈荒坞雾，月苦绿梧蝉。因忆垂纶者，沧浪何处边。

卷 829\_22 【四皓图】

贯休

何人图四皓，如语话唠唠。双鬓雪相似，是谁年最高。  
溪苔连豹褥，仙酒污云袍。想得忘秦日，伊余亦合逃。

卷 829\_23 【怀白阁道侣】

贯休

寒思白阁层，石屋两三僧。斜雪扫不尽，饥猿唤得应。  
香然一字火，磬过数潭冰。终必相寻去，孤怀久不胜。

卷 829\_24 【读孟郊集】

贯休

东野子何之，诗人始见诗。清剝霜雪髓，吟动鬼神司。  
举世言多媚，无人师此师。因知吾道后，冷淡亦如斯。

卷 829\_25 【怀四明亮公】

贯休

孤峰含紫烟，师住此安禅。不下便不下，如斯太可怜。  
坐侵天井黑，吟久海霞蔫。岂觉尘埃里，干戈已十年。

卷 829\_26 【秋过钱塘江】

贯休

巨浸东隅极，山吞大野平。因知吴相恨，不尽海涛声。  
黑气腾蛟窟，秋云入战城。游人千万里，过此白髭生。

卷 829\_27 【上俞许二判官】

贯休

近抛蓑笠者，急善遇休明。未省亲宗伯，焉能识正声。  
病容经夏在，岳梦入秋并。无限林中意，今逢许郭倾。

卷 829\_28 【怀刘得仁】

贯休

诗名动帝畿，身谢亦因诗。白日只如哭，皇天得不知。  
旅坟孤蹠岳，羸仆泣如儿。多少求名者，闻之泪尽垂。

卷 829\_29 【归故林后寄二三知己】

贯休

昨别楚江边，逡巡早数年。诗虽清到后，人更瘦于前。  
岸翠连乔岳，汀沙入坏田。何时重一见，谈笑有茶烟。

卷 829\_30 【春寄西山陈陶】

贯休

搔首复搔首，孤怀草萋萋。春光已满目，君在西山西。  
堑水成文去，庭柯擎翠低。所思不可见，黄鸟花中啼。

卷 829\_31 【秋末江行】

贯休

四顾木落尽，扁舟增所思。云冲远烧出，帆转大荒迟。  
天际霜雪作，水边蒿艾衰。断猿不堪听，一听亦同悲。

卷 829\_32 【送人归新罗】

贯休

昨夜西风起，送君归故乡。积愁穷地角，见日上扶桑。  
蜃气生初雾，潮痕匝乱荒。从兹头各白，魂梦一相望。

卷 829\_33 【思匡山贾匡（一作寒夜思庐山贾生）】

贯休

山兄诗癖甚，寒夜更何为。觅句唯顽坐，严霜打不知。  
石膏粘木屐，崖蜜落冰池。近见禅僧说，生涯胜往时。

卷 829\_34 【偶作】

贯休

十载独扃扉，唯为二雅诗。道孤终不杂，头白更何疑。  
句冷杉松与，霜严鼓角知。修心对闲镜，明月印秋池。

卷 829\_35 【赠方干】

贯休

盛名与高隐，合近谢敷村。弟子已得桂，先生犹灌园。  
垂纶侵海介，拾句历云根。白日升天路，如君别有门。

卷 829\_36 【渔父】

贯休

一叶一竿竹，眉须雪欲零。陆应无祖业，香必是伊腥。  
儿亦名鱼鹧，歌称我洞庭。回头深自愧，旧业近沧溟。

卷 829\_37【题友人山居】

贯休

卜居邻坞寺，魂梦又相关。鹤本如云白，君初似我闲。  
月明僧渡水，木落火连山。从此天台约，来兹未得还。

卷 829\_38【寄宋使君】

贯休

寺倚乌龙腹，窗中见碧棱。空廊人画祖，古殿鹤窥灯。  
风吼深松雪，炉寒一鼎冰。唯应谢内史，知此道心澄。

卷 829\_39【怀武夷红石子二首】

贯休

常思红石子，独自住山椒。窗外猩猩语，炉中姹姹娇。  
乳香诸洞滴，地秀众峰朝。曾见奇人说，烟霞恨太遥。

弋者终何慕，高吟坐绿鳌。烧侵姜芋窖，僧与水云袍。  
竹鞘畚刀缺，松枝猎箭牢。何时一相见，清话擘蟠桃。

卷 829\_40【送人征蛮】

贯休

七纵七擒处，君行事可攀。亦知磨一剑，不独定诸蛮。  
树尽低铜柱，潮常沸火山。名须麟阁上，好去及瓜还。

卷 829\_41【怀周朴、张为】

贯休

二子无消息，多应各自耕。巴江思杜甫，漳水忆刘桢。  
白发应全白，生涯作么生。寄书多不达，空念重行行。

卷 829\_42【寄令狐郎中】

贯休

雨打繁暑尽，放怀步微凉。绿苔狂似人，入我白玉堂。  
塹鸟眠堪画，庭怪夜益香。唯应蕊宫子，时到虎溪傍。

卷 829\_43【鄱阳道中作】

贯休

鄱阳古岸边，无一树无蝉。路转他山大，砧驱乡思偏。  
湖平帆尽落，天淡月初圆。何事尧云下，干戈满许田。

卷 829\_44【归故林别知己】

贯休

别离无古今，柳色向人深。万里长江水，平生不印心。  
远书容北雁，赠别谢南金。愧勉青云志，余怀非陆沈。

卷 829\_45【送僧游天台】

贯休

囊空心亦空，城郭去腾腾。眼作么是眼，僧谁识此僧。  
歇隈红树久，笑看白云崩。已有天台约，深秋必共登。

卷 829\_46【咏竹根玃子】

贯休

出处惭林藪，才微幸一阳。不缘怀片善，岂得近馨香。  
节亦因人净，声从擲地彰。但令筋力在，永愿报时昌。

卷 829\_47【砚瓦】

贯休

浅薄虽顽朴，其如近笔端。低心蒙润久，入匣更身安。  
应念研磨苦，无为瓦砾看。恍然仁不弃，还可比琅玕。

卷 829\_48【水壶子】

贯休

良匠曾陶莹，多居笔砚中。一从亲几案，常恐近儿童。  
卓立澄心久，提携注意通。不应嫌器小，还有济人功。

卷 829\_49【笔】

贯休

莫讶书绅苦，功成在一毫。自从蒙管录，便觉用心劳。  
手点时难弃，身闲架亦高。何妨成五色，永愿助风骚。

卷 829\_50【棋】

贯休

棋信无声乐，偏宜境寂寥。著高图暗合，势王气弥骄。  
人事掀天尽，光阴动地销。因知韦氏论，不独为吴朝。

卷 829\_51【夜对雪作寄友生】

贯休

皓彩中宵合，开门失所踪。何年今夜意，共子在孤峰。  
气射灯花落，光侵壁罅浓。唯君心似我，吟到五更钟。

卷 829\_52【题惠琮律师院】

贯休

苦节兼青目，公卿话有馀。唯传黄叶喻，还似白泉居。  
猿拨孤云破，钟撞众木疏。社坛踪迹在，重结复何如。

卷 829\_53【寄清泠山道人】

贯休

常忆清泠子，深云种早禾。万缘虽不涉，一句子如何。  
踪迹诸峰匝，衣裳老虱多。江头无事也，终必到烟萝。

卷 829\_54【秋尽途中作】

贯休

行行芳草歇，潭岛叶纷纷。山色路无尽，砧声客强闻。  
残阳曜极野，黑水浸空坟。那得无乡思，前程入楚云。

卷 829\_55【秋居寄王相公三首】

贯休

禅林蝉落，地燥可生苔。好句慵收拾，清风作么来。  
饼唯餐喜悦，社已得宗雷。还似山中日，柴门更不开。

松声高似瀑，药熟色如花。谁道全无病，时犹不在家。  
山童春菽粉，园叟送银瓜。谁访孙弘阁，谈玄到日斜。

气与非常合，常人争得知。直须穷到底，始是出家儿。  
阁雀衔红粟，邻僧背古碑。只应王与谢，时有沃州期。

卷 829\_56【读《玄宗幸蜀记》】

贯休

宋璟姚崇死，中庸遂变移。如何游万里，只为一胡儿。  
泣溷乾坤色，飘零日月旗。火从龙阙起，泪向马嵬垂。  
始忆张丞相，全师郭子仪。百官皆剽劫，九庙尽崩隳。  
尘扑银轮暗，雷奔栈阁危。幸臣方赐死，野老不胜悲。  
及溜飘沦日，行宫寂寞时。人心虽未厌，天意亦难知。  
圣两归丹禁，承乾动四夷。因知纳谏诤，始是太平基。

## 卷八百三十

### 卷 830\_1【闻征四处士】

贯休

一诏群公起，移山四海闻。因知丈夫事，须佐圣明君。  
白酒全倾瓮，蒲轮半载云。从兹居谏署，笔砚几人焚。

### 卷 830\_2【送友人下第游边】

贯休

失意穷边去，孤城值晚春。黑山霞不赤，白日鬼随人。  
角咽胡风紧，沙昏碛月新。明时至公在，回首莫因循。

### 卷 830\_3【寄匡山纪公】

贯休

锦绣谷中人，相思入梦频。寄言无别事，琢句似终身。  
书卷须求旨，须根易得银。斯言如不惑，千里亦相亲。

卷 830\_4【闻无相道人顺世五首】

贯休

一事不经营，孤峰长老情。惟餐橡子饼，爱说道君兄。  
池藕香狸掘，山神白日行。又闻行脚也，何处化群生。

自昔寻师日，颠峰绝顶头。虽闻不相似，特地使人愁。  
庭树雪摧残，上有白獼猴。大哉法中龙，去去不可留。

常思将道者，高论地炉傍。迂谈无世味，夜深山木僵。  
下山遭离乱，多病惟深藏。一别三十年，烟水空茫茫。

石霜既顺世，吾师亦不住。杉桂有猩猩，糠粃无句句。  
土肥多孟蕨，道老如婴孺。莫比优昙花，斯人更难遇。

百千万亿偈，共他勿交涉。所以那老人，密传与迦叶。  
吾师得此法，不论劫不劫。去矣不可留，无踪若为蹶。

卷 830\_5【苦热】

贯休

松桂枝不动，阳乌飞半天。稻麻须结实，沙石欲生烟。  
毒气仍干扇，高枝不立蝉。旧山多积雪，归去是何年。

卷 830\_6【鄂渚赠祥公】

贯休

寂寥堆积者，自为是高僧。客远何人识，吟多冷病增。  
松烟青透壁，雪气细吹灯。犹赖师于我，依依非面朋。

卷 830\_7【怀武昌栖一二首】

贯休

常忆能吟一，房连古帝墟。无端多忤物，唯我独知渠。  
病愈囊空后，神清木落初。只因烽火起，书札自兹疏。

清风江上月，霜洒月中砧。得句先呈佛，无人知此心。  
寂寥从鬼出，苍翠到门深。惟有双峰寺，时时独去寻。

卷 830\_8【寒食郊外】

贯休

寒食将吾族，相随过石溪。冢花沾酒落，林鸟学人啼。  
白水穿芜疾，新霞出雾低。不堪回首望，家在赤松西。

卷 830\_9【送道士归天台】

贯休

道高留不住，道去更何云。举世皆趋世，如君始爱君。  
径侵银地滑，瀑到石城闻。它日如相忆，金桃一为分。

卷 830\_10【经孟浩然鹿门旧居二首】

贯休

孟子终焉处，游人得得过。深黄狷小，地暖白云多。  
孔圣嗟大谬，玄宗争奈何。空馀岷山色，千古共嵯峨。

花落谷莺啼，精灵安在哉。青山不可问，永日独裴回。  
冢穴应藏虎，荒碑只见苔。伊余亦惆怅，昨日郢城回。

卷 830\_25【春送禅师归闽中】

贯休

春色满三湘，送师还故乡。穿霞逢黑鹄，乞食得红姜。  
大化宗门辟，孤禅海树凉。傥为新句偈，寄我亦何妨。

卷 830\_26【途中逢周朴】

贯休

东西南北路，相遇共兴衰。世浊无知己，子从何处来。  
菊衰芳草在，程远宿烟开。傥遇中兴主，还应不用媒。

卷 830\_27【避寇山中作】

贯休

山翠碧嵯峨，攀牵去者多。浅深俱得地，好恶未知他。  
有草皆为户，无人不荷戈。相逢空怅望，更有好时么。

卷 830\_28【避寇上唐台山】

贯休

苍黄缘鸟道，峰胁见楼台。怪桂香皆滴，烟霞湿不开。  
僧高眉半白，山老石多摧。莫问尘中事，如今正可哀。

卷 830\_29【题峰桐律师院】

贯休

律中麟角者，高淡出尘埃。芳草不曾触，几生如此来。  
壑风吹磬断，杉露滴花开。如结林中社，伊余亦愿陪。

卷 830\_30【上冯使君渡水僧障子】

贯休

跣足拄巴藤，潺湲渡几曾。尽权无著印，不是等闲僧。  
熊耳应初到，牛头始去登。画来偏觉好，将寄柳吴兴。

卷 830\_31【秋夜玩月怀玉霄道士】

贯休

光异磨砻出，轮非雕斫成。今宵刚道别，举世勿人争。  
征妇砧添怨，诗人哭到明。惟宜华顶叟，笙磬有馀声。

卷 830\_32【上杭州令狐使君】

贯休

颜冉德无邻，分忧浙水滨。爱山成大癖，求瘼似诸身。  
视事奸回尽，登楼海岳春。野人如有幸，应得见陶钧。

卷 830\_33【怀诸葛珏二首】

贯休

诸葛子作者，诗曾我细看。出山因觅孟，踏雪去寻韩。  
谬独哭不错，常流饮实难。知音知便了，归去旧江干。

羸马与羸童，微吟冒北风。店孤僧共歇，日落思无穷。  
囊草无非刺，魏人那识公。莺花五陵道，去去与谁同。

卷 830\_34【怀钱唐罗隐、章鲁封】

贯休

二子依公子，鸡鸣狗盗徒。青云十上苦，白发一茎无。  
风涩潮声恶，天寒角韵孤。别离千万里，何以慰荣枯。

卷 830\_35【送沈侍郎】

贯休

从知无远近，木落去闽城。地入无诸俗，冠峨甲乙精。  
山多高兴乱，江直好风生。俭府清无事，唯应荐祢衡。

卷 830\_36【题宿禅师院】

贯休

身闲心亦然，如此已多年。语淡不著物，茶香别有泉。  
古衣和藓衲，新偈几人传。时说秋归梦，孤峰在海边。

卷 830\_37【秋晚泊石头驿有寄】

贯休

萧索漳江北，何人慰寂寥。北风人独立，南国信空遥。  
烧坞新云白，渔家众木凋。所思不可见，行雁在青霄。

卷 830\_38 【别卢使君】

贯休

杜宇声声急，行行楚水滨。道无裨政化，行处傲孤云。  
幸到鹰门下，频蒙俸粟分。诗虽曾引玉，棋数中埋军。  
山好还寻去，恩深岂易云。扇风千里泰，车雨九重闻。  
晴雾和花气，危樯鼓浪文。终期陶铸日，再见信陵君。

卷 830\_39 【秋夜吟】

贯休

如愚复爱诗，木落即眠迟。思苦香消尽，更深笔尚随。  
饥童舂赤黍，繁露洒乌椳。看却龙钟也，归山是底时。

卷 830\_40 【桐江闲居作十二首】

贯休

木落雨翛翛，桐江古岸头。拟归仙掌去，刚被谢公留。  
猛烧侵茶坞，残霞照角楼。坐来还有意，流水面前流。

香刹通真观，楼台倚郡城。阴森古树气，粗淡老僧情。

壁画连山润，仙钟扣月清。何须结西社，大道本无生。

静室焚檀印，深炉烧铁瓶。茶和阿魏暖，火种柏根馨。  
数只飞来鹤，成堆读了经。何妨似支遁，骑马入青冥。

不问麋桑子，唯师妙吉祥。等闲眠片石，不觉到斜阳。  
独自收楸叶，教童探柏瓢。王孙莫指笑，淡泊味还长。

诗琢冰成句，多将大道论。人谁知此意，日日只关门。  
乳鼠穿荒壁，溪龟上净盆。因知无事贵，言外更无言。

红黍饭溪苔，清吟茗数杯。只应唯道在，无意俟时来。  
树叠藏仙洞，山蒸足爆雷。从他嫌复笑，门更不曾开。

蝉急野萧萧，山中信屡招。树香烹菌朮，诗 琼瑶。  
诸境教人认，荒榛引烧烧。吾皇礼金骨，谁 美南朝。

露滴滴蘅茅，秋成爽气交。霜裊如蜜裹， 似盐苞。  
浮藓侵蛭穴，微阳落鹤巢。还如山里日，门更绝人敲。

埴鸟毛衣别，频来似爱吟。萧条秋病后，斑驳绿苔深。  
珠翠笼金像，风泉洒玉琴。孰知吾所适，终不是心心。

芙蓉峰里居，关闭复何如。白獐兼花鹿，多年不见渠。  
红泉香滴沥，丹桂冷扶疏。唯有西溪叟，时时到弊庐。

忆在山中日，为僧鬓欲衰。一灯常到晓，十载不离师。

水汲冰溪滑，钟撞雪阁危。从来多自省，不学拟何为。

囊非扑满器，门更绝人过。土井连冈冷，风帘进叶多。  
村童顽似铁，山菜硬如莎。唯有前山色，窗中无奈何。

卷 830\_41【寄冯使君】

贯休

山风与霜气，浩浩满松枝。永日烧杉子，无人共此时。  
为文攀讽谏，得道在毫厘。唯有桐江守，常怜志不卑。

卷 830\_42【经栖白旧院二首】

贯休

竺卿何处去，触目尽凄凉。不见中秋月，空馀一炷香。  
残花飘暮雨，枯叶盖啼螿。谁礼新坟塔，萧条渭水傍。

国宝还亡一，时多李德林。故人卿相泣，承制渥恩深。  
旧藁谁收得，空堂影似吟。裴回不能去，寒日下西岑。

卷 830\_43【赠李祐道人（一作赠道士）】

贯休

闍茸复埃尘，难亲复易亲。皆疑有仙术，问著却愁人。  
只是耽浮蚁，曾云见泣麟。相逢先合手，浑似有前因。

卷 830\_44【赠景和尚院】

贯休

藏经看几遍，眉有数条霜。万境心都泯，深冬日亦长。  
窗虚花木气，衲挂水云乡。时说秋归梦，峰头雪满床。

卷 830\_45【上宋使君】

贯休

折桂文如锦，分忧力若春。位高空倚命，诗妙古无人。  
有感禾争熟，无私吏尽贫。野人如有幸，应得见陶钧。

卷 830\_46【离乱后寄九峰和尚二首】

贯休

乱后知深隐，庵应近石楼。异香因雪歇，仙果落池浮。  
诗老全抛格，心空未到头。还应嫌笑我，世路独悠悠。

萧洒复萧洒，松根独据梧。瀑冰吟次折，远烧坐来无。  
老 寒披衲，孤云静入厨。不知知我否，已到不区区。

卷 830\_47【送黄宾于赴举】

贯休

冬暮雨霏霏，行人喜可稀。二阶 夜雪，亚圣在春闱。  
马疾顽童远，山荒冻叶飞。 师无一事，应见丽龟归。

卷 830\_48【题灵溪畅公墅】

贯休

境清僧格冷，新斩古林开。旧隐还如此，令人来又来。  
岚飞黏似雾，茶好碧于苔。但使心清净，从渠岁月催。

卷 830\_49【送高九经赴举】

贯休

回也曾言志，明君则事之。中兴今若此，须去更何疑。  
志列秋霜好，忠言剧谏奇。陆机游洛日，文举荐衡时。  
虎迹商山雪，云痕岳庙碑。夫君将潦倒，一说向深知。

卷 830\_50【东西二林寺流水】

贯休

水尔何如此，区区砢砢流。墙墙边沥沥，砌砌下啾啾。  
味不卑于乳，声常占得秋。崩腾成大瀑，落托出深沟。  
远历神仙窟，高淋竹树头。数家舂碓磴，几处浴猿猴。  
共月穿峰罅，喧僧睡石楼。派通天宇阔，溜入楚江浮。  
为润知何极，无边始自由。好归江海里，长负济川舟。

卷 830\_51【送王贞白重试东归】

贯休

心苦酬心了，东归谢所知。可怜重试者，如折两三枝。  
雨毒逢花少，山多爱马迟。此行三可羨，正值倒戈时。

卷 830\_52【早秋即事寄冯使君】

贯休

金脉火初微，开门竹杖随。此身全是病，今日更嗔谁。  
落叶峥嵘处，诸峰爽拔时。唯思棠树下，高论入圆伊。

卷 830\_53【赠景和尚院】

贯休

貌古眉如雪，看经二十霜。寻常对诗客，只劝疗心疮。  
炭火邕湖滢，山晴紫竹凉。怡然无一事，流水自汤汤。

卷 830\_54【寄西山胡汾】

贯休

待价欲要君，山前独灌园。虽然不识面，要且已消魂。  
鹿睡红霞影，泉淋白石门。伊余心更苦，何日共深论。

卷 830\_55【题师颖和尚院】

贯休

师院清无敌，师心智不知。腊高清眼细，闲甚白云卑。  
煮茗然枫枿，泥墙札祖碑。爱师终不及，谩住许多时。

卷 830\_56【游云顶山晚望】

贯休

云顶聊一望，山灵草木奇。黔南在何处，堪笑复堪悲。  
菊歇香未歇，露繁蝉不饥。明朝又西去，锦水与峨眉。

卷 830\_57【刘相公见访】

贯休

千骑拥朱轮，香尘岂是尘。如何补袞服，来看衲衣人。  
庄叟因先觉，空王有宿因。对花无俗态，爱竹见天真。  
欹枕松窗迥，题墙道意新。戒师惭匪什，都讲更胜询。  
桃熟多红糝，茶香有碧筋。高宗多不寐，终是梦中人。

卷 830\_58【寄赤松舒道士二首】

贯休

不见高人久，空令鄙吝多。遥思青嶂下，无那白云何。  
子爱寒山子，歌惟乐道歌。会应陪太守，一日到烟萝。

余亦如君也，诗魔不敢魔。一餐兼午睡，万事不如他。  
雨阵冲溪月，蛛丝罥砌莎。近知山果熟，还拟寄来么。

卷 830\_59【鄂渚逢杨赞禹】

贯休

流浪兵荒苦，相思岁月阑。理惟通至道，人或谓无端。  
烧猛湖烟赤，窗空雪月寒。知音不可见，始为一吟看。

卷 830\_60【别性空禅师】

贯休

积翠迸一瀑，红霞碧雾开。方寻此境去，莫问几时回。  
荡桨入檐石，思诗闻早雷。唯师心似我，欲近不然灰。

卷 830\_61【送胡处士】

贯休

不名兼不利，相遇海西滨。白字未干发，清时错爱云。  
头巾多酒气，竹杖有苔文。久积希颜意，林中又送君。

卷 830\_62【寄澜公二首】

贯休

小一头应白，孤高住歙城。不知安乐否，何以近无生。  
烧逼鸿行侧，风干雪朕清。途中逢此信，珍重未精诚。

荒乱抛深隐，飘零远寓居。片云无定所，得力是逢渠。  
瀑灏群公社，江崩古帝墟。终期再相见，招手复何如。

卷 830\_63【寄栖一上人】

贯休

花塹接沧洲，阴云闲楚丘。雨声虽到夜，吟味不如秋。  
古屋藏花鸽，荒园聚乱流。无机心便是，何用话归休。

卷 830\_64【送僧之湖南】

贯休

湘水万馀里，师游芳草生。登山乞食后，无伴入云行。  
宿雨和花落，春牛拥雾耕。不知今夜月，何处听猿声。

卷 830\_65【秋末寄张侍郎】

贯休

静坐黔城北，离仁半岁强。雾中红黍熟，烧后白云香。  
多病如何好，无心去始长。寂寥还得句，溪上寄三张。

卷 830\_66【古塞曲三首】

贯休

单于烽火动，都护去天涯。别赐黄金甲，亲临白玉除。  
塞垣须静谧，师旅审安危。定远条支宠，如今胜古时。

方见将军贵，分明对冕旒。圣恩如远被，狂虏不难收。  
臣节唯期死，功勋敢望侯。终辞修里第，从此出皇州。

百万精兵动，参差便渡辽。如何好白日，亦照此天骄。  
远树深疑贼，惊蓬迥似雕。凯歌何日唱，磧路共天遥。

卷 830\_67【古塞下曲七首】

贯休

下营依遁甲，分帅把河隍。地使人心恶，风吹旗焰荒。  
搜山得探卒，放火猎黄羊。唯有南飞雁，声声断客肠。

归去是何年，山连逻沙川。苍黄曾战地，空阔养雕天。  
旗插蒸沙堡，枪担卓槊泉。萧条寒日落，号令彻穷边。

虏寇日相持，如龙马不肥。突围金甲破，趁贼铁枪飞。  
汉月堂堂上，胡云惨惨微。黄河冰已合，犹未送征衣。

南北惟堪恨，东西实可嗟。常飞侵夏雪，何处有人家。  
风刮阴山薄，河推大岸斜。只应寒夜梦，时见故园花。

不是将军勇，胡兵岂易当。雨曾淋火阵，箭又中金疮。  
铁岭全无土，豺群亦有狼。因思无战日，天子是陶唐。

榆叶飘萧尽，关防烽寨重。寒来知马疾，战后觉人凶。  
烧逐飞蓬死，沙生毒雾浓。谁能奏明主，功业已堪封。

万战千征地，苍茫古塞门。阴兵为客祟，恶酒发刀痕。

风落昆仑石，河崩苜蓿根。将军更移帐，日日近西蕃。

卷 830\_68【古塞上曲七首】

贯休

幽并儿百万，百战未曾输。蕃界已深入，将军仍远图。  
月明风拔帐，碛暗鬼骑狐。但有东归日，甘从筋力枯。

中军杀白马，白日祭苍苍。号变旗幡乱，鬣干草木黄。  
朔云含冻雨，枯骨放妖光。故国今何处，参差近鬼方。

白雁兼羌笛，几年垂泪听。阴风吹杀气，永日在青冥。  
远戍秋添将，边烽夜杂星。嫫姚头半白，犹自看兵经。

久雨始无尘，边声四散闻。浸河荒寨柱，吹角白头军。  
战马龃腥草，乌鸢识阵云。征人心力尽，枯骨更遭焚。

帐幕侵奚界，凭陵未可涯。擒生行别路，寻箭向平沙。  
赤落蒲桃叶，香微甘草花。不堪登陇望，白日又西斜。

地角天涯外，人号鬼哭边。大河流败卒，寒日下苍烟。  
杀气诸蕃动，军书一箭传。将军莫惆怅，高处是燕然。  
山接胡奴水，河连勃勃城。数州今已伏，此命岂堪轻。  
碛吼旄头落，风干刁斗清。因嗟李陵苦，只得没蕃名。

卷 830\_69【古出塞曲三首】

贯休

扫尽狂胡迹，回头望故关。相逢惟死斗，岂易得生还。  
纵宴参胡乐，收兵过雪山。不封十万户，此事亦应闲。

玉帐将军意，殷勤把酒论。功高宁在我，阵没与招魂。  
塞色干戈束，军容喜气屯。男儿今始是，讖出玉关门。

回首陇山头，连天草木秋。圣君应入梦，半路遣封侯。  
水不担阴雪，柴令倒戍楼。归来麟阁上，春色满皇州。

卷 830\_70【闻赤松舒道士下世（东阳未乱前相别）】

贯休

地变贤人丧，疮痍不可观。一闻消息苦，千种破除难。  
阴鹭那虚掷，深山近始安。玄关评兔角，玉器琢鸡冠。  
傲野高难狎，融怡美不殫。冀迎新渥泽，遽逐逝波澜。  
蛻壳埋金隧，飞精驾锦鸾。倾摧千仞壁，枯歇一株兰。  
仙庙诗虽继，苔墙篆必鞞。烟霞成片黯，松桂著行干。  
影拄溪流咽，堂扃隙月寒。寂寥遗药犬，缥缈想琼竿。  
伊昔相寻远，留连几尽欢。论诗花作席，炙菌叶为盘。  
彭伉心相似，承祜趣一般。琴弹溪月侧，棋次砌云残。

倏忽成千古，飘零见百端。荆襄春浩浩，吴越浪漫漫。  
已矣红霞子，空留白石坛。无弦亦须绝，回首一长叹。

卷 830\_71【赠抱麻刘舍人】

贯休

郡政今良吏，门风古缙绅。万年唐社稷，一个哭麻人。  
愤烈身先死，敷扬气益贞。天乎资大宝，泰矣见忠臣。  
得罪钟多故，投荒岂是违。玉寒方重涩，松古更青皴。  
鹏塌宁唯白，龙多岂止荀。道孤梳有雪，恩重泪盈巾。  
喻蜀须凭草，成周必仗仁。三峰宵旰切，万里渥恩新。  
赋鵬言无累，依刘德有邻。风期仁祖帽，鼠讶史云尘。  
禅叟知何幸，玄谈有宿因。双溪逢陆海，荆渚遇平津。  
落日愁闻笛，何人为吐茵。生徒希匠化，寰海仰经纶。  
疾愈蝉声老，年丰雨滴频。刘虬师弟子，时喜一相亲。